

Liahona

Mga Pakigpulong sa Kinatibuk-ang Komperensya

Si Presidente Nelson Miawhag sa mga Santos nga Maminaw sa Ginoo

Si Presidente Nelson Mihatag sa Pamahayag sa Ikaduhang Siglo nga Kasaulogan mahitungod sa Pagpahiuli

Ang Simbahan Migamit og Simbolo nga Naghatag og Gibug-aton sa Mahinungdanong Luna sa Manluluwas diha sa Iyang Simbahan

Bag-o nga mga General Authority Seventy ug Kinatibuk-ang Kapangulohan sa Young Men Gipaluyohan

8 ka Bag-ong mga Templo Gipahibalo



ANG PAGPAHIULI SA KAHINGPITAN SA EBANGHELYO NI JESUKRISTO

USA KA PAMAHAYAG NGADTO SA KALIBUTAN SA IKADUHANG SIGLO NGA KASAULOGAN

ANG UNANG KAPANGULOHAN UG KONSEHO SA NAPULOG DUHA KA MGA APOSTOLES SA ANG SIMBAHAN NI JESUKRISTO SA MGA SANTOS SA ULAHING MGA ADLAW

Kami ligdong nga mamahayag nga ang Dios nagmahal sa Iyang mga anak sa matag nasud sa kalibutan. Ang Dios nga Amahan mihatag kanato sa balaanong pagkatawo, walay sama nga kinabuhi, ug walay kinutuban nga maula-ong sakripisyo sa Iyang Pinalanggang Anak, si Jesukristo. Pinaagi sa gahum sa Amahan, si Jesus mibangon pag-usab ug nakaangkon og kadaugan batok sa kamatayon. Siya ang atong Manluluwas, atong Ehempro, ug atong Manunubos.

Duha ka gatus ka tuig na ang milabay, sa usa ka matahum nga buntag sa tingpamulak niadtong 1820, ang batan-ong si Joseph Smith, nagtinguha nga masayud kon hain nga simbahan ang apilan, miadto sa kakahoyan aron mag-ampo duol sa iyang panimalay sa amihanang bahin sa New York, USA. Aduna siyay mga pangutana kalabut sa kaluwasan sa iyang kalag ug misalig nga ang Dios mogiya kaniya.

Uban sa kamapainubsanon, kami modeklarar nga agig tubag sa iyang pag-ampo, ang Dios nga Amahan ug ang Iyang Anak, si Jesukristo, mipakita kang Joseph ug mipasiugda sa pagpabalik sa tanang butang (itandi sa Mga Buhat 3:21) sama sa gipanagna diha sa Biblia. Dinhi niini nga panan-awon, iyang nakat-unan nga human mamatay ang orihinal nga mga Apostoles, ang Simbahan ni Kristo sa Bag-ong Tugon nawala sa kalibutan. Si Joseph ang mahimong himan sa pagbalik niini.

Kami momatuod nga ubos sa direksyon sa Amahan ug sa Anak, ang langitnon nga mga mensahero mianhi aron sa pagtudlo kang Joseph ug sa pag-establisar og usab sa Simbahan ni Jesukristo. Ang nabanhaw nga si Juan Bautista mipahiuli sa awtoridad sa pagbunyang pinaagi sa pagpaunlod alang sa kapasayloan sa mga sala. Tulo sa orihinal nga napulog duha ka mga Apostoles—si Pedro, Santiago, ug Juan—mipahiuli sa pagka-apostol ug sa mga yawe sa awtoridad sa pagkapari. Ang uban mianhi usab, lakip ni Elijah, kinsa mipahiuli sa awtoridad sa paghiusa sa mga pamilya hangtud sa kahangturan diha sa mahangturon nga mga pakigrelyasyon nga molungtud lapas sa kamatayon.

Dugang kaming mosaksi nga si Joseph Smith gihatagan sa gasa ug gahum sa Dios sa paghubad sa usa ka karaan nga rekord: ang Basahon ni Mormon—Lain nga Tugon ni Jesukristo. Ang mga pahina niining sagrado nga teksto naglakip og usa ka asoy sa personal nga pagpangalagad ni Jesukristo taliwala sa katawhan sa Kasadpang Bahin sa Kalibutan

human sa Iyang Pagkabanhaw. Nagtudlo kini sa katuyoan sa kinabuhi ug nagpasabut sa doktrina ni Kristo, nga mahinungdanon alang niana nga katuyoan. Isip kauban nga kasulatan sa Biblia, ang Basahon ni Mormon nagpamatuod nga ang tanang tawhanong nilalang mga anak nga lalaki ug mga anak nga babaye sa usa ka mahigugmaong Amahan sa Langit, nga Siya adunay balaan nga plano alang sa atong kinabuhi, ug nga ang Iyang Anak, si Jesukristo, namulong karon sa samang paagi sa karaang panahon.

Kami modeklarar nga Ang Simbahan ni Jesukristo sa mga Santos sa Ulahing mga Adlaw, nga giorganisar niadtong Abril 6, 1830, mao ang Simbahan ni Kristo sa Bag-ong Tugon nga gipahiuli. Kini nga Simbahan nakaangkla sa hingpit nga kinabuhi sa ulohang bato sa pamag-ang niini, si Jesukristo, ug diha sa Iyang walay kinutuban nga Pag-ula ug literal nga Pagkabanhaw. Si Jesukristo mitawag na usab og mga Apostoles ug mihatag kanila og awtoridad sa pagkapari. Midapit Siya kanatong tanan sa pagduol ngadto Kaniya ug sa Iyang Simbahan, sa pagdawat sa Espiritu Santo, sa mga ordinansa sa kaluwasan, ug sa pag-angkon og malungtarong kalipay.

Duha ka gatus ka tuig na ang milabay sukad nga gipasiugdahan sa Dios nga Amahan ug sa Iyang Pinalanggang Anak, si Jesukristo, kini nga Pagpahiuli. Minilyon sa tibuok kalibutan ang mihangop sa kahibalo mahitungod niining gipanagna nga mga panghitabo.

Malipayon kaming modeklarar nga ang gisaad nga Pagpahiuli padayon nga mahitabo pinaagi sa nagpadayon nga pagpadayag. Ang kalibutan dili na gayud mahimong sama kaniadto, tungod kay ang Dios “[mo]hiusa diha kang Kristo sa tanang mga butang” (Mga Taga-Efeso 1:10).

Uban sa balaang pagtahud ug pagpasalamat, kami isip Iyang mga Apostoles modapit sa tanan nga masayud—sama kanamo—nga ang kalangitan bukas. Kami momatuod nga ang Dios mipahibalo sa Iyang kabubut-on alang sa Iyang pinalanggang mga anak nga lalaki ug mga anak nga babaye. Kami mopamatuod nga kadtong mainampuong magtuon sa mensahe sa Pagpahiuli ug molihok uban sa pagtuo mapanalinginan nga makaangkon og ilang kaugalingong pagsaksi sa kabalaan niini ug sa katuyoan niini sa pag-andam sa kalibutan alang sa gisaad nga Ikaduhang Pag-anhi sa atong Ginoo ug Manluluwas, si Jesukristo.

Kini nga pamahayag gibasa ni Presidente Russell M. Nelson isip kabahin sa iyang mensahe sa ika-190 nga Tinuig nga Kinatibuk-ang Komperensya, Abril 5, 2020, sa Siyudad sa Salt Lake, Utah.

Sesyon sa Sabado sa Buntag

- 8 Pangbukas nga Mensahe
Presidente Russell M. Nelson
- 1 Kita Dili Ba Mopadayon sa Hilabihan ka Mahinungdanon nga Katuyoan?
Presidente M. Russell Ballard
- 12 Pagsiguro og Matarung nga Paghukom
Elder James R. Rasband
- 15 Usa ka Talagsaong Balaanon nga Tawag
Joy D. Jones
- 18 Mga Espirituhanong Panumduman nga Angay Hinumduman
Elder Neil L. Andersen
- 23 Sulod sa Atong Kasingkasing
Douglas D. Holmes
- 27 Mga Pag-ampo uban sa Pagtuo
Presidente Henry B. Eyring

Sesyon sa Sabado sa Hapon

- 30 Pagpaluyo sa mga General Authority, mga Area Seventy, ug Kinatibuk-ang mga Opisyales
Presidente Dallin H. Oaks
- 31 Report sa Church Auditing Department, 2019
Kevin R. Jergensen
- 32 Ang Pagtungha sa Basahon ni Mormon
Elder Ulisses Soares
- 36 Duol ngadto ni Kristo—Magpakabuhi isip mga Santos sa Ulahing mga Adlaw
Elder John A. McCune

- 38 Usa ka Buhi nga Saksi sa Buhi nga Kristo
Bishop Gérald Caussé
- 41 Hunahunaa ang Pagkamaayo ug Katalagsaon sa Dios
Elder Dale G. Renlund
- 45 Ang Gahum sa Basahon ni Mormon sa Pagkakabig
Elder Benjamin M. Z. Tai
- 48 Usa ka Maayong Patukuranan alang sa Umaabut
Elder Gary E. Stevenson

Sesyon sa Sabado sa Gabii


- 52 Hosana ug Aleluya—Ang Buhi nga si Jesukristo: Ang Pinakaimportanting Bahin sa Pagpahiuli ug Pasko sa Pagkabanhaw
Elder Gerrit W. Gong
- 56 Giunsa sa Pagpanalangin sa Pagkapari ang Kabatan-onan
Laudy Ruth Kaouk
- 58 Giunsa sa Pagpanalangin sa Pagkapari ang Kabatan-onan
Enzo Serge Petelo
- 60 Nagkahiusa sa Pagtuman sa Buhat sa Dios
Jean B. Bingham
- 66 Siya Mag-una Kanato
Presidente Henry B. Eyring
- 69 Ang Melchizedek nga Pagkapari ug ang mga Yawe
Presidente Dallin H. Oaks
- 72 Pag-abli sa Kalangitan alang sa Tabang
Presidente Russell M. Nelson

Sesyon sa Dominggo sa Buntag

- 75 Katumanan sa Panagna
Elder Ronald A. Rasband
- 78 Aron Sila Makakita
Bonnie H. Cordon
- 81 Usa ka Hingpit nga Kahayag sa Paglaum
Elder Jeffrey R. Holland
- 84 “Himoa Kini nga Balay nga Matukod ngadto sa Akong Ngalan”
Elder David A. Bednar
- 88 Paminaw Kaniya
Presidente Russell M. Nelson
- 92 Pagsinggit og Hosanna
Presidente Russell M. Nelson

Sesyon sa Dominggo sa Hapon

- 93 Ang Dako nga Laraw
Presidente Dallin H. Oaks
- 96 Ang Panalangin sa Nagpadayon nga Pagpadayag ngadto sa mga Propeta ug sa Personal nga Pagpadayag aron sa Paggiya sa Atong Kinabuhi
Elder Quentin L. Cook
- 101 Pagpangita og Kadangpan gikan sa mga Kalisud sa Kinabuhi
Elder Ricardo P. Giménez
- 104 Dali ug Pasakop
Elder Dieter F. Uchtdorf
- 107 Ang Kinanindotang mga Panimalay
Elder L. Whitney Clayton
- 110 Pagpaambit sa Mensahe sa Pagpahiuli ug sa Pagkabanhaw
Elder D. Todd Christofferson
- 114 Padayon uban sa Hugot nga Pagtuo
Presidente Russell M. Nelson
- 64 Ang mga General Authority ug Kinatibuk-ang mga Opisyales sa Ang Simbahan ni Jesukristo sa mga Santos sa Ulahing mga Adlaw
- 116 Estatistikal nga Report, 2019
- 117 Mga Balita sa Simbahan
- 127 *Dali, Sunod Kanako*—Pagkat-on gikan sa mga Mensahe sa Kinatibuk-ang Komperensya



São Paulo, Brazil

Ang ika-190 nga Tinuig nga Kinatibuk-ang Komperensya

Sesyon sa Sabado sa Buntag, Abril 4, 2020

Conducting: Presidente Dallin H. Oaks
Pangbukas nga pag-ampo: Elder Richard J. Maynes
Panapos nga pag-ampo: Michelle Craig
Ang musika gidalit sa Tabernacle Choir sa Temple Square*: “Pagmata ug Bangon,” *Mga Himno*, nu. 8; “Miabut nang Kabuntagon,” *Mga Himno*, nu. 1, arr. Wilberg; “It is Well with My Soul [Maayo Kini sa Akong Kalag],” Spafford ug Bliss, arr. Wilberg; “Duol, Kamo mga Anak sa Ginoo,” *Mga Himno*, nu. 29; “Ang Unang Pag-ampo ni Joseph Smith,” *Mga Himno ug mga Awit sa mga Bata*, nu. 14; “Come, Thou Fount of Every Blessing [Dali, Ikaw nga Tinubdan sa Matag Panalangin],” Robinson/American folk melody, arr. Wilberg.

Sesyon sa Sabado sa Hapon, April 4, 2020

Conducting: Presidente Henry B. Eyring
Pangbukas nga pag-ampo: Milton Camargo
Panapos nga pag-ampo: Elder Rubén V. Alliaud
Ang musika gidalit sa Tabernacle Choir sa Temple Square: “Ibabaw sa Bukid,” *Mga Himno*, nu. 5, arr. Wilberg; “Sa Ako nga Pagsiksik sa Balaang Kasulatan,” *Mga Himno*, nu. 175, arr. Murphy; “Paglipay, ang Ginoo Hari!” *Mga Himno*, nu. 33; “Manunubos sa Israel,” *Mga Himno*, nu. 6, arr. Wilberg.

Sesyon sa Sabado sa Gabii, Abril 4, 2020

Conducting: Presidente Dallin H. Oaks
Pangbukas nga pag-ampo: Elder Kyle S. McKay
Panapos nga pag-ampo: Cristina B. Franco
Ang musika gidalit sa Tabernacle Choir sa Temple Square: “Let Zion in Her Beauty Rise [Tuguti ang Zion nga Mousbaw sa Iyang Kaanyag],” *Hymns*, nu. 41, arr. Kasen; “Giyahi, Maloloy-on nga Kahayag,” *Mga Himno*, nu. 53, arr. Wilberg; “Ako Anak sa Dios,” *Mga Himno*, nu. 189; “Paminaw, Tanang Kanasuran!” *Mga Himno*, nu. 164, arr. Wilberg.

Sesyon sa Dominggo sa Buntag, Abril 5, 2020

Conducting: Presidente Dallin H. Oaks
Pangbukas nga pag-ampo: Elder Brook P. Hales
Panapos nga pag-ampo: Elder Peter M. Johnson
Ang musika gidalit sa Tabernacle Choir sa Temple Square: “Mahangturon nga Kamatuoran,” *Mga Himno*, nu. 4; “Unsa Kalig-on ang Tukuran,” *Mga Himno*, nu. 44, arr. Wilberg; “This is My Beloved Son [Kini Ang Akong Hinigugmang Anak],” *Children’s Songbook*, 76, arr. Cardon; “Karon Maglipay Kita,” *Mga Himno*, nu. 3; “Israel,

Israel, Dios Nagtawag,” *Mga Himno*, nu. 7, arr. Wilberg; “Hosanna Anthem [Awit sa Hosanna]/ Ang Espiritu sa Dios,” Stephens ug *Mga Himno*, nu. 2, arr. Stephens.

Sesyon sa Dominggo sa Hapon, Abril 5, 2020

Conducting: Presidente Henry B. Eyring
Pangbukas nga pag-ampo: Elder Kevin R. Duncan
Panapos nga pag-ampo: Elder Lynn G. Robbins
Ang musika gidalit sa Tabernacle Choir sa Temple Square: “Pagdayeg sa Tawo,” *Mga Himno*, nu. 19, arr. Wilberg; “Duol na ang Kaadlawon,” *Mga Himno*, nu. 28, arr. Murphy; “Buhì ang Manunubos Ko, Niini Nasayud Ako,” *Mga Himno*, nu. 80; “Salamat, O Dios, sa Propeta,” *Mga Himno*, nu. 13, arr. Wilberg.

* Ang musika alang sa matag sesyon, ubos sa direksyon sa lain-laing conductor ug mipakita og lain-laing organist, narekord na kaniadto; ang panapos nga himno girekord sa Tabernacle Choir ug sa unom pa ka mga choir gikan sa Accra, Ghana; Mexico City, Mexico; Seoul, South Korea; São Paulo, Brazil; Frankfurt, Germany ug Auckland, New Zealand.

Anaa nga mga Pakigpulong sa Komperensya

Aron ma-access ang mga pakigpulong sa kinatibuk-ang komperensya diha sa internet sa daghang pinulongan, bisitaha ang conference.

ChurchofJesusChrist.org ug pagpili og pinulongan. Ang mga pakigpulong anaa usab sa Gospel Library mobile app. Kasagaran sulod sa unom ka semana human sa kinatibuk-ang komperensya, ang Iningles nga video ug audio nga mga recording maanaa na sa mga distribution center. Ang impormasyon sa kinatibuk-ang komperensya sa ma-access nga mga format para sa mga miyembro nga may kakulangan anaa sa disability.ChurchofJesusChrist.org.

Anaa sa Hapin

Atubangan: Painting sa Unang Panan-awon ni Dan Burr
Luyo: Litrato pinaagi ni Mason Coberly

Litrato sa Komperensya

Ang mga litrato diha sa Siyudad sa Salt Lake kinuha ni Cody Bell, Janae Bingham, Mason Coberly, Weston Colton, Brian Nicholson, ug Leslie Nilsson. Dugang nga mga litrato pinaagi ni Alexandre Borges, Mark Brunson, Nicolas Serey Bustamante, Annette Campbell, Karisa Creer, Cathie Frost, Alejandro Gutierrez, Natalia Hepworth, Korene Knight, Ashlee Larsen, Bruno Lima, Ashley Mailili, Melanie Miza, Kendrick Navarro, Arthe Odjidja, Veronica Olson, Elaine Palmer, Melanie Porter, Jonas Rebicki, Mark Romesser, Elizabeth Thompson, Chung Ho Tsai, Emily Utykanski, Marco Vargas, Christopher Walker, Dave Ward, Jonathan Wing, Justin Wright.



West Jordan, Utah, USA

MAYO 2020 VOL. 23 NU. 5
LIAHONA 16720 853

Internasyonal nga magasin sa Simbahan ni Jesukristo sa mga Santos sa Ulahing mga Adlaw

Ang Unang Kapangulohan: Russell M. Nelson, Dallin H. Oaks, Henry B. Eyring

Ang Korum sa Napulog Duha ka mga Apostoles: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, Ulisses Soares

Editor: Randy D. Funk

Mga Adviser: Becky Craven, Sharon Eubank, Cristina B. Franco, Walter F. González, Larry S. Kacher, Jan E. Newman, Adrián Ochoa, Michael T. Ringwood, Vern P. Stanfill

Tigdumalang Direktor: Richard I. Heaton

Direktor sa mga Magasin sa Simbahan: Allan R. Loyborg

Business Manager: Garff Cannon

Tigdumalang Editor: Adam C. Olson

Luyo-luyo sa Tigdumalang Editor: Ryan Carr

Tig-abag sa Pagmantala: Camila Castillón

Pagsulat ug Pag-edit: David Dickson, David A. Edwards, Matthew D. Flittton, Garrett H. Garff, Jon Ryan Jensen, Aaron Johnston, Charlotte Larcaball, Michael R. Morris, Eric B. Murdock, Joshua J. Perkey, Jan Pinborough, Richard M. Romney, Mindy Selu, Lori Fuller Sosa, Chakell Wardleigh, Marissa Widdison

Direktor sa Art: Tadd R. Peterson

Desinyo: Jeanette Andrews, Fay P. Andrus, Mandie Bentley, C. Kimball Bott, Thomas Child, Joshua Dennis, David Green, Colleen Hinkley, Eric P. Johnson, Susan Lofgren, Scott M. Mooy, Aleni Regehr, Mark W. Robison, K. Nicole Walkenhorst

Coordinador sa Intellectual Property: Collette Nebeker Aune

Tigdumala sa Produksyon: Ammon Harris, Jane Ann Peters

Produksyon: Ira Glen Adair, Julie Burdett, José Chavez, Bryan W. Gygi, Ginny J. Nilson, Mairissa M. Smith

Prepress: Joshua Dennis, Ammon Harris

Direktor sa Pag-imprinta: Steven T. Lewis

Direktor sa Pagpang-apud-apod: Nelson Gonzalez

Paghubad: Shahlom Alinsug

Mailing address: Liahona, Fl. 23, 50 E. North Temple St., Salt Lake City, UT 84150-0023, USA.

Ipadala ang subskripsyon, mga pangutana, ug mga taho ngadto sa Dateline Philippines sa *Liahona*, The Church of Jesus Christ of Latter-day Saints, Temple Drive, Greenmeadows Subdivision, Quezon City 1110, Metro Manila, Philippines o sa P. O. Box 1505, Ortigas Center, Emerald Avenue, Pasig 1600, Metro Manila, Philippines. Numero sa telepono 635-9183. Presyo sa subskripsyon sa Pilipinas, P48 matag tuig, P4.00 matag gula, gawas sa mga espesyal nga isyu.

Sa pag-subscribe ug pag-renew sa magasin, bisitahi ang <http://store.ChurchofJesusChrist.org>. Paliug ayaw kalimti sa pagbutang sa imong ward/b ranch isip address asa ipadala ang imong subskripsyon.

Kon dunay mga pangutana mahitungod sa subskripsyon paliug tawag sa Church's Global Service Center (GSC) sa 1800-8-680-3950 alang sa mga subscriber sa PLDT ug Smart o 1800-1-441-0687 alang sa mga subscriber sa Globe.

Isumiter ang mga manuskrito ug mga pangutana online sa Liahona.ChurchofJesusChrist.org; kon ipadala ngadto sa *Liahona*, Fl. 23, 50 East North Temple Street, Salt Lake City, UT 84150-0023, USA; o i-e-mail sa: Liahona@ChurchofJesusChrist.org

Ang *Liahona* (usa ka termino sa Basahon ni Mormon nga nagpasabut nga "kompas" o "direktor") gimantala sa Albanian, Armenian, Bislama, Bulgarian, Cambodian, Cebuano, Chinese, Chinese (simplified), Croatian, Czech, Danish, Dutch, English, Estonian, Fijian, Finnish, French, German, Greek, Hungarian, Icelandic, Indonesian, Italian, Japanese, Kiribati, Korean, Latvian, Lithuanian, Malagasy, Marshallese, Mongolian, Norwegian, Polish, Portuguese, Romanian, Russian, Samoan, Slovenian, Spanish, Swahili, Swedish, Tagalog, Tahitian, Thai, Tongan, Ukrainian, Urdu, and Vietnamese. (Ang kasagad magkalahi depende sa pinulongan.)

© 2020 pinaagi sa Intellectual Reserve, Inc. Tanang mga katungod gigahin. Gigamit sa Ang Simbahan ni Jesukristo sa mga Santos sa Ulahing mga Adlaw nga may pagtugot. Giimprinta sa Estados Unidos sa Amerika ug sa Pilipinas.

Copyright nga impormasyon: Gawas kon sa laing paagi gipasabut, ang mga indibidwal mahimong mokopya sa materyal gikan sa *Liahona* alang sa ilang personal, dili pangkomersyo nga paggamit (lakip sa mga calling sa Simbahan). Kini nga katungod mahimong kuaon pag-usab sa bisan unsang panahon. Ang biswal nga material dili mahimong kopyahan kon kini adunay mga pagdili diha sa linya sa kredito sa maong artwork. Ang copyright nga mga pangutana kinahanglan ipadala ngadto sa Intellectual Property Office, 50 E. North Temple St., Fl. 13, Salt Lake City, UT 84150, USA; email: cor-intellectualproperty@ChurchofJesusChrist.org.

For Readers in the United States and Canada:

May 2020 Vol. 23 No. 5. LIAHONA (USPS 311-480) Cebuano (ISSN 1096-5114) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 507.1.5.2). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



Sandy, Utah, USA

Indeks sa Mamumulong

Andersen, Neil L., 18
Ballard, M. Russell, 8
Bednar, David A., 84
Bingham, Jean B., 60
Caussé, Gérald, 38
Christofferson, D. Todd, 110
Clayton, L. Whitney, 107
Cook, Quentin L., 96
Cordon, Bonnie H., 78
Eyring, Henry B., 27, 66
Giménez, Ricardo P., 101
Gong, Gerrit W., 52
Holland, Jeffrey R., 81
Holmes, Douglas D., 23
Jergensen, Kevin R., 31
Jones, Joy D., 15
Kaouk, Laudy Ruth, 56
McCune, John A., 36
Nelson, Russell M., 6, 72, 88, 92, 114
Oaks, Dallin H., 30, 69, 93
Petelo, Enzo Serge, 58
Rasband, James R., 12
Rasband, Ronald A., 75
Renlund, Dale G., 41
Soares, Ulisses, 32
Stevenson, Gary E., 48
Tai, Benjamin M. Z., 45
Uchtdorf, Dieter F., 104

Indeks sa Hilisgutan

Adan ug Eva, 60
Basahon ni Mormon, 12, 32, 38, 45, 110
Buhat sa templo, 52, 66, 81, 84, 114
Ehemplo, 78, 110
Espiritu Santo, 88, 96
Gahum, 27
Gugma, 18, 23, 36, 81, 110
Hingpit nga kalipay, 101
Hugot nga Pagtuo, 27, 48, 72, 101, 114
Jesukristo, 6, 12, 36, 38, 41, 45, 48, 52, 66, 72, 78, 81, 84, 88, 93, 101, 104, 110, 114
Joseph Smith, 6, 8, 15, 18, 27, 32, 58, 60, 66, 75, 84, 88, 96, 101, 104, 110
Kaangayan, 12
Kababayen-an, 15, 60
Kabubut-on, 23, 69
Kahadlok, 6
Kahayag ni Kristo, 78
Kahibalo, 18
Kalalakin-an, 60
Kalinaw, 6, 12, 36
Kalisdanan, 6, 8, 32, 36, 38, 56, 93, 88, 101, 107
Kalooy, 12
Kamanggihatagon, 41
Kamatuoran, 69
Kaminyoon, 69
Kasaysayan sa pamilya [Family history], 84, 88
Katakus, 58
Kauswagan, 107
Langitnong Amahan, 18, 41, 81, 88
Melchizedek nga Pagkapari, 69
Mga calling sa Simbahan, 96
Mga lider sa Simbahan, 30
Mga Panalangin, 58
Mga Propeta, 1, 75, 88, 96
Mga relasyon, 23
Mga templo, 48, 56, 75, 88, 92, 114
Misyonaryo nga buhat, 27, 66, 75, 104, 110

Ordinansa, mga, 69, 84
Paghinulsol, 23, 45, 104
Paghukom, 12, 69
Pagkaayo, 12
Pagkabanhaw, 52, 93, 110
Pagkadisipulo, 104, 107
Pagka-espirituhanon, 48, 107
Pagkakabig, 45
Pagkamartir, 8
Pagkapari, 15, 58, 60, 66, 84
Pagkat-on, 104
Paglahutay hangtud sa katapusan, 88
Pagalang, 69
Paglaum, 81
Pagpadayag, 15, 23, 88, 96
Pagpahiuli, 8, 15, 27, 52, 60, 66, 75, 81, 88, 93, 110, 114
Pagpalabay, 52
Pagpamatuod, 18, 32, 48
Pagpangandam, 6
Pagpanggukod, 8
Pagpangulo, 23
Pagpuasa, 72
Pagpundok sa Israel, 66, 78
Pagtuan sa kasulatan, 107
Pag-u-la, 12, 38, 41, 52, 56, 93, 101
Pakigsaad, mga, 84
Pamilya, 69
Panaghiusa, 23, 60
Panalangin sa Pagkapari, mga, 56
Pangalan sa Simbahan, 72
Panimalay, 107
Pasalamat, 41
Pasaylo o Kapasayloan, 27, 72
Pasko sa Pagkabanhaw, 52
Patriyarkal nga mga panalangin, 56
Personal nga kauswagan, 15, 45, 69
Personal nga Pagpadayag, 18, 88, 96
Propesiya, 75
Relief Society, 60
Sakripisyo, 23, 110
Unang Panan-awon, 6, 8, 15, 18, 27, 92, 69
Yawe, mga, 69

Mga Importanting Panghitabo sa ika-190 nga Tinuig nga Kinatibuk-ang Komperensya



Si Presidente Russell M. Nelson adunay klaro nga mensahe sa kinatibuk-ang komperensya: “Paminaw Kaniya.”

“Kita kinahanglang magtinguha, sa matag paagi kutob sa atong mahimo, sa pagpaminaw kang Jesukristo, kinsa namulong kanato pinaagi sa gahum ug pagpangalagad sa Espiritu Santo,” mitudlo si Presidente Nelson.

“Ang katuyoan niini ug sa matag kinatibuk-ang komperensya mao ang pagtabang kanato nga maminaw Kaniya” (pahina 7).

Sa usa ka komperensya nga nakatutok sa Unang Panan-awon ug sa Pagpahiuli, kita gitudloan nga makapaminaw kita Kaniya, sama ni Joseph Smith didto sa Sagrado nga Kakahoyan. Gilibutan sa mga epekto sa tibuok kalibutan nga pandemic nga nakaapekto og minilyon, gitudloan kita sa pagpaminaw Kaniya alang sa giya diha sa atong kalisdanan. Nagtan-aw ngadto sa usa ka hayag nga kaugmaon alang sa Simbahan ug sa matag usa kanato sa tinagsa-tagsa,

gitudloan kita sa pagbag-o sa atong mga paningkamot sa pagpaminaw Kaniya ug sa pagsunod Kaniya.

“Ang daghang makapadasig nga mga butang niining Abril 2020 nga kinatibuk-ang komperensya,” miingon si Presidente Nelson, “. . . ma-summarize sa duha ka balaanong gilitok nga mga pulong: ‘Paminaw Kaniya.’ Kami nag-ampo nga ang inyong pagpokus sa Langitnong Aman, kinsa militok niadto nga mga pulong, ug sa Iyang Hinigugmang

Anak, si Jesukristo, mao ang labing importante sa inyong mga panumdu-man sa tanang nahitabo.”

Samtang magtuon ka sa mga mensahe niining komperensya ug magtinguha “nga maminaw, mamati, ug mopatalinghug sa mga pulong sa Manluluwas,” imong makaplagan ang saad sa propeta nga natuman diha sa imong kinabuhi nga “nagkaminos nga kahadlok ug nagkadako nga pagtuo” (pahina 114).

- Si Presidente Nelson mipaila sa usa ka bag-ong simbolo alang sa Simbahan diha sa pahina 73.
- Si Presidente Nelson mipaila og pamahayag mahitungod sa Pagpahiuli diha sa pahina 91.
- Si Presidente Nelson nangulo sa tibuok kalibutan nga maligdong nga katiguman diha sa pahina 92.
- Si Presidente Nelson mipahibalo og walo ka bag-ong templo diha sa pahina 115.
- Pagkat-on pa og dugang mahitungod sa paagi nga makatabang kita sa uban #HearHim sa HearHim. [ChurchofJesusChrist.org](https://www.ChurchofJesusChrist.org). ■

MGA IMAHE DINHI NIINI NGA ISYU

Among gipaningkamotan sa pagdokumento ang matag kinatibuk-ang komperensya pinaagi sa mga hulagway nga among gimantala. Samtang lahi ang matag komperensya, ang mga imahe niini nga isyu nagpakita sa pipila sa talagsaon nga mga kahimtang nga gipresentar niini nga komperensya.

Agi og dugang sa mga imahe gikan sa sibya, makakita ka og mga litrato gikan sa matahum nga Temple Square (bisan og dili kasarangan nga haw-ang tungod sa COVID-19 ug sa konstruksyon), ingon man usab sa mga painting kabahin sa Pagpahiuli sa ebanghelyo ug sa gisumiter sa mga miyembro nga mga litrato sa ilang kaugalingon nga miapil sa komperensya sa tibuok kalibutan.



NAGTAWAG KAWAKO SA AKONG NGALAN, NI WALTER RANE



Ni Presidente Russell M. Nelson
*Presidente sa Ang Simbahan ni Jesukristo
sa mga Santos sa Ulahing mga Adlaw*

Pangbukas nga Mensahe

Kita kinahanglang magtinguha, sa matag paagi kutob sa atong mahimo, sa pagpaminaw kang Jesukristo, kinsa namulong kanato pinaagi sa gahum ug pagpangalagad sa Espiritu Santo.

Akong minahal nga mga kaigsoonan, samtang amo kamong gi-welcome niining makasaysayanong Abril 2020 nga kinatibuk-ang komperensya sa Ang Simbahan ni Jesukristo sa mga Santos sa Ulahing mga Adlaw, alang sa mga rason nga inyo nang nahibaluan, nagbarug ko atubangan sa walay sulod nga awditoryum!

Wala nako damha, sa dihang misaad ko kaninyo atol sa Oktubre 2019 nga kinatibuk-ang komperensya nga kining Abril nga komperensya mahimong “halandumon” ug “dili makalimtan,” nga ang pagpamulong sa usa

ka makita nga kongregasyon nga mas minus pa sa 10 ka tawo makapahimo niining komperensya nga halandumon ug dili gayud makalimtan *alang kanako!* Apan ang pagkasayud nga kamo miapil pinaagi sa elektronik nga transmision, ug ang matahum nga pasundayag sa choir sa “It Is Well with My Soul,” nagdala og dakong kahupayan sa *akong* kalag.

Sama sa inyong nahibaloan, ang nanambong niining kinatibuk-ang komperensya higpit nga gilimitahan isip kabahin sa atong mga tinguha nga mahimong maayong tibuok

kalibutan nga mga lumulupyo ug buhaton ang tanan kutob sa atong mahimo sa pagpugong sa pagkaylap sa COVID-19. Kini nga virus adunay dakong epekto sa tibuok kalibutan. Kini usab nakapausab sa atong mga miting sa Simbahan, misyonaryo nga pagserbisyo, ug sa buhat sa templo sa mubo nga panahon.

Bisan kon ang mga restriksyon karon adunay kalabutan sa makamatay nga virus, ang personal nga mga pagsulay sa kinabuhi moabut lapas pa niining pandemic. Ang umaabut nga mga pagsulay mahimong moresulta tungod sa aksidente, natural nga katalagman, o sa wala damha nga personal nga kagulan.

Unsaon man nato paglahutay sa maong mga pagsulay? Ang Ginoo misulti kanato nga “Kon kamo andam dili kamo mahadlok.”¹ Siyempre, makapundo kita og kaugalingon natong mga reserba sa pagkaon, tubig, ug tinigum nga kwarta. Apan sama ka mahinungdanon mao ang atong panginahanglan nga pun-on ang atong personal nga *espirituhanong* mga tipiganan og hugot nga pagtuo, kamatuoran, ug pagpamatuod.

Ang atong kinatas-ang paninguha sa kinabuhi mao ang pag-andam nga mohimamat sa atong Tiglalang. Ato kining buhaton pinaagi sa pagpaningkamot kada adlaw nga mas mahisama sa atong Manluluwas, si Jesukristo.² Ug buhaton nato *kana* samtang maghinulsol kita kada adlaw ug modawat sa Iyang makalimpyo, makaayo, ug makapalig-on nga gahum. Dayon mobati kita og malungtarong kalinaw ug hingpit nga kalipay, bisan atol sa gubot nga mga panahon. Kini mao gayud kon nganong ang Ginoo mihangyo kanato sa pagbarug sa balaang mga dapit ug “ayaw pagbalhin.”³

Karong tuiga, atong gihandum ang ika-200 nga anibersaryo sa usa sa labing mahinungdanong mga panghitabo sa kasaysayan sa kalibutan—nga mao, ang pagpakita sa Dios nga Amahan ug sa Iyang Hinigugmang Anak, si Jesukristo, ngadto ni Joseph Smith. Atol nianang talagsaong pananawon, ang Dios nga Amahan mitudlo ngadto ni Jesukristo ug miingon: “Kini



mao ang Akong Hinigugmang Anak. Paminaw Kaniya!”⁴

Kana nga tambag nga gihatag kang Joseph kay alang sa matag usa kanato. Kita kinahanglang magtinguha, sa matag paagi kutob sa atong mahimo, sa pagpaminaw kang Jesukristo, kinsa namulong kanato pinaagi sa gahum ug pagpangalagad sa Espiritu Santo.

Ang katuyoan niini ug sa matag kinatibuk-ang komperensya mao ang pagtabang kanato nga maminaw Kaniya. Kami nag-ampo, ug nagdapit kaninyo nga mag-ampo, nga ang Espiritu sa Ginoo magauban kanato sa ingon kaabunda nga inyong madungog ang mga mensahe nga gitagana gayud sa Manluluwas alang kaninyo—mga mensahe nga magdala og kalinaw sa inyong kalag. Mga mensahe nga moayo sa inyong nasakitan nga kasingkasing. Mga mensahe nga molamdag sa inyong hunahuna. Mga mensahe nga motabang kaninyo nga masayud kon unsay buhaton samtang magpadayon kamo sa inyong kinabuhi sa mga panahon sa kagubot ug pagsulay.

Kami nag-ampo nga kining komperensya mahimong halandumon ug dili makalimtan tungod sa mga mensahe nga inyong madungog, sa talagsaong mga pahibalo nga pagahimoon, ug sa mga kasinatian diin kamo dapiton nga moapil.

Pananglitan, atol sa pagtapos sa sesyon sa Dominggo sa buntag, atong himoon ang usa ka tibuok kalibutan nga maligdong nga katiguman kon kanus-a mangulo ko kaninyo sa sagradong Singgit nga Hosanna. Kami nag-ampo nga mahimo kining usa ka espirituhanong panahon alang kaninyo samtang mopahayag kita sa tibuok kalibutan sa atong tulukibong pagpasalamat sa Dios nga Amahan ug sa Iyang Hinigugmang Anak pinaagi sa pagdayeg Kanila niining talagsaong paagi.

Alang niining sagradong kasinatian, mogamit kita og limpyo nga puting mga panyo. Apan kon wala kamo niini, mahimo lang ninyong iwara-wara ang inyong kamot. Atol sa pagtapos sa Singgit nga Hosanna, ang kongregasyon moapil sa choir sa

pagkanta sa “The Spirit of God [Ang Espiritu sa Dios].”⁵


Akong minahal nga mga kaigsoonan, kini nga komperensya mahimong mahimayaon. Kini nga tuig mahimong dili kasarangan samtang nakatutok kita og maayo sa Manluluwas ug sa Iyang gipahiuli nga ebanghelyo. Ang labing importante nga malungtarong mga epekto niining makasaysayanong komperensya mao nga ang atong kasingkasing mausab ug magsugod kita og tibuok kinabuhi nga paninguha nga maminaw Kaniya.

Welcome sa Abril 2020 nga kinatibuk-ang komperensya! Ako nasayud nga ang Dios, atong Langitnong Amahan, ug ang Iyang Anak, si

Jesukristo, nagpakabana kanato. Magauban Sila kanato sa tibuok nga mga kahimoan [proceedings] niining duha ka mahimayaong adlaw samtang nagtinguha kita nga mas mahiduol Kanila ug mopasidungog Kanila. Sa sagradong ngalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 38:30.
2. Tan-awa sa 3 Nephi 27:27.
3. Doktrina ug mga Pakigsaad 87:8.
4. Joseph Smith—Kasaysayan 1:17.
5. *Mga Himno*, nu. 2.



CHRIST'S IMAGE (MGAHE N KRISTO), NI HEINRICH HOFMANN



Curitiba, Paraná, Brazil



Ni Presidente M. Russell Ballard
Aking nga Presidente sa Korum sa Napulog Duha
ka mga Apostoles

Kita Dili Ba Mopadayon sa Hilabihan ka Mahinungdanon nga Katuyoan?

Kanunay gayud natong hinumduman ang bili nga gibayran ni Joseph ug Hyrum Smith, dungan sa ubang daghang matinud-anong mga lalaki, mga babaye, ug mga kabataan, sa pag-establisar sa Simbahan.

Salamat kaayo, President, sa talagsaong pangbukas. Mga kaigsoonan, 215 ka tuig nang milabay, usa ka batang lalaki natawo ngadto nila ni Joseph ug Lucy

Mack Smith sa Vermont sa rehiyon nga nailhan nga New England sa amiha-nang silangan sa Estados Unidos. Si Joseph ug Lucy Mack nagtuo



Buenos Aires, Argentina

kang Jesukristo, nagtuon sa balaang mga kasulatan, sinserong nag-ampo, ug hugot ang pagtuo sa Dios.

Ilang ginganlan ang ilang bag-ong gipanganak nga bata og Joseph Smith Jr.

Sa pamilyang Smith, si Brigham Young miingon: “Ang panan-aw sa Dios anaa nganha kaniya, ug nganha sa iyang amahan, ug nganha sa amahan sa iyang amahan, ug ngadto sa ilang mga kagikan tin-aw kaayo balik kang Abraham, ug gikan ni Abraham ngadto sa baha, gikan sa baha ngadto ni Enoch, ug gikan ni Enoch ngadto ni Adan. Iyang gibantayan kana nga pamilya ug kana nga dugo ingon nga kini nagatuyok gikan sa iyang tinubdan hangtud sa pagkahimugso nianang tawhana. Si [Joseph Smith] gi-orden nang daan diha sa kahangturan.”¹

Gihigugma sa iyang pamilya, si Joseph Jr. suod ilabi na ngadto sa iyang magulang nga igsoon nga lalaki nga si Hyrum, kinsa hapit sais anyos ang pangidaron sa dihang natawo si Joseph.

Sa miaging Oktubre, naglingkod ko sa may halinganan nga naa sa gamayng panimalay sa Smith sa Sharon, Vermont, diin si Joseph natawo. Akong gibati ang gugma ni Hyrum kang Joseph ug naghunahuna kaniya nga naggunit sa iyang manghud nga masuso sa iyang mga bukton ug nagtudlo kaniya unsaon paglakaw.

Ang Amahan ug Inahan nga Smith nakasinati og personal nga kalisud, nakapapugos nila sa pagbalhin sa ilang pamilya sa makadagdan sa wala pa mihawa sa New England ug ma-isugong midesidir sa pagbalhin ngadto pa sa kasadpan, hangtud sa Estado sa New York.

Tungod kay ang pamilya nagkahiusa, sila nakalahutay niini nga mga hagit ug dungan nga misagubang sa makapasagmuyo nga pagsugod og usab didto sa usa ka gatus ka ektarya (0.4 km²) nga kakahoyan sa Manchester, duol sa Palmyra, New York.

Ako wala makasiguro nga kadaghanan kanato nakahunahuna sa pisikal ug emosyonal nga mga hagit sa pagsugod nga nasinati sa pamilyang Smith—paghawan sa yuta, pananom, pagtukod og panimalay ug ubang

estraktura, pagsuhol og trabahante, ug paghimo og mga gamit sa balay aron ibaligya sa lungsod.

Sa dihang ang pamilya miabut sa kasadpang New York, ang lugar napuno sa mga relihiyosong kalihokan—nailhan nga ang Ikaduhang Dakong Pagkaamgo.

Atol niining panahona sa pakiglantugi ug panag-away tali sa relihiyosong mga grupo, si Joseph nakasinati og talagsaong panan-awon, nailhan karon nga ang Unang Panan-awon. Napanalanginan kita nga adunay upat ka mga nag-unang mga asoy nga akong hisgutan.²

Si Joseph misulat: “Niini nga panahon sa dako nga [relihiyosong] kasamok ang akong hunahuna gitawag ngadto sa mahinungdanon nga pamalandong ug dako nga kabalisa; apan bisan ang akong mga pagbati lawom ug sa kasagaran makatandog, sa gihapon ako nagpahilayo sa akong kaugalingon gikan niini nga mga pundok, bisan pa og ako mitambong sa ilang daghan nga mga tigum sa kasagaran kon ang panahon motugot. . . . [Apan] hilabihan ang kalibug ug kagubot taliwala sa nagkalain-lain nga mga tinuohan, nga kini dili mahimo alang sa usa ka batan-on nga tawo nga sama kanako, nga walay kasinatian sa mga katawhan ug sa mga butang, aron pagkab-ut sa usa ka piho nga paghukom kinsa ang tinuod ug kinsa ang sayop.”³

Si Joseph mipakli sa Biblia aron makit-an ang mga tubag sa iyang mga pangutana ug mibasa sa Santiago 1:5: “Kon aduna man kaninyoy nakulangnan og kaalam, papangayoa siya sa Dios, nga nagapanghatag ngadto sa tanang mga tawo sa madagayaon gayud, ug sa walay pagpamoyboy; ug kini igahatag kaniya.”⁴

Siya misulat: “Wala pay bisan unsa nga tudling sa kasulatan nga mituhop uban sa labaw nga gahum ngadto sa kasingkasing sa tawo kay sa nahimo niini nga panahon ngari kanako. Kini ingon og misulod uban sa makusog nga gahum ngadto sa matag tipik sa akong kasingkasing. Ako namalandong niini pagbalik-balik.”⁵

Si Joseph nakaamgo nga ang Biblia wala magsulat sa tanang tubag sa mga pangutana sa kinabuhi; hinoon, kini nagtudlo sa mga katawhan unsaon nila pagkakita sa mga tubag sa ilang mga pangutana pinaagi sa pagpakigsulti direkta sa Dios pinaagi sa pag-ampo.

Siya midugang: “Busa, pinasubay niini, sa akong hugot nga tinguha sa pagpangutana sa Dios, ako miadto sa kakahoyan aron sa paghimo sa pagsulay. Kini usa ka buntag sa usa ka matahum, maayo nga panahon, sayo sa tingpamulak sa usa ka libo walo ka gatus ug kawhaan.”⁶

Dayon, si Joseph miingon nga “[usa ka gilis sa] kahayag midapat kanako [ug] ako nakakita og duha ka Personahe, kansang kahayag ug himaya dili mahulagway, nagtindog ibabaw kanako diha sa kawanangan. Usa kanila misulti ngari kanako, nagtawag kanako sa akong ngalan ug miingon, nagtudlo ngadto sa lain—[Joseph,] *Kini mao ang Akong Hinigugmang Anak. Paminaw Kaniya!*”⁷

Ang Manluluwas dayon miingon: “Joseph, akong anak, ang imong mga sala gipasaylo na. Lakaw, magalakaw [ka] sa akong kabalaoran, ug pagabantayan [nimo] ang akong mga sugo. Tan-awa, Ako mao ang Ginoo sa himaya. Ako gilansang sa krus alang sa kalibutan, aron kadtong tanan nga motuo sa akong ngalan mahimo nga makaangkon og kinabuhing dayon.”⁸

Si Joseph midugang, “Busa sa wala madugay, ako miandam sa akong kaugalingon, nga aron ako makasulti, nga ako nangutana sa mga Personahe kinsa nagbarug ibabaw kanako diha sa kahayag, hain sa tanan nga mga tinuohan ang tinuod.”⁹

Siya nahinumdom: “Miingon sila kanako nga ang tanan nga relihiyosong mga denominasyon nagtuo sa sayop nga mga doktrina, ug nga wala niini ang giila sa Dios isip iyang simbahan ug gingharian. Ug . . . sa samang higayon [ako] nakadawat og saad nga ang kahingpitan sa ebanghelyo kinahanglan ipahibalo kanako.”¹⁰

Si Joseph mipahibalo usab, “Nakakita ako og daghang mga anghel niini nga panan-awon.”¹¹



Human niining mahimayaong panan-awon, si Joseph misulat: “Ang akong kalag napuno sa gugma, ug sulod sa daghang mga adlaw nagmaya ako uban sa hingpit nga kalipay. . . . Ang Ginoo nagauban kanako.”¹²

Siya migula gikan sa Sagradong Kakahoyan aron sugdan ang iyang pagpangandam nga mahimong usa ka propeta sa Dios.

Si Joseph usab misugod sa pagkat-on sa nasinati sa karaang mga propeta—pagsalikway, pagbatok, ug pagpanggukod. Si Joseph nahinumdom nga nakigbahin unsay iyang nakita ug nadungog uban sa usa sa mga tigpangalagad nga aktibo sa relihiyosong kalihokan:

“Ako nahibulong kaayo sa iyang mga lihoc; dili lamang nga wala niya hatagi og gibug-aton ang akong gipamulong, apan sa dako nga pagtamay, nag-ingon, kining tanan gikan sa yawa, nga wala na kuno kanang mga butang sama sa mga panan-awon o mga pagpadayag niini nga mga adlaw; nga kana nga mga butang mihunong na uban sa mga apostoles, ug nga wala na gayud bisan unsa pa niana kanila.

“Ako sa wala madugay nakahibalo, bisan pa niana, nga ang akong pag-asoy sa sugilanon nakapaukay og hilabihan nga pagyubit batok kanako taliwala sa mga magtutudlo sa relihiyon, ug mao kini ang hinungdan sa

dako nga pagpanggukod, diin mipadayon sa pagdaghan; . . . ug mao kini ang nagpasulabi diha sa tanan nga mga tinuohan—ang tanan nagkahiusa sa paggukod kanako.”¹³

Tulo ka tuig human niadto, sa 1823, ang kalangitan miabli pag-usab isip kabahin sa nagpadayon nga Pagpahiuli sa ebanghelyo ni Jesu-kristo sa katapusang mga adlaw. Si Joseph misulat nga usa ka anghel nga ginganlan og Moroni mipakita kaniya ug miingon “nga ang Dios adunay ipabuhat kanako . . . [ug nga] adunay usa ka basahon nga gitagoan, gisulat sa bulawan nga mga palid” nga anaa “ang kahingpitan sa walay katapusan nga Ebanghelyo . . . ingon nga gitugyan sa Manluluwas ngadto sa karaan nga mga lumulupyong [sa Amerika].”¹⁴

Sa katapusan, si Joseph mikuha, mihubad, ug mimantala sa karaang talaan, nahibaloan karon nga ang Basahon ni Mormon.

Ang iyang igsoon nga si Hyrum, nga iyang kanunay nga tig-abag, ilabi na human sa iyang sakit kaayo, ug maku-yaw nga operasyon sa bitiis niadtong 1813, usa sa mga saksi sa bulawang mga palid. Siya usab usa sa unom ka mga miyembro sa Simbahan ni Jesukristo sa dihang na-organisar kini niadtong 1830.

Sa ilang kinabuhi, si Joseph ug Hyrum dungan nga nakigharong sa mga manggugubot ug pagpanggukod. Sama pananglit, nag-antus sila sa pinakagrabe nga kondisyon sa Bilanggoan sa Liberty sa Missouri sulod sa lima ka bulan panahon sa tingtugnaw sa 1838–39.

Niadtong Abril 1839, si Joseph misulat sa iyang asawa nga si Emma naghulagway sa ilang kahintang sa Bilanggoan sa Liberty: “Ako nagtuo nga mga lima ka buwan ug unom ka adlaw na ko sukad nga gikusmoron sa gwardiya, gabii ug adlaw, ug sulod sa mga paril, nagkagot, ug alingisngis nga pultahan nga puthaw sa mingaw, ngitngit, hugaw nga prisohan. . . . Mabalhin ra gihapon kami gikan niining [lugara], ug kami malipay niana. Bisan unsa pay mahitabo namo, kami dili maadto sa pinakabati nga lungga kay sa niini. . . . Kami dili gayud

mangandoy nga mobalik pa human sa Liberty sa Clay County, Missouri. Sobra ra kaayo ni para namo.”¹⁵

Samtang nag-atubang og pagpanggukod, si Hyrum nagpakita og pagtuo sa mga saad sa Ginoo, lakip sa garantiya nga makaikyasa sa mga kaaway kon pillion niya. Sa usa ka panalangin nga nadawat ni Hyrum niadtong 1835 gikan ni Joseph Smith, ang Ginoo misaad kaniya, “Ikaw makaangkon og gahum sa pag-eskapo sa kamot sa imong mga kaaway. Ang imong kinabuhi pangitaon og maayo, apan ikaw makaeskapo. *Kon gusto nimo*, ug gitinguha nimo, *ikaw makaangkon sa gahum sa kinabubut-on sa pagtugyan sa imong kinabuhi sa paghimaya sa Dios.*”¹⁶

Pagka-Hunyo 1844, si Hyrum gipapili nga mabuhi o mohalad sa iyang kinabuhi aron sa paghimaya sa Dios ug “mosilyo sa iyang pagpamatuod uban sa iyang dugo”—nag-abay uban sa iyang hinigugmang igsoon nga si Joseph.¹⁷

Usa ka semana sa wala pa ang malaglagon nga biyahe padulong sa Carthage, diin gipatay sila sa armadong mga manggugubot nga talawan nga mipintal sa ilang mga nawong aron dili mailhan, si Joseph misulat nga “Akong gitambagan ang akong igsoong Hyrum nga dad-on ang iyang pamilya sa sunod nga barko ug moadto sa Cincinnati.”

Ako mibati gihapon sa hilabihang emosyon samtang nahinumdom ko sa tubag ni Hyrum: “Joseph, *dili ko makabiya nimo.*”¹⁸

Si Joseph ug Hyrum nangadto sa Cathage, diin sila nahimong mga martir alang sa kawasa ug ngalan ni Kristo.

Ang opisyal nga pahibalo sa pagpamartir mipahayag sa mosunod: “Joseph Smith, ang Propeta ug Manalagna sa Ginoo, . . . nakapatungha sa Basahon ni Mormon, diin siya mihubad pinaagi sa gasa ug gahum sa Dios, ug nahimo nga mga paagi sa pagmantala niini ngadto sa duha ka mga dagko nga kayutaan [kontinente]; nakapadala sa kahingpitan sa walay katapusan nga ebanghelyo, diin kini naglangkob, ngadto sa upat ka mga dapit sa yuta; nakapatungha sa mga pagpadayag ug mga sugo nga naglangkob niini nga

basahon sa Doktrina ug mga Pakigsaad, ug daghan nga ubang maalamon nga mga kalig-unan ug mga panudlo alang sa kaayohan sa mga katawhan; nagpundok og daghan nga mga kaliboan nga mga Santos sa Ulahing mga Adlaw, naghimo og usa ka dako nga dakbayan, ug nagbilin og usa ka dungog ug ngalan nga dili mamatay. . . . Ug sama sa kasagaran nga pinili sa Ginoo sa karaan nga mga panahon, si [Joseph] nakasilyo sa iyang misyon ug sa iyang mga buhat sa iyang kaugalingon nga dugo; ug ingon man sa iyang igsoon nga lalaki nga si Hyrum. *Sa kinabuhi sila wala mabahin, ug sa kamatayon sila wala mabulag.*”¹⁹

Human sa pagkamartir, ang mga lawas ni Joseph ug Hyrum gibalik ngadto sa Nauvoo, gihugasan, ug giilisan aron ang pamilyang Smith makakita sa ilang mga mahal sa kinabuhi. Ang ilang mahal nga inahan mihinumdom: “Dugay na nakong giandam ang matag parte sa akong kaugalingon, migamit sa tanang kusog sa akong kalag, ug mitawag sa Dios sa paglig-on kanako; apan sa dihang misulod ko sa kwarto, ug nakita ang akong mga anak nga gipatay nga nanagbuy-od sa akong atubangan, ug nadungog ang mga pagbakho ug pag-agulo sa akong pamilya [ug] ang mga singgit . . . gikan sa mga ngabil sa ilang mga asawa, mga anak, mga igsoon, sobra na kaayo kadto. Nahugno ko nangaliyupo ngadto sa Ginoo sa panghingutas sa akong kalag, ‘Dios ko! Akong Dios! Nganong gibiyahan mo man kining pamilyaha?’”²⁰

Nianang higayona sa kasubo ug kasakit, nahinumdom siya nila nga nag-ingon, “Mama, ayaw kami hilaki; nabuntog na namo ang kalibutan pinaagi sa gugma.”²¹

Sila mibuntog tinuod sa kalibutan. Si Joseph ug Hyrum Smith, sama niadtong matinud-anong mga Santos nga gihulagway diha sa basahon sa Pinadayag, “nanagpakalabang sa dagkung kasakitan, ug ilang mga tag-as nga bisti gilabhan nila ug gipaputi diha sa dugo sa Kordero [ug] anaa . . . atubangan sa trono sa Dios, ug nagaalagad kaniya sa maadlaw ug sa magabii sulod sa iyang templo: ug

ang nagalingkod sa trono magapanalipod kanila.

“Sila dili na gutomon, ug dili na usab pagauhawon; dili na sila pagahasulon sa adlaw, ni sa bisan unsang makasunog nga kainit.

“Kay ang Kordero nga anaa sa gitaliwad-an sa trono mamahimong ilang magbalantay, ug siya magatultol kanila ngadto sa mga tuburan sa mga tubig nga nagahatag og kinabuhi; ug pagapahiran sa Dios ang tanang luha sa ilang mga mata.”²²

Samtang kita magsaulog niining malipayong okasyon, ang ika-200 nga anibersaryo sa Unang Panan-awon, ato gayud kanunayng hinumdoman ang bili nga gibayran ni Joseph ug Hyrum Smith, dungan sa ubang daghang matinud-anong mga lalaki, mga babaye, ug mga kabataan, sa pag-establisar sa Simbahan aron ikaw ug ako makapahimulos sa daghang mga panalangin ug tanan niining pinadayag nga mga kamatuoran nga anaa kanato karon. Ang ilang kamatinud-anon dili gayud hikalimtan!

Ako sa kasagaran natingala nganong si Joseph ug Hyrum ug ang ilang mga pamilya kinahanglang moantus sa hilabihan. Tingali kay sila nakaila sa Dios pinaagi sa ilang pag-antus sa mga paagi nga dili unta mahitabo kon wala pa kini. Pinaagi niini, sila namalandong sa Getsemani ug ang krus sa Manluluwas. Si Pablo miingon, “Kay gikatugot kaninyo nga tungod kang Kristo kamo dili lamang kay igo rang motuo kaniya kondili nga kamo manag-antus usab tungod kaniya.”²³

Sa wala pa ang iyang kamatayon niadtong 1844, si Joseph misulat og madasigong sulat ngadto sa mga Santos. Usa kadto ka pahamatngon, nga nagpadayon sa Simbahan karon:

“Mga kaigsoonan [ug mga sister], kita dili ba mopadayon sa hilabihan nga mahinungdanon nga katuyoan? Padayon ug ayaw pagsibug. Pagmaisugon, mga kaigsoonang lalaki [ug mga sister]; ug sa kanunay, ngadto sa kadaugan! . . .

“ . . . Kita kinahanglan, busa, ingon nga usa ka simbahan ug usa ka katawhan, ug ingon nga mga Santos sa Ulahing mga Adlaw, mohalad

ngadto sa Ginoo og usa ka halad sa pagkamatarung.”²⁴

Samtang maminaw kita sa Espiritu atol niining pagsaulog sa ika-200 nga anibersaryo karong tapos sa semana, ikonsiderar unsa nga halad ang inyong mahatag ngadto sa Ginoo diha sa pagkamatarung sa umaabut nga mga adlaw. Pagmaisugon—ipakigbahin kini sa laing tawo nga imong gisaligan, ug ilabi na, palihug gahini og panahon sa pagbuhat niini!

Ako nasayud nga ang Manluluwas malipay kon atong ihatag Kaniya ang usa ka halad gikan sa atong kasingkasing diha sa pagkamatarung, sama nga Siya nalipay sa matinud-anong halad niadtong talagsaong managsoon, si Joseph ug Hyrum Smith, ug sa tanang matinud-anong mga Santos. Niana ako balaanong mopamatuod sa sagrado ug balaan nga ngalan sa atong Ginoong Jesukristo, amen. ■

MUBO NGA MGA SULAT

1. Brigham Young, sa *Mga Pagtulun-an sa mga Presidente sa Simbahan: Joseph Smith* (2007), 659; tan-awa usab sa Brigham Young, “Remarks,” *Deseret News*, Okt. 26, 1859, 266.
2. Adunay upat ka nag-unang mga asoy sa Unang Panan-awon diin ako mikutlo; tan-awa sa “Joseph Smith’s Accounts of the First Vision,” josephsmithpapers.org.

3. Joseph Smith—Kasaysayan 1:8.
4. Tan-awa sa Joseph Smith—Kasaysayan 1:11.
5. Joseph Smith—Kasaysayan 1:12.
6. Joseph Smith—Kasaysayan 1:14.
7. Joseph Smith—Kasaysayan 1:17.
8. Sa Joseph Smith, “History, circa Summer 1832,” 3, josephsmithpapers.org; ang spelling, punctuation, ug capitalization gimoderno.
9. Joseph Smith—Kasaysayan 1:18.
10. Sa Joseph Smith, “Church History,” *Times and Seasons*, Mar. 1, 1842, 707; tan-awa usab sa josephsmithpapers.org.
11. Sa Joseph Smith, “Journal, 1835–1836,” 24, josephsmithpapers.org.
12. Sa Joseph Smith, “History, circa Summer 1832,” 3, josephsmithpapers.org; ang punctuation ug capitalization gimoderno.
13. Joseph Smith—Kasaysayan 1:21–22.
14. Joseph Smith—Kasaysayan 1:33–34.
15. Sa Joseph Smith, “Letter to Emma Smith, 4 Abril 1839,” 1–2, josephsmithpapers.org; ang spelling, punctuation, ug capitalization gimoderno.
16. Sa Joseph Smith, “Minute Book 1,” 186, josephsmithpapers.org; ang punctuation gimoderno.
17. Tan-awa sa Doktrina ug mga Pakigsaad 136:39.
18. Sa Joseph Smith, “History of Joseph Smith,” *The Latter-day Saints’ Millennial Star*, Abr. 19, 1862, 248.
19. Doktrina ug mga Pakigsaad 135:3.
20. “Lucy Mack Smith, History, 1845,” 312–13, josephsmithpapers.org; ang spelling ug punctuation gimoderno.
21. “Lucy Mack Smith, History, 1845,” 313, josephsmithpapers.org.
22. Pinadayag 7:14–17.
23. Mga Taga-Filipos 1:29.
24. Doktrina ug mga Pakigsaad 128:22–24.



JOSEPH AND HYRUM SMITH STANDING BY RIVER (S) JOSEPH UG HYRUM SMITH NGA NAGBARUG DAPUN SA SUBAL NI THEODORE S. GORCA



Ni Elder James R. Rasband
Sa Seventy

Pagsiguro og Matarung nga Paghukom

Sa pagsiguro sa matarung nga paghukom, ang Manluluwas mohawan sa sagbut sa pagkaignorante ug sa masakit nga mga tunok sa kasakit nga nahimo sa uban.

Ang Basahon ni Mormon Nagtudlo sa Doktrina ni Kristo

Sa miaging Oktubre, si Presidente Russell M. Nelson mihagit kanato sa pagkonsiderar kon unsa kaha ka lahi ang atong kinabuhi kon ang atong “kahibalo nga naangkon gikan sa Basahon ni Mormon kalit nga kuhaon?”¹ Ako namalandong sa iyang pangutana, sama sa kadaghanan ninyo. Usa ka hunahuna nga nagsige og balik-balik—kon wala ang Basahon ni Mormon ug sa kaklaro niini bahin sa doktrina ni Kristo ug sa Iyang maulaong sakripisyo, asa ako mangita og kalinaw?

Ang doktrina ni Kristo—nga naglangkob sa makaluwas nga mga baruganan ug mga ordinansa sa hugot nga pagtuo kang Kristo, paghinulsol, bunyag, sa gasa sa Espiritu Santo, ug paglahutay hangtud sa katapusan—gitudlo sa makadaghan sa tanang mga kasulatan sa Pagpahiuli apan uban sa piho nga gahum sa Basahon ni Mormon.² Ang doktrina magsugod sa hugot nga pagtuo kang Kristo, ug ang matag usa sa mga elemento niini nagdepende sa pagsalig sa Iyang maulaong sakripisyo.

Sama sa gitudlo ni Presidente Nelson “Ang Basahon ni Mormon naghatag sa kahingpitan sa labing masaligon nga pagsabut sa Pag-ula ni Jesukristo nga makaplagaan bisan asa.”³ Kon nakasabut kita sa langitnong gasa sa Manluluwas, mas makahibalo ta, sa atong hunahuna ug sa atong kasingkasing,⁴ sa katinuod sa kasiguroan ni Presidente Nelson nga “ang mga kamatuoran sa Basahon ni Mormon adunay *gahum* sa pag-ayo, paghupay, pagpahiuli, pagtabang, paglig-on, pagpakalma, ug pag-abiba sa atong mga kalag.”⁵

Ang Pag-ula sa Manluluwas Nagtagbaw sa Tanang Gipangayo sa Kaangayan

Ang importante ug nakahatag og kalinaw nga kontribusyon sa Basahon ni Mormon sa atong pagsabut sa Pag-ula sa Manluluwas mao ang pagtulun-an niini nga ang maloloy-ong sakripisyo ni Kristo nagtuman sa tanang gipangayo sa kaangayan. Sa gipasabut ni Alma: “Ang Dios sa iyang kaugalingon miula sa iyang dugo alang sa mga sala sa kalibutan, aron pagpadangat sa laraw sa kalooy, pagtagbaw sa mga

gipangayo sa kaangayan, nga ang Dios unta mahimo nga usa ka mahingpit, makiangayon nga Dios, ug usa ka maloloy-on nga Dios usab.”⁶ Ang laraw sa kalooy sa Amahan⁷—nga gitawag usab sa mga kasulatan nga laraw sa kalipay⁸ o ang laraw sa kaluwasan⁹—dili matuman hangtud ang tanang gipangayo sa kaangayan mahatag.

Apan unsa gayud ang “mga gipangayo sa kaangayan”? Ikonsiderar ang kaugalingong kasinatian ni Alma. Hinumdumi nga isip batan-on si Alma nagtinguha “sa paglaglag sa simbahan.”¹⁰ Gani, si Alma misulti sa iyang anak nga si Helaman nga siya “gihasol uban sa mga kasakit sa imperno” tungod kay siya epektibo nga “nakabuno sa daghan nga mga anak sa [Dios]” pinaagi sa paglingla “kanila ngadto sa kalaglagan.”¹¹

Si Alma mipasabut ngadto ni Helaman nga ang kalinaw sa katapusan miabut kaniya sa dihang “nahinumdom usab” siya sa mga pagtulun-an sa iyang amahan “mahitungod sa pag-anhi ni . . . Jesukristo . . . sa pag-ula sa mga sala sa kalibutan.”¹² Ang mahinulsulon nga Alma nangamuyo sa kalooy ni Kristo¹³ ug mibati sa kalipay ug kahupayan sa dihang siya nakaamgo nga si Kristo miula sa iyang mga sala ug mibayad sa tanang gikinahanglan sa kaangayan. Usab, unsa ang gikinahanglan sa kaangayan gikan ni Alma? Si Alma mitudlo mismo, “Walay mahugaw nga butang nga makapanunod sa gingharian sa Dios.”¹⁴ Sa ingon, kabahin sa kahupayan ni Alma tingali mao, gawas kon mangaliya og kalooy, ang kaangayan makapugong unta kaniya sa pagpuyo uban sa Langitnong Amahan.¹⁵

Ang Manluluwas Moayo sa mga Samad nga Dili Nato Maayo

Apan ang kalipay ba ni Alma sa iyang kaugalingon lamang—sa *iyang* paglikay sa silot ug *sa iyang* pagbalik ngadto sa Amahan? Kita nasayud nga si Alma nagbangutan usab niadtong iyang gipalayo sa kamatuoran.¹⁶ Apan si Alma dili makaayo ug makabalik niadtong tanan nga iyang gipahisalaag. Siya dili makapaniguro nga sila hatagan og makiangayon nga oportunidad nga makat-on sa doktrina ni Kristo ug

mapanalanginan pinaagi sa pagsunod sa makalipay nga mga baruganan. Siya dili makapabalik niadtong kinsa nangamatay nga nabutaan gihapon sa iyang bakak nga pagtulun-an.

Sumala sa gitudlo ni Presidente Boyd K. Packer makausa: “Ang hunahuna nga miluwas ni Alma . . . mao kini: Pagpahiuli unsay dili nimo mapahiuli, pag-ayo sa samad nga dili nimo maayo, pag-ayo nianang imong naguba ug dili nimo maayo mao ang katuyoan gayud sa pag-ula ni Kristo.”¹⁷ Ang malipayong kamatuoran nga “gihinuktokan” sa hunahuna ni Alma dili lamang nga siya mahimong limpyo apan usab kadtong iyang nahimoan og kadaot mamaayo ug mahingpit.

Ang Sakripisyo sa Manluluwas Nagsiguro sa usa ka Matarung nga Paghukom

Mga tuig sa wala pa si Alma naluwawas niining siguradong nga doktrina, si Haring Benjamin mitudlo sa gilapdon sa pagkaayo nga gitanyag sa maulaong sakripisyo sa Manluluwas. Si Haring Benjamin mipahayag nga ang “malipayon nga mga balita sa dako nga kalipay” nga gihatag kaniya “sa usa ka anghel nga gikan sa Dios.”¹⁸ Apil niadtong malipayon nga mga balita mao ang kamatuoran nga si Kristo magantus ug mamatay alang sa atong mga sala ug mga sayop sa pagsiguro nga “usa ka *matarung nga paghukom* unta moabut nganha sa mga katawhan.”¹⁹

Unsa gayud ang gikinahanglan sa “matarung nga paghukom? Sa sunod nga bersikulo, si Haring Benjamin mipasabut nga, sa pagsiguro sa usa ka matarung nga paghukom, ang dugo sa Manluluwas miula “alang sa mga sala niadtong kinsa napukan pinaagi sa kalapasan ni Adan” ug alang niadtong kinsa “namatay nga walay kasayuran sa kabubut-on sa Dios mahitungod kani-la, o kinsa sa walay kasayuran naka-sala.”²⁰ Ang matarung nga paghukom nagkinahanglan usab, iyang gitudlo, nga ang “dugo ni Kristo [mi]ula alang” sa mga sala sa gagmay nga mga bata.²¹

Kini nga mga kasulatan nagtudlo og mahimayaong doktrina: ang maulaong sakripisyo sa Manluluwas moayo, isip



CHRIST PRAYING IN THE GARDEN OF GETHSEMANE [SI KRISTO NGA NAG-AMPO DIDTO SA TANAMAN SA GETSEMANI], NI HERMANN CLEMENTZ

libre nga gasa, kadtong kinsa nakasala nga walay kasayuran, niadtong kinsa sama sa gisulti ni Jacob, “walay balaod nga gihatag.”²² Ang pagkamaytulubagon alang sa sala nagdepende sa kahayag nga gihatag kanato ug depende sa atong abilidad sa paggamit sa atong kabubut-on.²³ Kita nasayud niining makaayo ug makahupay nga kamatu-oran tungod lang sa Basahon ni Mormon ug sa ubang kasulatan sa Pagpahiuli.²⁴

Dayag lang, kon dunay balaod nga gihatag, diin kita dili ignorante sa kabubut-on sa Dios, kita may tulubagon. Sumala sa gihatagan og gibug-aton ni Haring Benjamin: “Apan alaot, alaot ngadto kaniya kinsa nasayud nga siya misukol batok sa Dios! Kay ang kaluwasan dili modangat kaniya gawas kon kini pinaagi sa paghinulsol ug hugot nga pagtuo diha sa Ginoong Jesukristo.”²⁵

Kini usab mao ang maayong balita sa doktrina ni Kristo. Dili lamang ang Manluluwas moayo ug mopahiuli niadtong kinsa nakasala nga walay kasayuran apan usab, alang niadtong nakasala batok sa kahayag, ang Manluluwas nagtanyag og pagkaayo sa kondisyon sa paghinulsol ug hugot nga pagtuo diha Kaniya.²⁶

Si Alma tingali “nakahibalo” niining duha ka kamatuoran. Nabati ba gayud kaha ni Alma unsay iyang gihulagway nga “wala nay labaw ka talagsaon . . .

sa hingpit nga kalipay”²⁷ kon siya nagtuo nga si Kristo miluwas kaniya apan pasagdan sa kahangturan kadtong iyang gipahisalaag gikan sa kamatu-oran? Dili gayud. Aron si Alma mobati og kompleto nga kalinaw, kadtong iyang napasakitan nagkinahanglan usab sa oportunidad nga mahimong maayo.

Apan unsaon gyud nila—o kadtong atong napasakitan—nga maayo? Bisan og wala nato masabti sa hingpit ang sagradong paagi diin ang maulaong sakripisyo sa Manluluwas moayo ug mopahiuli, kita nasayud nga sa pagsiguro sa matarung nga paghukom, ang Manluluwas mohawan sa sagbut sa pagkaignorante ug sa masakit nga mga tunok sa kasakit nga nahimo sa uban.²⁸ Pinaagi niini Siya misiguro nga ang tanang mga anak sa Dios hatagan sa oportunidad, ubanan sa tin-aw nga panan-aw, sa pagpili sa pagsunod Kaniya ug pagdawat sa mahinungda-non nga laraw sa kalipay.²⁹

Ang Manluluwas Moayo sa Tanan nga Atong Naguba

Kini nga mga kamatuoran mao ang nakahatag ni Alma og kalinaw. Ug kini nga mga kamatuoran ang nakahatag nato usab og dakong kalinaw. Isip kinaiyanhon nga mga lalaki ug mga babaye, kitang tanan makaigo, o usahay makapasakit sa usag usa, ug makahimo

og kadaot. Sama sa ipamatuod ni bisan kinsa nga ginikanan, ang kasakit tungod sa atong mga sayop dili lang ang kahadlok sa atong kaugalingong silot apan ang kahadlok nga nalimitahan nato ang kalipay sa atong mga anak o sa ubang paagi nakapugong nila sa pagkakita ug pagsabut sa kamatuoran. Ang mahimayaong saad sa maulaong sakripisyo sa Manluluwas mao nga, kon bahin sa atong mga sayop isip mga ginikanan, Iyang gipawalay sala ang atong mga anak ug misaad og pagkaayo alang kanila.³⁰ Ug bisan kon sila nakasala batok sa kahayag—nga kitang tanan makahimo—ang Iyang bukton sa kalooy gipatuy-od,³¹ ug Siya motubos kanila kon sila motan-aw lamang Kaniya ug mabuhi.³²

Bisan og ang Manluluwas adunay gahum sa pag-ayo sa unsay dili nato maayo, Siya misugo nato sa pagbuhat kutob sa atong mahimo sa pagpahiuli isip kabahin sa atong paghinulsol.³³ Ang atong mga sala ug mga sayop dili lang makapalayo sa atong relasyon sa Dios apan usab sa atong relasyon sa uban. Usahay ang atong mga paningkamot nga mamaayo ug mapahiuli tingali sama ka yano sa pagpangayog pasaylo, apan sa ubang panahon ang pagpahiuli magkinahanglan og mga katuigang mapainubsanong paningkamot.³⁴ Apan, alang sa atong daghang mga sala ug mga sayop, dili lang gyud kita makahimo sa pagpaayo sa hingpit niadtong atong napasakitan. Ang talagsaon, naghatag og kalinaw nga saad sa Basahon ni Mormon ug sa gipahiuli nga ebanghelyo mao nga ang Manluluwas moayo sa tanan natong nasad-an.³⁵ Ug Siya usab moayo nato kon kita mobalik ngadto Kaniya pinaagi sa hugot nga pagtuo ug paghinulsol sa kadaot nga atong nahimo.³⁶ Siya mitanyag niining duha ka gasa tungod kay Siya nahigugma natong tanan uban ang hingpit nga paghigugma³⁷ ug tungod kay Siya mipasalig sa pagsiguro sa matarung nga paghukom nga nagsunod sa kaangayan ug kalooy. Ako mopamatuod nga kini tinuod sa ngalan ni Jesukristo, amen. ■

MUBO NGA MGA SULAT

1. Russell M. Nelson, “Panapos nga Pakigipulong,” *Liahona*, Nob. 2019, 122.

2. Tan-awa sa 2 Nephi 31; 3 Nephi 11:28, 32, 35, 39–40; Doktrina ug mga Pakigsaad 10:62–63, 67–70; 68:25; Moises 6:52–54; 8:24; Ang mga Artikulo sa Hugot nga Pagtuo 1:4.
3. Russell M. Nelson, “Ang Basahon ni Mormon: Unsa kaha ang Imong Kinabuhi Kon wala Kini?” *Liahona*, Nob. 2017, 62.
4. Tan-awa sa Doktrina ug mga Pakigsaad 8:2–3.
5. Russell M. Nelson, “Ang Basahon ni Mormon: Unsa kaha ang Imong Kinabuhi Kon wala Kini?” 62.
6. Alma 42:15.
7. Tan-awa sa Alma 42:15.
8. Tan-awa sa Alma 42:8.
9. Tan-awa sa Alma 24:14; Moises 6:62.
10. Tan-awa sa Mosiah 27:8–10.
11. Alma 36:13, 14.
12. Alma 36:17, 18.
13. Tan-awa sa Alma 36:18.
14. Alma 40:26; tan-awa usab sa 1 Nephi 15:34; Alma 7:21; 11:37; Helaman 8:25.
15. Tan-awa sa 3 Nephi 27:19; tan-awa usab sa Moises 6:57.
16. Tan-awa sa Alma 36:14–17.
17. Boyd K. Packer, “The Brilliant Morning of Forgiveness,” *Ensign*, Nob. 1995, 19–20.
18. Mosiah 3:2, 3.
19. Mosiah 3:10.
20. Mosiah 3:11; tan-awa usab sa 2 Nephi 9:26.
21. Mosiah 3:16; Tan-awa usab sa Mosiah 15:25; Moroni 8:11–12, 22.
22. 2 Nephi 9:25.
23. Tan-awa sa 2 Nephi 2:26–27; Helaman 14:29–30.
24. Tan-awa sa Ang mga Artikulo sa Hugot nga Pagtuo 1:2; tan-awa usab sa Doktrina ug mga Pakigsaad 45:54. Nagpasabut sa doktrina sa bunyag alang sa mga patay, si Propeta Joseph sa makausa miingon: “Samtang ang usa ka bahin sa kaliwatan sa tawo naghukom ug mokondenar sa uban nga walay kalooy, ang Halangdong Ginikanan sa tibuk kalibutan nagtan-aw sa kinatibuk-ang tawhanong pamilya uban sa paggalam sa usa ka amahan ug pagtagad sa ginikanan; Siya mitagad kanila isip Iyang mga anak. . . . Siya usa ka maalamon nga Magbalaod, ug maoy mohukom sa tanang mga tawo, dili sumala sa hagip-ot, hinakog nga mga hunahuna sa mga tawo. . . . Siya mohukom kanila, ‘dili sumala sa unsa ang wala diha kanila, apan sumala sa unsa ang anaa kanila’; ang tanang nagpakabuhi nga walay kasugoan, pagahukman nga walay kasugoan, ug kadtong nanagpakasala ilalum sa kasugoan, pagahukman pinaagi niana nga kasugoan. Kita dili angay nga magduha-duha sa kaalam ug salabutan sa Halangdong Jehova; Siya moganti og paghukom o kalooy ngadto sa tanang mga nasud sumala sa ilang nagkalahi nga mga katakus, sa ilang mga paagi sa pagbaton og salabutan, sa mga balaod diin

- silang gidumala, ang mga kahimanan nga gihatag kanila sa pagbaton og husto nga impormasyon, ug . . . kitang tanan sa katapusan kinahanglan mokumpisal nga ang Maghuhukom sa tibuk yuta mibuhat sa husto” (*Mga Pagtulun-an sa mga Presidente sa Simbahan: Joseph Smith* [2007], 490–91).
25. Mosiah 3:12; tan-awa usab sa 2 Nephi 9:27.
 26. Tan-awa sa Mosiah 3:12; Helaman 14:30; Moroni 8:10; Doctrine and Covenants 101:78. Ang mga indibidwal mahimong ignorante sa piho nga mga sugo ug mga pakigsaad o dili makahimo sa paggamit sa ilang kabubut-on sa pipila ka mga sirkumstansya apan sa gihapon may tulubagon sa laing mga sirkumstansya tungod sa Kahayag ni Kristo nga ilang gihuptan (tan-awa sa 2 Nephi 9:25; Moroni 7:16–19). Ang Manluluwas, kinsa mao ang atong maghuhukom ug kinsa misiguro nga usa ka matarung nga paghukom, moila niini nga mga sirkumstansya (tan-awa sa Mormon 3:20; Moises 6:53–57). Ug Siya mibayad sa bili alang sa duha—ang nahauna walay kondisyon ug ang naulahi may kondisyon sa paghinulsol.
 27. Alma 36:21.
 28. Tan-awa sa Mosiah 3:11; tan-awa usab sa D. Todd Christofferson, “Katubsanang,” *Liahona*, May 2013, 110; Alma 7:11–12 (“Siya mag-antus sa mga kasakit ug mga kasakit sa iyang katawhan. . . . Ug siya modala diha kaniya sa ilang mga kahuyang”); Isaias 53:3–5 (“Sa pagkamatuo gipas-an niya ang aong kasakitan ug gipas-an niya ang atong mga kasub-anan”); 61:1–3 (“Tungod kay ako gidihogan sa Ginoo. . . sa pagbugkos sa mga dugmok og kasingkasing. . . sa pagtudlo kanila nga ang nanagbalata didto sa Sion, aron sa paghatag kanila og purongpurong nga bulak nga puli sa abo; ang lana sa kalipay puli sa pagbalata”). Makatabang nga ang Manluluwas mikutlo gikan niini nga mga bersikulo sa Isaias sa dihang Siya mipahibalo sa Iyang pagka-Mesiyas: “Niining adlaw karon, kining bahina sa kasulatan natuman diha sa inyong pagpatalinghug niini” (tan-awa sa Lucas 4:16–21).
 29. Didto sa kalibutan sa espiritu, “ang ebanghelyo gisangyaw ngadto sa mga ignorante, mga wala maghinulsol, ug mga masinupakon aron sila makalingkawas gikan sa ilang pagkabinilanggo ug magpadayon ngadto sa mga panalangin nga giandam sa usa ka mahigugmaong



Provo, Utah, USA

- Langitnong Amahan alang kanila” (Dallin H. Oaks, “Salig sa Ginoo,” *Liahona*, Nov. 2019, 27). Tan-awa sae 1 Peter 4:6; 2 Nephi 2:11–16; Doktrina ug mga Pakigsaad 128:19; 137:7–9; 138:31–35.
30. Tan-awa sa Moises 6:54. Si Presidente M. Russell Ballard mitudlo niini nga doktrina nga bahin sa paghikog: “Ang Ginoo lamang ang nasayud sa mga detalye, ug siya kinsa mohukom sa atong mga aksyon dinhi sa yuta. Kon siya mohukom nato, akong gibati nga iyang ikonsiderar ang tanang mga butang: ang atong genetic ug ang napanunod nga pisikal nga hiyas, ang atong kahimtang sa panghunahuna, ang atong intelektwal nga kapasidad, ang mga pagtulun-an nga atong nadawat, ang mga tradisyon sa atong mga amahan, ang atong kahimsog, ug uban pa. Kita nakat-on sa mga kasulatan nga ang dugo ni Kristo moula sa mga sala sa mga tawo ‘kinsa namatay nga walay kasayuran sa kabubut-on sa Dios mahitungod kanila, o kinsa sa walay kasayuran nakasala (Mosiah 3:11)” (“Suicide: Some Things We Know, and Some We Do Not,” *Ensign*, Oct. 1987, 8; *Tambuli*, Mar. 1988, 18).
31. Tan-awa sa Jacob 6:5; Mosiah 29:20; 3 Nephi 9:14; Doktrina ug mga Pakigsaad 29:1.
32. Tan-awa sa Helaman 8:15.
33. Tan-awa sa Levitico 6:4–5; Ezequiel 33:15–16; Helaman 5:17; Doktrina ug mga Pakigsaad 58:42–43.
34. Mao kini ang matang sa paningkamot ang gihimo mismo ni Alma. (tan-awa sa Alma 36:24).
35. Si Presidente Boyd K. Packer mitudlo nga gamhanan kaayo niini sa lagda: “Adunay mga higayon nga dili ninyo maayo kanang inyong naguba. Tingali ang sala dugay na kaayo, o ang nasakitan nagdumili sa pagdawat sa inyong paghinulsol. Tingali ang kadaut hilabihan ka grabe nga dili ka makaayo niini bisan giunsa nimo sa pagpaningkamot. “Ang inyong paghinulsol dili madawat hangtud adunay pagpahiuli. Kon dili ninyo mausab ang unsay inyong nahimo, kamo nalaang. Sayon ra sabton ang inyong gibati nga walay mahimo ug walay paglaum ug ngano nga kamo gusto nang moundang sama sa gibuhit ni Alma. . . . “Unsaon kining tanan sa pag-ayo, wala kita mahibalo. Tingali kining tanan dili matuman niini nga kinabuhi. Kita nasayud gikan sa mga panan-awon ug sa mga pagbisita nga ang mga sulugoon sa Ginoo nagpadayon sa paghimo sa katubsan sa lapas sa tabil. “Kini nga kahibalo makahupay kaayo sa inosente ingon man ngadto sa sad-an. Ako naghunahuna sa mga ginikanan kinsa nag-antus sa hilabihan sa mga sayop sa ilang mga badlungon nga mga anak ug nawad-an na og paglaum” (“The Brilliant Morning of Forgiveness,” 19–20).
36. Tan-awa sa 3 Nephi 12:19; tan-awa usab sa Mateo 6:12; 3 Nephi 13:11.
37. Tan-awa sa Juan 15:12–13; 1 Juan 4:18; Dieter F. Uchtdorf, “Ang Hingpit nga Gugma Nagahingilin sa Kahadlok,” *Liahona*, Mayo 2017, 107.



Ni Joy D. Jones
Kinatibuk-ang Presidente sa Primary

Usa ka Talagsaong Balaanon nga Tawag

Isip kababayan-an nga adunay hugot nga pagtuo, makakuha kita og mga baruganan sa kamatuoran gikan sa mga kasinatian ni Propeta Joseph nga makahatag og mga panabut alang sa pagdawat sa atong kaugalingong pagpadayag.

Ako mapasalamaton nga motutok sa akong pakigpulong karon sa nagpadayon nga mga tahas sa kababayan-an diha sa Pagpahiuli. Kini tawag nga sa kinatibuk-an sa kasaysayan ang kababayan-an naghupot og talagsaon nga dapit sa plano sa atong Langitnong Amahan. Si Presidente Russell M. Nelson mitudlo, “Imposibleng masukod ang impluwensya sa . . . mga babaye, dili lamang sa mga pamilya apan diha usab sa Simbahan sa Ginoo, isip mga asawa, mga inahan, ug mga apohan; isip mga igsoon ug iyaan; isip mga magtutudlo ug lider; ug ilabi na isip mga ehemplo ug mapahinungu-rong mga tigpanalipod sa tinuohan.”¹

Sa nag-una nga Relief Society sa Nauvoo, 178 ka katuigan na ang milabay, si Propeta Joseph Smith mitambag sa mga sister sa “pagpaka-buhi subay sa [ilang] pribilehiyo.”² Ang ilang ehemplo nagtudlo kanato karon. Sila nagkahiusa sa pagsunod sa tingog sa usa ka propeta ug nagpuyo uban sa lig-on nga pagtuo diha ni Jesukristo samtang sila mitabang sa pag-andam

sa pundasyon nga atong gibarugan karon. Mga sister, ato na karon nga higayon. Kita adunay balaan nga buluhaton gikan sa Ginoo, ug ang atong matinud-anon, talagsaon nga mga kontribusyon mahinungdanon.

Si Presidente Spencer W. Kimball mipasabut: “Ang mahimong matarung nga babaye sa panahon sa katapusang dispensasyon niini nga yuta, sa dili pa ang ikaduhang pag-anhi sa atong Manluluwas, usa ka talagsaong balaanon nga tawag. Ang kalig-on ug impluwensya sa matarung nga babaye karon mahimong kapulo pil-on sa unsa kini sa mas malinawon nga mga panahon.”³

Si Presidente Nelson usab nanga-muyo: “Naghangyo ko sa akong mga sister [sa] Simbahan . . . sa pag-abante! Angkuna ang inyong tukma ug importanting dapit diha sa inyong panimalay, diha sa inyong komunidad, ug diha sa gingharian sa Dios—labaw pa kay sa inyong nabuhit sukad.”⁴

Bag-ohay lang, ako adunay pribilehiyo, kauban sa usa ka grupo sa mga

batang Primary, nga mahimamat si Presidente Russell M. Nelson sa hulad [replica] nga panimalay sa pamilyang Smith sa Palmyra, New York. Paminaw samtang ang atong pinalanggang propeta nagtudlo sa kabataan kon unsa ang *ilang* mahimo aron moabante.

Sister Jones: “Ako nakuryuso lang nga mahibalo kon anaa ba kaha kamoy pangutana nga gusto ninyong ipangutana ni Presidente Nelson. Kamo naglingkod karon uban sa propeta. Aduna ba moy gusto kaayo nga ipangutana sa propeta? Sige, Pearl.”

Pearl: “Lisud ba mahimong propeta? Ikaw ba, busy kaayo?”

Presidente Nelson: “Oo lisud gyud. Tanang butang nga kinahanglan buhaton para mas mahisama sa Manluluwas lisud. Sama pananglit, sa dihang ang Dios gusto mohatag sa Napulo ka mga Sugo ngadto kang Moises, asa Niya gipaadto si Moises? Didto sa ibabaw sa usa ka bukid, sa ibabaw sa Bukid sa Sinai. Mao nga si Moises kinahanglan molakaw paingon sa ibabaw niana nga bukid aron makuha ang Napulo ka mga Sugo. Karon, ang Langitnong Amahan pwede unta moingon, ‘Moises, pagsugod diha, ug magsugod ko diri, ug sugaton tika sa tunga-tunga.’ Pero dili, ang Ginoo ganahan og paningkamot, tungod kay ang paningkamot maghatag og mga ganti nga dili moabut kon wala kini. Sama pananglit, nagtuon ba mo og piano?”

Kabataan: “Oo.”

Pearl: “Ako kay nag-violin.”

President Nelson: “Ug nagpraktis ba kamo?”

Kabataan: “Oo.”

President Nelson: “Unsa ang mahitabo kon dili mo magpraktis?”

Pearl: “Makalimot ka.”

Presidente Nelson: “Oo, dili ka mouswag, dili ba? Mao nga ang tubag kay oo, Pearl. Nagkinahanglan og paningkamot, daghan nga kakugi, daghan nga pagtuon, ug wala gayud kini katapusan. Maayo kana! Maayo kana, tungod kay kita kanunay nga miuswag. Bisan sa sunod nga kinabuhi mohimo gihapon kita og kauswagan.”

Ang tubag ni Presidente Nelson ngadto niining bililhon nga kabataan mahatag usab sa matag usa kanato. Ang Ginoo ganahan og paningkamot, ug ang paningkamot magdala og mga ganti. Kita magpadayon sa pagbansay. Kita kanunay nga mouswag samtang kita maningkamot sa pagsunod sa Ginoo.⁵ Siya wala maglaum og pagkahingpit karon. Kita padayon nga motungas sa atong personal nga Bukid sa Sinai. Sama sa nangaging mga panahon, ang atong panaw sa pagkatinuod magkinahanglan gayud og paningkamot, kakugi, ug pagtuon, apan ang atong pasalig sa pag-uswag magdala og mahangturong mga ganti.⁶

Unsa pa ang atong makat-unan gikan kang Propeta Joseph Smith ug sa Unang Panan-awon kabahin sa paningkamot, kakugi, ug pagtuon? Ang Unang Panan-awon naghatag kanato og direksyon sa *atong* talagsaon, nagpadayon nga mga tahas. Isip kababayan-an nga adunay hugot nga pagtuo, makakuha kita og mga baruganan sa kamatuoran gikan sa mga kasinatian ni Propeta Joseph nga makahatag og mga panabut alang sa pagdawat sa atong kaugalingong pagpadayag. Sama pananglit:

- Kita mitrabaho taliwala sa mga kalisud.
- Kita midangup sa mga kasulatan aron makadawat og kaalam sa paglihok.
- Atong gipakita ang atong hugot nga pagtuo ug pagsalig sa Dios.
- Atong gigamit ang atong gahum sa pagpangamuyo sa Dios aron tabangan kita nga mapugngan ang impluwensya sa kaaway.
- Atong gihalad ang mga gipangandoy sa atong mga kasingkasing ngadto sa Dios.
- Kita motutok sa Iyang kahayag nga naggiya sa atong mga pagpili sa kinabuhi ug nagpundo diha kanato kon kita modangup ngadto Kaniya.
- Kita nakaamgo nga Siya nakaila sa ngalan sa matag usa kanato ug adunay tinagsa-tagsa ka mga tahas nga ipatuman kanato.⁷

Agig dugang, si Joseph Smith mipahiuli sa kahibalo nga kita adunay bala-anong potensyal ug mahangturong bili. Tungod niana nga relasyon uban sa atong Langitnong Amahan, ako nagtuo nga Siya *naglaum* nga kita modawat og pagpadayag gikan Kaniya.

Ang Ginoo mitudlo ni Emma Smith sa “[pag]dawat sa Espiritu Santo,” magkat-on pag-ayo, “mosalikway sa mga butang niini nga kalibutan, . . . [pagpangita sa] mga butang nga maayo,” ug “[mo]hupot ngadto sa [iyang] pakigsaad” sa Dios.⁸ Ang pagkat-on mahinungdanon sa pag-uswag, ilabi na nga ang makanunayong pakig-uban sa Espiritu Santo nagtudlo kanato unsa ang kinahanglanon natong isalikway—buot ipasabut kanang *makabalda* kanato o *makalangay* sa atong pag-uswag.

Si Presidente Nelson miingon, “Mohangyo ko kaninyo sa pagpalambo sa inyong espirituhanong kapasidad sa pagdawat og pagpadayag.”⁹ Ang mga pulong sa atong propeta padayon nga nag-uban kanako samtang ako namalandong sa abilidad sa kababayan-an sa pag-abante. Siya mihangyo kanato, nga nagpakita og prayoridad. Siya nagtudlo kanato unsaon nga mabuhi sa espirituhanong paagi diha sa kalibutan nga puno sa kasal-anan pinaagi sa pagdawat ug pagsunod sa pagpadayag.¹⁰ Samtang ato kining gihimo, nagtahud ug nagsunod sa mga sugo sa Ginoo, kita gisaran, sama ni Emma Smith, og “korona sa pagkamatarung.”¹¹ Ang Propeta Joseph nagtudlo sa kamahinungdanon sa *pagkahibalo* nga ang dalan nga atong gisunod niini nga kinabuhi giaprubahan sa Dios. Kon wala kana nga kahibalo, kita “maluya sa [atong] hunahuna, ug malup-og.”¹²

Niini nga komperensya, kita makadungog og mga kamatuoran nga modasig kanato sa pag-usab, paglambo, ug pagpapatli sa atong kinabuhi. Pinaagi sa personal nga pagpadayag, kita makalikay sa unsay gitawag sa uban og “nasobrahan sa kinatibuk-ang komperensya nga pagbati”—nga kita mobiya nga determinadong himoon kining *tanang* karon. Ang kababayan-an

adunay daghang nagkalain-laing mga responsibilidad, apan imposible kini, ug dili kinahanglan, nga buhaton kining tanan og dungan diha-diha dayon. Ang Espiritu motabang kanato nga makaila asa nga buhat ang tutukan karon.¹³

Ang mahigugmaong impluwensya sa Ginoo pinaagi sa Espiritu Santo motabang nato nga mahibalo sa *Iyang* prayoridad alang sa atong pag-uswag. Ang pagsunod sa personal nga pagpadayag mogiya ngadto sa *personal* nga pag-uswag.¹⁴ Kita maminaw ug mobuhat.¹⁵ Ang Ginoo miingon, “Pangayo sa Amahan pinaagi sa akong ngalan, sa hugot nga pagtuo nga ikaw makadawat, ug ikaw makabaton sa Espiritu Santo, nga nagpadayag sa tanan nga mga butang nga angay.”¹⁶ Ang atong nagpadayon nga tahas mao ang pagdawat og nagpadayon nga pagpadayag.

Samtang kita makakab-ot og mas taas nga kahanas sa pagbuhat niini, kita makadawat og dugang nga gahum sa atong tinagsa-tagsa nga mga tahas sa pagpangalagad ug pagtuman sa buhat sa kaluwasan ug kahimayaan—aron tinud-anay nga “mosalikway sa mga butang niini nga kalibutan, ug [mangita sa] mga butang nga maayo.”¹⁷ Kita dayon mas epektibo nga makaawhag sa atong umaabut nga henerasyon sa paghimo sa ingon.

Mga kaigsoonan, kitang tanan nangita sa gahum sa Dios diha sa

atong kinabuhi.¹⁸ Adunay maanindot nga panaghiusa tali sa kababayan-an ug kalalakin-an sa pagtuman sa buhat sa Dios karon. Kita makaangkon sa gahum sa pagkapari pinaagi sa mga pakigsaad, nga unang gihimo sa dihang kita gibunyagan ug dayon diha sa sulod sa balaang mga templo.¹⁹ Si Presidente Nelson mitudlo kanato, “Ang matag babaye ug matag lalaki kinsa mohimo og mga pakigsaad uban sa Dios ug motuman niadto nga mga pakigsaad, ug kinsa takus nga moapil sa mga ordinansa sa pagkapari, direktang makaangkon sa gahum sa Dios.”²⁰

Ang akong personal nga pagangkon karon mao nga isip usa ka babaye ako wala makaamgo, sa sayo pa sa akong kinabuhi, nga *ako* adunay kahigayunan nga makaangkon, pinaagi sa akong mga pakigsaad, sa gahum sa pagkapari.²¹ Mga sister, ako nag-ampo nga kita moila ug moamping sa gahum sa pagkapari samtang kita “[mo]hupot ngadto sa [atong] pakigsaad,”²² mohangup sa mga kamatuoran sa mga kasulatan, ug mosunod sa mga pulong sa atong buhi nga mga propeta.

Maisugon nato nga ideklarar ang atong debosyon ngadto sa atong Langitnong Amahan ug sa atong Manluluwas, “uban sa dili matarug nga hugot nga pagtuo diha kaniya, mosalig sa hingpit diha sa mga maayo

nga buhat kaniya kinsa gamhanan sa pagluwas.”²³ Kita magmalipayon sa pagpadayon niini nga panaw padulong sa atong labing taas nga espi-rituhanong potensyal ug motabang niadtong anaa sa atong palibut sa pagbuhat sa ingon pinaagi sa paghigugma, pagserbisyo, pagpangulo, ug pagkamanggiloloy-on.

Si Elder James E. Talmage maag- hupon nga mipahinumdom kanato, “Ang pinakabantugan nga manlalaban sa kalibutan alang sa mga babaye ug pagkababaye mao si Jesukristo.”²⁴ Sa katapusang pag-analisar sa nagpadayon nga mga tahas sa kababayan-an diha sa Pagpahiuli, ug para kanatong tanan, unsa nga tahas ang labing molabaw? Ako mopamatuod nga kini mao ang *pagpaminaw* Kaniya,²⁵ ang pagsunod Kaniya,²⁶ ang pagsalig Kaniya,²⁷ ug ang mahimong sumpay sa Iyang gugma.²⁸ Ako nasayud nga Siya buhi.²⁹ Sa sagradong ngalan ni Jesukristo, amen. ■

MUBO NGA MGA SULAT

1. Russell M. Nelson, “Usa ka Hangyo ngadto sa Akong mga Sister,” *Liahona*, Nob. 2015, 95–96.
2. Joseph Smith, sa “Relief Society Minute Book,” 38, josephsmithpapers.org.
3. *Mga Pagtulun-an sa mga Presidente sa Simbahan*: Spencer W. Kimball (2006), 272.
4. Russell M. Nelson, “Usa ka Hangyo ngadto sa Akong mga Sister,” 97.
5. Tan-awa sa Doktrina ug mga Pakigsaad 58:26–28.
6. Tan-awa sa Doktrina ug mga Pakigsaad 6:33.
7. Tan-awa sa Joseph Smith—Kasaysayan 1:11–17.
8. Doktrina ug mga Pakigsaad 25:8, 10, 13.
9. Russell M. Nelson, “Pagpadayag alang sa Simbahan, Pagpadayag alang sa Atong mga Kinabuhi,” *Liahona*, Mayo 2018, 96.
10. Tan-awa sa 2 Nephi 9:39.
11. Doktrina ug mga Pakigsaad 25:15.
12. *Lectures on Faith* (1985), 68.
13. Tan-awa sa Doktrina ug mga Pakigsaad 42:61.
14. Si Presidente Henry B. Eyring miingon: “Karon, kung ikaw ug ako nag-istorya nga kita ra (manghinaut ko nga makahimo kita), diin ikaw mobati nga gawasnon sa pagpangutana sa bisan unsang gusto nimong ipangutana, makahanduraw ko nga mosulti ka og sama niini: ‘Ah, Brother Eyring, akong gibati ang pipila sa mga butang nga imong gihulagway. Ang Espiritu Santo miimpluwensya sa akong kasingkasing ug hunahuna matag karon ug unya. Apan kinahanglanon nako kini sa kanunay kon dili ko gusto nga mabuntog o malingla. Posible ba kana? Posible ba kini, ug kon posible man, unsa ang dapat buhaton aron madawat kana nga panalangin?’



San Bernardo, Santiago, Chile

“Nan, atong sugdan sa unang bahin sa imong pangutana. Oo, posible kini. Sa matag higayon nga nagkinahanglan ko niana nga pagpasalig—ug nagkinahanglan usab ako niini matag karon ug unya—ako makahinumdom og duha ka managsoong lalaki. Si Nephi ug Lehi, ug ang ubang mga sulugoon sa Ginoo nga naghago uban nila, nag-atubang og grabe nga oposisyon. Sila nagserbisyo diha sa usa ka kalibutan nga nagkagrade ang kadautan. Sila kinahanglang mosagubang og grabe nga mga pagpanlinlang. Mao nga ako molihok uban sa kaisog—ug kamo usab—gikan sa mga pulong niini nga usa ka bersikulo sa Helaman. Ang pagpasalig makita diha sa sagsay sa tanan nga nahitabo sa tibuok tuig, nga mora og sa tigsulat dili kini makapatingala. Paminaw:

“Ug sa ikapitoan ug siyam nga tuig misugod ang daghan nga panagbangi. Apan nahinabo nga si Nephi ug si Lehi, ug daghan sa ilang mga kaigsoonan kinsa nasayud mahitungod sa tinuod nga mga punto sa doktrina, nakabaton og daghan nga mga pagpadayag matag adlaw, busa sila misangyaw ngadto sa mga katawhan, hangtud nga sila mitapos sa ilang mga panagbangi nianang mao nga tuig.” [Helaman 11:23]

“Sila adunay ‘daghan nga mga pagpadayag matag adlaw.’ Busa, alang nimo ug alang nako, mitubag kana sa imong unang pangutana. Oo, posible nga maanaa ang pagpakig-uban sa Espiritu Santo nga igo aron makadawat og daghang pagpadayag kada adlaw. Dili kini sayon. Apan posible kini. Unsa ang gikinahanglan niini lain-lain sa matag tawo tungod kay magsugod kita kon asa kita sa atong talagsaon nga mga kasinatian sa kinabuhi.” (“*Gifts of the Spirit for Hard Times*” [Brigham Young University fireside, Sept. 10, 2006], 3–4, speeches.byu.edu).

15. Tan-awa sa 2 Nephi 2:16.
16. Doktrina ug mga Pakigsaad 18:18.
17. Doktrina ug mga Pakigsaad 25:10.
18. Tan-awa sa Doktrina ug mga Pakigsaad 121:26, 33, 41, 45–46.
19. Tan-awa sa Doktrina ug mga Pakigsaad 84:19–21.
20. Russell M. Nelson, “Espirituhanon nga mga Bahandi,” *Liahona*, Nob. 2019, 77.
21. Tan-awa sa Russell M. Nelson, “Espirituhanon nga mga Bahandi,” 76–79; Dallin H. Oaks, “Ang mga Yawe ug Awtoridad sa Priesthood,” *Liahona*, Mayo 2014, 49–52; Henry B. Eyring, “Kababayen-an ug Pagkat-on sa Ebanghelyo diha sa Panimalay,” *Liahona*, Nob. 2018, 58–60.
22. Doktrina ug mga Pakigsaad 25:13.
23. 2 Nephi 31:19.
24. James E. Talmage, *Jesus the Christ*, 3rd ed. (1916), 475.
25. Tan-awa sa Joseph Smith—Kasaysayan 1:17.
26. Tan-awa sa Mateo 4:19–20.
27. Tan-awa sa Proverbio 3:5–6; Doktrina ug mga Pakigsaad 11:12.
28. Tan-awa sa Juan 13:34; Moroni 7:47.
29. Tan-awa sa 2 Nephi 33:6; Doktrina ug mga Pakigsaad 76:22.



Ni Elder Neil L. Andersen
Sa Korum sa Napulog Duha ka mga Apostoles

Mga Espirituhanong Panumduman nga Angay Hinumduman

Kon ang personal nga mga kalisdanan, o kon ang mga kahimtang sa kalibutan nga lapas sa atong pagkontrolar mopangitngit sa atong dalan, ang espirituhanong panumduman nga angay hinumduman gikan sa libro sa atong kinabuhi mahisama sa sanag nga mga bato nga modan-ag sa unahan.

Diseotso ka tuig human sa Unang Panan-awon, misulat si Propeta Joseph Smith og detalyadong sugilanon sa iyang kasinatian. Siya nagsagubang og mga oposisyon, pagpanglutos, pagpanghasi, pagpanghulga, ug bangis nga mga pagsulong.¹ Sa gihapon sa walay lipud-lipod padayon siyang nagpamatuod sa iyang Unang Panan-awon: “Ako sa tinuod nakakita og usa ka kahayag, ug sa taliwala niana nga kahayag ako nakakita sa duha ka mga Personahe, ug sila sa kamatuoran namulong ngari kanako; ug bisan pa ako gikasilagan ug gigukod sa pag-ingon

nga ako nakakita og usa ka panan-awon, apan kini tinuod. . . . Nasayud ako niini, ug ang Dios nasayud niini, ug ako dili makalimud niini.”²

Sa iyang pait nga mga oras, gihi-numduman ni Joseph ang hapit duha



Salt Lake City, Utah, USA

na ka dekadang milabay nga kasiguro-
doan sa gugma sa Dios kaniya ug ang
mga hitabo nga mihangop sa dugay
nang gitagna nga Pagpahiuli. Sa pag-
pamalandong sa espirituhanon niyang
panaw, miingon si Joseph: “Dili nako
mabasol si bisan kinsa sa dili pagtuo
sa akong kasaysayan. Kon ako wala
makasinati unsay akong nasinati, mis-
mo ako dili motuo niini.”³

Ang maong mga kasinatian tinuod,
ug wala siya makalimot o molimud
niini, hilum niyang gipamatud-an ang
iyang panghimatuod samtang padu-
long siya sa Carthage. “Ako moadto
sama sa usa ka karnero ngadto sa
ihawanan,” “apan ako malinawon
ingon sa kabuntagon sa ting-init;
ako adunay tanlag nga walay sala
ngadto sa Dios ug ngadto sa tanan
nga mga tawo.”⁴

Imong mga Espirituhanon nga Kasinatian nga Angay Hinumduman

Adunay leksyon para kanato sa
ehemplo ni Propeta Joseph. Kauban
sa malinawong direksyon nga atong
nadawat gikan sa Espiritu Santo, sa
matag karon ug unya, ang Dios sa
impluwensyal ug sa personal ka-
ayo nga paagi misiguro sa matag usa
kanato nga Siya nakaila ug nahigug-
ma kanato ug Siya nanalangin kanato
sa piho ug sa dayag nga paagi. Dayon,
sa atong mga kalisdanan, kining mga
kasinatian ibalik sa Manluluwas diha
sa atong hunahuna.

Hunahunaa ang kaugalingon
nimong kinabuhi. Sulod sa mga katu-
igan, namati ako sa mahinuklugong
espirituhanong mga kasinatian gikan
sa liboan ka mga Santos sa Ulahing
mga Adlaw sa tibuok kalibutan,
nagmatuod kanako sa dili ikalimud
nga ang Dios nakaila ug nahigugma
sa matag usa kanato ug matinguha-
on kaayo nga mopadayag sa Iyang
kaugalingon ngari kanato. Kini nga
mga kasinatian posibling moabut sa
importanting mga panahon sa atong
kinabuhi, ug tingali sa sinugdanan
daw dili kaayo importanting mga hita-
bo, apan kanunay kining giubanan og
linahi nga kumpirmasyon sa espiritu-
hanong gahum sa gugma sa Dios.

Ang paghinumdom niining espi-
rituhanon angay hinumduman nga mga
kasinatian mopaluhod kanato, nga
magpahayag sama ni Propeta Joseph:
“Ang akong nadawat nagagikan sa
Dios. Ako nasayud niini, ug ako dili
makalimud niini.”⁵

Upat ka Sanglitanan

Pamalandongi ang kaugalingon
nimong mga espirituhanong panum-
duman nga angay hinumduman
samtang mopaambit ko og pipila ka
ehemplo gikan sa uban.

Mga tuig nang milabay, usa ka
gulungan nga patriarch nga dunay
problema sa duha ka ugat sa kasing-
kasing mihangyo sa kaniadto-Dr.
Russell M. Nelson nga motabang,
bisan og niadtong higayona wala pay
pag-opera nga maoy sulbad sa nadaot
nga ugat. Si Dr. Nelson sa katapusan
miuyon sa pag-opera. Kini ang mga
pulong ni Presidente Nelson:

“Human matangtang ang naka-ali sa
unang ugat, gisunod namo ang ikadu-
ha. Among nakita nga tibuok ra kini
apan grabe ang paghubag niini nga dili
na kini makalihok og tarung. Samtang
gisusi kini nga ugat, usa ka mensahe
misulod sa akong hunahuna: *Pagamyi
ang gidak-on sa buka*. Gipahibalo nako
ang mensahe sa akong assistant. ‘Ang
tissue paigo ra *kon* matarung nato sa
pagpagamay ang buka ngadto sa nor-
mal niini nga gidak-on.’

“Apan unsaon? . . . Usa ka hulag-
way klaro kaayo sa akong hunahuna
nagpakita unsaon nako pagpahimu-
tang ang mga tahi—nga ipilo diri ug

ipalapus didto. . . Akong mahinum-
duman gihapon kadtong mental nga
imahe—nga may kompletong tuldok-
tuldok kon asa ipahimutang ang mga
tahi. Nahuman ang pag-opera sigun
sa gi-diagram sa akong hunahuna.
Among gitinging ang ugat ug nakita
nga migamay ang buka sa talagsaong
paagi. Miingon ang akong assistant,
‘Milagro.’”⁶ Nabuhi ang patriarch og
daghan pang mga tuig.

Si Dr. Nelson gigiyahan. Ug nahiba-
lo siya nga ang Dios nahibalo nga siya
nahibalo nga gigiyahan siya.

Si Kathy ug ako unang nakahima-
mat ni Beatrice Magré sa France 30 ka
tuig nang milabay. Si Beatrice bag-o
lang misulti nako og kasinatian nga
nakaepetto sa iyang espirituhanong
kinabuhi wala madugay human sa
iyang bunyag niadtong tin-edyer pa
siya. Kini ang iyang mga pulong:

“Ang kabatan-onan sa among bran-
ch mibiyahe kuyog sa ilang mga lider
ngadto sa Lacanau Beach, usa ka oras
ug tunga gikan sa Bordeaux.

“Sa wala pa mamauli, usa sa mga
lider mihukom nga mosawom una
siya ug mi-dive ngadto sa mga balud
nga nag-antipara. Sa iyang pagtungo,
wala na ang iyang antipara. . . . Nawa-
la kini sa dagat.

“Sa pagkawala sa iyang antipara
dili na siya maka-drive sa iyang sakya-
nan. Matanggong kami layo sa balay.

“Usa ka sister nga puno sa pagtuo
misugyot nga mag-ampo kami.

“Miyam-id kong nag-ingon nga
walay kahimoan ang pag-ampo, ug
wala kaayo ko ganahing miapil sa



Dr. Russell M. Nelson



Beatrice Magré

pag-ampo sa publiko samtang nagbarug kami kutob sa hawak sa lubugon nga tubig.

“Pagkahuman sa pag-ampo, gituyhad nako aron i nako akong mga kamot aron sabligan og tubig ang tanan. Sa akong pagkawos aron mosablig sa tubig, ang antipara nasa-ngit sa akong kamot. Usa ka kusog kaayong pagbati midulot sa akong kalag nga ang Dios sa tinuod makadungog sa atong mga pag-ampo.”⁷

Kwarenta y singko ka tuig na ang milabay, gihinumduman niya kini sama og nahitabo kini kagahapon. Si Beatrice napanalanginan, ug nasayud siya nga ang Dios nasayud nga napanalanginan siya.

Ang mga kasinatian ni Presidente Nelson ug ni Sister Magré managlahi kaayo, apan alang sa duha, ang dili angay hikalimtan nga espirituhanong panumduman sa gugma sa Dios nakulit sa ilang mga kasingkasing.

Kini nga importanting mga hitabo sa kasagaran moabut diha sa pagkat-on mahitungod sa gipahiuli nga ebanghelyo o sa pagpaambit sa ebanghelyo ngadto sa uban.

Kini nga litrato kuha sa São Paulo, Brazil, niadtong 2004. Si Floripes Luzia Damasio sa Ipatinga Brazil Stake 114 anyos na. Sa paghisgot bahin sa iyang pagkakabig, giingnan ko ni Sister Damasio nga ang mga misyonaryo sa iyang balangay mihatag og panalangin sa pagkapari sa grabe og sakit nga bata kinsa milagrusong naayo. Gusto siyang mahibalo pa og daghan. Samtang nag-ampo siya kabahin sa



Si Sister Floripes Luzia Damasio uban ni Elder Andersen.

ilang mensahe, usa ka dili malimud nga pagsaksi sa Espiritu mikumpirmar kaniya nga si Joseph Smith usa ka propeta sa Dios. Sa edad nga 103, gibunyagan siya, ug sa edad nga 104, na-endow siya. Matag tuig human niadto, mobiyahe siya og 14-ka oras sa bus sa paggahin og usa ka semana sa templo. Si sister Damasio nakadawat og langitnong panghimatuod, ug nasayud siya nga ang Dios nasayud nga siya nasayud nga ang pagsaksi tinuod.

Aniay espirituhanon nga panumdu-man gikan sa una nakong misyon sa France 48 ka tuig nang milabay.

Samtang nag-trakting, ako ug ang akong kompanyon mibilin og Basahon ni Mormon sa gulangan na nga babaye. Dihang namalik mi sa apartment sa maong babaye mga usa ka semana human niadto, giablihan niya ang pultahan. Sa wala pay gilitok nga mga pulong, klaro nakong gibati, ang espirituhanon nga gahum. Ang kusog kaayong pagbati padayon dihang gipasulod kami ni Madam Alice Audubert ug misulti kanamo nga iyang gibasa ang Basahon ni Mormon ug nahibalo nga kini tinuod. Sa among pagbiya sa iyang apartment nianang adlaw, nag-ampo ko, “Langitnong Amahan, palihug tabangi ko nga dili nako kalimtan ang bag-o lang nakong gibati.” Wala gyud ko makalimot.

Sa daw ordinaryo nga gutlo, dapit sa pultahan sama sa daghan kaayong gatusan ka ubang mga pultahan, mibati ko sa gahum sa langit. Ug nasayud ako nga ang Dios nasayud nga ang bintana sa langit giablihan.



Si Elder Andersen nga nagbunyag ni Alice Audubert.

Gitinagsa-tagsa ug Dili Ikalimud

Kining espirituhanon dili angay hikalimtang mga gutlo moabut sa managlahing panahon ug managlahing paagi, nga gitinagsa-tagsa sa matag usa kanato.

Hunahunaa ang paborito ninyong mga ehempo diha sa mga kasulatan. Kadtong naminaw ni Apostol Pedro “gisakitan sa ilang [mga] kasingkasing.”⁸ Ang babayeng Lamanite nga si Abish mituo sa “talagsaon nga panan-awon sa iyang amahan.”⁹ Ug ang tingog miabut diha sa hunahuna ni Enos.¹⁰

Ang higala nakong si Clayton Christensen mihulagway og usa ka kasinatian atol sa mahinuklugon kaayong pagbasa sa Basahon ni Mormon niini nga paagi: “Usa ka matahum, mainiton, mahigugmaong Espiritu . . . mipalibut kanako ug mikuyanap sa akong kalag, miputos kanako sa pagbati sa gugma nga dili nako masabut nga akong gibati, [ug kini nga pagbati nagpadayon gabii human sa usa ka gabii].”¹¹

Dunay mga panahon nga ang espirituhanong mga pagbati motuhop sa atong kasingkasing sama sa kalayo, nga mosanag sa atong kalag. Si Joseph Smith mipasabut nga usahay makadawat kita og “hinanaling pagsantup sa mga ideya” ug panagsa sa tiunay nga pagdagayday sa salabutan.¹²

Si Presidente Dallin H. Oaks, sa pagtubag sa sinsero nga tawo kinsa miingon nga wala pa gayud siyay ingon niana nga kasinatian, mitambag, “Tingali ang imong mga pag-ampo balik-balik nang gitubag, apan ikaw nangita og usa ka timailhan nga klaro kaayo o tingog nga kusog kaayo nga nagtuo na noon ka nga wala ka tubaga.”¹³ Ang Manluluwas Mismo namulong kabahin sa mga tawo nga adunay hugot nga pagtuo kinsa “[napanalanginan] sa kalayo ug uban sa Espiritu Santo, [apan sila] wala masayud niini.”¹⁴

Unsaon Ninyo sa Pagkadungog Kaniya?

Bag-o lang natong nadungog si Presidente Russell M. Nelson nga miingon: “Ako modapit kaninyo sa paghunahuna og maayo ug sa kanunay bahin niining mahinungdanon nga pangutana: Unsaon *nimo* sa pagkadungog Kaniya? Ako usab modapit

kaninyo sa paghimo og mga lakang aron mas makadungog Kaniya ug mas kanunay.”¹⁵ Gisubli niya ang imbitasyon karong buntag.

Makadungog kita Kaniya sa atong mga pag-ampo, sa atong mga balay, sa atong mga kasulatan, sa atong mga himno, samtang takus kitang moambit sa sakramento, samtang magserbisyo kita sa uban, ug samtang naa kita sa templo kauban sa isigka-tumutuo. Ang espirituhanong mga panumduman nga angay hinumduman moabut kon mainampunon kitang maminaw sa kinatibuk-ang komperensya ug kon mas maayo ang pagsunod nato sa mga sugo. Ug mga bata, kini nga mga kasinatian para kaninyo usab. Hinumdumi, si Jesus, “mitudlo ug mialagad ngadto sa anak sa mga katawhan . . . ug [ang mga anak] namulong . . . sa mahinungdanon ug katingalahan nga mga butang.”¹⁶ Ang Ginoo miingon:

“[Kini nga kahibalo] gihatag pinaagi sa akong Espiritu nganha kaninyo, . . . gawas kon kini pinaagi sa akong gahum kamo dili makabaton [niini];

“Busa, kamo makapamatuod nga kamo nakadungog sa akong tingog, ug nahibalo sa akong mga pulong.”¹⁷

Kita “makadungog Kaniya” tungod sa panalangin sa dili ikatandi nga Pag-ula sa Manluluwas.

Samtang dili kita makapili sa tayming alang sa pagdawat niining angay hinumduman nga mga gutlo, si Presidente Henry B. Eyring mihatag niini nga tambag sa atong pagpangandam:



“Karong gabii, ug ugma sa gabii, tingali mag-ampo kamo ug mamalandong, nga mangutana: Ang Dios nagpadala ba og mensahe nga alang lang gayud kanako? Nakita ba nako ang Iyang kamot sa akong kinabuhi o sa kinabuhi sa akong [pamilya]?”¹⁸ Ang pagtuo, kamasulundon, pagpaubos, ug tinuod nga katuyoan moabli sa mga bintana sa langit.¹⁹

Usa ka Paghulagway


Tingali maghunahuna kamo sa inyong mga espirituhanong panumduman niini nga paagi. Pinaagi sa kanunay nga pag-ampo, determinasyon sa pagtuman sa atong mga pakigsaad, ug sa gasa sa Espiritu Santo, gidumala nato ang atong dalan sa kinabuhi. Kon ang personal nga kalisdanan, pagduhaduha, o pagkaluya mopangitngit sa atong dalan, o kon ang mga kahimtang sa kalibutan nga lapas sa atong pagkontrolar mopahunahuna kanato sa umaabut,

ang espirituhanong panumduman nga angay hinumduman gikan sa libro sa atong kinabuhi ng espirituhanong panumduman nga angay hinumduman gikan sa libro sa atong kinabuhi mahisama sa sanag nga mga bato nga modan-ag sa unahan, nagsiguro kanato nga ang Dios nakaila ug nahigugma kanato, ug mipadala sa Iyang Anak, si Jesukristo, sa pagtabang kanato nga makabalik sa panimalay. Ug kon may tawo nga mobaliwala sa iyang mga panumduman nga angay hinumduman ug nahisalaag o nalibug, ato silang ipaatubang sa Manluluwas samtang mopaambit kita sa atong pagtuo ug mga panumduman uban nila, sa pagtabang nga madiskobrihan nila og balik ang mga bililhon espirituhanong mga gutlo nga kaniadto ilang gibahandi.

Ang ubang mga kasinatian sagrado kaayo nga kini atong tagoan diha sa atong espirituhanong panumduman ug dili kini ipaambit.²⁰



Ang pag-ampo, pagtuman sa mga pakigsaad ug ang Espiritu Santo makatabang kanato sa pagdumala sa kinabuhi.



Ang espirituhanon nga mga panumduman susama sa sanag nga mga bato nga nagdan-ag sa unahan.



Atong ipaambit ang atong pagtuo ug mga panumduman aron mapaatubang ang mga nangawala ngadto sa Manluluwas.

“Ang mga anghel mamulong pinaagi sa gahum sa Espiritu Santo; busa, sila namulong sa mga pulong ni Kristo.”²¹

Ang mga anghel [wala mohunong] sa pagpangalagad sa katawhan.

“Kay tan-awa, sila mga alagad [kang Kristo], nga mangalagad sumala sa . . . iyang pagmando, nagpakita sa ilang kaugalingon ngadto kanila sa hugot nga pagtuo og usa ka maligon nga panghunahuna diha sa matag dagway sa pagka-diosnon.”²²

Ug “ang Maghuhupay, nga mao ang Espiritu Santo, . . . magatudlo kaninyo sa tanang butang, ug magapahinumdom kaninyo.”²³

Hangupa ang sagrado ninyong mga panumduman. Tuohi kini. Isulat kini. Ipaambit kini sa inyong pamilya. Saligi nga miabut kini kaninyo gikan sa inyong Langitnong Amahan ug sa iyang Hinigugma nga Anak.²⁴ Tuguti nga magdala kini og pailub sa inyong mga pagduhaduha ug panabut sa inyong mga kalisdanan.²⁵ Mosaad ko ninyo nga samtang kamo andam nga moila ug mainampingon nga mobahandi sa espirituhanong mga hitabo nga angay hinumduman sa inyong kinabuhi, magkadaghan pa ang moabut kaninyo. Ang Langitnong Amahan nakaila ug nahigugma kaninyo!

Si Jesus mao ang Kristo, ang Iyang ebanghelyo napahiuli na, ug kon padayon kitang magmatinud-anon, ako mosaad nga kita Iya gayud sa hangtud, sa ngalan ni Jesukristo, amen. ■

MUBO NGA MGA SULAT

1. Tan-awa sa *Mga Santos: Ang Istorya sa Simbahan ni Jesukristo sa Ulahing mga Adlaw*, vol. 1, *Ang Sumbanan sa Kamatuoran, 1815–1846* (2018), 166–79; tan-awa usab sa Joseph Smith, “History, 1838–1856, volume A-1 [23 Disyembre 1805–30 Agosto 1834],” 205–9, josephsmithpapers.org; *Mga Santos*, 1:408–21.
2. Joseph Smith—Kasaysayan 1:25.
3. *Mga Pagtulun-an sa mga Presidente sa Simbahan: Joseph Smith* (2007), 636.
4. Doktrina ug mga Pakigsaad 135:4.
5. Sa kanunay makadayeg ako sa mga pulong diha sa Joseph Smith—Kasaysayan: “Ako nakakita og usa ka panan-awon, ako nasayud niini, ug ako nasayud nga ang Dios nasayud niini, ug ako dili makalimud niini” (Joseph Smith—Kasaysayan 1:25). Mobarug unya siya atubangan sa Dios ug angkunon nga kining mga hitabo sa Sagradong Kakahoyan nahitabo gayud sa iyang kinabuhi ug ang

iyang kinabuhi lahi na. Mga 25 ka tuig ang milabay, una to nakong nadungog ang usa ka pinalahi bahin niini nga mga pulong ni Elder Neal A. Maxwell. Gihatag niya kini nga ehemplo: “Dugay na niadtong Mayo 1945 adunay panahon nga ako didto sa usa ka isla sa Okinawa sa edad nga disetos. Sa piho lang dili pagpasikat sa akong bahin apan usa ka panalangin kanako ug sa uban atong sa pagpamomba sa Japanese artillery didto sa among nahimutangan. Human sa sunod-sunod nga mga pagpamomba nga mitugpa layo ra sa among nahimutangan, sa katapusan ang kaaway nakapunting na gayud. Pwede ra gayud unta nila nga ipabuto, apan adunay balaanong tubag sa pinakaminos sa usa ka nalisang, hinakog nga pag-ampo. Ang pagpamomba mihunong. . . . Napanalangin ako, ug nasayud ako nga ang Dios nasayud nga ako nasayud” (“Becoming a Disciple,” *Ensign*, Hunyo 1996, 19).

Si Elder Maxwell midugang nga wala lamang siya mahibalo, ug dili lang kay siya nahibalo, apan ang Dios nahibalo nga siya nahibalo nga siya gipanalangin. Sa pinasimbolo nga paagi alang nako kini nagpataas og usa ka ang-ang sa tulubagon. Sa mga higayon, ang atong Langitnong Amahan mipauban og panalangin nga gihatag kanato uban sa klaro kaayo nga espirituhanong kumpirmasyon nga mopataliwala ang kalangitan para kanato. Dili kini ikalimud. Magpabilin kini kanato, ug kon magmatinuoron kita ug magmatinud-anon, mohulma kini sa atong kinabuhi sa umaabot nga katuigan. “Napanalangin ako, ug ako nasayud nga ang Dios nasayud nga ako nasayud nga ako napanalangin.”

6. Russell M. Nelson, “Sweet Power of Prayer,” *Liahona*, Mayo 2003, 8.
7. Personal nga sugilanon gikan ni Beatrice Magré nga gipaambit ngadto ni Elder Andersen niadtong Okt. 29, 2019; follow-up nga email pagka Ene. 24, 2020.
8. Mga Buhat 2:37.
9. Alma 19:16.
10. Tan-awa sa Enos 1:5.
11. Clayton M. Christensen, “The Most Useful Piece of Knowledge,” *Liahona*, Ene. 2009, 23.
12. Tan-awa sa *Mga Pagtulun-an: Joseph Smith*, 154.
13. Dallin H. Oaks, *Life’s Lessons Learned: Personal Reflections* (2011), 116.
14. 3 Nephi 9:20.
15. Russell M. Nelson, “How Do You Hear Him?” A Special Invitation,” Peb. 26, 2020, blog.ChurchofJesusChrist.org.
16. 3 Nephi 26:14.
17. Doktrina ug mga Pakigsaad 18:35–36. Ang mga pagbati ubanan kanunay og espirituhanong kahibalo. “Kamo dali nga mobuhat og kadautan apan dugay nga mahinumdom sa Ginoo nga inyong Dios. Kamo nakakita og usa ka anghel, ug siya namulong nganha kaninyo; oo, kamo nakadungog sa iyang tingog matag karon ug unya; ug siya nakapamulong nganha kaninyo sa usa ka hinay nga hinagawhaw nga tingog, apan kamo ingon sa walay pagbati, mao nga kamo dili makabati sa iyang mga pulong” (1 Nephi 17:45).

18. Henry B. Eyring, “O Hinumdumi, Hinumdumi,” *Liahona*, Nob. 2007, 69.
19. Tan-awa sa 2 Nephi 31:13; Moroni 10:4. Si Presidente Dallin H. Oaks mibisita sa among mission sa Bordeaux, France, niadtong 1991. Gipasabut niya sa among mga misyonaryo nga ang ipasabut sa tinuoray nga katuyoan mao nga ang tawo nga nag-ampo mosulti og ingon niini ngadto sa Ginoo: “Wala ako mangutana tungod kay nanguryuso lang, apan sa hingpit nga kasinero sa paglihok agig tubag sa akong pag-ampo. Kon Ikaw mohatag kanako niini nga tubag, molihok ako sa pag-usab sa akong kinabuhi. Molihok ako.”
20. “Kini gihatag ngadto sa kadaghanan aron masayud sa mga misteryo sa Dios; bisan pa niana sila gipahimutang ubos sa mahigpit nga sugo nga sila dili makigbahin gawas sumala niana nga bahin sa iyang pulong nga iyang gihatag ngadto sa mga anak sa tawo, sumala sa pagpaminaw ug kakugi nga ilang gihatag ngadto kaniya” (Alma 12:9).
Si Elder Neal A. Maxwell miingon: “Nagkinahanglan og inspirasyon ang pagkahibalo kon kanus-a angay mopaambit sa [espirituhanong mga kasinatian]. Nahinumdom ko nga nakadungog ni Presidente Marion G. Romney, kinsa mihiusa sa talento ug sa kaalam, nga miingon, ‘Mas daghan ang atong espirituhanong mga kasinatian kon dili ta magpatuyang sa pagtabi mahitungod niini’” (“Called to Serve” [Brigham Young University devotional, Mar. 27, 1994], 9, speeches.byu.edu).
21. 2 Nephi 32:3.
22. Moroni 7:29–30.
23. Juan 14:26.
24. Ang mga kamatuoran sa ebanghelyo anaa para sa tanan. Sa semana sa wala pa ang komperensya, human makompleto ang akong pakigpulong, sa espirituhanong paagi giganoy ako ngadto sa usa ka libro nga ginganlan og *Divine Signatures: The Confirming Hand of God* (2010), sinulat ni Gerald N. Lund, kinsa nagserbiyo nga General Authority Seventy sukad 2002 hangtud 2008. Sa akong kalipay, ang mga pulong ni Brother Lund nga pulong nga matahum nga ikaduhang saksi sa mga baruganan nga gipaambit niini nga mga pakigpulong sa komperensya nga dugang matun-an mahitungod sa mga panumduman nga angay hinumduman.
25. Usa sa paboritong kinutlo ni Presidente Thomas S. Monson gikan sa Scottish nga magbabalak nga si James M. Barrie: “Ang Dios naghatag kanato og mga panumduman, aron atong matagamtam ang matahum nga mga higayon dapit sa katapusang mga panahon sa atong kinabuhi” (sa Thomas S. Monson, “Paghunahuna sa Pagpasalamat [Think to Thank],” *Liahona*, Ene. 1999, 22). Mao usab sa espirituhanong mga panumduman. Tingali mas makatabang kini atol sa mga panahon sa pait nga mga pagsulay sa atong kinabuhi diin kita magkinahanglan niadtong mga espirituhanong mga panumduman niadtong “matahum nga mga higayon” nga espirituhanong mga panumduman.



Ni Douglas D. Holmes
*Bag-ong Gi-release nga Unang Magtatambag sa
Kinatibuk-ang Kapangulohan sa Young Men*

Sa Kahiladman sa Atong Kasingkasing

Ang Ginoo nagsulay sa pagtabang kanato—tanang kanato—nga mas motuhop ang Iyang ebanghelyo sa kahiladman sa atong mga kasingkasing.

Mga kaigsoonan, pagkamahimayaon sa adlaw nga atong gipuy-an. Sa atong pagsaulog sa sinugdanan sa Pagpahiuli, angay usab nga saulogon ang padayon nga Pagpahiuli nga atong gisaksihan. Ako nagmaya uban kaninyo nga nabuhi niining panahona.¹ Ang Ginoo padayon nga mipahimutang sa tanang gikinahanglan, pinaagi sa Iyang mga propeta, nga makatabang kanato aron maandam sa pagdawat Kaniya.²

Usa nianang gikinahanglan nga mga butang mao ang bag-ong inisyatibo alang sa mga Kabataan ug Kabatan-onan. Daghan kaninyo ang pamilyar sa gihatagan og gibug-aton niini nga programa sa paghimo og mga tumong, bag-ong mga timailhan sa pagkahisakop, ug Alang sa Kalig-on sa mga Kabatan-onan nga mga komperensya. Apan dili gayud nato kini tugutan nga mobalda sa atong panabut bahin sa mga baruganan diin kini nga programa giestablisar ug sa katuyoan niini: pagtabang aron ang ebanghelyo ni Jesukristo motuhop sa kahiladman sa mga kasingkasing sa atong mga kabataan ug kabatan-onan.³

Ako nagtuo nga kon mas klaro natong makita kini nga mga baruganan, maila nato kini nga mas labaw

pa kay sa programa alang sa mga miyembro nga nag-edad og 8 hangtud sa 18. Atong makita giunsa sa Ginoo pagsulay sa pagtabang kanato — tanang kanato—nga mas motuhop ang ebanghelyo sa kahiladman sa atong mga kasingkasing. Ako nag-ampo nga ang Espiritu Santo motabang kanato nga mag-uban sa pagkat-on.

Mga Relasyon—“Pakig-uban Kanila”⁴

Ang unang baruganan mao ang mga relasyon. Tungod kay natural kaayo kini nga bahin sa Simbahan ni Jesukristo, usahay makalimot kita sa kaimportante sa mga relasyon diha sa atong padayon nga panaw padulong ni Kristo. Wala laumi nga kita mangita o maglakaw diha sa dalan sa pagkigsaad nga maginusara. Kita nagkinahanglan og gugma ug suporta gikan sa mga ginikanan, ubang mga sakop sa pamilya, mga kahigalaan, ug mga lider kinsa naglakaw usab diha sa dalan sa pakigsaad.

Kini nga mga matang sa mga relasyon nagkinahanglan og panahon. Panahon sa pagpakig-uban. Panahon sa pagkatawa, pagdula, pagkat-on, pagserbisyo nga magkauban. Panahon sa pagdayeg sa mga interes ug mga hagit sa matag usa. Panahon sa pagpadayag

ug pagmatinud-anon sa matag usa samtang kita maningkamot nga magkauban sa pag-uswag. Kini nga mga relasyon maoy usa sa nag-unang mga katuyoan sa pagpundok isip mga pamilya, mga korum, mga klase, ug mga kongregasyon. Mao kini sila ang pundasyon sa epektibo nga pagpangalagad.⁵

Si Elder Dale G. Renlund mihatag kanato og usa ka yawe sa pag-ugmad niining mga relasyon dihang siya miingon: “Aron epektibong makaserbisyo sa uban kinahanglan ato silang makita . . . pinaagi sa panan-aw sa Langitnong Amahan. Niana lamang nga masugdan nato pagsabut ang tinuod nga bili sa usa ka kalag. Niana lamang nga mabati nato ang gugma sa Langitnong Amahan alang sa tanang Niyang mga anak.”⁶

Ang pagtan-aw sa uban sama sa pagtan-aw sa Dios usa ka gasa. Gidapit nako ang tanang kanato sa pagtinguha niini nga gasa. Samtang ang atong mga mata gibuka aron makakita,⁷ kita usab makatabang sa uban sa pagtan-aw sa ilang mga kaugalingon sama sa pagtan-aw sa Dios.⁸ Si Presidente Henry B. Eyring mipasabut pag-ayo sa gahum niini dihang siya miingon: “Ang mas mahinungdanon mao ang unsay makat-unan sa [uban] gikan [kaninyo] kon si kinsa gayud sila ug kon unsa gayud sila sa umaabut. Ang akong tag-an nga dili kaayo kini nila makat-unan sa mga lektyur. Makuha nila kini gikan sa mga *pagbati* kon si kinsa kamo, kinsa sila para ninyo, ug unsa sa inyong hunahuna nga mamahimo sila sa umaabut.”⁹ Ang pagtabang sa uban nga makasabut sa ilang tinuod nga pagkatawo ug katuyoan maoy usa sa pinakadakong mga gasa nga atong mahatag.¹⁰ Ang pagtan-aw sa uban ug sa atong mga kaugalingon sama sa pagtan-aw sa Dios tinuod nga mobugkos sa atong mga kasingkasing “diha sa pagkahiusa ug diha sa gugma.”¹¹

Sa kanunay nga nagkadugang nga sekular nga mga impluwensya nga nagbira kanato, atong gikinahanglan ang kusog nga nagagikan sa mahigugma-ong mga relasyon. Busa sa atong pagplano og mga kalihokan, mga miting, ug ubang mga panagpundok, hinumduman nato ang labing dakong katuyoan

niining mga panagpundok nga mao ang pag-ugmad og mahigugmaong mga relasyon nga mohiusa kanato ug makatabang nga ang ebanghelyo ni Jesukristo mas motuhop sa kahiladman sa atong mga kasingkasing.¹²

Pagpadayag, Kabubut-on, ug Paghinulsol—“Ikonektar Sila ngadto sa Langit”¹³

Siyempre, dili igo nga basta lang magkahiusa. Adunay daghang grupo ug mga organisasyon nga nahiusa tungod sa nagkalain-lain nga mga kawsa. Apan ang pagkahiusa nga atong gitinguha mao ang pagkahiusa diha ni Kristo, ang pagkonektar sa atong kaugalingon ngadto Kaniya.¹⁴ Aron makonektar ang atong mga kasingkasing ngadto sa langit, atong gikinahanglan ang indibidwal nga espirital nga mga kasinatian, sama sa bag-ohay lang nga hapsay kaayong gipamulong ni Elder Andersen.¹⁵ Kana nga mga kasinatian moabut samtang ang Espiritu Santo modala sa pulong ug gugma sa Dios ngari sa atong hunahuna ug kasingkasing.¹⁶

Kini nga pagpadayag moabut pinaagi sa mga kasulatan, ilabi na sa Basahon ni Mormon; pinaagi sa dinasig nga mga pulong sa buhing mga propeta ug ubang matinud-anong mga disipulo; ug pinaagi sa ligdong nga hinagawhaw nga tingog.¹⁷ Kini nga mga pulong labaw pa kay sa tinta diha sa pahina, mga tunog diha sa atong dalunggan, mga hunahuna sa atong mga pangisip o mga pagbati diha sa atong kasingkasing. Ang pulong sa Dios usa ka espirital nga gahum.¹⁸ Kini mao ang kamatuoran ug kahayag.¹⁹ Kini ang paagi nga kita makadungog Kaniya! Ang pulong mopasiugda ug mopalig-on sa atong pagtuo ni Kristo ug modasig sa atong tinguha nga mas mahisama sa Manluluwas—nga mao, ang paghinulsol ug paglakaw diha sa dalan sa pakigsaad.²⁰

Sa miaging Abril, si Presidente Russell M. Nelson mitabang kanato sa pagsabot sa mahinungdanon nga tahas sa paghinulsol niining makahatag og pagpadayag nga panaw.²¹ Siya miingon: “Kon kita mopili nga maghinulsol, kita mopili nga mag-usab! Atong tugutan

ang Manluluwas nga mousab kanato ngadto sa labing maayo nga bersyon sa atong mga kaugalingon. . . . Kita mopili nga mas mahisama ni Jesukristo!”²² Kini nga proseso sa pag-usab, dinasig sa pulong sa Dios, mao ang atong paagi sa pagkonektar ngadto sa langit.

Ang sukaranan sa pagdapit ni Presidente Nelson sa paghinulsol mao ang baruganan sa kabubut-on. Kita kinahanglan gayud nga *mopili* sa paghinulsol alang sa atong kaugalingon. Ang ebanghelyo dili mahimong ipugos sa atong mga kasingkasing. Sa giingon ni Elder Renlund, “Ang tumong sa atong Langitnong Amahan sa pagkaginikanan dili ang *pagpabuhat* sa Iyang mga anak sa unsay matarung; kini ang *pagpapili* sa Iyang mga anak sa pagbuhat sa matarung.”²³

Diha sa mga programa nga gipulihan sa Kabataan ug Kabatan-onan, adunay sobra sa 500 ka lain-laing mga gikinahanglan nga kompletuhon aron makadawat og lain-lain nga mga pasidungog.²⁴ Karon, usa na lang gayud. Kini usa ka pagdapit sa *pagpili* nga mas mahisama sa Manluluwas. Ato kining buhaton pinaagi sa pagdawat sa pulong sa Dios pinaagi sa Espiritu Santo ug pagtugot ni Kristo nga mousab nato ngadto sa labing maayo nga bersyon sa atong mga kaugalingon.

Labaw pa kini kay sa pagbansay sa paghimo og tumong o kaugalingong paglambo. Ang mga tumong usa lamang ka himan nga makatabang nato sa pagkonektar ngadto sa langit pinaagi sa pagpadayag, kabubut-on, ug paghinulsol—sa pagduol ni Kristo ug pagdawat sa Iyang ebanghelyo sa kahiladman sa atong mga kasingkasing.

Pag-apil ug Pagsakripisyo—“Tugoti Sila nga Mangulo”²⁵

Sa katapusan, aron ang ebanghelyo ni Jesukristo motuhop sa kahiladman sa atong mga kasingkasing, kinahanglang moapil kita diha niini—mohatag sa atong panahon ug mga talento ngadto niini, mosakripisyo alang niini.²⁶ Kitang tanan nagtinguha nga magpuyo og makahuluganon nga kinabuhi, ug tinuod gayud kini ilabi na sa bag-ong henerasyon. Ganahan sila og kawsa.

Ang ebanghelyo ni Jesukristo mao ang pinakadako nga kawsa sa kalibutan. Si Presidente Ezra Taft Benson miingon: “Gimanduan kita sa Dios sa pagdala niining ebanghelyo sa tibuok kalibutan. Mao kana ang kawsa nga kinahanglang mohiusa kanato karon. Ang ebanghelyo lamang ang makaluwas sa kalibutan gikan sa katalagman sa iyang kaugalingong pagkagun-ob. Ang ebanghelyo lamang ang mohiusa sa kalalakin-an [ug kababayen-an] sa tanang kaliwatan ug nasyonalidad diha sa kalinaw. Ang ebanghelyo lamang ang modala og hingpit nga kamaya, kalipay, ug kaluwasan sa tawhanong pamilya.”²⁷

Si Elder David A. Bednar misaad, “Samtang atong hatagan og katungod ang kabatan-onan pinaagi sa pagdapit ug pagtugot nila nga molihok, ang Simbahan magpadayon sa milagrosong mga paagi.”²⁸ Sa kasagaran wala nato dapita ug tugoti ang mga kabatan-onan sa pagsakripisyo alang niining dakong kawsa ni Kristo. Si Elder Neal A. Maxwell nakaobserbar, “Kon ang [atong] kabatan-onan dili pabug-atan [sa buhat sa Dios], sila sigurado nga mabug-atan sa kalibutan.”²⁹

Ang programa sa Kabataan ug Kabatan-onan nagtutok sa paghatag og katungod sa kabatan-onan. Mopili sila sa ilang kaugalingong mga tumong. Ang mga kapangulohan sa korum ug sa klase ibutang sa ilang tukmang dapit. Ang konseho sa kabatan-onan sa ward, sama sa konseho sa ward, nakatutok sa buhat sa kaluwasan ug kahimayaan.³⁰ Ang mga korum ug mga klase magsugod sa mga miting pinaagi sa pagpakigtambag kon unsaon paglihok sa buhat sa Dios nga gihatag kanila.³¹

Si Presidente Nelson misulti sa kabatan-onan sa Simbahan: “Kon pilion ninyo, kon gustuhon ninyo, . . . mahimo kamong dakong parte sa usa ka dakong butang, mahinungdanong butang, halangdong butang! . . . Kamo usa sa mga labing maayo nga gipadala sa Ginoo *sukad* dinhi sa kalibutan. Aduna kamoy kapasidad nga mahimong mas lantip ug mas maalamon ug adunay mas dakong epekto sa kalibutan kay sa nangaging henerasyon!”³²

Sa laing okasyon, si Presidente Nelson miingon sa kabatan-onan: “Ako adunay hingpit nga pagsalig kaninyo. Nagmahal ko ninyo, ug mao usab ang Ginoo. Kita Iyang katawhan, nagtinabangay diha sa Iyang balaang buhat.”³³ Mga batan-on, nabati ba ninyo ang pagsalig ni Presidente Nelson diha kaninyo ug kon unsa kamo kaimportante niini nga buhat?

Mga ginikanan ug hamtong nga mga lider, dapiton ko kamo nga motan-aw sa kabatan-onan sama ni Presidente Nelson. Samtang ang kabatan-onan mobati sa inyong gugma ug pagsalig, samtang inyo silang dasigon ug tudloan unsaon sa pagpangulo—ug pasagdan sila nga molihok nga sila lang—mahingangha kamo sa ilang mga panabut, mga abilidad, ug pasalig sa ebanghelyo.³⁴ Sila mobati sa hingpit nga kalipay sa pagpili nga moapil ug mosakripisyo alang sa kawsa ni Kristo. Ang Iyang ebanghelyo mas motuhop sa kahiladman sa ilang mga kasingkasing, ug ang buhat magpadayon sa milagroso nga mga paagi.

Saad ug Pagpamatuod

Ako mopamatuod, nga kon motutok kita niini nga mga baruganan—mga relasyon, pagpadayag, kabubut-on, paghinulsol, ug sakripisyo—ang ebanghelyo ni Jesukristo mas motuhop sa kahiladman sa tanan natong mga kasingkasing. Atong makita ang Pagpahiuli nga magpadayon sa lintungangay niini, ang katubsan sa Israel ug ang pag-establisar sa Zion,³⁵ diin si Kristo magmando isip Hari sa mga hari.



Bluffdale, Utah, USA

Ako mopamatuod nga ang Dios padayong nagbuhat sa tanang butang nga gikinahanglan aron maandam ang Iyang katawhan alang niana nga adlaw. Makita unta nato ang Iyang kamot niining mahimayaon nga buhat samtang kitang tanan maningkamot nga “[mo]duol ngadto kang Kristo, ug [magma]hingpit diha kaniya.”³⁶ Sa ngalan ni Jesukristo, amen. ■

MUBO NGA MGA SULAT

1. Tan-awa sa Doktrina ug mga Pakigsaad 45:12. Si Presidente Nelson miingon: “Hunahunaa lang ang kahinam ug kadinalian niining tanan: ang matag propeta sugod kang Adan nakakita sa atong panahon. Ug ang matag propeta naghisgut kalabut sa *atong* panahon, diha nga ang Israel pagapundukon ug ang kalibutan andamon alang sa Ikaduhang Pag-anhi sa Manluluwas. Hunahunaa kana! Sa tanang katawhan nga nakapuyo niining kalibutana, *kita* ang makahimo sa pag-apil niini nga kalihokan sa katapusan, dakong panagpundok. Makapahinam gayud kana!” (“Paglaum sa Israel” [tibuok kalibutan nga debosyonal sa kabatan-onan, Hunyo 3, 2018], HopeofIsrael.ChurchofJesusChrist.org).

Si Elder Jeffrey R. Holland nagtudlo: “Pagkanindot nga panahon sa pagpakabuhi!

“Ang ebanghelyo ni Jesukristo mao ang labing sigurado, ang labing lig-on, ang labing kasaligan, ug pinakamagantihong kamatuoran dinhi sa yuta ug didto sa langit, sa karon ug sa kahangturan. Wala—walay bisan unsang butang, walay bisan kinsang tawo, walay bisan unsang impluwensya—nga makapugong niini nga Simbahan sa pagtuman sa misyon niini ug pagkab-ot sa padulgan niini nga giandam sa wala pa ang katukuran sa kalibutan. . . . Dili kinahanglan nga mahadlok o magduha-duha bahin sa umaabut.

“Dili sama sa tanang kapanahunan nga nag-una kanato, kini nga dispensasyon dili makasinati ug apostasiya sa institusyon; kini dili makasinati ug pagkawala sa mga yawe sa pagkapari; kini dili mag-antus ug pagkahunong sa pagpadayag gikan sa tingog sa Labawng Makagagahum nga Dios. . . . Pagkanindot nga panahon aron mabuhi!

“. . . Kon wala kamo makamatikod, masaligon kaayo ako sa ulahing mga adlaw. . . . Tuo. Barug. Pagmatinud-anon. Ug pahimusli ug maayo ang pinakatalagsaong panahon nga atong gipuy-an!” (Post sa Facebook, Mayo 27, 2015; tan-awa usab sa

“Be Not Afraid, Only Believe” [pakigpulong ngadto sa mga religious educator sa Church Educational System, Feb. 6, 2015], broadcasts.ChurchofJesusChrist.org).

2. Tan-awa sa Juan 1:12.
3. Human kami gitawag isip Kinatibuk-ang Kapangulohan sa Young Men, si Presidente Henry B. Eyring naghisgot uban kanamo sa talagsaong mga hagit ug mga kahigayunan nga giatubang sa kabatan-onan sa Simbahan karon. Siya mitambag namo sa pagtutok sa mga butang nga makatabang aron ang ebanghelyo ni Jesukristo motuhop sa ilang mga kasingkasing. Kana nga tambag nahimong kahayag kanamo isip ang Kapangulohan sa Young Men.
4. Tan-awa sa “Be with Them [Pakig-uban Kanila],” ChurchofJesusChrist.org/callings/aaronic-priesthood-quorums/my-calling/leader-instruction/be-with-them.
5. Tan-awa sa Mosiiah 18:25; Moroni 6:5.
6. Dale G. Renlund, “Pinaagi sa Panan-aw sa Dios,” *Liahona*, Nob. 2015, 94; tan-awa usab sa Moises 1:4–6.
Si Presidente Thomas S. Monson nagtudlo: “Kita dunay responsibilidad sa pagtan-aw sa indibidwal dili kon unsa sila karon apan kon unsa sila sa umaabut. Ako mangamuyo ninyo sa paghunahuna nila sa ingon niini nga paagi” (“Tan-awa ang Uban kon Unsa Sila sa Umaabut,” *Liahona*, Nob. 2012, 70).
Si Elder Neal A. Maxwell nagtudlo: “Sa kasagaran, ang pamayhon sa usa ka batan-on sa *pagsupak* sa mga sumbanan sa Simbahan, o ang iyang makahagit nga mga pangutana, o dayag nga mga pagduda maoy hinungdan nga husgahan siya. Ang mga resulta mao ang pagpalayo ug, usahay pagpahimulag. Ang tinuod nga gugma dili ganahan nga mohusga!” (“Unto the Rising Generation,” *Ensign*, Abr. 1985, 9).
7. Tan-awa sa 2 Mga Hari 6:17.
8. Si Stephen L. Richards, isip usa ka sakop sa Unang Kapangulohan, miingon, “Ang pinakataas nga matang sa pag-ila mao kanang pagmatikud unsay anaa sa uban ug ang pagkaplag alang kanila sa ilang mas maayong mga kinaiya, ang kaayo nga diha nang daan nila” (sa Conference Report, Abr. 1950, 162; sa David A. Bednar, “Quick to Observe,” *Ensign*, Dis. 2006, 35; *Liahona*, Dis. 2006, 19). Tan-awa usab sa 2 Mga Hari 6:17.
9. Henry B. Eyring, “Teaching Is a Moral Act” (pakigpulong didto sa Brigham Young University, Ago. 27, 1991), 3, speeches.byu.edu; emphasis gidugang; tan-awa usab sa Henry B. Eyring, “Tabangi Sila nga Motaas ang Panglantaw,” *Liahona*, Nob. 2012, 60–67.
10. Tan-awa sa Moises 1:3–6.
11. Mosiiah 18:21; tan-awa usab sa Moses 7:18.
12. “Ang mga batan-ong lalaki kinsa adunay lig-on, positibo nga mga relasyon sa usa ka aktibo nga [Santos sa Ulahing mga Adlaw] nga pamilya, kaedad, ug mga lider, nga makatabang nila sa pagpalambo og relasyon sa ilang Langitnong Amahan, sa kasagaran magpabilin nga aktibo. Piho nga mga elemento sa programa—sama sa kurikulum sa Dominggo, programa sa kalihokan sa



diha sa Ang Simbahan ni Jesukristo sa mga Santos sa Ulahing mga Adlaw, 2.2, ChurchofJesusChrist.org.

- [Young Men], gilauman nga personal nga mga kalampanan. . . mahimong adunay gamay nga epekto nga way kalabutan niana nga mga relasyon. . . Ang importante nga pangutana dili kon unsa ka hingpit ang pag-implementar sa piho nga mga programa kondili sa unsang paagi kini nakatampo/nakatabang sa positibo nga mga relasyon nga nakapalig-on sa relihiyoso nga ilhanan sa [mga Santos sa Ulahing mga Adlaw] nga mga batan-ong lalaki” (diha sa “Be with Them [Pakig-uban Kanila],” ChurchofJesusChrist.org/callings/aaronic-priesthood-quorums/my-calling/leader-instruction/be-with-them).
13. Tan-awa sa “Connect Them with Heaven [Ikonektar Sila ngadto sa Langit],” ChurchofJesusChrist.org/callings/aaronic-priesthood-quorums/my-calling/leader-instruction/connect-them-with-heaven.
 14. Tan-awa sa Juan 15:1–5; Juan 17:11; Mga Taga-Filipos 4:13; 1 Juan 2:6; Jacob 1:7; Omni 1:26; Moroni 10:32.
 15. Ang mga kasulatan puno sa mga ehemplo niini; aniyay duha lang: 1 Nephi 2:16; Enos 1:1–4.
 16. Tan-awa sa Lucas 24:32; 2 Nephi 33:1–2; Jacob 3:2; Moroni 8:26; Doktrina ug mga Pakigsaad 8:2–3.
 17. Tan-awa sa 2 Timoteo 3:15–16; Doktrina ug mga Pakigsaad 68:3–4; 88:66; 113:10.
 18. Tan-awa sa 1 Mga Taga-Tesalonica 1:5; Alma 26:13; 31:5; Helaman 3:29; 5:17; Doktrina ug mga Pakigsaad 21:4–6; 42:61; 43:8–10; 50:17–22; 68:4.
 19. Tan-awa sa Juan 6:63; 17:17; Alma 5:7; Doktrina ug mga Pakigsaad 84:43–45; 88:66; 93:36.
 20. Tan-awa sa Juan 15:3; 1 Pedro 1:23; Mosiah 1:5; Alma 5:7, 11–13; 32:28, 41–42; 36:26; 62:45; Helaman 14:13.
 21. Tan-awa sa 2 Nephi 31:19–21; 32:3, 5.
 22. Russell M. Nelson, “Kita Makabuhat og Mas Maayo pa ug Mahimong mas Maayo;” *Liahona*, Mayo 2019, 67.
 23. Dale G. Renlund, “Magpili Kamo Niining Adlaw,” *Liahona*, Nob. 2018, 104.
 24. Kini nga pigura naglakip sa mga programa sa Scouting, nga hangtud bag-ohay lang kabahin kini sa programa sa kalihokan sa Simbahan alang sa mga batang lalaki ug mga batan-ong lalaki, nga kasagaran sa Estados Unidos ug Canada lang. Sa mga dapit nga wala moapil sa Scouting, ang gikinahanglan nga gidaghanon sobra sa 200. Dugang pa, ang lain-laing mga kalihokan sa mga programa alang sa mga batang lalaki, mga batang babaye, mga batan-ong lalaki ug mga batan-ong babaye lahi ang pagkahan-ay, naghimo sa tibuk kasinatian nga komplikado alang sa mga pamilya.
 25. Tan-awa sa “Let Them Lead [Tugoti Sila nga Mangulo],” ChurchofJesusChrist.org/callings/aaronic-priesthood-quorums/my-calling/leader-instruction/let-them-lead.
 26. Tan-awa sa Omni 1:26; 3 Nephi 9:20; 12:19; Doktrina ug mga Pakigsaad 64:34. “Ang relihiyon nga wala magkinahanglan ug sakripisyo sa tanang butang walay gahum nga igong makaugmad og hugot nga pagtuo nga gikinahanglan sa kinabuhi ug kaluwasan” (*Lectures on Faith* [1985], 69).
 27. Ezra Taft Benson, *The Teachings of Ezra Taft Benson* (1988), 167; sa *Isangyaw ang Akong Ebanghelyo: Usa ka Giya sa Misyonaryo nga Pangalagad* (2019), 13; tan-awa usab sa Russell M. Nelson, “Paglaum sa Israel,” HopeofIsrael. ChurchofJesusChrist.org.
 28. Panagtigum uban ni Elder David A. Bednar, tan-awa usab sa “2020 Temple and Family History Leadership Instruction,” Feb. 27, 2020, ChurchofJesusChrist.org/family-history.
 29. Neal A. Maxwell, “Unto the Rising Generation,” 11. Si Elder Maxwell mipadayon: “Sa aktwal gayud, pila ka mga kapangulohan sa korum sa mga deacon ug mga teacher nga ang ilang katungdanan mao ra ang pagsangon og tawo nga mohatag sa pag-ampo o moapud-apud sa sakramento? Mga kaigsoonan, kini sila espesyal nga mga espiritu, ug makahimo sila og mga butang nga mahinungdanon kaayo kon hatagan og kahigayunan!”
 30. Tan-awa sa *General Handbook: Serving in The Church of Jesus Christ of Latter-day Saints* [Kinatibuk-ang Tamdanan nga Basahon: Pagserbisyo diha sa Ang Simbahan ni Jesukristo sa mga Santos sa Ulahing mga Adlaw], 2.2, ChurchofJesusChrist.org.
 31. Pipila ka mga kapanguhaan makita diha sa Gospel Library aron sa pagtabang sa mga kabatan-onan nga mangulo, lakip na sa “Quorum and Class Presidency Resources,” “Paggamit sa *Dali, Sunod Kanako—Alang sa Korum sa Aaronic nga Pagkapari ug Mga Klase sa mga Young Women*,” ug diha sa mga kapanguhaan alang sa mga batan-ong babaye ug mga korum sa Aaronic nga Pagkapari diha sa “Mga Calling sa Ward o Branch.”
 32. Russell M. Nelson, “Paglaum sa Israel,” HopeofIsrael. ChurchofJesusChrist.org. Atol niining sama nga debosyonal, si Presidente Nelson miingon: “Gireserba sa atong Langitnong Amahan ang daghan sa Iyang labing halangdon nga mga espiritu—tingali, moingon ko, nga labing nindot Niya nga team—alang niining katapusang hugna. Kadtong halangdon nga mga espiritu—kadtong labing maayo nga mga magdudula, kadtong mga bayani—mao kamo!”
 33. Russell M. Nelson, pangbukas nga pakigpulong diha sa “Kabataan ug Kabatan-onan: Usa ka Face to Face nga Kalihokan uban ni Elder Gerrit W. Gong,” Nob. 17, 2019, broadcasts. ChurchofJesusChrist.org.
 34. Si Presidente Nelson miingon: “Angay nga matugutan natong mangulo ang atong mga batan-on, ilabi na niadtong gitawag ug gi-set apart nga moserbisyo sa klase ug sa mga kapangulohan sa korum. Ang katungod sa pagkapari nadelegar na diha nila. Makakat-on sila unsaon sa pagdawat sa inspirasyon sa pagpangulo sa ilang klase o korum” (sa “Children and Youth Introductory Video Presentation,” Sept. 29, 2019, ChurchofJesusChrist.org).
Si Elder Quentin L Cook miingon, “Ang atong kabatan-onan gihangyo sa pagdawat og dugang nga indibidwal nga responsibilidad sa mas batan-ong edad—diin ang mga ginikanan ug mga lider dili mobuhat sa unsay mabuhat sa kabatan-onan alang sa ilang kaugalingon.” (“Mga Kausaban aron sa Paglig-on sa Kabatan-onan,” *Liahona*, Nob. 2019, 40).
 35. Si Presidente George Q. Cannon nagtudlo: “Ang Dios nagreserba og mga espiritu alang niining dispensasyon kinsa adunay kaisug ug determinasyon sa pag-atubang sa kalibutan, ug sa tanang gahum sa yawa, makita ug dili makita, sa pagsangyaw sa ebanghelyo ug sa pagpabilin sa kamatuoran ug sa pag-establisar ug pagtukod sa Zion sa atong Dios dili mahadlok sa tanang mga sangputanan. Mipadala Siya niining mga espiritu sa karon nga henerasyon sa pagpahimutang sa pundasyon sa Zion nga dili na gayud matumpag, ug sa pagpasanay og katawhan nga mahimong matarung, ug motahud sa Dios, ug motahud Kaniya labaw sa tanan, ug magmasulundon ngadto Kaniya sa tanang mga sirkumstansya” (“Remarks,” *Deseret News*, Mayo 31, 1866, 203); tan-awa usab sa Mga Pagtulun-an sa mga Presidente sa Simbahan: Joseph Smith (2007), 221.
 36. Moroni 10:32.



Ni Presidente Henry B. Eyring
Ikaduhang Magtatambag sa Unang Kapangulohan

Mga Pag-ampo uban sa Hugot nga Pagtuo

Kon mag-ampo kita uban sa hugot nga pagtuo, mahimo kitang mahinungdanong bahin sa buhat sa Ginoo samtang Siya nag-andam sa kalibutan sa Iyang ikaduhang Pag-anhi.

Ang pag-ampo ni Elder Maynes sa pagsugod sa sesyon niining una nga sesyon sa kinatibuk-ang komperensya natubag. Ang inspirasyon miabut kanato pinaagi sa maanindot nga mga mensahe ug matahum nga musika. Ang saad ni Presidente Russell M. Nelson nga kini nga komperensya halandumon nagsugod na sa pagkatuman.

Si Presidente Nelson mitakda niini nga tuig isip “ika-200 nga tuig nga kasaulugan [bicentennial] sukad ang Dios nga Amahan ug Iyang Hinigugmang Anak, si Jesukristo, mipakita kang Joseph Smith sa usa ka pananawon.” Si Presidente Nelson midapit kanato sa paghimo og personal nga plano sa pag-andam sa atong kaugalingon alang niining makasaysayanong komperensya, diin nga pagsaulog miingon siya nga “usa ka impluwensyal nga kausaban sa kasaysayan sa Simbahan, ug ang inyong bahin mahinungdanon.”¹

Sama nako, tingali nakadungog kamo sa iyang mensahe ug nakapangutana sa inyong kaugalingon, “Sa unsang paagi ang akong bahin mahinungdanon?” Tingali nagbasa kamo

ug nag-ampo mahitungod sa mga hitabo sa Pagpahiuli. Tingali, labaw pa kay sa kaniadto, nabasa ninyo ang mga gisaysay niadto pipila na ka higayon dihang ang Dios nga Amahan mipaila sa Iyang Hinigugmang Anak. Tingali nabasa ninyo ang mga higayon dihang ang Manluluwas namulong sa mga anak sa atong Langitnong Amahan. Ako nasayud nga akong nabuhat kadtong tanang butanga ug dugang pa.

Nakakita ko og mga panimaan [reference] sa akong pagbasa sa pagkapari sa Dios ug sa pag-abli sa mga dispensasyon. Napaubos ko sa akong pagkaamgo ko nga ang akong pagpangandam niining komperensya usa ka impluwensyal nga kausaban sa kaugalingon nakong kasaysayan. Gibati nako ang mga kausaban sa akong kasingkasing. Akong gibati ang bag-ong pagpasalamat. Gibati nako ang kalipay nga ako gidapit nga makaapil niining selebrasyon sa padayon nga Pagpahiuli.

Akong mahunahuna ang pagbati sa uban, tungod sa mainampingon nga pagpangandam, mas malipayon, mas malaumon, ug mas determinado nga

moserbisyo sa bisan unsang kapasidad nga gikinahanglan sa Ginoo.

Ang labaw pa sa ordinaryong mga kasinatian nga atong gitamud maoy mga sinugdanan sa gitagna nga katapusang dispensasyon, diin ang Ginoo nag-andam sa Iyang Simbahan ug sa Iyang katawhan, niadtong nanagdala sa Iyang ngalan, sa pagdawat Kaniya. Isip kabahin sa atong preparasyon sa Iyang pag-anhi, Siya motabang kanato atol sa espiritwal nga mga hagit ug mga oportunidad nga lahi sa unsay nakita sa kasaysayan niini nga kalibutan.

Niadtong Septyembre 1840, si Propeta Joseph Smith ug ang iyang mga magtatambag sa Unang Kapangulohan mipahayag sa mosunod: “Ang buluhaton sa Ginoo niining katapusan nga mga adlaw, usa ka lapad nga luna ug ingon og lapas pa kini sa panabut sa mga tawo. Ang mga himaya niini dili mahulagway, ug ang kaanindot walay makatupong. Kini ang tema nga mipalagsik sa dughan sa mga propeta ug sa matarung nga mga katawhan sugod sa pagmugna sa kalibutan paubos ngadto sa nagsunod nga mga henerasyon hangtud sa kasamtangang panahon; ug sa pagkatinuod mao kini ang dispensasyon sa kahingpitan sa panahon, kon ang tanan nga mga butang nga anaa ni Kristo Jesus, maanaa man sa langit o sa yuta, mapundok ang tanan diha Kaniya, ug kon ang tanang mga butang mapahiuli, sumala sa gipamulong sa mga balaang propeta sukad pa sa sinugdanan sa kalibutan; kay niini mahitabo ang mahimayaon nga katumanan sa mga panaad nga gihimo ngadto sa mga amahan, samtang ang mga pagpakita sa gahum sa Labing Halangdon mahimong talagsaon, mahimayaon, ug madasigon.”

Gipadayon nila sa pag-ingon: “Gibati namo nga andam sa pagpadayon ug sa paghiusa sa among mga kusog alang sa kalamboan sa Gingharian, ug pagestablisar sa Priesthood sa kahingpitan niini ug kahimayaan. Ang buluhaton nga kinahanglang humanon sa katapusan nga mga adlaw maoy usa ka mahinungdanon kaayo, ug nagkinahanglan sa kusog, kahanas, talento, ug abilidad



sa mga Santos, aron kini mokaylap uban niana nga himaya ug kahalangdon nga gihulagway sa propeta [Daniel] [tan-awa sa Daniel 2:34–35, 44–45]; ug hinungdan kini nga gikinahanglan ang halawom nga paghunahuna sa mga Santos, aron matuman ang mga buluhaton nga ingon ka daghan ug hilabihan kaanindot.”²

Daghan sa mga detalye nga atong buhatunon ug kon kanus-a nato kini buhaton sa gibutyag nga Pagpahiuli wala pa ipadayag. Apan ang Unang Kapangulohan gani niadtong unang mga adlaw nasayud sa kalapdon ug kaladmon sa buhat sa Ginoo nga gipahimutang ngari kanato. Ania ang pipila ka mga ehemplo sa unsay atong nahibaloan nga manghitabo:

Pinaagi sa Iyang mga Santos, ang Ginoo motanyag sa gasa sa Iyang ebanghelyo “ngadto sa matag kanasuran, kaliwatan, pinulongan, ug katawhan.”³ Ang teknolohiya ug mga milagro magpadayon sa iyang bahin— isip tinagsa-tagsang “mangingisdag tawo”⁴ kinsa mangalagad uban sa gahum ug sa naglambo nga pagtuo.

Kita isip katawhan mas magkahiusa bisan sa nagkadaghang panagbangi. Kita pundukon diha sa espirital nga kalig-on sa mga pundok ug mga pamilya nga puno sa kahayag sa ebanghelyo.

Gani ang dili matuohon nga kalibutan moila sa Ang Simbahan ni Jesukristo sa mga Santos sa Ulahing mga Adlaw ug makahibalo sa gahum sa Dios nga anaa niini. Ang matinudanon ug maisugon nga mga disipulo walay kahadlok, mapaubsanon, ug walay lipud-lipod nga modala diha kanila sa ngalan ni Kristo sa ilang inadlaw-adlaw nga kinabuhi.

Nan, sa unsang paagi ang matag usa nato makaapil niini nga buhat sa ingon nianang kalapdon ug kahalangdon? Si Presidente Nelson mitudlo kanato kon unsaon nato nga molambo sa espirital nga gahum. Kon kita modawat sa paghinulsol isip malipayong oportunidad tungod sa naglambo natong pagtuo kang Jesus nga mao ang Kristo, kon masabtan ug motuo kita nga ang Langitnong Amahan maminaw sa atong tanan nga pag-ampo, kon maningkamot kita sa

pagtuman ug pagsunod sa mga sugo, motubo ang atong gahum sa pagdawat og padayon nga pagpadayag. Ang Espiritu Santo mahimo natong padayon nga kauban. Ang pagbati nga kahayag magpabilin kanato bisan og magkangitngit ang kalibutan sa atong palibut.

Si Joseph Smith usa ka ehemplo kon unsaon sa pagpalambo og ingon nianang espirital nga gahum. Iyang gipakita kanato nga ang pag-ampo uban sa pagtuo maoy yawe sa pagpadayag gikan sa Dios. Siya nag-ampo uban sa hugot nga pagtuo, nga ang Dios nga Amahan motubag sa iyang mga pag-ampo. Siya nag-ampo uban sa pagtuo, nga pinaagi lamang kang Jesukristo siya mahaw-as gikan sa gibati niyang kahamol tungod sa iyang mga sala. Ug nag-ampo siya uban sa pagtuo, nasayud nga nagkinahanglan siyang makakita sa tinuod nga Simbahan ni Jesukristo aron maangkon kana nga kapasayloan.

Sa tibuok niyang mapanagnaong pagpangalagad, si Joseph Smith migamit sa mga pag-ampo uban sa hugot nga pagtuo sa pag-angkon sa padayong pagpadayag. Samtang magatubang kita sa mga hagit karon ug sa mga umaabutt, kita usab nagkinahanglan sa sama nga sundanan. Si Presidente Brigham Young miingon, “Wala akoy nahibaloang lahi nga paagi para sa mga Santos sa Ulahing mga Adlaw kay sa kinasingsing nga pag-ampo sa tanang higayon alang sa Dios aron mogiya ug motudlo sa iyang katawhan.”⁵

Kining mga pulong nga gikan sa mga pag-ampo sa sakramento kinahanglan nga maghulagway sa atong inadlaw nga kinabuhi: “Kanunay mohinumdom kaniya.” Ang “Kaniya” nagpasabut kang Jesukristo. Ang sunod nga mga pulong, “ug mohupot sa iyang mga sugo,” nagsugyot unsay ipasabut sa paghinumdom Kaniya.⁶ Kon kanunay kitang mohinumdom ni Jesukristo kanunay, tingali mangutana kita sa hilum nga pag-ampo, “Unsa ang gusto Niya nga akong buhaton?”

Ang mao nga pag-ampo, gihalad uban sa hugot nga pagtuo kang

Jesukristo, nga gisugdan niining katapusang dispensasyon. Ug mahinungdanon kining buluhaton sa matag usa kanato sa padayon nga pagpadayag. Ako nakakita, sama ninyo, sa talagsaong mga ehemplo sa ingon niana nga pag-ampo.

Una si Joseph Smith. Nangutana siya sama sa pagtuo sa usa ka bata unsay ipabuhat kaniya sa Ginoo. Ang Iyang tubag miusab sa kasaysayan sa kalibutan.

Para nako, usa ka pinakaimportanting leksyon naggikan sa pagtubag ni Joseph sa pag-atake ni Satanas samtang miluhod si Joseph sa pag-ampo.

Akong nahibaloan gikan sa kasinatian nga si Satanas ug ang iyang mga sulugoon naningkamot aron mobati kita nga dili kinahanglang mag-ampo. Dihang si Joseph Smith nanglimbasug gayud sa pagtawag sa Dios aron siya luwason gikan sa gahum nga misulay sa paggapos kaniya, ang iyang pag-ampo alang sa kahupayan natubag ug ang Langitnong Amahan ug si Jesukristo mipakita.

Ang paningkamot ni Satanas nga mapugngan ang pagsugod sa Pagpahiuli hilabihan gayud kay ang pag-ampo ni Joseph importante kaayo. Ikaw ug ako adunay gagmayng bahin nga ikatampo sa padayon nga Pagpahiuli. Sa gihapon ang kaaway sa Pagpahiuli mosulay sa pagpugong kanato sa pag-ampo. Ang ehemplo sa hugot nga pagtuo ni Joseph ug ang iyang determinasyon makalig-on sa atong pagdesisyon. Usa kini sa daghang rason nganong ang akong mga pag-ampo naglakip og mga pagpasalamat sa Langitnong Amahan alang ni Propeta Joseph.

Si Enos sa Basahon ni Mormon usa ka laing modelo sa akong pag-ampo diha sa hugot nga pagtuo samtang maningkamot ko sa paghimo sa akong bahin sa padayon nga Pagpahiuli. Bisan unsa ang inyong bahin, pwede usab ninyo siyang gamiton isip personal nga tigmatuto.

Sama ni Joseph, si Enos nag-ampo uban sa hugot nga pagtuo. Gihulagway niya ang iyang kasinatian sa ingon niini nga paagi:

“Ug ang akong kalag gigutom; ug ako miluhod sa atubangan sa akong Magbubuhat, ug ako nangamuyo ngadto kaniya sa hilabihan nga pag-ampo ug nangaliya alang sa akong kaugalingon nga kalag; ug sa tibuk adlaw ako nangamuyo ngadto kaniya; oo, ug sa diha nga midangat ang kagabhion ako sa gihapon mipataas sa akong tingog pag-ayo nga kini miabut sa mga kalangitan.

“Ug dihay miabut nga usa ka tingog ngari kanako, nag-ingon: Enos, ang imong mga sala gipasaylo na, ug ikaw panalanginan.

“Ug ako, si Enos, nasayud nga ang Dios dili magbakak; busa, ang akong kasaypanan nakuha sa hingpit.

“Ug ako miingon: Ginoo, giunsa kini pagbuhat?”

“Ug siya miingon ngari kanako: Tungod sa imong hugot nga pagtuo ni Kristo, si kinsa ikaw wala pa gayud sukad makadungog ni makakita. Ug daghan nga mga katuigan ang mola-bay unà siya mopakita sa iyang kaugalingon diha sa lawas; busa, makalakaw ka na, ang imong hugot nga pagtuo nakahimo kanimong hinlo.”⁷

Ang leksyon nga mipanalangin kanako ania niini nga mga pulong: “Tungod sa imong hugot nga pagtuo ni Kristo, kinsa wala pa gayud nimo madungog o makita.”

Si Joseph adunay hugot nga pagtuo diha kang Kristo sa pag-adto sa kakahoyan ug sa pag-ampo usab aron makabuhi gikan sa mga gahum sa kaaway. Wala pa siya makakita sa Amahan ug sa Anak, apan nag-ampo siya diha sa hugot nga pagtuo sa tanang kusog sa iyang kasingkasing.

Ang kasinatian ni Enos nagtudlo kanako sa mao gihapong bililhon nga leksyon. Kon mag-ampo ko uban sa hugot nga pagtuo, anaa ang Manluluwas nga akong maglalaban ngadto sa Amahan ug mobati ko nga mosangko sa langit ang akong mga pag-ampo. Mga tubag moabut. Mga panalangin madawat. Adunay kalinaw ug kalipay bisan sa lisud nga mga panahon.

Akong nahinumduman nga, isip kinabag-ohang sakop sa Korum sa Napulog Duha ka mga Apostoles,

miluhod ko sa pag-ampo uban ni Elder David B. Haight. Susama ang iyang edad kanako karon, ug sa mga hagit nga karon akong gisinati. Nahinumdom ko sa Iyang tingog dihang nag-ampo siya. Wala ko mobuka sa akong mga mata aron motan-aw, apan ingon kini og nagpahiyom siya. Nakigsulti siya sa Langitnong Amahan uban sa kamaya sa iyang tingog.


Akong mabati sa akong hunahuna ang kalipay dihang miingon siya, “Sa ngalan ni Jesukristo.” Para nako daw si Elder Haight mibati sa pagmatuod sa Manluluwas nianang higayona ang mensahe nga iyang giampo ngadto sa Amahan. Ug sigurado ko nga gidawat kini uban sa pahiyom.

Ang atong katakus sa paghimo sa atong mahinungdanong kontribusyon sa talagsaon nga nagpadayong Pagpahiuli molambo samtang magtubo ang atong pagtuo diha kang Jesukristo isip atong Manluluwas ug atong Langitnong Amahan isip atong Amahan nga mahigugmaon. Kon mag-ampo kita uban sa hugot nga pagtuo, mahimo kitang mahinungdanong bahin sa buhat sa Ginoo samtang Siya nag-andam sa kalibutan sa Iyang ikaduhang Pag-anhi. Nag-ampo ako nga kitang tanan makakaplag og kalipay sa paghimo sa buhat nga Siya nagdapit sa matag usa kanato nga buhaton.

Mopamatuod ko nga si Jesukristo buhi. Kini Iyang Simbahan ug ginghamarian dinhi sa yuta. Si Joseph Smith ang propeta sa Pagpahiuli. Si Presidente Russell M. Nelson ang propeta sa Ginoo sa kalibutan karon. Siya ang naggunit sa tanang yawe sa pagkapani sa Ang Simbahan ni Jesukristo sa mga Santos sa Ulahing mga Adlaw. Sa ngalan ni Jesukristo, amen. ■

MUBO NGA MGA SULAT

1. Russell M. Nelson, “My 2020 Invitation to You: Share the Message of the Restoration of the Savior’s Gospel,” Ene. 1, 2020, blog. ChurchofJesusChrist.org.
2. *Mga Pagtulun-an sa mga Presidente sa Simbahan: Joseph Smith* (2007), 621.
3. Mosiah 15:28.
4. Mateo 4:19.
5. *Discourses of Brigham Young*, pin. John A. Widtsoe (1954), 43–44.
6. Doktrina ug mga Pakigsaad 20:77.
7. Enos 1:4–8.



Gipresentar ni Presidente Dallin H. Oaks
Unang Magtatambag sa Unang Kapangulohan

Pagpaluyo sa mga General Authority, mga Area Seventy, ug Kinatibuk-ang mga Opisyales

Mga kaigsoonan, ako na karong ipresentar ang mga General Authority, mga Area Seventy, ug Kinatibuk-ang mga Opisyales sa Simbahan alang sa inyong pagpaluyo nga boto.

Palihug ipahayag ang inyong boto sa naandan nga paagi bisan asa man kamo. Kon anaay mosupak sa bisan hain sa gisugyot, kami mohangyo sa pagkontak sa inyong presidente sa stake.

Gisugyot nga atong paluyohan si Russell Marion Nelson isip

propeta, manalagna, ug tigpadayag ug Presidente sa Ang Simbahan ni Jesukristo sa mga Santos sa Ulahing mga Adlaw; Dallin Harris Oaks isip Unang Magtatambag sa Unang Kapangulohan; ug Henry Bennion Eyring isip Ikaduhang Magtatambag sa Unang Kapangulohan.

Kadtong uyon mahimong mopakita niini.

Kadtong supak, kon aduna, mahimong mopakita niini.

Gisugyot nga atong paluyohan si Dallin H Oaks isip Presidente sa Korum sa Napulog Duha ka mga Apostoles ug si M Russell Ballard isip Akting nga Presidente sa Korum sa Napulog Duha ka mga Apostoles.

Kadtong uyon, palihug ipakita kini.

Bisan kinsa nga supak mahimong mopakita niini.

Gisugyot nga atong paluyohan ang mosunod isip mga sakop sa Korum sa Napulog Duha ka mga Apostoles: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, ug si Ulisses Soares.

Kadtong uyon, palihug ipakita kini.

Si bisan kinsa nga mosupak mahimong mopakita niini.

Gisugyot nga atong paluyohan ang mga magtatambag sa Unang Kapangulohan ug ang Napulog Duha ka mga Apostoles isip mga propeta, manalagna, ug mga tigpadayag.

Ang tanang uyon, palihug ipakita kini.

Ang dili uyon, kon aduna, sa samang paagi.

Gisugyot nga atong i-release ang mosunod isip mga Area Seventy: Sila si Elder Jorge T. Becerra, Mark S. Bryce, Jeremy R. Jaggi, Kelly R. Johnson, Adeyinka A. Ojediran, ug Moisés Villanueva.

Kadtong kinsa moapil kanamo sa pagpadayag og pasalamat sa ilang maayo kaayo nga pagserbisyo, palihug ipakita kini.

Gisugyot nga atong i-release uban sa kinasingkasing nga pasalamat ang Kinatibuk-ang Kapangulohan sa Young Men nga ang mosunod: Stephen W. Owen isip Presidente, Douglas D. Holmes isip Unang Magtatambag, ug M. Joseph Brough isip Ikaduhang Magtatambag.

Ang tanang gustong moapil kanamo sa pagpasalamat niining mga kaigsoonan sa ilang talagsaong pagserbisyo, palihug ipakita kini.

Gisugyot nga atong paluyohan ang mosunod isip mga General



Curitiba, Paraná, Brazil

Authority Seventy: Jorge T. Becerra, Matthew S. Holland, William K. Jackson, Jeremy R. Jaggi, Kelly R. Johnson, Thierry K. Mutombo, Adeyinka A. Ojediran, Ciro Schmeil, ug Moisés Villanueva.

Ang tanang uyon, palihug ipakita kini.

Kadtong supak, sa samang paagi.

Gisugyot nga atong paluyohan ang mosunod isip mga Area Seventy: Jay D. Andersen, Faapito Auapaau, Frederick K. Balli Jr., Kevin W. Birch, John W. Boswell III, J. Francisco Bühner, Suchat Chaichana, Matthew R. Clarke, L. Guido Cristobal, Edmarc R. Dumas, Carlos A. Gabaldón, M. Andrew Galt IV, Clark G. Gilbert, Leonard D. Greer, Vladislav Y. Gornostaev, D. Martin Goury, Richard I. Heaton, Broc C. Hiatt, David H. Huntsman, Norman C. Insong, Daniel Kabason, Federico M. Kähnlein, Jeffrey J. Kerr, Youngjoon Kwon, David G. LaFrance, Ricardo C. Leite, Marcelo Louza, Jose G. Manarin, Jeremiah J. Morgan, Mark A. Mortensen, Eduardo F. Ortega, Nathan D. Pace, Michael M. Packer, Omar I. Palacios, Jorge W. Pérez, Kyrylo Pokhlyk, Sergio A. Poncio, Arthur Rascon, Miguel A. Reynoso, Gustavo G. Rezende, Robert G. Rivarola, Tonga J. Sai, Luciano Sankari, Rosendo Santos, Henry Savstrom, J. Matthew Scott, James E. Slaughter, Robert T. Smith, Ricardo A. Spencer, Colin C. Stauffer, David C. Stewart, Jared W. Stone, Arlen M. Tumaliuan, Martin J. Turvey, Yan C. Vega, Paul B. Whippy, Chad R. Wilkinson, ug si Dow R. Wilson.

Ang tanang uyon, palihug ipakita kini.

Kadtong supak, kon aduna.

Gisugyot nga atong paluyohan isip ang bag-ong Kinatibuk-ang Kapangulohan sa Young Men si Steven J. Lund isip Presidente, Ahmad Saleem Corbitt isip Unang Magtatambag, ug Bradley Ray Wilcox isip Ikaduhang Magtatambag.

Kadtong uyon mahimong mopakita niini.

Si bisan kinsa nga supak sa samang paagi ipakita.

Gisugyot nga atong paluyohan ang ubang mga General Authority, mga Area Seventy, ug Kinatibuk-ang mga Opisyalas ingon nga naglangkob karon.

Ang tanang uyon, palihug ipakita kini.

Kadtong supak, kon aduna.

Usab, gidapit namo kadtong misupak sa bisan hain sa gisugyot sa pagkontak sa ilang mga presidente sa stake.

Mapasalamaton kami sa ang inyong nagpadayon nga hugot nga pagtuo ug mga pag-ampo alang sa mga lider sa Simbahan. ■

Report sa Church Auditing Department, 2019

Gipresentar ni Kevin R. Jergensen

Tigdumalang Direktor, Church Auditing Department

Ngadto sa Unang Kapangulohan sa Ang Simbahan ni Jesukristo sa mga Santos Ulahing mga Adlaw

Minahal nga mga Kaigsoonan: Sumala sa gisulti sa pagpadayag diha sa seksyon 120 sa Doktrina ug mga Pakigsaad, ang Konseho sa Paggasto sa Ikapulo—gilangkuban sa Unang Kapangulohan, sa Korum sa Napulog Duha ka mga Apostoles, ug sa Presiding Bishopric—nagtugot sa paggasto sa mga pundo sa Simbahan. Ang mga departamento sa Simbahan moapud-apud sa mga pundo nga pinasubay sa giaprubahan nga mga badyet, mga polisiya ug mga pamaagi.

Ang Church Auditing, nga gilangkuban sa mga propesyonal nga dunay mga kredensyal ug independente sa tanang ubang mga departamento sa Simbahan, adunay responsibilidad sa pagpahigayon og mga audit aron sa paghatag og resonable nga kasiguroan kabahin sa mga amot nga nadawat, mga galastuhan nga nahimo, ug sa pagbantay sa mga kabtangan sa Simbahan.

Base sa mga pag-audit nga gihimo, ang Church Auditing nagtuo nga, sa tanang importanting detalye, ang mga amot nga nadawat, mga paggasto nga gihimo, ug mga kabtangan sa Simbahan alang sa tuig 2019 narekord ug nadumala sumala sa giaprubahan nga mga badyet, mga polisiya, ug mga pamaagi sa accounting sa Simbahan. Ang Simbahan nagsunod sa mga pagtulun-an nga gitudlo ngadto sa mga miyembro niini nga magpu-yo sumala sa badyet, molikay sa utang, ug magtigum alang sa panahon sa panginahanglan.

Matinahurong gisumiter,
Church Auditing Department
Kevin R. Jergensen
Tigdumalang Direktor ■



Ni Elder Ulisses Soares
Sa Korum sa Napulog Duha ka mga Apostoles

Ang Pagtungha sa Basahon ni Mormon

Ang makasaysayanong mga kamatuoran ug ang espesyal nga mga saksi sa Basahon ni Mormon nagpamatuod nga ang pagtungha niini milagroso gayud kaayo.

Samtang nakigtigum uban sa mga elders sa Simbahan sa usa ka okasyon, si Propeta Joseph Smith namahayag: “Kuhaa ang Basahon ni Mormon ug ang mga pagpadayag, ug asa man ang atong relihiyon? Wala kitay relihiyon.”¹ Minahal kong kaisogon, sunod sa Unang Panan-awon, ang milagroso nga pagtungha sa Basahon ni Mormon mao ang ikaduha nga sukaranan nga panghitabo sa pagbutyag sa Pagpahiuli sa ebanghelyo ni

Jesukristo niining dispensasyon. Ang Basahon ni Mormon nagpamatuod sa gugma sa Dios alang sa Iyang mga anak, sa dili hinakog ug balaan nga maulaong sakripisyo sa Ginoo nga si Jesukristo, ug sa Iyang madaugon nga pangalagad taliwala sa mga Nephite wala madugay human sa Iyang Pagkabanhaw.² Nagpamatuod usab kini nga ang salin sa balay ni Israel mahimong mahiusa pinaagi sa Iyang buhat sa ulahing mga adlaw ug nga sila wala gisalikway hangtud sa kahangturan.³

Samtang atong tun-an ang pagtungha niining balaang basahon sa kasulatan niining ulahing mga adlaw, kita makaamgo nga ang tibuok paningkamot milagroso—gikan sa Propetang Joseph sa pagdawat sa bulawan nga mga palid gikan sa balaan nga anghel hangtud sa paghubad niini uban sa “gasa ug gahum sa Dios,”⁴ ang pagtagana niini, ug pagpamantala niini pinaagi sa kamot sa Ginoo.

Ang pagtungha sa Basahon ni Mormon dugay nang gisugdan sa wala pa nadawat ni Joseph Smith ang bulawan nga mga palid gikan sa mga kamot ni anghel Moroni. Ang karaan

nga mga propeta nanagna mahitungod sa pagtungha niining sagradong basahon sa atong panahon.⁵ Si Isaias namulong kabahin sa usa ka selyado nga libro, nga kon kini motunga ang katawhan makig-away batok sa pulong sa Dios. Kini nga kahintang makahatag sa konteksto diin ang Dios makahimo sa Iyang “katingalahan nga buhat ug usa ka kahibulongan,” hinungdan sa “kaalam sa ilang malalamon nga mga tawo [nga] mahanaw, ug ang pagsabut sa ilang mabuot nga mga tawo [mahimong] matago,” samtang ang maaghup “magadugang sa ilang kalipay kang Jehova, ug ang mga kabus sa taliwala sa mga tawo magakalipay sa Balaan sa Israel.”⁶ Si Ezekiel namulong mahitungod sa sungkod ni Juda (ang Biblia) ug sa sungkod ni Ephraim (ang Basahon ni Mormon) gihugpong nga mahiusa. Si Ezekiel (diha sa Daang Tugon) ug si Lehi (diha sa Basahon ni Mormon) nagpakita nga kini “magkahiusa” ngadto sa pagsupak sa sayop nga mga doktrina, sa pagpahiluna sa kalinaw, ug pagdala [kanato] sa kasayuran sa mga pakigsaad.⁷

Sa gabii sa Septyembre 21, 1823, tulo ug tunga ka tuig human nasinati ang Unang Panan-awon, si Joseph gibisita sa makatulo ka higayon ni anghel Moroni, ang katapusan nga propeta sa mga Nephite sa karaang Amerika, isip usa ka resulta sa iyang sinsero nga pag-ampo. Atol sa ilang panag-istorya nga milungtad sa tibuok gabii, si Moroni misulti ni Joseph nga ang Dios adunay kahibulongan nga buhat nga ipatuman kaniya—ang paghubad ug pagpamantala ngadto sa kalibutan sa mga dinasig nga mga pulong sa karaang mga propeta sa kontinente sa Amerika.⁸ Sa sunod nga adlaw, si Joseph miadto sa dapit, dili layo gikan sa iyang panimalay, diin ang mga palid gilubong ni Moroni atol sa katapusan sa iyang kinabuhi, mga siglo ang nangagi. Didto, si Joseph nakakita pagusab ni Moroni, kinsa misugo kaniya sa pag-andam sa iyang kaugalingon sa pagdawat sa mga palid sa umaabut.

Sa misunod nga upat ka tuig, niadtong Septyembre 22 sa matag tuig,



Bountiful, Utah, USA

si Joseph nakadawat og dugang nga mga panudlo gikan ni Moroni kalabut sa kahibalo mahitungod kon unsaon sa pagdumala ang gingharian sa Dios sa ulahing mga adlaw. Ang pagpangandam ni Joseph naglakip usab sa mga pagbisita gikan sa mga anghel sa Dios, sa ingon gipadayag ang kaharianon ug himaya sa mga panghitabo nga moabut niining dispensasyon.⁹

Ang iyang kaminyoon ngadto ni Emma Hale niadtong 1827 kabahin niana nga pagpangandam. Importante ang iyang papel sa pagtabang sa Propeta sa iyang tibuok kinabuhi ug pagpangalagad. Gani, niadtong Septyembre 1827, si Emma miuban kang Joseph ngadto sa bungtod diin ang mga palid gitago, ug siya mihulat kaniya samtang si anghel Moroni mitunol sa rekord ngadto sa mga kamot ni Joseph. Si Joseph midawat sa saad nga ang mga palid matagana kon siya mopahinungod sa tanan niyang paningkamot aron mapabilin kining luwas hangtud nga kini mabalik ngadto sa mga kamot ni Moroni.¹⁰

Minahal kong mga kauban sa ebanghelyo, daghan karong mga pagdiskobre gikan sa karaan nga mga panahon nga mitumaw atol sa archaeological nga pagkubkob o gani sulagma lang atol sa pagtukod og proyekto. Si Joseph Smith, hinoon, gigiyahan ngadto sa mga palid pinaagi sa usa ka anghel. Kana nga sangputanan mismo usa ka milagro.

Ang proseso sa paghubad sa Basahon ni Mormon usa usab ka milagro. Kining sagrado nga karaang rekord wala “gihubad” diha sa tradisyonal nga paagi nga ang mga eskolar mohubad sa karaan nga mga teksto pinaagi sa pagkat-on sa karaan nga pinulongan. Kita angay nga molantaw pa sa proseso nga sama og “pagpadayag” uban sa tabang sa pisikal nga kahimanan nga gihatag sa Ginoo, sukwahi ngadto sa “paghubad” pinaagi sa tawo nga dunay kahibalo sa mga pinulongan. Si Joseph Smith namahayag nga pinaagi sa gahum sa Dios siya “[mihubad sa] Basahon ni Mormon gikan sa sinulat sa karaang Ehipto [hieroglyphs], diin ang kahibalo nawala sa kalibutan, diin ang talagsaong hitabo



PAGHULAGWAY PINAAGI NI JOSHUA DENNIS

nagbarug [siyang] nag-inusara, usa ka batan-on nga walay kinaadman, sa pagpakig-away sa kaalam sa kalibutan ug gidugangan sa pagkaignorante sa ikanapulog walo nga siglo, uban sa bag-ong pagpadayag.”¹¹ Ang tabang sa Ginoo diha sa paghubad sa mga palid—o sa pagpadayag, sa ingon nga pagkasulti—makita usab kon maghunahuna sa milagro sa kamubo sa panahon nga nagamit ni Joseph Smith sa paghubad niini.¹²

Ang mga tigsulat ni Joseph mipamatuod sa gahum sa Dios nga gipakita samtang nagtrabaho sa paghubad sa Basahon ni Mormon. Si Oliver Cowdery sa makausa miingon: “Kini ang mga adlaw nga dili gayud makalimtan—nga naglingkod ubos sa tunog sa usa ka tingog nga gidiktahan pinaagi sa dinasig sa langit, nakapahigmata sa tuman nga pagpasalamat niini nga dughan! Adlaw-adlaw ako mipadayon, sa walay hunong, sa pagsulat gikan

sa iyang ba-ba, samtang siya mihubad sa . . . ‘Basahon ni Mormon.’”¹³

Ang mga tinubdan sa kasaysayan nagbutyag nga sukad sa higayon nga si Joseph Smith nakabaton sa mga palid niadtong 1827, dunay mga misulay sa pagkawat niini gikan kaniya. Misulti siya nga “ang labing pinugsanay nga tinguha gigamit aron sa pagkuha [sa mga palid] gikan [kaniya]” ug nga “matag paagi nga nahunahunaan gigamit sa mao nga katuyoan.”¹⁴ Si Joseph ug si Emma sa katapusan napugos sa pagbalhin gikan sa Manchester, New York, ngadto sa Harmony, Pennsylvania, aron makakita og luwas nga dapit aron makapadayon sa buhat sa paghubad, layo gikan sa mga manggugubot nga panon ug sa mga indibidwal kinsa gusto nga mokawat sa mga palid.¹⁵ Sumala sa usa ka historian: “Sa ingon natapos ang unang malisud nga hugna sa pagkapiniyalan ni Joseph ngadto sa mga

palid. . . . Apan ang mga rekord luwara, ug ang iyang mga panglimbasug sa pagtagana niini si Joseph walay pagduda nga nakat-on og daghan mahitungod sa mga pamaagi sa Dios ug sa tawo nga makaayo kaniya sa panahon nga moabut.”¹⁶

Samtang naghubad sa Basahon ni Mormon, si Joseph nakat-on nga ang Ginoo mopili og mga saksi aron makakita sa mga palid.¹⁷ Kini kabahin sa unsay giestablisar sa Ginoo Mismo sa dihang Siya miingon, “Diha sa ba-ba sa duha o tulo ka mga saksi nga ang matag pulong matukod.”¹⁸ Si Oliver Cowdery, David Whitmer, ug si Martin Harris, kinsa mao ang pipila sa nag-unang mga kauban ni Joseph diha sa pagtukod sa kahibulongan nga buhat sa Dios niining dispensasyon, mao ang unang mga saksi nga gitawag sa paghatag og espesyal nga pagpamatuod sa Basahon ni Mormon ngadto sa kalibutan. Sila mipamatuod nga ang usa ka anghel, kinsa naggikan sa presensya sa Ginoo, mipakita kanila sa karaang rekord ug nga ilang nakita ang mga letra nga gikulit diha sa mga palid. Sila mipamatuod usab nga nakadungog sila sa tingog sa Dios gikan sa Langit nga nagpahayag nga ang karaang rekord gihubad pinaagi sa gasa ug gahum sa Dios. Dayon sila gimandoan sa pagpamatuod niini ngadto sa tibuok kalibutan.¹⁹

Ang Ginoo pinaagi sa milagro mitawag og laing walo ka saksi aron makita ang mga palid nga bulawan sa ilang kaugalingon ug mahimo nga talagsaon nga mga saksi sa kamatuoran ug sa ka balaanon sa Basahon ni Mormon ngadto sa kalibutan. Sila mipamatuod nga ilang nakita ug gisusi og maayo ang mga palid ug ang kinulit nga mga letra. Bisan taliwala sa mga kalisdanan, mga pagpanggukod, tanang matang sa kalisdanan, ug gani pipila kanila napukan sa ilang pagtuo, kining napulog usa nga pinili nga mga saksi sa Basahon ni Mormon wala gayud milimud sa ilang mga pagpamatuod nga sila nakakita sa mga palid. Si Joseph Smith wala na nag-inusara uban sa kahibalo sa pagbisita ni Moroni ug sa bulawan nga mga palid.

Si Lucy Mack Smith misulat nga ang iyang anak nga lalaki miabut sa

panimalay nga gibuntog sa kalipay human ang mga saksi gipakita sa mga palid. Si Joseph mipasabut ngadto sa iyang mga ginikanan, “akong gibati nga ingon og migaan ang akong salagubangon nga bug-at na kaayo alang nako; ug kini nakapalipay nako, nga wala na gayud ako mag-inusara sa kalibutan.”²⁰

Si Joseph Smith nag-atubang og daghan kaayong oposisyon sa pagprinta sa Basahon ni Mormon samtang ang paghubad niini naghinapos na. Siya nakahimo sa pagkumbinser sa tig-imprinta nga ginganlan og Egbert B. Grandin sa Palmyra, New York, sa pagprinta niini human lang si Martin Harris, agi sa pagbuhat sa dakong pagtuo ug sakripisyo, moprenda sa iyang umahan isip kolateral alang sa galastuhan sa pagpaprinta. Tungod sa nagpadayon nga oposisyon human sa pagpamantala sa Basahon ni Mormon, si Martin Harris matinud-anong mibaligya sa 151 ka acre (0.6 km²) sa iyang umahan aron pag-impas sa kantidad sa pagpamantala. Pinaagi sa pagpadayag nga gihatag ngadto ni Joseph Smith, ang Ginoo misugo ni Martin Harris nga dili mahinugon sa iyang kabtangan ug mobayad sa kantidad sa pagprinta alang sa basahon nga “gilangkuban sa kamatuoran ug sa pulong sa Dios.”²¹ Niadtong Marso 1830 ang unang 5,000 ka kopya sa Basahon ni Mormon namantala, ug karon kapin na sa 180 ka milyon ka kopya ang naprinta sa kapin sa usa ka gatus ka pinulongan.

Ang makasaysayanong mga kamatuoran ug ang espesyal nga mga saksi sa Basahon ni Mormon nagpamatuod nga ang pagtungha niini milagroso gayud kaayo. Bisan pa niana, ang gahum niining basahon wala gibase lamang diha sa maanindot niini nga kasaysayan apan sa iyang gamhanan, dili hitupngan nga mensahe nga naka usab sa dili na maihap nga kinabuhi—lakip na nako!

Gibasa nako ang Basahon ni Mormon sa unang higayon sa dihang bata pa ko nga estudyante sa seminary. Isip girekomendar sa akong mga magtutudlo, misugod ko sa pagbasa niini sa sinugdanan sa mga pahina sa pasiuna.

Ang saad nga gilangkuban sa unang mga pahina sa Basahon ni Mormon naglanog-lanog gihapon sa akong hunahuna: “Pagpamalandong diha sa [inyong] mga kasingkasing . . . , ug unya . . . pangutana sa Dios [sa hugot nga pagtuo] . . . sa ngalan ni Kristo kon ang basahon tinuod ba. Kadto kinsa mopadayon niining dalan . . . makabaton og pagpamatuod sa kamatuoran ug sa kabalaan niini pinaagi sa gahum sa Espiritu Santo.”²²

Uban niana nga saad sa hunahuna, matinguhaon sa pagkahibalo og dugang mahitungod sa kamatuoran niini, ug diha sa espiritu sa pag-ampo, akong gitun-an ang Basahon ni Mormon, ginagmay, samtang akong gikompleto ang sinemana nga mga leksyon sa seminary. Akong mahinumdu-man, mura lang og kagahapon, kanang mainiton nga pagbati hinay-hinay nga mipadako sa akong kalag ug mipuno sa akong kasingkasing, naglamdag sa akong panabut, ug nahimong nagkaanam og kanindot, sama sa gihulagway ni Alma sa iyang pagsangyaw sa pulong sa Dios ngadto sa iyang katawhan.²³ Kana nga pagbati sa kadugayannahimong kahibalo nga migamot sa akong kasingkasing ug nahimong pundasyon sa akong pagpamatuod sa mahinungdanong mga panghitabo ug mga pagtulun-an nga makita niining balaan nga basahon.

Pinaagi niiniug sa uban pang bilihong personal nga mga kasinatian, ang Basahon ni Mormon nahimo gayud nga bato sa pamag-ang nga nakasustiner sa akong pagtuo diha ni Jesukristo ug sa akong pagpamatuod sa doktrina sa Iyang ebanghelyo. Nahimo kining usa sa mga haligi nga nagpamatuod ngari nako kabahin sa balaan nga maulaon nga sakripisyo ni Kristo. Nahimo kining taming sa tibuok nakong kinabuhi batok sa mga pagsulay sa kaaway sa pagpahinay sa akong hugot nga pagtuo ug pagtisok og kawalay pagtuo sa akong hunahuna ug mihatag nako og kaisug nga maisugon nga mamahayag sa akong pagpamatuod sa Manluluwas ngadto sa kalibutan.

Minahal kong mga higala, ang akong pagpamatuod sa Basahon ni

Mormon miabut sa kahibalo human sa laing kahibalo²⁴ isip usa ka milagro ngari sa akong kasingkasing. Hangtud niining adlaw, kana nga pagpamatuod nagpadayon sa paglambo samtang nagpadayon ko sa pagsiksik, inubanan sa sinsero nga kasingkasing, aron mas hingpit nga masabtan ang pulong sa Dios nga gilangkuban niining talag-saong basahon sa kasulatan.

Sa tanang makadungog sa akong tingog karon, ako modapit ninyo nga mahimong kabahin sa kahibulongang pagtungha sa Basahon ni Mormon sa inyo mismong kinabuhi. Ako mosaad kaninyo nga samtang kamo mainam-puon ug makanunayon nga magtuon sa mga pulong niini, makaambit kamo sa mga saad niini ug buhong nga mga panalangin sa inyong kinabuhi. Ako subling mopamatuod sa saad nga milanog sa matag pahina niini: nga kon kamo “mangutana sa Dios, ang Amahan sa Kahangturan, sa ngalan ni Kristo, kon kini nga mga butang dili ba tinuod; ug kon kamo mangutana sa kinasingkasing, uban sa tinuod nga katuyoan, nga may hugot nga pagtuo kang Kristo,” Siya maloloy-on nga “mopakita sa kamatuoran niini nganha kaninyo, pinaagi sa gahum sa Espiritu Santo.”²⁵ Ako makapasalig kaninyo nga Siya mohatag kaninyo sa tubag sa personal kaayo nga paagi, sama sa Iyang nahimo alang kanako ug sa daghan pa sa tibuok kalibutan. Ang inyong kasinatian mahimong ingon kamahimayaon ug kasagrado alang ninyo sama sa mga nasinati ni Joseph Smith alang kaniya, ingon man alang sa unang mga saksi ug alang sa tanan kinsa nagtinguha sa pagdawat og pagsaksi sa kaligdong ug pagka-masaligan niining sagradong basahon.

“Ako mohatag sa akong pagsaksi nga ang Basahon ni Mormon pulong gayud sa Dios. Ako mopamatuod nga kining sagrado nga rekord “nagpahimutang sa mga doktrina sa ebanghelyo, naglatid sa laraw sa kaluwasan, ug nagsulti sa mga tawo unsa ang kinahanglan gayud nga ilang pagabuhaton aron maangkon ang kalinaw niini nga kinabuhi ug ang kaluwasan sa kahangturan sa kinabuhi nga

umaabut.”²⁶ Ako mopamatuod nga Ang Basahon Ni Mormon, mao ang instrumento sa Dios sa pagpahinabo sa pagpundok sa Israel sa atong panahon ug sa pagtabang sa mga tawo nga mahibalo sa Iyang Anak, si Jesukristo. Ako mopamatuod nga ang Dios buhi ug nahigugma kanato ug ang Iyang Anak, si Jesukristo ang ulohan nga tukurang bato sa atong relihiyon. Akong gisulti kining mga butanga diha sa sagradong ngalan sa atong Manunubos, arong Agalon, ug atong Ginoo, gani si Jesukristo, amen. ■

MUBO NGA MGA SULAT

1. Joseph Smith, sa “Minute Book 1,” 44, josephsmithpapers.org; also at Church History Library, Siyudad sa Salt Lake; ang capitalization gi-standardize.
2. Tan-awa sa 3 Nephi 11–26.
3. Tan-awa sa Ezekiel 37:21–28; 1 Nephi 13:34–41; 3 Nephi 20:46; 21:1–11; ulohang pahina sa Basahon ni Mormon.
4. Pasiuna sa Basahon ni Mormon.
5. Tan-awa sa Pinadayag 14:6–7; 1 Nephi 19:21.
6. Isaias 29:14, 19; tan-awa usab sa mga bersikulo 11–13.
7. Tan-awa sa Ezekiel 37:16–17; 2 Nephi 3:12.
8. Tan-awa sa Joseph Smith—Kasaysayan 1:27–47; tan-awa usab sa Doktrina ug mga Pakigsaad 27:5; Joseph Smith, “History, 1838–1856, volume A-1 [23 Disyembre 1805–30 Agosto 1834],” 5, josephsmithpapers.org.
9. Tan-awa sa Joseph Smith—Kasaysayan 1:54; tan-awa usab sa Joseph Smith, “Church History,” *Times and Seasons*, Mar. 1, 1842, 707, josephsmithpapers.org.
10. Tan-awa sa Joseph Smith—Kasaysayan 1:59; *Mga Pagtulun-an sa mga Presidente sa Simbahan: Joseph Smith* (2007), 67–70.
11. Joseph Smith, “History, 1838–1856, volume E-1 [1 July 1843–30 April 1844],” 1775, josephsmithpapers.org; anaa usab sa Church History Library, Siyudad sa Salt Lake; ang punctuation gi-standardize. Tan-awa usab sa Joseph Smith, “Letter to James Arlington Bennet, 13 Nobyembre 1843,” 1, josephsmithpapers.org; anaa usab sa Church History Library, Siyudad sa Salt Lake.
12. Tan-awa sa John W. Welch, “Timing the Translation of the Book of Mormon: ‘Days [and Hours] Never to Be Forgotten,’” *BYU Studies*, vol. 57, nu. 4 (2018), 11–50.
13. Oliver Cowdery, gikutlo sa Joseph Smith—Kasaysayan 1:71, footnote; tan-awa usab sa *Latter Day Saints’ Messenger and Advocate*, Okt. 1834, 14.
14. Joseph Smith—Kasaysayan 1:60.
15. Tan-awa sa Joseph Smith—Kasaysayan 1:60–62.
16. Andrew H. Hedges, “‘All My Endeavors to Preserve Them’: Protecting the Plates in Palmyra, 22 Septyembre–Disyembre 1827,” *Journal of Book of Mormon Studies*, vol. 8, nu. 2 (1999), 23.
17. Tan-awa sa 2 Nephi 27:12–14; Ether 5:1–3.
18. Mateo 18:16.
19. Tan-awa sa “Ang Pagpamatuod sa Tulo ka mga Saksi,” Basahon ni Mormon.
20. Joseph Smith, sa Lucy Smith, *Biographical Sketches of Joseph Smith, the Prophet, and His Progenitors for Many Generations* (1880); tan-awa usab sa “Lucy Mack Smith, History, 1845,” 154, josephsmithpapers.org.
21. Doktrina ug mga Pakigsaad 19:26.
22. Pasiuna sa Basahon ni Mormon; tan-awa usab sa Moroni 10:3–5.
23. Tan-awa sa Alma 32:41–43.
24. Tan-awa sa 2 Nephi 28:30.
25. Moroni 10:4.
26. Pasiuna sa Basahon ni Mormon.



Olmué, Marga Marga, Chile



Ni Elder John A. McCune
Sa Seventy

Duol ngadto kang Kristo—Magpakabuhi isip mga Santos sa Ulahing mga Adlaw

Kita makabuhay og lisud nga mga butang ug makatabang sa uban sa pagbuhay sa ingon, tungod kay nasayud kita kinsa ang atong masaligan.

Salamat, Elder Soares, sa imong lig-on ug propetikanhon nga pagpamatuod sa Basahon ni Mormon. Bag-ohay lang, ako adunay kahigayunan nga makagunit sa usa ka pahina sa orihinal nga manuskrito sa Basahon ni Mormon. Niining piho nga pahina, sa unang higayon niini nga dispensasyon, gitala kining maisugon nga mga pulong ni Nephi: “Ako moadto ug mobuhay sa mga butang nga ang Ginoo nagsugo, kay ako nasayud nga ang Ginoo dili mohatag og mga sugo ngadto sa mga katawhan, gawas kon siya moandam og paagi alang kanila nga sila unta makatuman sa butang diin siya misugo kanila.”¹

Samtang naggunit ko niini nga pahina, napuno ko sa halawom nga pasalamat sa mga kahago sa 23 anyos nga si Joseph Smith, kinsa mihubad sa Basahon ni Mormon pinaagi sa “gasa ug gahum sa Dios.”² Ako mapasalamaton usab sa mga pulong sa batanon nga si Nephi, kinsa gihangyo sa pagbuhay sa lisud kaayo nga tahas sa

pagkuha sa mga palid nga tumbaga gikan ni Laban.

Si Nephi nasayud nga kon magpadayon siya nga nakatutok sa Ginoo, molampus siya sa pagtuman sa gisugo sa Ginoo kaniya. Siya kanunay nga nakatutok sa Manluluwas sa tibuok niyang kinabuhi bisan kon nag-antus siya og mga tintasyon, pisikal nga mga pagsulay, ug gani pagluib sa ubang suod nga mga sakop sa iyang pamilya.

Si Nephi nasayud kinsa ang Iyang masaligan.³ Human niana siya mituaw, “O pagkaalaot ko nga tawo! Oo, ang akong kasingkasing nagmasulub-on tungod sa akong pagkahuyang,”⁴ Si Nephi miingon, “Ang akong Dios mao ang akong kaabag; siya nag-agak kanako sa akong mga kasakit sa kami-ngawan; ug siya nanalipod kanako diha sa ibabaw sa mga katubigan sa dakong lawod.”⁵

Isip mga sumusunod ni Kristo, dili kita luwas sa mga hagit ug mga pagsulay sa atong kinabuhi. Kita sa

kasagaran pabuhayon og lisud nga mga butang nga, kon sulayan sa pagbuhay nga mag-inusara, mahimong bug-at ra kaayo ug tingali imposible. Samtang atong dawaton ang pagdapit sa Manluluwas nga “duol ngari kanako,”⁶ Siya mohatag sa suporta, kahupayan, ug kalinaw nga gikinahanglan, sama gayud sa Iyang gibuhay alang ni Nephi ug ni Joseph. Bisin sa atong pinakabug-at nga mga pagsulay, atong mabati ang mainiton nga paghangup sa Iyang gugma samtang kita mosalig kaniya ug modawat sa Iyang kabubut-on. Kita makasinati sa hingpit nga kalipay nga giandam alang sa Iyang matinud-anon nga mga disipulo, kay si “Kristo mao ang hingpit nga kalipay.”⁷

Niadto 2014, samtang nagserbisyo og usa ka full-time nga misyon, ang among pamilya nakasinati ug wala damha nga panghitabo. Samtang nagsakay sa taas nga skateboard sa dulhugon kaayo nga bungtod, ang among kamanghurang anak nga lalaki nahulog ug nakaangkon og halos makamatay nga kadaot sa iyang utok. Samtang ang iyang sitwasyon migra-be, ang mga kawaning medikal mipaubos niya sa danalian nga operasyon.

Ang among pamilya miluhod sa salog sa usa ka bakante nga lawak sa ospital, ug among gipahayag ang among mga gibati ngadto sa Dios. Sa taliwala nianang makalibog ug masakit nga gutlo, kami napuno sa gugma ug kalinaw sa atong Langitnong Amahan.

Wala kami masayud kon unsay mahitabo sa umaabut o kon makita pa ba kaha namo pag-usab ang among anak nga buhi. Kami tataw gayud nga nasayud nga ang iyang kinabuhi anaa sa mga kamot sa Dios ug ang mga sangputanan, gikan sa mahangturong panglantaw, makahatag og kaayohan kaniya ug kanamo. Pinaagi sa gasa sa Espiritu, kami hingpit nga andam sa pagdawat sa bisin unsa nga resulta.

Dili kadto sayon! Ang aksidente miresulta sa duha ka bulan nga pagpuyo sa ospital samtang nagdumala mi sa sobra sa 400 ka full-time nga mga misyonaryo. Ang among anak nakasinati og dakong pagkawala sa iyang panumduman. Ang iyang

pagkaayo naglakip sa dugay ug lisud nga mga sesyon alang sa pisikal, sa pagsulti, ug occupational therapy. Ang mga hagit nagpabilin, apan sa kadugayan nakasaksi kami og milagro.

Kita klaro nga nakasabut nga dili tanang pagsulay nga atong giatubang adunay resulta nga atong gipangandoy. Hinoon, samtang magpabilin kita nga nakatutok ni Kristo, kita mobati og kalinaw ug makakita sa mga milagro sa Dios, bisan unsa man kini, diha sa Iyang panahon ug sa Iyang paagi.

Adunay mga higayon nga dili nato makita sa bisan unsang paagi nga ang kasamtangang sitwasyon mamaayo ra ug kaha mopadayag pa gani, sama ni Nephi, “Ang akong kasingkasing nagmasulub-on tungod sa akong pagkahuyang.”⁸ Tingali adunay mga higayon nga ang ato rang bugtong paglaum *anaa ra* ni Jesukristo. Usa ka dakong panalangin nga makaangkon niana nga paglaum ug pagsalig diha Kaniya.

Si Kristo mao ang tawo kinsa kanunay nga motuman sa Iyang mga saad. Ang Iyang kalinaw gipaniguro alang sa tanan nga moduol ngadto Kaniya.⁹

Ang atong mga lider hugot nga nagtinguha sa tanan nga mobati sa kalinaw ug kahupayan nga moabut pinaagi sa pagsalig ug pagtutok ngadto sa Manluluwas nga si Jesukristo.

Ang atong buhing propeta, si Presidente Russell M. Nelson, kanunay nga nagpahibalo sa panglantaw sa Ginoo alang sa kalibutan ug sa mga sakop sa Simbahan ni Kristo: “Ang among mensahe ngadto sa kalibutan yano ug sinsero: among gidapit ang tanang anak sa Dios sa duha ka habig sa tabil sa *pagduol ngadto sa ilang Manluluwas*, pagdawat sa mga panalangin sa balaan nga templo, pagbaton og molahutay nga kalipay, ug mahimong angayan sa kinabuhing dayon.”¹⁰

Kini nga pagdapit sa “pagduol ngadto kang Kristo” adunay *piho* nga mga kahulugan alang sa mga Santos sa Ulahing mga Adlaw.¹¹ Isip mga miyembro sa Simbahan sa Manluluwas, kita mihimo og mga pakigsaad ngadto Kaniya ug nahimong Iyang mga anak nga lalaki ug babaye diha sa espiritu.¹² Kita usab gihatagan og kahigayunan sa



pag-alagad uban sa Ginoo sa pagdapit sa uban nga moduol ngadto Kaniya.

Samtang kita mag-alagad uban ni Kristo, ang atong labing dakong paningkamot kinahanglan nga anaa sulod sa atong mga panimalay. Adunay mga higayon nga ang mga sakop sa pamilya ug suod nga mga higala mag-atubang og mga hagit. Ang mga tingog sa kalibutan, ug tingali ang ilang kaugalingong mga tinguha, motulod nila sa pagduda sa kamatuoran. Buhaton gyud nato ang tanan aron matabangan sila nga mobati sa gugma sa Manluluwas ug sa atong gugma. Napahinumdu-man ko sa bersikulo sa kasulatan nga nahimo natong minahal nga himno nga “Maghigugmaay,” nga nagtudlo kanato nga, “Ang . . . [mga] tawo makaila . . . nga kamo mga tinun-an ko, kon kamo maghigugmaay ang usa sa usa.”¹³

Sa atong gugma niadtong kinsa nagduda sa kamatuoran, ang kaaway sa tanang kalipay mahimong mosulay sa pagpabati kanato nga atong giluiban kadtong atong gihigugma kon *kita* sa atong kaugalingon magpadayon sa pagsunod sa kahingpitan sa ebanghelyo ug magtudlo sa mga kamatuoran niini.

Ang atong abilidad sa pagtabang sa uban sa pagduol ngadto kang Kristo matino gayud sa ehemplo nga atong gipakita pinaagi sa atong personal nga

pasalig nga magpabilin diha sa dalan sa pakigsaad.

Kon ang atong tinuod nga tinguha mao ang pagluwas niadtong atong gihigugma, kita mismo kinahanglan gayud nga magpabiling lig-on uban ni Kristo pinaagi sa paghangup sa Iyang Simbahan ug sa kahingpitan sa Iyang ebanghelyo.

Balik ngadto sa sugilanon ni Nephi, kita nasayud nga ang inklinasyon ni Nephi nga mosalig sa Ginoo naimpluwensyahan sa kahilig sa iyang mga ginikanan nga mosalig sa Ginoo ug sa ilang ehemplo sa pagtuman sa mga pakigsaad. Kini nindot kaayo nga gipakita diha sa panan-awon ni Lehi bahin sa kahoy sa kinabuhi. Human makakaon sa tam-is ug makalipay nga bunga sa kahoy, si Lehi “milibut sa [iyang] panan-aw, nga basin pa unta [siya] makakaplag usab sa [iyang] banay.”¹⁴ Iyang nakita si Sariah, Sam, ug Nephi nga nagbarug “ingon og sila wala masayud asa sila paingon.”¹⁵ Dayon si Lehi miingon, “ako mitawag kanila; ug ako usab miingon ngadto kanila uban sa makusog nga tingog nga sila kinahanglan nga moduol ngari kanako, ug mokaon sa bunga.”¹⁶ Palihug timan-i nga si Lehi wala mobiya sa kahoy sa kinabuhi. Siya nagpabilin sa espirituhanong paagi uban sa Ginoo ug midapit sa iyang banay sa pagduol diin *siya* mikaon sa bunga.

Ang kaaway moagni sa uban sa pagbiya sa kalipay sa ebanghelyo pinaagi sa pagpahimulag sa mga pagtulun-an ni Kristo gikan sa Iyang Simbahan. Iya kitang patuohon nga mahimo kitang magpabilin nga lig-on diha sa dalan sa pakigsaad nga kita lang, pinaagi sa atong kaugalingong pagka-espirituhanon, nga dili magkinahanglan sa Iyang Simbahan.

Niining ulahing mga adlaw, ang Simbahan ni Kristo gipahiuli aron matabangan ang mga anak ni Kristo sa pakigsaad nga magpabilin diha sa Iyang dalan sa pakigsaad.

Diha sa Doktrina ug mga Pakigsaad atong mabasa: “Tan-awa, mao kini ang akong doktrina—kinsa kadto nga maghinulsol ug *moduol ngari kanako*, ang ingon *mao* ang akong simbahan.”¹⁷

Pinaagi sa Simbahan ni Kristo, kita malig-on pinaagi sa atong mga kasinatian isip usa ka katilingban sa mga Santos. Kita makadungog sa Iyang tingog pinaagi sa Iyang mga propeta, mga manalagna, ug mga tigpadayag. Labaw sa tanan, pinaagi sa Iyang Simbahan kita gihatagan sa tanang gikinahanglan nga mga panalangin sa Pag-ula ni Kristo nga matuman lamang pinaagi sa pag-apil sa sagrado nga mga ordinansa.

Ang Simbahan ni Jesukristo sa mga Santos sa Ulahing mga Adlaw mao ang Simbahan ni Kristo dinhi sa kalibutan, gipahiuli niining ulahing mga adlaw alang sa kaayohan sa tanang mga anak sa Dios.

Ako mopamatuod nga samtang kita moduol ngadto kang Kristo ug magpuyo isip mga Santos sa Ulahing mga Adlaw, kita mapanalanginan og dugang sa Iyang gugma, sa Iyang hingpit nga kalipay, ug sa Iyang kalinaw. Sama ni Nephi, kita makabuhat og lisud nga mga butang ug makatabang sa uban sa pagbuhat sa ingon, tungod kay nasayud kita kon kang kinsa kita makasalig.¹⁸ Si Kristo ang atong kahayag, ang atong kinabuhi, ug ang atong kaluwasan.¹⁹ Sa ngalan ni Jesukristo, amen. ■

MUBO NGA MGA SULAT

1. 1 Nephi 3:7.
2. Ulohan nga pahina sa Basahon ni Mormon; tan-awa usab sa pasiuna sa Basahon ni Mormon.
3. Tan-awa sa 2 Nephi 4:19.
4. 2 Nephi 4:17.
5. 2 Nephi 4:20.
6. Mateo 11:28.
7. Russell M. Nelson, “Hingpit nga Kalipay ug Espirituhanon nga Pagsugakod,” *Liahona*, Nob. 2016, 82.
8. 2 Nephi 4:17.
9. Tan-awa sa Mateo 11:28–30.
10. Russell M. Nelson, “Magpadayon Tang Tanan,” *Liahona*, Mayo 2018, 118–119.
11. Tan-awa sa Doktrina ug mga Pakigsaad 20:59.
12. Tan-awa sa Mosiah 5:7.
13. Juan 13:35; tan-awa usab sa “Maghigugmaay,” *Mga Himno*, nu. 196.
14. 1 Nephi 8:13.
15. 1 Nephi 8:14.
16. 1 Nephi 8:15.
17. Doktrina ug mga Pakigsaad 10:67; emphasis gidugang.
18. Tan-awa sa 2 Nephi 4:19.
19. Tan-awa sa Salmo 27:1.



Ni Bishop Gérald Causse
Presiding Bishop

Usa ka Buhi nga Saksi sa Buhi nga Kristo

Ang labing mahinungdanong mensahe sa Basahon ni Mormon mao ang pagpahiuli sa tinuod nga kahibalo bahin sa mahinungdanong tahas ni Jesukristo sa kaluwasan ug kahimayaan sa katawhan.

Sa usa ka init nga adlaw sa tingpamulak niadtong 2017, ang open house alang sa Templo sa Paris France nasugdan na gayud sa dihang ang usa sa mga tour guide giduol sa usa ka tawo nga adunay masulub-ong ekspresyon sa iyang panagway. Siya miingon nga nagpuyo siya duol sa templo ug miangkong nga aktibo siyang misupak sa pagtukod niini. Siya misaysay nga usa ka adlaw samtang naglantaw siya gikan sa bintana sa iyang apartment, nakakita siya og dakong crane nga mipaubos sa estatuwa ni Jesus gikan sa taas ug hinay nga mipahimutang niini diha sa nataran sa templo. Ang tawo namahayag nga kini nga kasinatian hingpit nga miusab sa iyang mga pagbati sa atong Simbahan. Siya nakaamgo nga mga sumusunod kita ni Jesukristo ug nangayo sa atong pagpasaylo alang sa miaging kaudat nga tingali iyang nahimo.

Ang estatuwa sa *Christus*, nga miadorno sa nataran sa Templo sa Paris ug sa ubang mga kabtangan sa Simbahan, nagpamatuod sa atong gugma alang sa Manluluwas. Ang orihinal nga estatuwa nga marmol mao ang buhat sa Danish nga artist nga si Bertel

Thorvaldsen, kinsa mikulit niini niadtong 1820—ang samang tuig sa Unang Panan-awon. Ang estatuwa nagbarug nga lahi kaayo sa kasagaran sa artistikong mga binuhat nianang panahona, nga nagpakita gayud sa nag-antus nga Kristo diha sa krus. Ang buhat ni Thorvaldsen nagpresentar sa buhi nga Kristo, kinsa nagmadaugon batok sa kamatayon ug, uban sa bukas nga mga bukton, nagdapit sa tanan nga moduol Kaniya. Bugtong ang mga agi sa lansang diha sa Iyang mga kamot ug mga tiil ug ang samad diha sa Iyang kilid ang nagmatuod sa dili mahulagway nga paghingutas nga Iyang naagian aron luwason ang katawhan.

Tingali ang usa ka rason nga kita isip mga miyembro sa Ang Simbahan ni Jesukristo sa mga Santos sa Ulahing mga Adlaw ganahan niining estatuwa mao nga nagpahinumdom kini kanato sa deskripsyon nga gihatag diha sa Basahon ni Mormon bahin sa pagpakita sa Manluluwas sa kontinente sa Amerika:

“Ug tan-awa, sila nakakita og usa ka Tawo nga mikunsad gikan sa langit; ug siya nagsul-ob og puti nga



Anak sa Amahan sa Kahangturan, ug ang Manluluwas sa kalibutan; ug nga ang tanan nga mga tawo kinahanglan gayud nga moduol ngadto kaniya, o sila dili maluwas.⁴

Ang yano ug bililhon nga mga kamatuoran mahitungod sa Pag-ula sa Manluluwas makita sa tibuok Basahon ni Mormon. Samtang naglista ko sa pipila niining mga kamatuoran, gidapit nako kamo nga mamalandong kon sa unsang paagi kini nakausab o makausab sa inyong kinabuhi.

1. Ang Pag-ula ni Jesukristo usa ka libre nga gasa nga gitanyag ngadto sa *tanan* kinsa *na-* kapuyo, kinsa *kasamtangang* nagpuyo, ug kinsa *mo-* puyo pa dinhi sa yuta.⁵
2. Agig dugang sa pagdala sa kabug-at sa atong mga sala, gidala ni Kristo sa Iyang kaugalingon ang atong mga kasub-anan, mga kahuyang, mga pag-antus, ug mga balatian ug tanang kalisdanan nga dala sa mortal nga kondisyon sa tawo. Walay kaguol, kasakit, o kasub-anan nga wala Niya giantus alang kanato.⁶
3. Ang maulaong sakripisyo sa Manluluwas nagtugot kanato nga mabuntog ang negatibong mga sangputanan sa Pagkapukan ni Adan, lakip na ang pisikal nga kamatayon. Tungod ni Kristo, tanang anak sa Dios nga natawo dinhi sa yuta, bisan unsa pa ang ilang katarung, makasinati sa paghiusa sa ilang mga espiritu ug mga lawas pinaagi sa gahum sa Pagkabanhaw⁷ ug mobalik ngadto Kaniya nga “gipanaghukman . . . pinasikad sa ilang binuhatan.”⁸
4. Sa pikas bahin, ang pagdawat sa hingpit nga mga panalangin sa Pag-ula sa Manluluwas nagdepende sa atong kakugi⁹ sa pagsunod sa “doktrina ni Kristo.”¹⁰ Sa iyang damgo, nakakita si Lehi sa “hingpit ug pig-ot nga agianan”¹¹ nga nagpaingon sa kahoy sa kinabuhi. Ang bunga niini, nga nagrepresentar sa gugma sa Dios sigun sa gipahayag pinaagi sa hilabihan katalagsaon nga mga panalangin sa Pag-ula ni Kristo, “labing bililhon ug labing

kupo; ug siya nanaog ug mibarug sa ilang taliwala. . . .

“Ug nahinabo nga siya mituy-od sa iyang kamot ug namulong ngadto sa mga katawhan, nag-ingon:

“Tan-awa, Ako mao si Jesukristo, . . .

“ . . . Ug Ako nakainom gikan sa pait nga kopa nga gihatag sa Amahan ngari kanako, ug gihimaya ang Amahan sa akong pagpas-an sa mga sala sa kalibutan.”¹

Dayon Iyang gidapit ang matag lalaki, babaye, ug bata nga moduol ug mohikap sa Iyang kilid ug mobati sa mga agi sa lansang diha sa Iyang mga kamot ug mga tiil, sa ingon nakadawat og personal nga pagsaksi nga Siya sa pagkatinuod mao ang dugay nang gipaabut nga Mesiyas.²

Kining talagsaon nga talan-awon mao ang labing mahinungdanong talan-awon diha sa Basahon ni Mormon. Ang tibuok nga “maayong balita” sa ebanghelyo anaa niining imahe sa Manluluwas nga malumong mipatuyhad sa Iyang “mga bukton sa kalooy”³ aron pagdapit sa matag indibidwal nga moduol Kaniya ug

modawat sa mga panalangin sa Iyang Pag-ula.

Ang labing mahinungdanong mensahe sa Basahon ni Mormon mao ang pagpahiuli sa tinuod nga kahibalo bahin sa mahinungdanong tahas ni Jesukristo sa kaluwasan ug kahimayaan sa katawhan. Kini nga tema milanog gikan sa pasiunang pahina hangtud sa katapusan gayud nga mga pulong sa katapusang kapitulo. Sulod sa mga siglo sa apostasiya ug espiritwal nga kalibug, ang mas lawom nga kahulugan sa unsay gibuhay ni Kristo didto sa Getsemani ug sa Golgota nawala o nausab. Unsa kaha kama-hinamon si Joseph Smith sa dihang, samtang naghuhad siya sa 1 Nephi, nadiskubrihan niya kining talagsaong saad: “Kini nga katapusan nga mga talaan [ang Basahon ni Mormon] . . . motukod sa kamatuoran sa naha-una [ang Biblia] . . . ug motug-an sa yano ug bililhon nga mga butang nga gikuha gikan kanila; ug motug-an ngadto sa tanan nga mga kaliwatan, mga pinulongan, ug mga katawhan, nga ang Kordero sa Dios mao ang



madanohon . . . [ug] mao ang labing mahinungdanon sa tanan nga mga gasa sa Dios.”¹² Aron makabaton niini nga bunga, kinahanglan gayud kitang mopakita og hugot nga pagtuo diha ni Jesukristo, maghinulsol, “mopatalinghug sa pulong sa Dios,”¹³ modawat sa mahinungdanong mga ordinansa, ug motuman sa sagradong mga pakigsaad hangtud sa katapusan sa atong kinabuhi.¹⁴

5. Pinaagi sa Iyang Pag-ula, wala lamang hugasi ni Jesukristo ang atong mga sala, apan misangkap usab Siya og *makahatag* og *katakus* nga gahum nga pinaagi niini ang Iyang mga disipulo mahimong “[mosalikway sa] kinaiyanhon nga pagkatawo,”¹⁵ mouswag “pagtulun-an human sa usa ka pagtulun-an,”¹⁶ ug molambo sa pagkabalaan¹⁷ aron usa ka adlaw mahimo silang hingpit nga mga binuhat diha sa imahe ni Kristo,¹⁸ mahimong sarang nga mopuyo pag-usab uban sa Dios¹⁹ ug mapanunod ang tanang panalangin sa gingharian sa langit.²⁰

Laing makahupay nga kamatuoran nga anaa sa Basahon ni Mormon mao nga, bisan kon kini walay kinutuban ug malukpanon, ang Pag-ula sa Ginoo sa talagsaong paagi personal ug hinasa nga gasa, nga moangay sa matag usa kanato.²¹ Sama sa pagdapit ni Jesus sa matag usa sa Nephite nga mga disipulo nga mobati sa Iyang

mga samad, namatay Siya alang sa matag usa kanato, sa personal nga paagi, sama nga kamo o ako ra ang tawo sa yuta. Iyang gipadangat kanato ang personal nga pagdapit nga moduol Kaniya ug mogamit sa talagsaong mga panalangin sa Iyang Pag-ula.²²

Ang personal nga kahimtang sa Pag-ula ni Kristo nahimong mas tinuod pa samtang atong ikonsiderar ang mga ehemplo sa talagsaong mga lalaki ug mga babaye diha sa Basahon ni Mormon. Lakip kanila mao si Enos, Alma, Zeezrom, Haring Lamoni ug ang iyang asawa, ug ang katawhan ni Haring Benjamin. Ang ilang mga istorya sa pagkakabig ug gamhanang mga pagpamatuod naghatag og buhi nga pagsaksi kon sa unsang paagi nga ang atong kasingkasing ug ang atong kinabuhi mausab pinaagi sa walay kinutuban nga kaayo ug kalooy sa Ginoo.²³

Si propeta Alma nangutana sa iyang katawhan niining importante nga pangutana. Siya miingon: “Kon kamo nakasinati og usa ka kausaban sa kasingkasing, ug kon kamo mibati sa pag-awit sa awit sa matubsanon nga gugma, ako mangutana, kamo mibati ba *karon*sa mao?”²⁴ Kini nga pangutana mahinungdanon karon, tungod kay isip mga disipulo sa Ginoo, gikinahanglan nato ang Iyang matubsanong gahum nga mouban kanato, modasig kanato, ug mousab kanato kada adlaw.

Ang pangutana ni Alma mahimo usab nga ipangutana sama niini, kanus-a ang katapusang higayon nga mibati kamo sa makapahimuot nga impluwensya sa Pag-ula sa Manluluwas diha sa inyong kinabuhi? Mahitabo kini kon mobati kamo og “talagsaon ug makapahimuot” nga kalipay²⁵ nga moabut kaninyo nga nagdala og pagsaksi sa inyong kalag nga ang inyong mga sala gipasaylo; o kon ang sakit nga mga pagsulay kalit lang nga mas gaan pas-anon; o kon ang inyong kasingkasing mapahumok ug makahimo kamo sa pagpahayag og pagpasaylo ngadto sa usa ka tawo nga mipasakit kaninyo. O mahitabo kini sa matag higayon nga inyong mabantayan ang inyong kapasidad sa paghigugma ug pagserbisyo

sa uban milambo o nga ang proseso sa pagbalaan nakapahimo ninyong lahi nga tawo, nga gipahisama sa ehemplo sa Manluluwas.²⁶

Ako mohatag og pagsaksi nga kining tanang kasinatian tinuod ug mga ebidensya nga ang mga kinabuhi mausab pinaagi sa hugot nga pagtuo diha ni Jesukristo ug sa Iyang Pag-ula. Ang Basahon ni Mormon miklaro ug mipalambo sa atong kahibalo bahin niining langitnong gasa. Samtang magtuon kamo niining libro, inyong madungog ang tingog sa buhi nga Kristo nga nagdapit kaninyo nga moduol Kaniya. Ako mosaad nga kon dawaton ninyo kining pagdapit ug ipahisama ang inyong kinabuhi sa Iyang ehemplo, ang Iyang makapatubos nga impluwensya moabut sa inyong kinabuhi. Pinaagi sa gahum sa Espiritu Santo, ang Manluluwas mousab kaninyo kada adlaw “hangtud sa hingpit nga adlaw”²⁷ kon kamo, sama sa Iyang gipamahayag, “makakita sa akong panagway ug masayud nga Ako mao.”²⁸ Sa ngalan ni Jesukristo, amen. ■

MUBO NGA MGA SULAT

1. 3 Nephi 11:8–11.
2. Tan-awa sa 3 Nephi 11:14–15.
3. Alma 5:33.
4. 1 Nephi 13:40.
5. Tan-awa sa 2 Nephi 9:21; 26:24–27; Mosiah 3:13.
6. Tan-awa sa Alma 7:11–12.
7. Tan-awa sa 2 Nephi 10:25.
8. Mosiah 3:24; tan-awa usab sa 2 Nephi 2:4, 10, 26; 9:6–7, 12–13, 15, 22; Mosiah 3:12; 16:7–8; Alma 11:41–44; 42:6–8, 23; Helaman 14:16; Mormon 9:12.
9. Tan-awa sa 2 Nephi 9:21; Mosiah 3:12; Helaman 5:11; 14:18.
10. 2 Nephi 31:21; tan-awa sa 3 Nephi 27:20–21.
11. 1 Nephi 8:20.
12. 1 Nephi 15:36.
13. 1 Nephi 15:24.
14. Tan-awa sa 2 Nephi 31.
15. Mosiah 3:19.
16. 2 Nephi 28:30.
17. Tan-awa sa Mosiah 3:19.
18. Tan-awa sa 3 Nephi 27:27; Moroni 10:32–33.
19. Tan-awa sa 2 Nephi 2:8; Mosiah 2:41.
20. Tan-awa sa Alma 11:37.
21. Tan-awa sa 2 Nephi 9:21.
22. Tan-awa sa Omni 1:26; Alma 5:33; Moroni 10:32–33.
23. Tan-awa sa Enos 1; Mosiah 5; Alma 12; 18–19; 36.
24. Alma 5:26; emphasis gidugang.
25. Alma 36:21.
26. Tan-awa sa Mosiah 3:19.
27. Doktrina ug mga Pakigsaad 50:24.
28. Doktrina ug mga Pakigsaad 93:1.



Ni Elder Dale G. Renlund
Sa Korum sa Napulog Duha ka mga Apostoles

Hunahunaa ang Pagkamaayo ug Pagkahalangdon sa Dios

Ako modapit kaninyo sa paghinumdom matag adlaw sa pagkahalangdon sa Langitnong Amahan ug ni Jesukristo ug sa unsay ilang nabuhat alang kaninyo.

Sa tibuok kapanahunan, ilabi na sa malisud nga mga panahon, ang mga propeta miawhag kanato sa paghinumdom sa katalagsaon sa Dios ug paghunahuna unsay Iyang nahimo kanato isip mga indibidwal, mga pamilya, ug katawhan.¹ Kini nga direksyon makita sa tanang kasulatan apan ilabi na diha sa Basahon ni Mormon. Ang ulohan nga pahina nagpasabut nga ang usa sa mga katuyoan sa Basahon ni Mormon mao “ang pagpakita ngadto sa salin sa balay ni Israel unsa nga mahinungdanon nga mga butang ang Ginoo mihimo alang sa ilang mga amahan.”² Ang konklusyon sa Basahon ni Mormon naglakip sa hangyo ni Moroni: “Tan-awa, ako moawhag kaninyo nga kon kamo mobasa niini nga mga butang . . . nga kamo unta mohinumdom unsa ka maloloy-on ang Ginoo ngadto sa mga katawhan, . . . ug palandongang kani sa inyong mga kasingkasing.”³

Ang walay pagkausab nga mga paghangyo gikan sa mga propeta nga pamalandungan ang pagkamaayo sa Dios talagsaon.⁴ Ang atong Langitnong

Amahan gusto nga kita mahinumdom sa Iyang pagkamaayo ug sa Iyang Hinigugmang Anak, dili alang sa Ilang kaugalingon nga katagbawan apan sa impluwensya niana nga paghinumdom diri kanato. Pinaagi sa pagkonsiderar sa Ilang pagkamabination, milapad ang atong panglantaw ug panabut. Pinaagi sa pagpamalandong sa Ilang kamanggiloy-on, mas mapaubsanon na kita, mainampuon, ug makanunayon.

Ang sakit nga kasinatian uban sa kanhi pasyente nagpakita sa unsang paagi ang pagpasalamat sa kamanggi-hatagon ug kalooy makausab kanato. Niadtong 1987, akong gikaila si Thomas Nielson, talagsaong tawo nga nagkinahanglang pulihan og kasingkasing. Siya 63 anyos ug nagpuyo sa Logan, Utah, sa Estados Unidos. Human sa pagserbisyo sa militar atol sa Ikaduhang Gubat sa Kalibutan, naminyo siya ni Donna Wilkes sa Logan Utah Temple. Nahimo siyang abtik ug malampusong mason sa bika [brick]. Sa milabayng katuigan nalingaw kaayo siyang nakigtrabaho sa kamagulangan

niyang apo, si Jonathan, atol sa mga bakasyon sa eskwela. Ang duha nagkasuod, sa ubang bahin kay nakita ni Tom ang daghan sa iyang kaugalingon kang Jonathan.


Nakita ni Tom nga ang paghulat og donor og kasingkasing makasagmuyo. Dili siya ingon ana ka pasensyuso nga tawo. Kanunay siyang makahimo ug makalampus og mga tumong pinaagi sa pagkugi ug sa hingpit nga determinasyon. Naglisud tungod sa depektuso nga kasingkasing, walay uswag nga kinabuhi, si Tom usahay mangutana nako unsay akong gihimo aron madali ang proseso. Mangomedyas siya sa pagsugyot og mga paagi aron makakita dayon ko og donor sa kasingkasing.

Usa ka makalipay apan kulba nga adlaw, usa ka sulundon nga donor miabut para ni Tom. Ang gidak-on ug ang tipo sa dugo nagkatugma, ug batan-on ang donor, 16 anyos ang edad. Ang idonar nga kasingkasing iya ni Jonathan, gipangga nga apo ni Tom. Sayo nianang adlaw, grabe ang pagkaangol ni Jonathan dihang ang awto nga iyang gisakyan naigo sa milabayng tren.

Dihang mibisita ko ni Tom ug Donna sa ospital, hilabihan ang ilang kasubo. Lisud hunahunaon ang ilang gisinati, sayud nga malugwayan ang kinabuhi ni Tom pinaagi sa kasingkasing sa iyang apo. Sa una, mibalibad sila sa gitanyag nga kasingkasing gikan sa nagsubong inahan nga ilang anak ug sa iyang umagad nga mga ginikanan ni Jonathan. Si Tom ug Donna nasayud, hinoon, nga patay na



Provo, Utah, USA



ang utok ni Jonathan, ug nakasabut nga ang ilang mga pag-ampo alang sa usa ka donor alang ni Tom dili maoy hinungdan sa pagkaaksidente ni Jonathan. Kondili, ang kasingkasing ni Jonathan usa ka gasa nga makapanalangin ni Tom sa oras sa panginahanglan. Ilang nasayran nga moabut ang maayong butang gumikan niini nga trahedyang ug mihukom nga ipadayon.

Ang mga paagi sa pagbalhin nagmalampuson. Pagkahuman, si Tom lahi na nga tawo. Ang pagkausab milapas pa sa malambuon kahimsog o gani pasalamat. Gisultihan ko niya nga mamalandong siya matag buntag kang Jonathan, sa iyang anak ug sa umagad, sa gasa nga iyang nadawat, ug sa unsay gibilin niana nga gasa. Bisan og ang iyang natural nga kakomedyante ug determinasyon makita gihapon, akong nabantayan nga si Tom mas mahinuklugon, mahunahunaon, ug mabination.

Nabuhi si Tom og 13 ka tuig human sa pagbalhin, mga tuig nga wala unta kon wala pa kadto. Ang saysay diha sa iyang haya nag-ingon nga kining mga tuiga nagtugot nga matandog niya ang mga kinabuhi sa iyang pamilya ug sa uban pinaagi sa kamanggihatagon ug sa gugma. Usa siya ka pribadong tabang ug ehemplo sa kapositibo ug determinasyon alang sa tanan.

Sama kang Tom, matag usa kanato nakadawat og mga gasa diin kita mismo dili makahatag, mga gasa nga gikan sa atong Langitnong Amahan ug sa Iyang Hinigugmang Anak, lakip ang pagtubos pinaagi sa maulaon nga pagsakripisyo ni Jesukristo.⁵ Nakadawat kita og kinabuhi niini nga kalibutan; makadawat kita og pisikal nga kinabuhi human dinhi, ug mahangturong kaluwasan ug kahimayaan—kon kita mopili niini—tanang tungod sa Langitnong Amahan ug ni Jesukristo.

Sa matag higayon nga kita mogamit, makabenipisyo, o gani sa paghunahuna niini nga mga gasa, angay nga hunahunaon nato ang sakripisyo, kamanggihatagon, ug kamanggiloy-on sa mga tighatag. Ang pagtahud sa mga tighatag makahimo og daghan kay sa paghimo natong mapasalamaton. Ang pagpamalandong sa Ilang mga gasa makahimo ug kinahanglang makausab kanato.

Usa ka talagasaong kausaban mao ang kang Alma nga Batanon. Samtang si Alma “misukol batok sa Dios,”⁶ usa ka anghel mipakita. Sa “tingog sa usa ka dugdog,”⁷ ang anghel mibadlong

ni Alma sa paglutos sa Simbahan ug sa “pagluib sa kasingkasing sa katawhan.”⁸ Ang anghel midugang niini nga pahimangno, “Lakaw, ug hinumdumi ang pagkabihag sa imong mga amahan . . . ; ug hinumdumi unsa ka mahinungdanon ang mga butang nga gihimo sa [Dios] alang kanila.”⁹ Uban sa tanan nga pag-awhag, mao kana ang gihatagan og gibug-aton sa anghel.

Si Alma naghinulsol ug nakahinumdom. Siya sa wala madugay mipaambit ngadto sa iyang anak nga si Helaman sa gipahimangno sa anghel. Mitambag si Alma, “Ako manghinaut nga ikaw mobuhat ingon nga ako mibuhat, sa paghinumdom sa pagkabihag sa atong mga amahan; kay sila diha sa pagkaulipon, ug walay makaluwas kanila gawas sa Dios ni Abraham, . . . Isaac, ug . . . Jacob; ug



San Bernardo, Santiago, Chile

siya sa pagkamatuo miluwas kanila diha sa ilang mga kasakitan.¹⁰ Sa yanong paagi miingon si Alma, “Ako mibutang sa akong pagsalig diha kaniya.”¹¹ Nasabtan ni Alma nga pinaagi sa paghinumdom sa pagkaluwas gikan sa pagkaulipon ug suporta atol sa “mga pagsulay ug mga kasamok sa matag matang,” makaila kita sa Dios ug sa kasiguroan sa Iyang mga saad.¹²

Diyutay ra kanato ang adunay mga kasinatian nga sama ka mahinuklugon kang Alma, bisan pa ang atong pagkausab posibling susama ang kadak-on. Sa karaang panahon ang Manluluwas misaad:

“Hatagan ko usab kamo sa usa ka bag-o nga kasingkasing, ug ang usa ka bag-ong espiritu igabutang ko sa sulod ninyo: kuhaon ko ang baton nga kasingkasing . . . , hatagan ko kamo sa usa ka kasingkasing nga unod.

“Igabutang ko ang akong Espiritu sa sulod ninyo. . . .

“ . . . Ug kamo mahimong akong katawhan, ug ako mahimo nga inyong Dios.”¹³

Ang nabanhaw nga Manluluwas misulti sa mga Nephite sa unsang paagi ang pagkausab magsugod. Iyang gitino ang usa ka importanting butang sa plano sa Langitnong Amahan dihang miingon Siya:

“Ug ang akong Amahan mipadala kanako nga Ako unta ituboy nganha sa krus; ug human niana nga Ako matuboy diha sa krus, nga Ako unta *makadala* sa tanan nga mga tawo ngari kanako. . . .

“Ug tungod niini nga hinungdan Ako natuboy; busa, sumala sa gahum sa Amahan Ako *modala* sa tanan nga mga tawo ngari kanako.”¹⁴

Unsa ang gikinahanglan aron kamo madala ngadto sa Manluluwas? Hunahuna ang pagtugyan ni Jesukristo ngadto sa kabubut-on sa Iyang Amahan, ang Iyang pagbuntog sa kamatayon, ang Iyang pagdala diha sa Iyang kaugalingon sa inyong mga sala ug mga sayop, ang Iyang pagdawat sa gahum sa Amahan aron pagpangamuyo alang kaninyo, ug ang Iyang hingpit nga pagtubos kaninyo.¹⁵ Kining mga butanga dili ba igo nga kamo madala ngadto Kaniya?

Kini mao ngari kanako. Si Jesukristo “nagbarug nga andam mogakus, malau-mon ug andam nga moalim, mopasaylo, mohugas, mopalig-on, molimpyo, ug mobalaan [kanimo ug kanako].”¹⁶

Kining mga butanga angay nga maghatag kanato og bag-ong kasingkasing ug mag-ghat nato sa pagpili sa pagsunod sa Langitnong Amahan ug ni Jesukristo. Gani ang bag-ong mga kasingkasing “posibling matipas sa tumong, . . . posibling mobiya sa Dios [nga atong] gimahal.”¹⁷ Sa pagbatok niini nga kalagmitan, kinahanglang mamalandong kita matag adlaw sa mga gasa nga atong nadawat ug kon unsay gikinahanglan niini. Si Haring Benjamin mitambag, “gani ako manghinaut nga kamo kinahanglan mahinumdom, ug sa kanunay magpabilin sa inyong panumduman, ang pagkahalangdon sa Dios . . . ug sa iyang pagkamaayo ug pagkamaintuson nganha kaninyo.”¹⁸ Kon kita mohimo niini, kwalipikado kita alang sa talagsaon nga langitnong mga panalangin.

Ang pagpamalandong sa kaayo ug kalooy sa Dios motabang kanato sa pagkahimong mas madawaton sa espiritwal nga paagi. Agi og balus, ang nagtubong espritwal nga pagbati magtugot nga kita mahibalo sa kamatuoran sa tanang butang pinaagi sa gahum sa Espiritu Santo.¹⁹ Naglakip kini sa pagpamatuod sa katinuod sa Basahon ni Mormon, nahibalo nga si Jesus mao ang Kristo, atong personal nga Manluluwas ug Manunubos, ug sa pagdawat nga ang Iyang Ebanghelyo gipahiuli na niining ulahing mga adlaw.²⁰


Kon mohinumdom kita sa pagkahalangdon sa atong Langitnong Amahan ug ni Jesukristo ug unsay Ilang nahimo kanato, dili kita makabaliwala, sama ni Tom nga wala mobaliwala sa kasingkasing ni Jonathan. Sa masadyaon ug talahurong paagi, matag adlaw si Tom mahinumdom sa trahedyang naglugway sa iyang kinabuhi. Sa dakong kalipay bahin sa pagkahibalo nga maluwas kita ug mahimaya, nagkinahanglan kitang mohinumdom nga ang kaluwasan ug kahimayaan dako kaayo og kantidad.²¹ Kita sa talahurong paagi magmaya kon atong mahibaloan

nga kon wala si Jesukristo wala kitay paglaum apan Kaniya kita makadawat sa kinadak-ang gasa nga ikahatag sa Langitnong Amahan.²² Gani, kini nga pagtahud nagtugot kanato sa pagtagamtam sa saad nga “kinabuhi nga dayon niini nga kalibutan,” ug sa katapusan makadawat og “kinabuhi nga dayon . . . gani sa imortal nga himaya” sa kalibutang moabut.²³

Kon hunahunaon nato ang kamaayo sa atong Langitnong Amahan ug ni Jesukristo, ang atong pagsalig Kanila molambo. Ang atong mga pagampo mausab kay mahibalo kita nga ang Dios mao ang atong Amahan ug kita Iyang mga anak. Wala kita magtinguha sa pag-usab sa Iyang kabubut-on apan sa pagpahaum sa atong kabubut-on sa Iya ug mosiguro sa atong kaugalingong mga panalangin nga gusto Niya nga ihatag, apan mag-agad sa atong pagpangayo niini.²⁴ Atong pangandoy ang pagka mas maaghup, pagka-mas putli, pagka-mas lig-on, pagka-mas Kristohanon.²⁵ Kini nga mga kausaban mopasarang kanato og dugang nga langitnong mga panalangin.

Pinaagi sa pagdawat nga ang matag maayo nga butang naggikan kang Jesukristo, atong ipaambit ang atong pagtuo sa mas epektibong paagi ngadto sa uban.²⁶ Makabaton kita og kaisug kon mag-atubang kita og daw imposibling mga tahas ug mga kahimtang.²⁷ Atong malig-on ang atong determinasyon sa pagtuman sa mga pakigsaad nga atong gihimo sa pagsunod sa Manluluwas.²⁸ Mapuno kita sa gugma sa Dios, magtinguha sa pagtabang sa nanginahanglan sa walay paghukom, mohigugma sa atong mga anak ug padak-on sila sa katarung, magbaton og kapasayloan sa atong mga sala, ug kanunayng magmaya.²⁹ Mao kini ang talagsaong mga bunga sa paghinumdom sa kamaayo sa Dios ug kalooy.

Agig pagkumpara, mipahimangno ang Manluluwas, “Walay butang nga ang tawo makapasakit sa Dios, o batok ni bisan kinsa nga ang iyang kasuko mapukaw, gawas niadtong kinsa dili mokumpisal sa iyang sayop diha sa tanan nga mga butang.”³⁰ Tingali ang Dios dili mainsulto kon mahikalimtan



nato Siya. Hinoon, tingali masagmuyo Siya sa hilabihan. Siya nahibalo nga gihikawan nato ang atong kaugalingon sa oportunidad nga mapaduol Kaniya pinaagi sa paghinumdom Kaniya ug sa Iyang pagkamaayo. Kita dili makahimo sa atong kaugalingon paduol Kaniya ug sa pihong mga panalangin nga Iyang gisaad.³¹

Ako modapit kaninyo sa paghinumdom matag adlaw sa pagkahalagdon sa Langitnong Amahan ug ni Jesukristo ug sa unsay Ilang nabuhat alang kaninyo. Himoa nga ang inyong paghuna-huna sa Ilang kamaayo mas lig-ong nakahigot sa natipas ninyong kasingkasing ngadto Kanila.³² Pamalandungi ang Ilang kamanggiloy-on, ug ikaw mapanalanginan og dugang nga espiritwal nga pagbati ug mas mahisama kang Kristo. Ang pagpamalandong sa Ilang pagbati makatabang ninyo sa “pagpabiling matinud-anon hangtud sa katapusan,” hangtud nga kamo “pagadawat

ngadto sa langit” nga “mopuyo uban sa Dios diha sa usa ka kahintang nga walay katapusan ang kalipay.”³³

Ang atong Langitnong Amahan, nga nagpaila sa Iyang Hinigugmang Anak, miingon, “Paminaw Kaniya!”³⁴ Samtang lihukon ninyo kadtong mga pulong ug maminaw Kaniya, hinumdumi, sa malipayon ug talahurong paagi, nga ang Manluluwas gusto nga mopahiuli sa dili ninyo mapahiuli, gusto Siya nga moayo sa mga samad nga dili ninyo maayo, gusto Siya nga mouli sa unsay dili na maulian;³⁵ mobayad Siya sa bisan unsay dili patas nga gipahamtang kaninyo;³⁶ ug gusto Siya nga permanente ang pagkaayo gani sa gisakitan nga mga kasingkasing.³⁷

Samtang akong gipamalandungan ang mga gasa gikan sa atong Langitnong Amahan ug ni Jesukristo, akong nahibaloan ang Ilang walay kinutubang gugma ug ang Ilang dili matugkad nga kamanggiloy-on alang

sa tanan nga anak sa Langitnong Amahan.³⁸ Kini nga kahibalo miusab kanako, ug kini usab makausab kaninyo. Sa ngalan ni Jesukristo, amen. ■

MUBO NGA MGA SULAT

1. Tan-awa, sama pananglit ang Abraham 2:16; Exodo 13:3; Joshue 4:6–9; 1 Samuel 7:11–12.
2. Ulohan nga pahina sa Basahon ni Mormon.
3. Moroni 10:3.
4. Tan-awa, sama pananglit sa, Deuteronomio 6:12; 11:18; Josue 4:21–24; 1 Samuel 7:12; Mga Taga-Roma 2:4; 11:22; 2 Nephi 9:10; 33:14; Jacob 1:7; Mosiah 5:3; 25:10; 27:22; Alma 34:4; Helaman 12:2; 3 Nephi 4:33; 18:11–12; Morman 2:13; Doktrina ug mga Pakigsaad 133:52; 138:2.
5. Tan-awa sa Isaias 53:3–12; Lucas 22:44; Juan 3:16; Mga Taga-Galacia 2:20; Mosiah 3:5–11; Alma 7:10–13; Doktrina ug mga Pakigsaad 19:16–19.
6. Mosiah 27:11.
7. Mosiah 27:11.
8. Mosiah 27:9; tan-awa usab sa bersikulo 13.
9. Mosiah 27:16.
10. Alma 36:2.
11. Alma 36:27.
12. Tan-awa sa Alma 36:27–29.
13. Ezequiel 36:26–28.
14. 3 Nephi 27:14–15. Tan-awa usab sa Juan 12:32; 2 Nephi 26:24.
15. Tan-awa sa Mosiah 15:7–9; Pinadayag 21:4.
16. Russell M. Nelson, “Kita Makabuhat og Mas Maayo pa ug Mahimong Mas Maayo,” *Liahona*, Mayo 2019, 67.
17. “Come, Thou Fount of Every Blessing,” *Hymns* (1948), nu. 70.
18. Mosiah 4:11; tan-awa usab sa Alma 36:2, 28–29; Ether 7:27; 10:2; Moroni 9:25.
19. Tan-awa sa Moroni 10:4–5.
20. Tan-awa sa ulohan nga pahina ug sa pasiuna sa Basahon ni Mormon.
21. Tan-awa sa Doktrina ug mga Pakigsaad 19:18–19.
22. Tan-awa sa Doktrina ug mga Pakigsaad 14:7.
23. Moises 6:59; tan-awa usab sa Alma 36:28.
24. Tan-awa sa Ang Giya ngadto sa mga Kasulatan, “Pag-ampo.”
25. Tan-awa sa “Dugang Kabalaan Hatagi Ako,” *Mga Himno*, nu. 77.
26. Tan-awa sa Filemon 1:6.
27. Tan-awa sa 1 Samuel 17:37; 1 Nephi 4:2.
28. Tan-awa sa Alma 5:6, 13, 26–28.
29. Tan-awa sa Mosiah 4:11–26.
30. Doktrina ug mga Pakigsaad 59:21.
31. Tan-awa sa Doktrina ug mga Pakigsaad 88:63–64.
32. Tan-awa sa “Come, Thou Fount of Every Blessing.”
33. Mosiah 2:41.
34. Tan-awa sa Mateo 17:5; Marcos 9:7; Lucas 9:35; 3 Nephi 11:7; Joseph Smith—Kasaysayan 1:17.
35. Tan-awa sa Boyd K. Packer, “The Brilliant Morning of Forgiveness,” *Ensign*, Nob. 1995, 19–20.
36. Tan-awa sa Pinadayag 21:4.
37. Tan-awa sa Salmo 147:3.
38. Tan-awa sa 2 Nephi 26:33.



Ni Elder Benjamin M. Z. Tai
Sa Seventy

Ang Gahum sa Basahon ni Mormon sa Pagkakabig

Ang Basahon ni Mormon naghatag og espirituhanong nutrisyon, nagresita og plano sa buhatunon, ug nagkonektar kanato sa Balaang Espiritu.

Human maribyu ang report gikan sa bag-o lang nga pisikal nga paghiling, akong nakat-unan nga kinahanglan nakong mohimo og mga kausaban sa paagi sa pagpakabuhi. Aron sa pagtabang nako, ang akong doktor miresita og plano sa nutrisyon ug ehersisyo, nga, kon mopili ko nga sundon kini, mousab nako ngadto sa mas himsog nga tawo.

Kon ang matag usa kanato mosinati og espiritwal nga paghiling, unsa kaha ang atong makat-unan mahitungod sa atong kaugalingon? Unsa kaha nga mga kausaban ang iresita sa atong espiritwal nga magtatambal? Aron mahimo kita kon kinsa kita angay nga mahimo, importante nga mahibalo kita unsay buhaton ug buhaton unsay atong nahibaloan.

Si Jesukristo mao ang Batid nga Magtatambal.¹ Pinaagi sa Iyang Pag-ula, mobugkos Siya sa atong mga samad, modala diha Kaniya sa atong mga kahuyang, ug moayo sa atong nadugmok nga kasingkasing.² Pinaagi sa Iyang grasya ang atong kahuyang mamahimong lig-on.³ Siya nagdapit kanato sa pagsunod Kaniya⁴ pinaagi sa pagkat-on mahitungod Kaniya, pagpaminaw sa Iyang mga pulong, ug paglakaw diha sa

kaaghup sa Iyang Espiritu.⁵ Siya misaad nga motabang kanato⁶ niining tibuok kinabuhi nga proseso sa pagkakabig, nga mousab kanato ug magdala og walay katapusang kalipay.⁷

Ang Manluluwas mihatag kanato sa Basahon ni Mormon isip gamhanang himan nga motabang sa pagkakabig. Ang Basahon ni Mormon naghatag og espirituhanong nutrisyon, nagresita og plano sa buhatunon, ug nagkonektar kanato sa Balaang Espiritu. Gisulat alang kanato,⁸ naglangkob kini sa pulong sa Dios diha sa kayano⁹ ug nagsulti kanato sa atong pagkatawo, katuyoan, ug padulngan.¹⁰ Kauban sa Biblia, ang Basahon ni Mormon nagpamatuod kang Jesukristo¹¹ ug nagtudlo unsaon nato sa pagkasayud sa kamatuoran ug mahimong sama Kaniya.

Si Brother Saw Polo 58 anyos sa dihang gipaila siya sa gipahiuli nga

ebanghelyo ni Jesukristo. Sa dihang nahimamat nako siya, nagserbisyo siya isip presidente sa branch sulod sa daghang katuigan, apan akong nasayran nga wala pa gayud siya makabasa sa Basahon ni Mormon tungod kay wala pa kini sa iyang lumad nga pinulongang Burmese. Sa dihang nangutana ko niya giunsa niya pagkasayud nga ang libro tinuod bisan wala pa makabasa niini, mitubag siya nga natun-an niya ang hulagway nga libro sa *Mga Sugilanon sa Basahon ni Mormon* kada adlaw pinaagi sa pagtan-aw sa mga paghulagway, paggamit og diksyonaryo sa paghubad sa Iningles nga mga pulong, ug mainampingong paghimo og mugbong sulat sa unsay iyang nakat-unan. Siya mipasabut, “Matag higayon nga nagtuon ko, mag-ampo ko kalabut sa unsay akong nakat-unan, ug mobati ko og kalinaw ug kalipay, matin-aw ang akong hunahuna, ug ang akong kasingkasing mahumok. Akong gibati ang Espiritu Santo nga nagmatuod kanako nga tinuod kini. Ako nasayud nga ang Basahon ni Mormon pulong sa Dios.”

Sama ni Brother Saw Polo, ang matag usa kanato makatuon sa Basahon ni Mormon sumala sa atong



Bountiful, Utah, USA

mga kahintang. Samtang magtinguha kita nga motuo ug mamalandong sa mga pagtulun-an niini diha sa atong mga kasingkasing, kita makapangutana sa Dios uban sa pagtuo kon ang mga pagtulun-an tinuod.¹² Kon kita sinsero sa atong tinguha nga masayud ug dunay tinuod nga katuyoan nga mobuhat, Siya motubag kanato diha sa atong mga kasingkasing pinaagi sa Espiritu Santo. Kini pinaagi sa gahum sa Espiritu Santo nga kita mahimo nga masayud sa kamatuoran sa tanan nga mga butang.¹³ Kon makaangkon kita og balaanong pagpamatuod sa Basahon ni Mormon, kita usab masayud pinaagi sa samang gahum nga si Jesukristo mao ang Manluluwas sa kalibutan, nga si Joseph Smith Iyang propeta, ug nga Ang Simbahan ni Jesukristo sa mga Santos sa Ulahing mga Adlaw mao ang Iyang gipahiuli nga Simbahan.¹⁴

Isip batan-on pa nga nagsugod sa akong misyonaryo nga pagserbisyo, misakay ko og eroplano padulong sa Australia. Mibati nga nag-inusara, nabalaka, ug dili angayan apan mapasaligon nga moserbisyo, nanginahanglan gyud ko og kasiguroan nga ang akong gituohan tinuod. Matinud-anon akong nag-ampo ug nagbasa sa akong mga kasulatan, apan sa pagpadayon



sa paglupad, migrabe ang akong pagduha-duha ug migrabe ang akong pisikal nga kondisyon. Human ko nanlimbasug sulod sa pipila ka oras, usa ka flight attendant milakaw sa agianan ug mihunong tupad sa akong lingkuranan. Iyang gikuha ang Basahon ni Mormon nga akong gibasa gikan sa akong mga kamot. Siya mitan-aw sa hapin ug miingon, “Nindot kana nga libro!” dayon gitunol og balik ang basahon kanako ug mipadayon sa paglakaw. Wala na ko kakita niya pag-usab.

Samtang naghunahuna ko sa iyang mga pulong, tataw nakong nadungog ug nabati sa akong kasingkasing ang, “Ania Ako, ug nasayud Ako kon asa ka. Buhata lang ang imong labing maayo, kay Ako na ang bahala sa tanan.” Ni-ana nga eroplano ibabaw sa Kadagatan sa Pasipiko, nakadawat ko og personal nga pagsaksi pinaagi sa akong pagtuon sa Basahon ni Mormon ug sa mga pag-aghat sa Espiritu Santo nga ang akong Manluluwas nasayud kon si kinsa ako ug nga ang ebanghelyo tinuod.

Si Elder David A. Bednar mitudlo: “Ang pagkasayud nga ang ebanghelyo tinuod mao ang kahulugan sa pagpamatuod. Ang padayon nga magmatinuoron sa ebanghelyo mao ang kahulugan sa pagkakabig.”¹⁵ Ang pagkakabig nagkinahanglan kanato nga mahimong “[tigtuman sa] pulong, ug dili kay magpaminaw ra.”¹⁶ Ang plano sa buhatunon sa Ginoo alang kanato—ang doktrina ni Kristo—labing klaro nga gitudlo diha sa Basahon ni Mormon.¹⁷ Kini naglakip sa:

- Una, *pagpakita* og hugot nga pagtuo kang Jesukristo pinaagi sa *pagsalig* Kaniya, *pagsunod* sa Iyang mga sugo, ug *pagkasayud* nga Siya motabang kanato.¹⁸
- Ikaduha, *paghinulsol* matag adlaw sa atong mga sayop ug *pagsinati* og hingpit nga kalipay ug kalinaw kon Siya mopasaylo kanato.¹⁹ Ang paghinulsol nagkinahanglan kanato sa *pagpasaylo* sa uban²⁰ ug nagtabang kanato nga mopadayon sa unahan. Ang Manluluwas misaad nga mopasaylo kanato kutob nga kita maghinulsol.²¹

- Ikatulo, *paghimo ug pagtuman* sa mga pakigsaad ngadto sa Dios pinaagi sa mga ordinansa sama sa bunyag. Kini magpabilin kanato diha sa dalan sa pakigsaad padulong Kaniya.²²
- Ikaupat, *pagdawat* sa gasa sa Espiritu Santo. Kini nga gasa nagtugot kanato sa kanunay nga pakig-uban sa usa kinsa mobalaan, mohupay, ug mogiya kanato.²³
- Ikalima, *paglahutay* hangtud sa katapusan pinaagi sa makanunayong *pagpadayon* samtang *magbusog* matag adlaw diha sa pulong ni Kristo.²⁴ Pinaagi sa pagbusog gikan sa Basahon ni Mormon ug hugtanong pagsunod sa mga pagtulunan niini, atong mabuntog ang mga tintasyon ug makadawat og giya ug proteksyon sa tibuok natong kinabuhi.²⁵

Pinaagi sa makanunayong paggamit sa doktrina ni Kristo sa atong kinabuhi, atong mabuntog ang pagkaluya nga mobabag sa kausaban ug kahadlok nga mopugong sa paglihok. Makadawat kita og personal nga pagpadayag, kay ang Espiritu Santo “*mopakita* nganha kaninyo sa tanan nga mga butang nga kinahanglan inyong buhaton,”²⁶ ug “ang mga pulong ni Kristo *magtug-an* kaninyo sa tanan nga mga butang nga inyong buhaton.”²⁷

Sulod sa 20 ka tuig, si Brother Huang Juncong nanlimbasug sa ilimnong makahubog, sigarilyo, ug dili mapugngang pagsugal. Sa dihang gipahila kang Jesukristo ug sa Iyang gipahiuli nga ebanghelyo, si Brother Huang nagtinguha og kausaban alang sa kayohan sa iyang batan-ong pamilya. Ang iyang labing dakong hagit mao ang pagpanabako. Walay puas ang pagpanigarilyo, kadaghan na siyang napakyas sa pagsulay nga moundang. Usa ka adlaw kini nga mga pulong gikan sa Basahon ni Mormon misulod sa iyang hunahuna: “kasingkasing, uban sa tinuod nga katuyoan.”²⁸ Bisan og pakyas ang milabay nga mga paningkamot, gibati niya nga tingali mahimo siyang mausab uban sa tabang sa Langitnong Amahan ug ni Jesukristo.

Ang full-time nga mga misyonaryo mihusa sa ilang pagtuo uban kaniya ug mihatag og plano sa mga yanong stratehiya, uban sa bug-os nga pag-ampo ug pagtuon sa pulong sa Dios. Uban sa kinasingkasing ug tinuod nga katuyoan, si Brother Huang milihok nga may matnud-anong determinasyon ug nakakaplag nga kon mas nakatutok siya sa bag-ong mga gawi nga gusto niyang mapalambo, sama sa pagtuon sa Basahon ni Mormon, maminosan ang iyang pagtutok sa mga gawi nga gusto niyang wagtangon.

Mihinumdom sa iyang kasinatian 15 ka tuig na ang milabay, siya miingon, “Wala ko kahinumdom kon kanus-a gyud ko mihunong sa pagpanigarilyo, apan samtang naningkamot ko pag-ayo kada adlaw sa pagbuhat sa mga butang nga kinahanglan nakong buhaton aron madapit ang Espiritu sa Ginoo sa akong kinabuhi ug padayon nga mobuhat niini, dili na ako madani sa sigarilyo ug wala na gayud sukad.” Pinaagi sa paggamit sa mga pagtulun-an sa Basahon ni Mormon, ang kinabuhi ni Brother Huang nausab, ug nahimo siya nga mas maayong bana ug amahan.

Si Presidente Russell M. Nelson misaad: “Kon mainampunon kamo nga magtuon sa Basahon ni Mormon *kada adlaw*, makahimo kamo og mas maayong mga desisyon—*kada adlaw*. Mosaad ako nga kon mamalandong kamo sa unsay inyong gitun-an, ang mga bintana sa langit mobukas, ug makadawat kamo sa mga tubag sa inyong mga pangutana ug direksyon sa inyong kinabuhi. Mosaad ako nga kon inyong isubsob kada adlaw ang inyong kaugalingon diha sa Basahon ni Mormon, mapanalipdan kamo batok sa mga dautan niining panahona, bisan ang grabing pagtakboy sa pornograpiya ug sa ubang matang sa adiksiyon.”²⁹

Minahal nga mga higala, ang Basahon ni Mormon mao ang pulong sa Dios, ug kita mas mapaduol kaniya kon tun-an nato kini.³⁰ Samtang atong sulayan ang mga pulong niini, makaangkon kita og saksi sa katinuod



New York City, New York, USA

niini.³¹ Samtang padayon kita nga magpuyo sumala sa mga pagtulun-an niini, wala na kitay “tinguha nga mobuhat og dautan.”³² Ang atong kasingkasing, panagway, ug kinaiya mausab aron mahimong mas sama sa Manluluwas.³³ Akong ipaambit ang akong siguradong pagsaksi nga si Jesus mao ang Kristo, atong Manluluwas, Manunubos, ug Higala. Sa ngalan ni Jesukristo, amen. ■

MUBO NGA MGA SULAT

1. Tan-awa sa Marcos 2:17.
2. Tan-awa sa Salmo 147:3; Isaias 53:4; Mateo 8:17.
3. Tan-awa sa 2 Nephi 25:23; Jacob 4:7; Ether 12:27.
4. Tan-awa sa Mateo 19:21; Marcos 10:21; Lucas 18:22; 2 Nephi 31:10.
5. Tan-awa sa Doktrina ug mga Pakigsaad 19:23.
6. Tan-awa sa Isaias 41:10.
7. Tan-awa sa Mosiah 2:41; 3:19; 5:2.
8. Tan-awa sa 2 Nephi 25:8, 21–22; Mormon 7:1; 8:35.
9. Tan-awa sa 2 Nephi 25:7; 31:2–3.
10. Tan-awa sa 2 Nephi 2:25; Alma 40.
11. Tan-awa sa Isaias 29:4, 11–18; Ezequil 37:16–21; 2 Mga Taga-Corinto 13:1; 1 Nephi 13:38–42; 2 Nephi 3:12; 25:26.

12. Tan-awa sa Alma 32:26–43.
13. Tan-awa sa Moroni 10:3–5.
14. Tan-awa sa pasiuna sa Basahon ni Mormon.
15. David A. Bednar, “Nakabig ngadto sa Ginoo,” *Liahona*, Nob. 2012, 109.
16. Santiago 1:22.
17. Tan-awa sa 2 Nephi 31; 3 Nephi 11:31–40; 27:13–22.
18. Tan-awa sa 1 Nephi 3:7; Moroni 7:33.
19. Tan-awa sa Mosiah 4:3.
20. Tan-awa sa Mateo 18:21–35; Marcos 11:25–26; Lucas 6:37; 3 Nephi 13:14–15; Doktrina ug mga Pakigsaad 64:10; 82:1.
21. Tan-awa sa Mosiah 26:30; Moroni 6:8.
22. Tan-awa sa 2 Nephi 31:17–18.
23. Tan-awa sa 1 Nephi 10:19; 2 Nephi 33:1; 3 Nephi 11:32; 28:11; Moroni 6:4.
24. Tan-awa sa 2 Nephi 31:20.
25. Tan-awa sa 1 Nephi 15:24.
26. 2 Nephi 32:5.
27. 2 Nephi 32:3.
28. Moroni 10:4.
29. Russell M. Nelson, “Ang Basahon ni Mormon: Unsa kaha ang Imong Kinabuhi Kon wala Kini?” *Liahona*, Nob. 2017, 62–63.
30. Si Propeta Joseph Smith misulti mahitungod sa Basahon ni Mormon, “Ang tawo labi nga maduol sa Dios pinaagi sa pagsunod sa iyang mga lagda, kay sa bisan hain nga basahon” (pasiuna sa Basahon ni Mormon).
31. Tan-awa sa Jacob 6:7; Alma 32:26–43.
32. Alma 19:33.
33. Tan-awa sa 2 Mga Taga-Corinto 5:17; Mosiah 3:19; 5:2; Alma 5:14, 19.



Ni Elder Gary E. Stevenson
Sa Korum sa Napulog Duha ka mga Apostoles

Usa ka Maayong Patukuranan alang sa Umaabut

Sa umaabut nga katuigan, unta atong tugutan kining mga pagpalambo nga gihimo sa Templo sa Salt Lake sa pagpalihok ug padasig nato.

Kasaysayan sa Templo sa Salt Lake

Mobyaha kita balik ngadto sa usa ka init nga kahapunon niadtong Hulyo 24, 1847, mga alas 2:00 sa hapon. Human sa lisud kaayo nga 111 ka adlaw nga panaw uban sa 148 ka miyembro sa Simbahan kinsa milangkub sa unang grupo nga mipadulong sa kasadpan, si Brigham Young, niadtong panahona Presidente sa Korum sa Napulog Duha ka mga Apostoles, masakiton ug luya gikan sa hilanat, misulod sa Walog sa Salt Lake.

Duha ka adlaw ang milabay, samtang nagpaayo gikan sa iyang sakit, si Brigham Young nangulo sa pipila ka sakop sa Korum sa Napulog Duha ka mga Apostoles ug uban pa sa usa ka pag-usisa nga ekspedisyon. Si William Clayton mirekord, “Mga 1.2 ka kilometro gikan sa amihanan sa kampo, kami miabut sa maanindot nga patag sa yuta, lebel ug inanay nga nagbaki-lid ngadto sa kasadpan.”¹

Samtang gisuhiid ang dapit uban sa grupo, si Brigham Young kalit nga mihunong ug gitugsok iyang sungkod sa yuta, nagsinggit, “Dinhi mobarug

ang Templo sa atong Dios.” Usa sa iyang kauban mao si Elder Wilford Woodruff, kinsa miingon nga kining pamahayag “misulod [niya] sama sa kilat,” ug siya miugsok og sanga ngadto sa yuta sa pagtimaan sa dapit nga gimarkahan sa sungkod ni Presidente Young. Dise sais ka ektarya ang gipili alang sa templo, ug nahukman nga ang siyudad kinahanglan nga ipahimutang “nga ang mga dalan ideretso padulong sa Amihanan & Habagatan, silangan & kasadpan gikan niini” nga ang templo anaa sa sentro.²

Sa kinatibuk-ang komperensya sa Abril 1851, ang mga miyembro sa Simbahan nagkahiusang miboto sa pagpaluyo og sugyot sa pagtukod og templo “sa ngalan sa Ginoo.”³ Duha ka tuig ang milabay, niadtong Pebrero 14, 1853, ang luna gipahinungod ni Heber C. Kimball sa usa ka publikong seremonya nga gitambongan sa liboan ka mga Santos, ug gisugdan pagkalot ang yuta alang sa konstruksyon sa patukuranan sa Templo sa Salt Lake. Pipila ka bulan ang milabay, niadtong Abril 6, ang dagkong bato sa pamag-ang sa templo

gipahimutang ug gipahinungod uban sa nindot nga mga seremonya nga naglakip sa nakauniporme nga grupo sa mga tawo nga nagdala og bandera ug mga banda ug prosesyon nga gipangulohan sa mga lider sa Simbahan gikan sa karaang tabernakulo padulong sa luna sa templo, diin gihalad ang mga pakigpulong ug pag-ampo sa matag usa sa upat ka bato.⁴

Sa seremonya sa groundbreaking, si Presidente Young mihinumdum nga siya nakakita og panan-awon sa dihang siya unang miadto sa yuta samtang gisusi nila ang tiilan sa walog, nagsulti, “Ako nasayud [kaniadto], sama nga ako nahibalo gyud karon, nga kini ang yuta diin tukuron ang usa ka templo—klaro kaayo ni sa akong panan-awon.”⁵

Napul ka tuig ang milabay, si Brigham Young mitanyag sa mosunod nga mapanagnaong panglantaw sa kinatibuk-ang komperensya sa Oktubre 1863: “Ako gusto nga makakita nga [ang] templo matukod sa paagi nga kini molungtud hangtud sa milenyum. Kini dili lang ang templo nga atong tukuron, dunay gatosan niini nga tukuron ug ipahinungod ngadto sa Ginoo. Kini nga templo mailhan isip unang templo nga natukod sa kabukiran pinaagi sa mga Santos sa Ulahing mga Adlaw. . . . Gusto ko kana nga templo . . . mobarug isip



mapasigarbuhong monumento sa pagtuo, pagkamalahutayon ug kakugi sa mga santos sa Dios sa kabukiran.”⁶

Sa pagribyu niining mubong kasaysayan, ako natingala sa pagkamanalagna ni Brigham Young—una, sa iyang pagsiguro nga, kutob sa mahimo ug, gamit ang mga pamaagi sa pagtukod nga anaa niadto nga panahon ug dapit, ang Templo sa Salt Lake pagatukuron sa paagi nga molungtad sa tibuok Milenyum ug, ikaduha, sa iyang pagpanagna sa pagtubo sa umaabut nga mga templo sa tibuok kalibutan, *gani sa gidaghanon nga gatasan.*

Ang Pagbag-o sa Templo sa Salt Lake

Sama ni Brigham Young, ang atong propeta karon nagpabakana sa Templo sa Salt Lake ug sa tanang ubang templo sa tumang pag-amping. Latas sa mga katuigan, ang Unang Kapangulohan, matag karon ug unya, nagtambag sa Presiding Bishopric sa pagsiguro nga lig-on ang patukuranan sa Templo sa Salt Lake. Sa dihang ako nagserbisyo sa Presiding Bishopric, sa hangyo sa Unang Kapangulohan, kami mihimo og kinatibuk-ang pagribyu sa pasilidad sa Templo sa Salt Lake, lakip ang pagtuki sa labing bag-ong kalamboan sa seismic nga desinyo ug mga paagi sa pagtukod.

Ania ang mga porsyon sa ribyu nga gihatag ngadto sa Unang Kapangulohan niadtong panahona: “Sa desinyo ug pagtukod sa Templo sa Salt Lake, ang labing maayong engineering, hanas nga trabaho, konstruksyon nga materyales, kagamitan, ug ubang



“Dinhi mobarug ang Templo sa atong Dios,” mideklarar si Presidente Brigham Young.



Ang mga pagbag-o sa Templo sa Salt Lake makatampo sa katumanan sa tinguha ni Brigham Young nga ang templo molungtad hangtud sa Milenyum.

mga kapanguhaan nga anaa niadtong panahona mao ang gigamit. Sukad sa pagpahinungod niini niadtong 1893, ang templo nagbarug nga lig-on ug nagsilbing simbolo sa pagtuo [ug] paglaum ug usa ka kahayag ngadto sa katawhan. Tumang pag-amping ang gihimo sa pagpadagan, paglimpyo, ug pag-atiman sa templo aron magpabiling anaa sa maayong kondisyon. Ang gawas nga granite ug mga suliras sa salog sa sulod ug suporta nga mga sagbayan anaa sa maayong kondisyon. Bag-ong mga pagtuon nagmatuod nga ang dapit nga gipili ni Brigham Young alang sa templo dunay maayo kaayo nga yuta ug maayong mga kalidad sa pagkabantok.”⁷



Gisugdan pagkalot ang yuta alang sa Templo sa Salt Lake niadtong 1853.

Ang ribyu mihukom nga gikinahanglan ang normal nga mga pag-ayo ug pagpalambo aron sa pagbag-o ug pag-update sa templo, lakip ang deck sa gawas ug mga hawanan, dili na magamit nga mga utility system, ug mga dapit sa pagbunyag. Hinoon, konsiderasyon sa usa ka lahi, mas malukpanong seismic nga pagpalambo gikan sa patukuranan sa templo pataas girekomendar usab.

Ang Patukuranan sa Templo

Sama sa inyong mahinumdoman, si Presidente Brigham Young mismo miapil gyud sa daghang ditalye sa pagtukod sa orihinal nga patukuranan sa templo, nga maayong misilbi sa templo sukad sa pagkahuman niini 127 ka tuig na ang milabay. Ang bag-ong gisugyot nga package sa seismic nga pagpalambo sa templo mogamit og base isolasyon nga teknolohiya, diin wala pa gani mahunahunai sa panahon sa pagtukod niini. Kini giisip nga labing bag-o, labing state-of-the-art nga engineering alang sa proteksyon sa linog.

Kini nga teknolohiya, nga bag-o lang namugna, magsugod sa patukuranan gayud sa templo, maghatag og lig-on nga panalipod batok sa kadaut gikan sa linog. Buot ipasabut, kini naglig-on sa estruktura sa templo aron




mobarug nga lig-on, bisan og ang yuta ug ang palibut niini mosinati og pagtay-og sa yuta nga seismic nga panghitabo.

Ang pagbag-o sa templo nga mogamit niining teknolohiya gipahibalo sa Unang Kapangulohan miaging tuig. Ubos sa direksyon sa Presiding Bishopric, ang konstruksyon nagsugod na pipila ka bulan ang milabay, sa Enero 2020. Kini gibanabana nga makompleto sulod sa mga upat ka tuig.

Pagsiguro sa Imong Personal nga Patukuranan

Samtang ako namalandong sa sunod upat ka tuig sa kinabuhi niining matahom, halangdon, mahimayaon ug kahibulongan nga Templo sa Salt Lake, akong mas gilantaw kini isip panahon sa *pagbag-o* kay sa panahon sa



Ang gisugyot nga pagpalig-on sa Templo sa Salt Lake alang sa linog gikonsiderar nga maoy labing bag-o nga engineering alang sa proteksyon batok sa linog.

pagsarado! Sa samang paagi, kita tingali makapangutana sa atong kaugalingon, “Sa unsang paagi kining malukpanong pagbag-o sa Templo sa Salt Lake makapadasig nato nga moagi sa atong kaugalingong espiritwal nga *pagbag-o*?”

Usa ka mahinuklugong pagsusi sa atong kaugalingon mahimong mopakita nga kita usab ug atong mga pamilya makabenebisyo sa atong paghimo sa gikinahanglan nga buhat sa pagmintinar ug pagbag-o, gani usa ka seismic nga pagpalambo! Mahimong sugdan nato kana nga proseso pinaagi sa pagpangutana:

“Unsay hitsura sa akong patukuranan?”

“Unsay gilangkuban sa baga og bungbong, lig-ong mga bato sa pamag-ang nga parte sa akong personal nga patukuranan, diin anaa nahimutang ang akong pagpamatuod?”

“Unsay sukaranang mga elemento sa akong espiritwal ug emosyonal nga kinaiya nga makapahimo nako ug sa akong pamilya nga magpabiling makanunayon ug dili matarug, gani sa pagbuntog sa pagtay-og sa yuta ug sa kaguliyang sa seismic nga mga panghitabo nga siguradong mahitabo sa atong kinabuhi?”

Kining mga panghitabo, nga sama sa linog kasagaran lisud matag-an ug moabut sa nagkalainlaing mga angang sa kakusog—pakigbisog sa mga pangutana o pagduhaduha, pagatubang sa kasakit o kalisdanan, pagsagubang sa personal nga mga kahiubos

sa mga lider sa Simbahan, mga miyembro, doktrina, o polisiya. Ang labing maayong depensa batok niini anaa sa atong espiritwal nga patukuranan.

Unsa kaha ang espiritwal nga mga bato sa pamag-ang sa atong pamilya ug sa personal nga kinabuhi? Kini mahimong ang simple, yano, ug bililhong mga baruganan sa pagsunod sa ebanghelyo—pag-ampo sa pamilya, pagtuon sa kasulatan, lakip ang Basahon ni Mormon; pagtambong sa templo ug pagkat-on sa ebanghelyo pinaagi sa *Dali*, *Sunod Kanako* ug home evening. Ubang makatabang nga mga kapanguhaan sa paglig-on sa inyong espiritwal nga patukuranan mahimong maglakip sa mga Artikulo sa Hugot nga Pagtuo, sa pamahayag sa pamilya, ug “Ang Buhi nga Kristo.”

Alang kanako, ang mga baruganan nga nalakip sa mga pangutana nga gihisgutan isip kabahin sa pagdawat og usa ka rekomend sa templo nagserbisyo isip lig-on nga basehan alang sa usa ka espiritwal nga patukuranan—ilabi na ang unang upat ka pangutana. Ako nagkonsiderar niini nga espiritwal nga mga bato sa pamag-ang.

Kita, syempre, pamilyar niini nga mga pangutana, kay si Presidente Russell M Nelson mibasa niini kanato tagsa-tagsa sa miaging kinatibuk-ang komperensya.

1. Ikaw ba adunay pagtuo ug pagpamatuod sa Dios, ang Amahan

- sa Kahangturan; sa Iyang Anak, si Jesukristo; ug sa Espiritu Santo?
2. Ikaw ba adunay pagpamatuod sa Pag-ula ni Jesukristo ug sa Iyang tahas isip imong Manluluwas ug Manunubos?
 3. Ikaw ba adunay pagpamatuod sa Pagpahiuli sa ebanghelyo ni Jesukristo?
 4. Ikaw ba nagpaluyo sa Presidente sa Ang Simbahan ni Jesukristo sa mga Santos sa Ulahing mga Adlaw isip propeta, manalagna, ug tigpadayag ug isip mao ang bugtong tawo sa yuta nga gitugutan sa pagdumala sa tanang mga yawe sa pagkapari?⁸

Inyo bang nakita kon sa unsang paagi inyong makonsiderar kini nga mga pangutana isip bililhon nga mga elemento sa inyong personal nga patukuranan sa pagtabang ninyo sa pagtukod ug pagpalig-on niini? Si Pablo mitudlo sa mga Taga-Efeso sa usa ka simbahan nga “tinukod ibabaw sa patukuranan nga mao ang mga apostoles ug mga propeta, nga niini si Jesukristo mao ang ulohang bato sa pamag-ang; diha kaniya ang tibuok nga tinukod nausa ug nagatubo ngadto sa pagka-templo nga balaan diha sa Gino.”⁹

Usa sa dakong kalipay sa akong kinabuhi mao ang mahimamat ug madasig sa mga miyembro sa Simbahan sa tibuok kalibutan kinsa maoy buhi nga mga ehemplo sa pagtukod kang Jesukristo ug sa Iyang ebanghelyo. Sila dunay lig-ong personal nga mga patukuranan nga nagtugot nila sa pagbuntog sa mga kalisud sa kinabuhi uban sa lig-on nga panabut, bisan pa sa ilang mga kasakit.

Sa pagpakita niini sa mas personal nga lebel, ako bag-o lang namulong sa haya sa usa ka matahum, madasingong batan-ong asawa ug inahan (usa usab ka pamilya nga higala namo). Siya determinado nga Division 1 nga magdudula sa soccer sa dihang nahimamat ug naminyoan ang iyang bana nga dental nga estudyante. Sila napanalanginan og matahum, hingkod og kaalam nga anak nga babaye. Siya maisugong nakigbisog sa lainlaing matang sa kanser sulod sa unom

ka mahagitong mga tuig. Bisan pa sa kanunayng emosyonal ug pisikal nga kasakit nga iyang nasinati, siya misalig sa iyang mahigugmaong Langitnong Amahan ug kanunayng gikutlo sa iyang mga sumusunod sa social media sa iyang inilang panultihon: “Ang Dios anaa sa mga detalye.”

Sa usa sa iyang mga post sa social media, siya misulat nga usa ka tawo nangutana niya, “Giunsa nimo nga ikaw adunay pagtuo gihapon bisan pa sa tanang kasakit nga naglibut nimo?” Siya hugot nga mitubag niining mga pulong: “Tungod ang pagtuo maoy makatabang nako niining mangitngit nga mga panahon. Ang pagbaton og pagtuo wala magpasabut nga walay dautan nga mahitabo. Ang pagbaton og pagtuo nagtugot nako nga motuo nga may kahayag na usab nga moabut. Ug kana nga kahayag mas mohayag kay ako milakaw sa kangitngit. Ingon sa daghang kangitngit nga akong nasaksihan sa katuigan, ako nakasaksi og mas labaw nga kahayag. Ako nakakita og mga milagro. Ako nakabati og mga anghel. Ako nasayud nga ang akong Langitnong Amahan nag-agak nako. Wala niana ang masinati kon ang kinabuhi sayon pa. Ang kaugmaon niining kinabuhia mahimong wala mahibaloi, apan ang akong pagtuo dili. Kon ako mopili nga dili magbaton og pagtuo nan ako mipili nga maglakaw lang sa kangitngit. Kay kon walay pagtuo, kangitngit lang ang mahibilin.”¹⁰

Ang iyang dili matarug nga pagpamatuod sa pagtuo diha ni Ginoong Jesukristo—sa iyang mga pulong ug buhat—usa ka inspirasyon sa uban. Bisan tuod ang iyang lawas *mahuyang*, siya mibayaw sa uban aron mahimong *mas lig-on*.

Ako naghunahuna sa daghang ubang miyembro sa Simbahan, mga manggugubat sama niini nga sister, kinsa naglakaw sa pagtuo matag adlaw, naningkamot nga mahimong matinud-anon ug walay kahadlok nga mga disipulo sa atong Manluluwas, Si Jesukristo. Sila nagkat-on bahin kang Kristo. Sila nagsangyaw kang Kristo. Sila naningkamot sa pagsunod Niya.

Bisan kon ang mga adlaw sa ilang kinabuhi nag-atubang man og malig-on o huyang nga yuta, ang ilang espiritwal nga patukuranan lig-on ug dili matarug.

Kini mao sila ang mapahinungrong mga kalag kinsa nakasabut sa lawom nga kahulugan sa mga pulong sa himno “Unsa kaligon atong tukuranan” ug “Sa Manluluwas nga atong dangpanan.”¹¹ Ako mapasalamaton labaw pa sa akong masulti nga nakauban kadtong kinsa nag-andam og usa ka espiritwal nga patukuranan nga takus sa ngalan sa *mga Santos* ug kinsa lig-on ug luwas sa paglahutay sa daghang mga kalisud sa kinabuhi.

Ako wala nagtuo nga kita makasulti pa og labaw sa kaimportante niana nga lig-ong patukuranan sa atong personal nga kinabuhi. Bisan sa sayong edad, ang atong mga bata sa Primary giduloan samtang sila nagkanta niini gyud nga kamatuoran:

*Ang tawong maalam nagtukod
og balay,
Ug ang ulan mibuhagay. . . .
Mibundak ang ulan ug mibaha,
Ang balay’s bato wa maguba.*¹²

Ang kasulatan nagpalig-on niining patukuranang doktrina. Ang Manluluwas mitudlo sa katawhan sa Amerika:

“Ug kon kamo sa kanunay magbuhat niini nga mga butang bulahan kamo, kay kamo *natukod diha sa ibabaw sa akong lig-on nga sukaranan*.

“Apan kon kinsa diha kaninyo magbuhat kapin ug kulang niini *wala matukod sa akong lig-on nga sukaranan*, apan natukod sa usa ka balason nga tukuranan; ug sa pagbundak sa ulan, ug sa pag-abut sa mga lunop, ug sa paghuros sa mga hangin, ug mohampak diha kanila, sila matumba.”¹³

Kini sinsero nga paglaum sa mga lider sa Simbahan nga ang mahinungdanong mga pagbag-o sa Templo sa Salt Lake makatabang sa katumanan sa tinguha ni Brigham Young nga makakita nga “ang templo matukod sa paagi nga kini molungtad hangtud sa milenyum.” Sa umaabut nga katuigan, unta atong tugutan kining mga kalamboan

nga gihimo sa Templo sa Salt Lake sa padasig nato, isip mga indibidwal ug pamilya, aron kita sab—sa pina-sumingay—“matukod sa paagi nga molungtud hangtud sa milenyum.”

Ato kining mabuhat kon kita motuman sa sugo ni Apostol Pablo nga “sa ingon niini [gibutang nato] alang sa [atong] kaugalingon *ang maayong patukuranan alang sa umaabut*, aron [atong] makuptan kanang kinabuhi nga mao ang tinuod gayud nga kinabuhi.”¹⁴ Kini akong sinsero nga pag-ampo nga ang atong espiritwal nga patukuranan mahimong sigurado ug lig-on, nga ang atong pagpamatuod sa Pagula ni Jesukristo ug sa Iyang tahas isip Manluluwas ug Manunubos mahimong alang kanato nga atong kaugalingong ulohang bato sa pamag-ang, kinsa ako mopamatuod sa Iyang ngalan, nga mao si Jesukristo, amen. ■

MUBO NGA MGA SULAT

1. Journal ni William Clayton, Hulyo 26, 1847, Church History Library, Siyudad sa Salt Lake.
2. Tan-awa sa “At the Tabernacle, Presidents Woodruff and Smith Address the Saints Yesterday Afternoon,” *Deseret Evening News*, Ago. 30, 1897, 5; “Pioneers’ Day,” *Deseret Evening News*, Hulyo 26, 1880, 2; Wilford Woodruff journal, Hulyo 28, 1847, Church History Library, Salt Lake City.
3. “Minutes of the General Conference of the Church of Jesus Christ of Latter-day Saints, held at Great Salt Lake City, State of Deseret, April 6, 1851,” *Deseret News*, Abr. 19, 1851, 241.
4. Tan-awa sa “The Temple,” *Deseret News*, Peb. 19, 1853, 130; “Minutes of the General Conference,” *Deseret News*, Abr. 16, 1853, 146; “Minutes of the General Conference,” *Deseret News*, Abr. 30, 1853, 150.
5. “Address by President Brigham Young,” *Millennial Star*, Abr. 22, 1854, 241.
6. “Remarks by President Brigham Young,” *Deseret News*, Okt. 14, 1863, 97.
7. Presentasyon sa Presiding Bishopric bahin sa Templo sa Salt Lake ngadto sa Unang Kapangulohan, Okt. 2015.
8. Tan-awa sa Russell M. Nelson, “Panapos nga Pakigpulong,” *Liahona*, Nob. 2019, 121.
9. Mga Taga-Efeso 2:20–21.
10. Post sa social media ni Kim Olsen White.
11. “Unsa Kalig-on ang Tukuranan,” *Mga Himno*, nu. 44.
12. “Ang Tawong Maalam ug ang Tawong Walay Kaalam,” *Songbook sa mga Bata*, 132.
13. 3 Nephi 18:12–13.
14. 1 Timoteo 6:19.



Sesyon sa Sabado sa Gabii | 4 Abril 2020

Ni Elder Gerrit W. Gong

Sa Korum sa Napulog Duha ka mga Apostoles

Hosana ug Aleluya—Ang Buhi nga si Jesukristo: Ang Pinakaimportanting Bahin sa Pagpahiuli ug sa Pasko sa Pagkabanhaw

Niining panahon sa hosana [luwasa karon] ug aleluya, kantaha ang aleluya—kay Siya maghari hangtud sa kahangturan!

Minahal kong mga kaigsoonan: uban sa hosana ug aleluya, atong gisaulog ang buhi nga si Jesukristo niini nga panahon sa padayong Pagpahiuli ug Pasko sa Pagkabanhaw. Uban sa hingpit nga gugma, gisiguro kanato sa atong Manluluwas: nga “Kanakano makabaton kamo og kalinaw. Dinhi sa kalibutan aduna kamoy kagulan: apan sumalig kamo; gidaug ko na ang kalibutan.”¹

Pipila ka tuig ang milabay, samtang ako ug si Sister Gong nakigkita sa matahum nga pamilya, ang ilang batan-ong anak, si Ivy, maulawong mipagawas sa iyang violin. Gikuha niya ang pangkaskas sa violin [violin bow], gihugtan ug gibagnusan kini og rosin. Dayon iyang gibalik sa sudlanan ang pangkaskas, mipahiyom, ug milingkod. Bag-o pang nagtuon, gipaambit lang niya ang tanan niyang nahibaloan bahin sa violin. Karon,

mga tuig ang milabay, si Ivy nindot na kaayong motukar sa violin.

Niining mortal nga panahon, kitang tanan may gamay nga pagkasusama ni Ivy ug sa iyang violin. Magsugod kita sa sinugdanan. Pinaagi sa praktis ug pagpadayon, molambo kita ug mouswag. Sa paglabay sa panahon, ang moral nga kabubut-on ug ang mga mortal nga mga kasinatian nagtabang nga kita mas mahisama sa atong Manluluwas samtang naghago kita uban Kaniya sa Iyang ubasan² ug nagsubay sa Iyang dalan sa pakigsaad.

Ang mga anibersaryo, lakip niining ikadosyentos nga kasaulugan, nagpahinumdom kanato sa pagpahiuli.³ Sa pagsaulog sa padayon nga Pagpahiuli sa ebanghelyo ni Jesukristo, nangandam usab kita sa Pasko sa Pagkabanhaw. Niini, nagmaya kita sa pagbalik ni Jesukristo. Buhi Siya—dili

lang kaniadto, apan karon, dili para sa uban, apan sa tanan. Mianhi Siya ug moanhi aron sa pag-ayo sa nasa-kitan, paghaw-as sa mga nabilanggo, pag-ayo sa mga buta, ug paghatag og kagawasan sa mga nasamaran.⁴ Kana para natong tanan. Ang iyang makatubos nga saad magamit, bisan unsay atong kagahapon, atong karon, o mga kabalaka sa atong umaabut.

Ugma Domingo sa Lukay. Sa naandan, ang mga lukay mga sagradong simbolo sa pagpahayag sa kalipay diha sa atong Ginoo, sama sa *Madaugon nga Pagsulod ni Kristo sa Jerusalem*, diin “panon sa katawhan . . . nanguhag mga palwa sa palmera, ug nangadto sila sa pagsugat kaniya.”⁵ (Tingali ganahan kang makahibalo sa orihinal niining pinintal [painting] ni Harry Anderson nga gibitay sa opisina ni Presidente Russell M. Nelson, sa likod lang gyud sa iyang lamesa.) Sa basahon sa Pinadayag, kadtong nagadayeg sa Dios ug sa Kordero “nanagsul-ob ug maputi ug tag-as nga mga bisti, ug nanagdalag mga palwa sa palmera diha sa ilang mga kamot.”⁶ Kauban sa “mga kupo sa pagkamatarung” ug “mga korona sa himaya,” ang mga lukay gilakip sa pagpahinungod nga pag-ampo sa Kirtland Temple.⁷

Dayag lang, nga ang kahulugan sa Domingo sa Lukay mas labaw pa kay sa duot sa katawhan nga misugat ni Jesus dala ang mga lukay. Sa Domingo sa Lukay, si Jesus madaugon nga misulod sa Jerusalem isip paagi sa mga matinud-anon nga makिता ang katumanan sa panagna. Sama kang Zacarias⁸ ug sa mga Salmista nga mapanagnaong nanagna, ang atong Ginoo misulod sa Jerusalem nga nagkabayo sa asno samtang ang baga nga katawhan nagasinggit “Hosanna sa kahitas-an!”⁹ Ang Hosanna nagpasabut og “luwasa na karon.”¹⁰ Dayon, karon, kami maglipay, “Bulahan siya nga moanhi sa ngalan sa Ginoo.”¹¹

Sa semana human sa Domingo sa Lukay mao ang Pasko sa Pagkabanhaw. Si Presidente Russell M. Nelson mitudlo nga si Jesukristo “mianhi aron bayaran ang utang nga wala Niya utanga, tungod kay nakautang kita og dili



CHRIST'S TRIUMPHAL ENTRY INTO JERUSALEM (ANG MADAUGONG PAGSULOD NI KRISTO SA JERUSALEM), NI HARRY ANDERSON

nato mabayaran.”¹² Gani, pinaagi sa Pag-ula ni Kristo, ang tanang anak sa Dios “mahimo nga maluwas, pinaagi sa pagsunod sa mga balaod ug sa mga ordinansa sa Ebanghelyo.”¹³ Sa Pasko sa Pagkabanhaw, manganta kita og aleluya. Ang aleluya nagpasabut og “dayegon ninyo ang Ginoo.”¹⁴ Ang “Koro nga Aleluya” diha sa *Mesiyas* ni Handel usa ka matahum nga pamahayag sa Pasko sa Pagkabanhaw nga Siya “Hari sa Kaharian, ug Ginoo sa Kaginoohan.”¹⁵

Ang sagradong mga hitabo sa Domingo sa Lukay ug Pasko sa Pagkabanhaw mao ang istorya mahitungod sa hosana ug aleluya. Ang Hosana maoy atong pangamuyo sa Dios alang sa pagluwas. Ang aleluya nagpahayag sa atong pagdayeg ngadto sa Ginoo alang sa paglaum sa kaluwasan ug kahimayaan. Diha sa hosana ug aleluya atong giila ang buhi nga Jesukristo isip pinakaimportanting bahin sa Pasko sa Pagkabanhaw ug sa ulahing adlaw nga pagpahiuli.

Ang ulahing adlaw nga pagpahiuli nagsugod pinaagi sa pagpakita sa Dios—ang literal nga pagpakita sa Dios nga Amahan ug sa Iyang Anak, si Jesukristo ngadto sa batan-ong propeta nga si Joseph Smith. Miingon si Propeta Joseph, “Kon ikaw makatutok sa langit og mga lima ka minuto, ikaw masayud og daghan kay sa mobasa sa tanan nga nahisulat mahitungod niana nga hilisgutan.”¹⁶ Kay ang kalangitan abli na usab, nahibalo kita ug “mituo sa Dios ang Amahan sa Kahangturan, ug sa Iyang Anak, si Jesukristo, ug sa Espiritu Santo”¹⁷—ang balaanong Dios nga Kapangulohan.

Niadmong Domingo sa Pagkabanhaw, Abril 3, 1836, sa unang mga adlaw sa Pagpahiuli, ang buhi nga si Jesukristo mipakita dihang gipahinungod ang Kirtland Temple. Kadtong mga nakakita kaniya didto mipamatuod bahin kaniya pinaagi sa managsukwahing pulong sa pagkumpara niini sama sa kalayo ug tubig: “Ang

iyang mga mata ingon sa usa ka siga sa *kalayo*; ang buhok sa iyang ulo puti sama sa *lunsay nga yelo*; ang iyang panagway mihayag labaw sa *kahayag sa adlaw* ug ang iyang tingog ingon sa *dahunog sa dagko nga mga katubigan*, gani ang tingog ni Jehova.¹⁸

Niana nga okasyon mipahayag ang Manluluwas, “Ako mao ang sinugdanan ug ang katapusan; Ako mao siya kinsa nabuhi, Ako mao siya kinsa gipatay; Ako mao ang inyong manlalaban ngadto sa Amahan.”¹⁹ Usab, managsukwahing pulong sa pagkumpara—sinugdanan ug katapusan, nabuhi ug gipatay. Siya ang Alpha ug Omega, ang sinugdanan ug ang katapusan,²⁰ ang mag-uugmad ug maghiningpit sa atong pagtuo.²¹

Human nga mipakita si Jesukristo, si Moises, Elias, ug Elijah miabut usab. Pinaagi sa balaang direksyon, kining bantugang mga propeta sa karaan mipahiuli sa mga yawe sa pagkapari ug awtoridad. Sa ingon niana, “ang mga yawe niini nga kapaigoan [dispensasyon] gitugyan”²² diha sa Iyang gipahiuli nga Simbahan alang sa pagpanalagin sa tanan nga anak sa Dios.

Ang pag-adto ni Elijah didto sa Kirtland Temple katumanan usab sa panagna ni Malaquias sa Daang Tugon nga si Eljah mobalik “sa dili pa moabut ang mahinungdanon ug makalilisang nga adlaw sa Ginoo.”²³ Sa paghimo niini, ang pagpakita ni Elijah mihaum, apan dili sulagma, ngadto sa kapanahunan sa Pagpalabay sa mga Judeo, diin ang maong tradisyon sa balaang paagi nagpaabut sa pagbalik ni Elijah.

Daghan sa debotong pamilya sa mga Judeo mihimo og dapit alang ni Elijah diha sa ilang Pagpalabay nga lamesa. Daghan nagbutang og puno nga baso alang sa pagdapit ug pag-abiabi kaniya. Ug ang uban, atol sa tradisyonal nga Kapistahan sa Pagpalabay, magpadala og bata ngadto sa pultahan, usahay tuyuon kining abli og gamay, aron makita kon si Eliza naa ba sa gawas naghulat nga pasudlon.²⁴

Agig katumanan sa panagna ug isip kabahin sa pagpahiuli sa tanang butang,²⁵ si Elijah miabut sigun sa

gisaad, sa Pasko sa Pagkabanhaw ug sa pagsugod sa Pagpalabay. Gidala niya ang awtoridad sa pagsilyo alang sa pagbugkos sa mga pamilya sa yuta ug sa langit. Sama sa gitudlo ni Moroni sa Propetang si Joseph nga, si Elijah “motanom diha sa kasingkasing sa mga anak sa mga saad nga gihimo ngadto sa mga amahan, ug ang mga kasingkasing sa mga anak mobati ngadto sa ilang mga amahan. Kon wala pa kini,” mipadayon si Moroni, “ang tibuok kalibutan pagalaglagon sa hingpit sa pag-abut [sa Ginoo].”²⁶ Ang espiritu ni Elijah, ang timailhan sa Espiritu Santo, nagpaduol kanato sa atong mga henerasyon—kagahapon, karon, ug sa umaabut—sa atong mga genealogy, kasaysayan, ug serbisyo sa templo.

Lakbitan usab nato kon unsay ipasabut sa Pagpalabay. Ang pagpalabay maoy paghinumdom sa pagkaluwas sa mga anak sa Israel gikan sa 400 ka tuig nga pagkaulipon. Ang basahon sa Exodo misaysay giunsa pagkahitabo kini nga pagkaluwas human mihugpa ang mga baki, mga kuto, mga langaw, ang pagkamatay sa mga hayop, mga hubaghubag, mga kamayo, ulan og yelo ug kalayo, mga dolun, ug baga nga kangitngit. Ang katapusan nga kasakit naghulga sa kamatayon sa unang natawo sa yuta apan dili sa mga balay ni Israel kon—ugaling kadtong mga panimalay mobutang sa dugo sa walay lama nga unang natawo nga karnero diha sa mga haligi sa ilang mga pultahan.²⁷

Ang anghel sa kamatayon molabay ra sa mga balay nga minarkahan sa dugo nga nagsimbolo sa kordero.²⁸ Kana nga paglabay, o pagpalabay, nagrepresentar kang Jesukristo sa hingpit gayud nga pagbuntog sa kamatayon. Gani, ang makatubos nga dugo sa Kordero sa Dios naghatag sa atong Maayong Tigbalantay og gahum sa pagpundok sa Iyang katawhan sa tanang dapit ug mga kahimtang sa kasiguroan sa Iyang panon sa duha ka bahin sa tabil.

Sa ingon nga kahulugan, ang Basahon ni Mormon naghulagway sa “gahum ug pagkabanhaw ni Kristo”²⁹—sa kahulugan sa Pasko sa Pagkabanhaw—kon hisgutan ang duha ka pagpahiuli.

Una, ang pagkabanhaw naglakip sa pisikal nga pagpahiuli sa atong “tukma ug hingpit nga bayanan”; “matag bahin sa lawas ug lutahan,” gani bisan buhok sa ulo dili mawala.³⁰ Kini nga saad naghatag og paglaum niadtong nawad-an og mga bahin sa lawas; sa nawad-an sa panan-aw, pangdungog, o sa dili kalakaw; o nawad-an sa maayong pangisip tungod sa sakit, o ubang kakulangan sa kapasidad. Siya makakita kanato. Siya moayo kanato.

Ang ikaduhang saad sa Pasko sa Pagkabanhaw ug ang Pag-ula sa atong Ginoo mao nga, sa espiritwal, “ang tanan nga mga butang ipahiuli sa ilang tukma nga pagkahan-ay.”³¹ Kini nga espiritwal nga pagpahiuli makita sa atong mga buhat ug tinguha. Sama sa tinapay diha sa katubigan,³² mopahiuli kini “niana nga maayo,” “matarung,” “makiangayon,” ug “maloloy-on.”³³ Mao diay nga si propeta Alma migamit sa pulong nga *pagpahiuli* sa 22 ka higayon³⁴ dihang siya miawhag nato sa “paghimo niini sa makiangayon, sa paghukom nga matinud-anon, ug paghimo sa maayo sa kanunay.”³⁵

Kay “ang Dios sa iyang kaugalingon miula sa iyang dugo alang sa mga sala sa kalibutan,”³⁶ ang Pag-ula sa Ginoo makapahiuli dili lang sa unsay anaa apan usab sa unsay pweding mahimo. Kay Siya nahibalo sa atong mga kasakit, mga kasakitan, sa mga pagtintal kanato sa tanang matang,³⁷ Siya, uban sa kalooy, motabang kanato sumala sa atong mga kakulangan.³⁸ Kay ang Dios “hingpit, makiangayon ug maloloy-on nga Dios usab,” ang plano sa kalooy “motagbaw sa gipangayo sa kaangayan.”³⁹ Maghinulsol kita ug mobuhat kutob sa mahimo. Sa walay kinutuban Siya mopalibut kanato sa kahangturan “sa mga bukton sa iyang gugma.”⁴⁰

Karon gisaugod nato ang pagpahiuli ug pagkabanhaw. Uban kaninyo, ako nalipay sa nagpadayong Pagpahiuli sa kahingpitan sa ebanghelyo ni Jesukristo. Gisugdan 200 ka tuig nang milabay niini nga tingpamulak, ang kahayag ug pagpadayag nagpadayon sa pag-abut pinaagi sa buhing propeta sa Ginoo ug ang Iyang Simbahan gitawag sa Iyang ngalan—Ang Simbahan

ni Jesukristo sa Ulahing mga Adlaw—ug pinaagi sa personal nga pagpadayag ug inspirasyon pinaagi sa langitnong gasa sa Espiritu Santo.

Uban kaninyo, niining Pasko sa Pagkabanhaw, mopamatuod ko kabahin sa Dios, atong Mahangturon nga Langitnong Amahan, ug sa Iyang Hinigugmang Anak, ang buhi nga si Jesukristo. Ang mga tawo nga mortal bangis nga milansang sa krus ug nabanhaw sa wala madugay. Apan ang buhi nga si Jesukristo lamang sa Iyang hingpit nga matang sa pagkabanhaw nagdala gihapon sa mga marka sa linansangan sa Iyang mga kamot, mga tiil, ug kilid. Siya lamang ang makasulti nga, “Ako mikulit kaninyo diha sa mga palad sa akong mga kamot.”⁴¹ Siya lamang ang makasulti nga: “Ako mao siya kinsa gibayaw. Ako si Jesus nga gilansang sa krus. Ako ang Anak sa Dios.”⁴²

Sama sa batang si Ivy ug sa iyang violin, kita sa ubang paagi nagsugod pa lang. Sa pagkatinuod, “wala makita sa mata, ni madungog sa dalunggan, ni mosantop sa kasingkasing sa tawo, ang gikatagana sa Dios alang kanila nga nahigugma kaniya.”⁴³ Niini nga panahon, makakat-on kita og daghan sa kamaayo sa Dios ug sa atong balaanong potensyal aron ang gugma sa Dios molambo diri kanato samtang magtinguha kita Kaniya ug magtinabangay. Sa bag-ong mga paagi ug bag-ong mga dapit, kita makahimo ug mamahimo, pagtulun-an human sa usa ka pagtulun-an, kamabination human sa kamabination, sa tinagsa-tagsa ug sa tiningob.

Mahal kong mga kaigsoonan bisan asa, samtang nagkahimamat kita ug nagkat-on, ang inyong hugot nga pagtuo ug kamaayo mipuno kanako og pagbati sa panimpalad sa ebanghelyo ug pasalamat. Ang inyong pagpamatuod ug kasinatian sa ebanghelyo midugang sa akong pagpamatuod ug kasinatian sa ebanghelyo. Ang inyong mga kabalaka ug mga kalipay, ang inyong gugma alang sa balay sa Dios ug komunidad sa mga Santos ug inyong panabut sa gipahiuling kamatuoran ug kahayag


mipalambo sa akong kahingpitan sa gipahiuling ebanghelyo, nga si Jesukristo ang pinakaimportanting bahin niini. Mosalig kita, “sa dag-um ug kahayag, Ginoo, ubani ako.”⁴⁴ Sa paghiusa kita mahibalo, taliwala sa atong mga gipas-an ug mga kabalaka, kita makaihap sa atong daghan nga panalangin.⁴⁵ Sa inadlawng mga detalye ug sa gagmay ug yano nga mga butang ang mga dagko nga butang ipahinabo.⁴⁶

“Ug mahinabo nga ang mga matarung pagapundukon gikan diha sa tanan nga mga nasud, ug moadto sa Zion, mag-awit sa mga awit sa walay katapusan nga hingpit nga kalipay.”⁴⁷ Niining panahon sa hosana ug aleluya, kantaha ang aleluya—kay Siya maghari hangtud sa kahangturan! Isinggit ang hosana, sa Dios ug Korde-ro! Sa sagrado ug balaang pangalan ni Jesukristo, amen. ■

MUBO NGA MGA SULAT

- Juan 16:33.
- Tan-awa sa Jacob 5.
- Sigun sa gipanagna sa kasulatan, ang kasaysayan sa tawo nagpakita og mga panahon o liyok sa espiritwal nga pagkunhod nga atong gitawag og apostasiya o pagbiya sa kamatuoran, ug mga panahon sa nabag-o nga kahayag nga atong gitawag og espiritwal nga pagpahiuli; tan-awa, sama pananglit sa, 2 Mga Taga-Tesalonica 2:3.
- Tan-awa sa Lucas 4:18.
- Juan 12:12–13; tan-awa usab sa Mateo 21:8–9; Marcos 11:8–10.
- Pinadayag 7:9.
- Tan-awa sa Doktrina ug mga Pakigsaad 109:76.
- Tan-awa sa Zacarias 9:9.
- Mateo 21:9.
- Tan-awa sa Giya ngadto sa mga Kasulatan, “Hosana.” Gikan sa kapanahunan sa Daang Tugon, ang pagyugyog sa mga lukay dunganan sa kanta nga “Luwasa na karon, maghangyo ako kanimo, O Ginoo [Save now, I beseech thee, O Lord].” Ang Salmo 118:25 maoy kinatibuk-ang pagpahayag sa tradisyonal nga kiyasmo nga Mesiyanhong hangyo [chiastic Messianic plea]: “Luwasa karon, kanimo nangamuyo kami, O Ginoo: O Ginoo, kanimo nangamuyo kami, ipadala ang kauswagan karon.”
- Salmo 118:26; tan-awa usab sa 3 Nephi 11:17
- Russell M. Nelson, sa *Handel's Messiah: Debtor's Prison* (video), ChurchofJesusChrist.org/media-library.
- Artikulo sa Hugot nga Pagtuo 1:3.
- Tan-awa sa Giya ngadto sa mga Kasulatan, “Aleluya.”
- George Frideric Handel, *Messiah*, ed. T. Tertius Noble (1912), viii; tan-awa usab sa Pinadayag 17:14.
- Mga Pagtulun-an sa mga Presidente sa Simbahan: Joseph Smith* (2007), 507.
- Mga Artikulo sa Hugot nga Pagtuo 1:1.
- Doktrina ug mga Pakigsaad 110:3.
- Doktrina ug mga Pakigsaad 110:4.
- Tan-awa sa Pinadayag 1:8; 3 Nephi 9:18; Doktrina ug mga Pakigsaad 19:1; 38:1; 45:7.
- Tan-awa sa Mga Hebreohanon 12:2; Moroni 6:4.
- Doktrina ug mga Pakigsaad 110:16.
- Malaquias 4:5.
- Tan-awa sa Stephen D. Ricks, “The Appearance of Elijah and Moses in the Kirtland Temple and the Jewish Passover,” *BYU Studies*, vol. 23, nu. 4 (1986), 483–86, byustudies.byu.edu.
- Tan-awa sa Doktrina ug mga Pakigsaad 86:10; tan-awa usab sa Mga Buhat 3:19–21.
- Joseph Smith—Kasaysayan 1:39; sa bag-ong lang nga katugan, daghan ang nagtuo nga mahinungdanon ang paggamit sa pulong nga “ilang.”
- Tan-awa sa Exodo 7–12.
- Tan-awa sa Exodo 12:23.
- Alma 41:2.
- Alma 40:23.
- Alma 41:4.
- Tan-awa sa Ecclesiastes 11:1.
- Alma 41:13.
- Ang mga pulong nga *pahiuli*, *gipahiuli*, *pagpahiuli* o ubang susama nga pulong makita 22 ka higayon sa Alma 40:22–24 ug sa Alma 41, nga naghatag og empasis sa pisikal ug sa espiritwal nga pagpahiuli.
- Alma 41:14.
- Alma 42:15.
- Alma 7:11.
- Tan-awa sa Alma 7:12.
- Alma 42:15.
- 2 Nephi 1:15.
- Isaias 49:16; 1 Nephi 21:16.
- Doktrina ug mga Pakigsaad 45:52.
- 1 Mga Taga-Corinto 2:9.
- “Ubani Ako!” *Mga Himno*, nu. 97.
- Tan-awa sa “Ipaha ang Inyong mga Panalangin,” *Mga Himno ug mga Awit sa mga Bata*, nu. 8.
- Tan-awa sa Alma 37:6.
- Doktrina ug mga Pakigsaad 45:71.





Ni Laudy Ruth Kaouk
Sakop sa Slate Canyon 14th Ward (Spanish),
Provo Utah Stake

Sa Unsang Paagi ang Pagkapari Mopanalangin sa Kabatan-onan

Pinaagi sa pagkapari, kita mabayaw. Ang pagkapari nagdala og kahayag ngadto sa atong kalibutan.

Ako mapasalamaton nga maanaa dinhi. Sa dihang una nakong nahibaloan nga mamulong ako kaninyo karon, gibati nako ang tumang kahinam apan sa samang higayon ang kamapainubsanon kaayo. Ako migahin og dakong panahon sa paghunahuna kon unsa ang akong mapaambit, ug nanghinaut ko nga ang Espiritu direkta nga mamulong kaninyo pinaagi sa akong mensahe.

Sa Basahon ni Mormon, si Lehi mihatag og panalangin sa matag usa sa iyang mga anak nga lalaki sa wala pa siya mamatay nga nakatabang nila nga mailhan ang ilang mga kalig-on ug mahangturong potensyal. Ako ang kinamanghuran sa walo ka anak, ug niining milabay nga tuig ako ra ang nag-inusarang anak diha sa panimalay sa unang higayon. Ang kawalay mga igsoon nga kauban og puyo sa panimalay ug kawalay usa ka tawo nga makaistorya kanunay lisud alang nako. Adunay mga gabii nga gibati nako ang tumang pag-inusara. Mapasalamaton ko alang sa akong mga ginikanan, kinsa naningkamot kutob sa ilang mahimo aron nga matabangan ko. Usa ka pananglitan niini mao ang sa dihang ang akong

papa mitanyag sa paghatag nako og panalangin sa pagkapari nga kahupayan atol sa usa ka lisud nga panahon. Human sa iyang panalangin, ang mga butang wala mausab diha-diha dayon, apan gibati nako ang kalinaw ug gugma gikan sa akong Langitnong Amahan ug gikan sa akong papa. Ako mibati nga bulahan nga adunay takus nga amahan kinsa makahatag og mga panalangin sa pagkapari sa matag higayon nga ako kining gikinahanglan ug kinsa mitabang nako nga mailhan ang akong mga kalig-on ug mahangturong potensyal, sama sa gibuhay ni Lehi sa dihang gipanalanginan niya ang iyang mga anak.

Bisan unsa pa man ang inyong mga kahimtang, mahimo kamo nga kanunay nga makaangkon og mga panalangin sa pagkapari. Pinaagi sa mga sakop sa pamilya, kahigalaan, tigpangalagad nga mga brother, mga lider sa pagkapari, ug usa ka Langitnong Amahan nga dili gayud mopakyas ninyo, makadawat kamo sa mga panalangin sa pagkapari. Si Elder Neil L. Andersen miingon: “Ang mga panalangin sa pagkapari sa hangtud mas gamhanan kay sa tawo kinsa gisugo sa

pagpangalagad sa gasa. . . . Kon kita takus, ang mga ordinansa sa pagkapari magpalambo sa atong mga kinabuhi.”¹

Ayaw pagpanagana og pangayo alang sa usa ka panalangin kon nagkinahanglan ka og dugang nga giya. Diha sa atong lisud nga mga higayon labihan natong gikinahanglan ang tabang sa Espiritu. Walay usa nga hingpit, ug kitang tanan makasinati og mga kalisdanan. Ang uban kanato tingali nag-antus sa kabalaka, depresyon, adiksiyon, o mga pagbati nga dili igo ang atong kamaayo. Ang mga panalangin sa pagkapari makatabang nato nga mabuntog kini nga mga hagit ug madawat ang kalinaw samtang nagpadayon kita ngadto sa umaabut. Ako nanghinaut nga maningkamot kita nga mahimong takus sa pagdawat niini nga mga panalangin.

Ang laing paagi nga kita gipanalanginan sa pagkapari mao ang pinaagi sa patriyarkal nga mga panalangin. Ako nakat-on sa pagbasa sa akong patriyarkal nga panalangin sa matag higayon nga mobati ko og kaguol o kamingaw. Ang akong panalangin nakatabang nako nga masabtan ang akong potensyal ug ang piho nga plano sa Dios alang kanako. Kini mihupay kanako ug mitabang nako nga makakita lapas sa akong kalibutanong panglantaw. Kini mipahinumdom kanako sa akong mga gasa ug sa mga panalangin nga akong madawat kon magpuyo ko nga takus. Kini mitabang usab kanako nga mahinumdom ug mobati og kalinaw nga ang Dios mohatag og mga tubag ug bagong mga oportunidad alang kanako sa tukma nga higayon diin kini labi nakong gikinahanglan.

Ang patriyarkal nga mga panalangin motabang sa pag-andam kanato nga makabalik og puyo uban sa atong Langitnong Amahan. Ako nakahibalo nga ang patriyarkal nga mga panalangin nagagikan sa Dios ug makatabang nato nga himoong mga kalig-on ang atong mga kahuyang. Kini dili mga mensahe gikan sa mga managan; kini nga mga panalangin nagsulti kanato sa unsay angay natong madungog. Kini sama sa Liahona alang sa

matag usa kanato. Kon atong unahon ang Dios ug adunay hugot nga pagtuo Kaniya, Iya kitang giyahan tadlas sa atong kaugalingon nga kamingawan.

Sama sa pagpanalangin sa Dios ni Joseph Smith sa pagkapari aron mapahiuli ang mga panalangin sa ebanghelyo, mahimo natong madawat ang mga panalangin sa ebanghelyo diha sa atong kinabuhi pinaagi sa pagkapari. Matag semana gihatagan kita og pribilihiyo ug kahigayunan nga moambit sa sakramento. Pinaagi niini nga ordinansa sa pagkapari, mahimong makabaton kita kanunay sa Espiritu, nga makalimpyo ug makapaputli kanato. Kon bation nimo ang panginahanglan sa pagwagtang sa usa ka butang gikan sa imong kinabuhi, pagpakigsulti sa usa ka gisaligan nga lider kinsa makatabang nimo nga mabuhay ang maayong mga butang. Ang imong mga lider makatabang nimo nga madawat ang tibuok gahum sa Pag-ula ni Jesukristo.

Salamat sa pagkapari, madawat usab nato ang mga panalangin sa mga ordinansa sa templo. Sukad nga ako nakasulod sa templo, gihimo na nako nga tumong ug prayoridad ang regular nga pagtambong. Pinaagi sa paggahin og panahon ug paghimo og mga sakripisyo nga gikinahanglan aron mas mapaduol sa akong Langitnong Amahan diha sa Iyang balaan nga balay, napanalanginan ko nga makadawat og mga pagpadayag ug mga pag-aghat nga nakatabang gayud nako sa tibuok nakong kinabuhi.

Pinaagi sa pagkapari, kita mabayaw. Ang pagkapari nagdala og kahayag ngadto sa atong kalibutan. Si Elder Robert D. Hales miingon: “Kon wala ang gahum sa pagkapari, ‘ang tibuok yuta sa hingpit pagalaglagon’ (tan-awa sa D&P 2:1–3). Walay kahayag, walay paglaum—kangitngit lang.”²

Ang Dios miabiba kanato. Siya gusto nga kita makabalik Kaniya. Siya nakaila kanato sa personal gayud. Siya nakaila kaninyo. Siya nahigugma kanato. Siya kanunay nga nakamatikud kanato ug mopanalangin kanato bisan og atong gibati nga dili kita



angayan niini. Siya nasayud unsa ang atong gikinahanglan ug kanus-a nato kini kinahanglana.

“Pangayo, ug kamo pagahatagan; pangita, ug kamo makakaplag; pagtuktok, ug kamo pagaablihan:

“Kay ang tanan nga magapangayo makadawat; ug ang magapangita makakaplag; ug ang magatuktok pagaablihan” (Mateo 7:7–8).

Kon kamo wala pay pagpamatuod kabahin sa pagkapari, awhagon ko kamo nga mag-ampo ug mangutana


aron mahibalo sa inyong kaugalingon sa gahum niini, dayon basaha ang mga kasulatan aron madungog ang mga pulong sa Dios. Ako nahibalo nga kon maningkamot kita nga masinati ang gahum sa pagkapari sa Dios diha sa atong kinabuhi, kita mapanalanginan. Sa ngalan ni Jesukristo, amen. ■

MUBO NGA MGA SULAT

1. Neil L. Andersen, “Ang Gahum sa Priesthood,” *Liahona*, Nob. 2013, 92.
2. Robert D. Hales, “Blessings of the Priesthood,” *Ensign*, Nob. 1995, 32.



UPON YOU MY FELLOW-SERVANTS IDHA KANINYO NGA AKONG KAUBAN NGA MGA SULUGON!, NI LINDA CURLLEY CHRISTENSEN UG MICHAEL MALM



Ni Enzo Serge Petelo
Miyembro sa Meadow Wood Ward,
Provo Utah Edgemont Stake

Sa Unsang Paagi ang Pagkapari Mopanalangin sa Kabatan-onan

Kita gihatagan sa oportunidad sa pagpangalagad sama sa mga anghel, sa pagsangyaw sa ebanghelyo sa tanang mga kontinente sa yuta, ug sa pagtabang sa mga kalag nga moduol kang Kristo.

Mga kaisogon, ako sa tinuod mapasalamatong nga mamulong niining makasaysayang gabii bahin sa sagrado nga gasa sa pagkapari ug sa kahibulongang gahum niini sa pagpanalangin sa kabatan-onan niini nga dispensasyon. Ako nag-ampo nga bisan sa akong pagkadili hingpit, ang Espiritu motabang nako sa pagtudlo sa tinuod.

Ang Unang Kapangulohan nagpahinumdom sa mga naghupot sa Aaronic nga Pagkapari nga “nagpu-yo kamo sa panahon nga adunay dagkong mga oportunidad ug mga hagit—usa ka panahon diin ang pagkapari napahiuli. Kamo adunay awtoridad sa pagpahigayon sa mga ordinansa sa Aaronic nga Pagkapari. Samtang kamo sa mainampunon ug takus nga paagi mogamit niana nga awtoridad, kamo mopanalangin kaayo sa mga kinabuhi niadtong naa sa inyong palibut.”¹ Isip batan-ong mga lalaki sa Simbahan, kita sab gipahinumduman nga kita “hinigugmang [mga anak nga lalaki] sa Dios, ug

Siya dunay buluhaton nga ipabuhat [nato],”² ug kita motabang sa Iyang buhat “ang pagpahinabo sa pagka-imortal ug sa kinabuhing dayon sa tawo” (Moises 1:39).

Ang pagkapari mao ang awtoridad sa pagpahigayon sa mga ordinansa ug mga pakigsaad sa ebanghelyo sa Manluluwas ngadto niadtong takus nga modawat niini. Pinaagi niining mga ordinansa sa pagkapari ug sagradong mga pakigsaad moabut ang hingpit nga mga panalangin sa Pag-ula sa Manluluwas, nga makatabang nato nga makab-ot ang atong balaang padulngan.

Si Joseph Smith usa ka batan-ong lalaki kinsa gitawag sa Dios sa pagpahiuli sa ebanghelyo ni Jesukristo ug, alang niana nga katuyoan, gihatagan sa pagkapari, nga iyang gigamit sa pagpanalangin sa tanang katawhan. Ang Doktrina ug mga Pakigsaad 135 naghisgot og daghang panalangin nga gihatag ni Joseph sa kabatan-onan niini nga dispensasyon. Atong mabasa nga: “Si

Joseph Smith . . . nakahimo og daghan pa, gawas lamang kang Jesus, alang sa kaluwasan sa mga tawo niini nga kalibutan, kay ni bisan kinsa nga tawo nga nakapuyo dinhi. . . . Siya nakapatungha sa Basahon ni Mormon . . . ; nakapadala sa kahingpitan sa walay katapusan nga ebanghelyo . . . ngadto sa upat ka mga dapit sa yuta; nakapatungha sa mga pagpadayag ug mga sugo nga naglangkob [sa] Doktrina ug mga Pakigsaad . . . ; nagpundok og daghan nga mga kalibutan nga mga Santos sa Ulahing mga Adlaw, . . . ug nagbilin og usa ka dungog ug ngalan nga dili mamatay” (Doktrina ug mga Pakigsaad 135:3).

Aron epektibong makaserbisyo sama ni Joseph, kita kinahanglang mahimong takus sa paggamit sa gahum sa pagkapari sa Ginoo. Samtang naghupot sa Basahon ni Mormon, si Joseph ug Oliver gustong mabunyagan, apan sila walay tukma nga awtoridad. Niadtong Mayo 15, 1829, sila nagluhod sa pag-ampo ug gibisita ni Juan Bautista, kinsa mihatag kanila sa mga yawe ug awtoridad sa Aaronic nga Pagkapari, nga nagsulti, “Diha kaninyo nga akong kauban nga mga sulugoon, sa ngalan sa Mesiyas, ako motugyan sa Pagkapari ni Aaron, nga naghupot sa mga yawe sa pagpangalagad sa mga anghel, ug sa ebanghelyo sa paghinulsol, ug sa bunyag pinaagi sa pagpaunlod alang sa kapasayloan sa mga sala” (Doktrina ug mga Pakigsaad 13:1).

Kita gihatagan sa oportunidad sa pagpangalagad sama sa mga anghel, sa pagsangyaw sa ebanghelyo sa tanang mga kontinente sa yuta, ug sa pagtabang sa mga kalag nga moduol kang Kristo. Kini nga serbisyo nagbutang nato sa samang buhat uban ni Juan Bautista, Moroni, Joseph Smith, Presidente Russell M. Nelson, ug ubang kugihan nga sulugoon sa Ginoo.

Ang atong serbisyo diha ug uban sa Iyang pagkapari naghiusa niadtong kinsa mapahinunguron sa pagsunod sa mga pagtulun-an sa Ginoo sa tukma, diin ako mismo nasayud nga lisud samtang kita nag-atubang sa mga hagit sa kabatan-onan. Apan ang pakighiusa uban niining mga isig ka sulugoon sa Ginoo sa pagtuman sa

Iyang buhat makatabang sa pagligon nato batok sa mga tintasyon ug mga panglingla sa kaaway. Mahimo kamong maayong ehemplo sa tanan kinsa dili sigurado sa ilang kaugalingon. Ang inyong maayong ehemplo makita gyud nga ang tanang inyong gikauban mapanalanginan pinaagi lang sa pagpakig-uban ninyo. Malisud usahay ang pag-ila sa presensya sa atong espirituhanong mga kauban, apan ako mapasalamaton nga nasayud nga ako sakop sa usa ka matinudanon nga korum sa pagkapari kinsa akong makauban sa pagpaningkamot nga mahiduol kang Kristo.

Uban sa atong mga higala ug pamilya, ang Espiritu Santo mao ang usa sa atong labing maunungon ug kasaligan nga kauban. Apan aron madapit ang Iyang kanunay nga pakig-uban, kinahanglan ibutang nato ang atong kaugalingon sa mga sitwasyon ug dapit diin gusto Siya nga maanaa. Mahimong magsugod kini sa atong mga panimalay samtang kita maningkamot sa paghimo niini nga balaang mga dapit pinaagi sa pag-apil sa inadlaw nga pagtuon sa kasulatan ug pag-ampo isip pamilya ug, mas importante, samtang kita personal nga magtuon sa kasulatan ug mag-ampo sa atong kaugalingon.

Sayo niining tuiga, ako gihatagan og makapahinam apan mapaubsanon nga oportunidad sa pagtabang sa akong manghud nga babaye, si Oceane, nga molambo sa dalan sa pakigsaad pinaagi sa pagdawat sa imbitasyon sa pagpabunyang ug pagtuman sa usa sa gitakda nga mga kinahanglanon aron makasulod sa celestial nga gingharian. Siya milangan sa iyang bunyang og usa ka bulan, hangtud nga ako gi-orden nga priest, aron sa paghatag nako og higayon sa pagpahigayon sa ordinansa, samtang ang among ubang mga igsoon nga babaye adunay higayon usab ubos sa tahas sa pagkapari nga mobarug isip mga saksi. Samtang kami nagbarug sa nag-atbang nga kilid sa bunyaganan, ug nangandam nga moubog sa tubig, akong namatikdan ang iyang kahinam, nga parehas sa akong kahinam.



Ug ako mibati nga nahiusa niya, sa pagkakita nga siya naghimo sa husto nga desisyon. Kini nga oportunidad sa paggamit sa pagkapari nagkinahanglan nako nga mahimong mas mabinantayon ug dili kaayo kaswal sa akong pagsunod sa ebanghelyo. Aron makaandam, ako miadto sa templo kada adlaw niana nga semana, misuporta sa akong mama, lola, ug igsoong babaye, sa pagpahigayon og mga bunyang alang sa mga patay.

Kini nga kasinatian mitudlo nako og daghan bahin sa pagkapari ug unsaon nako paggamit niini sa takus nga paagi. Ako nasayud nga tanang naghupot sa pagkapari makabati sa samang mga butang nga akong gibati kon kita mosunod sa ehemplo ni Nephi nga “moadto ug mobuhat” (tan-awa sa 1 Nephi 3:7). Kita dili pwede magtinapulan ug magdahum nga ang Ginoo mogamit nato sa Iyang mahinungdanong buhat. Kita dili pwedeng maghulat niadtong kinsa nanginahanglan sa atong tabang nga mangita nato; atong katungdanan isip mga naghupot sa pagkapari sa pagpakita og ehemplo ug mobarug isip mga saksi sa Dios. Kon kita naghimo og mga desisyon nga nagpugong nato sa atong mahangturong pag-uswag, kita kinahanglan mag-usab karon. Si Satanas maningkamot gyud sa tanan niyang mahimo nga ipabilin kita sa kalibutanon nga

kahimtang sa pagtinguha og yano nga mga kalingawan. Apan ako nasayud nga kon kita maningkamot, mangita niadtong kinsa mosuporta nato, ug maghinulsol matag adlaw, ang moabut nga mga panalangin talagsaon ug ang atong kinabuhi mausab sa kahangturan samtang kita mopadayon sa dalan sa pakigsaad.

Ako nasayud nga kini mao ang tinuod nga Simbahan ni Jesukristo, kinsa atong Manluluwas ug mitugyan sa mga yawe sa pagkapari ngadto sa Iyang Apostoles, kinsa mogamit niini sa paggiya nato, ilabi na niining mahagitong mga adlaw, ug aron sa pag-andam sa kalibutan sa Iyang pagbalik.

Ako nasayud nga si Joseph Smith usa ka propeta sa Pagpahiuli ug nga si Presidente Nelson mao ang atong buhing propeta karon. Ako modapit natong tanan sa pagtuon sa kinabuhi niining halangdong mga naghupot sa pagkapari ug magtinguha sa pagpalambo sa atong kaugalingon matag adlaw aron kita mahimong andam sa pagsugat sa atong Magbubuhat. Sa ngalan ni Jesukristo, amen. ■

MUBO NGA MGA SULAT

1. Ang Unang Kapangulohan, sa *Pagtuman sa Akong Katungdanan ngadto sa Dios* (booklet, 2010), 5.
2. Tema sa korum sa Aaronic nga Pagkapari, sa *General Handbook: Serving in The Church of Jesus Christ of Latter-day Saints*, 10.1.2, ChurchofJesusChrist.org.



Ni Jean B. Bingham
Kinatibuk-ang Presidente sa Relief Society

Nagkahiusa sa Pagtuman sa Buhat sa Dios

Ang labing epektibong paagi sa pagtuman sa atong balaang potensyal mao ang pagtambayayong, napanalanginan sa gahum ug awtoridad sa pagkapari.

Minahal nga kaigsoonan kong mga babaye ug mga lalaki, usa kini ka hingpit nga kalipay nga makig-uban kaninyo. Bisan asa kamo naminaw, akong ipaabut ang paggakus sa akong kaigsoonan nga mga babaye ug kinasingkasing nga paglamano sa akong kaigsoonan nga mga lalaki. Kita nagkahiusa sa buhat sa Ginoo.

Kon kita maghunahuna nila ni Adan ug Eva, ang unang mahunahuna nato mao ang ilang perpektong kinabuhi sa Tanaman sa Eden. Ako naghanderaw nga ang klima perpekto kanunay—dili kaayo init ug dili kaayo bugnaw—ug nga ang abunda, lami-an nga mga prutas ug utanon mitubora sa duol aron sila makakaon kon sila gusto. Tungod kay kini bag-ong kalibutan alang nila, daghan kaayo ang talan-awon, mao nga matag adlaw makapahinam samtang sila dunay inter-aksyon sa mga hayop ug nagsuhid sa ilang matahum nga palibut. Sila usab gihatagan og mga sugo nga sundon ug lain-lain ang mga paagi sa pagsabut niadtong mga instruksyon, nga nakaingon sa inisyal nga kabalaka ug kalibug.¹ Apan sa ilang paghimo og

mga desisyon nga nakapausab sa ilang kinabuhi sa kahangturan, sila nakat-on sa pagtambayayong ug nagkahiusa sa pagtuman sa mga katuyoan sa Dios alang kanila—ug alang sa tanan Niyang mga anak.

Karon ihulagway kining maong magtiayon sa pagka-mortal. Sila maghago aron makakaon, ang pipila ka mga hayop miisip *nila* nga pagkaon, ug dihay lisud nga mga hagit nga mabuntog lamang samtang sila magtinambagay ug mag-ampo. Ako naghunahuna nga dihay pila ka higayon nga sila dunay managlahing opinyon kon unsaon sa pag-atubang



niadtong mga hagit. Hinoon, pinaagi sa Pagkapukan, sila nakat-on nga importante ang paglihok diha sa panaghiusa ug paghigugma. Sa pagtudlo nga ilang nadawat gikan sa balaang mga tinubdan, sila gitudloan sa plano sa kaluwasan ug sa mga baruganan sa ebanghelyo ni Jesu-kristo nga nakapahimo sa plano nga epektibo. Tungod kay sila nakasabut nga ang ilang yutan-ong katuyoan ug mahangturong tumong pareho, sila nakakita og katagbawan ug kalampusan sa pagkat-on sa paghago pinaagi sa gugma ug pagkamatarung.

Samtang nangatawo ang ilang mga anak, sila si Adan ug Eva mitudlo sa ilang pamilya unsay ilang nakat-unan gikan sa langitnong mga mensahero. Sila nakatutok sa pagtabang sa ilang mga anak nga makasabut usab ug makadawat sa mga baruganan nga makapalipay nila niini nga kinabuhi, ingon man makaandam sa pagbalik ngadto sa ilang langitnong mga gini-kanan human makapauswag sa ilang mga abilidad ug namatud-an ang ilang pagkamasulundon ngadto sa Dios. Sa pagbuhat sa ingon, sila si Adan ug Eva nakat-on sa pagdawat sa ilang managlahi nga mga kalig-on ug nagsuportahay sa ilang mahangturong buhat.²

Samtang ang mga siglo ug milenyum miabut ug milabay, ang kaklaro sa dinasig ug pagsalig sa mga kontribusyon sa usag usa nausab tungod sa sayop nga impormasyon ug walay pagsinabtanay. Sa panahon tali ni-anang talagsaong sinugdanan sa Tanaman sa Eden ug karon, ang kaaway nagmalampuson sa iyang tumong nga mabahin ang mga lalaki ug babaye sa iyang paningkamot sa pag-angkon sa atong mga kalag. Si Lucifer nakahibalo nga kon iyang maguba ang gibati nga panaghiusa sa mga lalaki ug babaye, kon siya makapalibug nato sa atong balaang bili ug mga responsibilidad sa pakigsaad, siya magmalampuson sa paglaglag sa mga pamilya, nga mao ang importanting mga unit sa kahangturan.

Si Satanas nag-agni og panagtandi isip usa ka himan nga mobati nga mas taas o mas ubos, nagtago sa

mahangturong kamatuoran nga ang kalainan sa mga lalaki ug babaye gituyo sa Dios ug parehang gihatagan og bili. Siya misulay sa pagbaliwala sa mga kontribusyon sa mga babaye ngadto sa pamilya ug sa sibil nga katilingban, sa ingon mipakunhod sa ilang makabayaw nga impluwensya alang sa maayo. Ang iyang tumong mao ang pag-awhag og pakigbisog sa gahum kay sa pagsaulog sa mga kontibusyon sa mga lalaki ug mga babaye nga nagsangkap sa usag usa ug nakasalmot sa panaghiusa.

Sa milabayng katuigan ug sa tibukok kalibutan, ang pagsabut sa balaang pagsalig sa usag usa ug magkalahing mga kontribusyon ug mga responsibilidad sa mga babaye ug mga lalaki nawala na. Ang mga babaye sa daghang mga katilingban sunod-sunod sa mga lalaki imbis managkauban, ang ilang mga kalihokan limitado sa gamay nga bahin. Ang espirituhanong kauswagan hinay atol niadtong mangitngit nga mga panahon, sa tinuod, gamay ra nga espirituhanong kahayag ang makasulod sa mga hunahuna ug mga kasingkasing nga puno sa mga tradisyon sa pagkadinante.

Ug dayon ang kahayag sa gipahiuli nga ebanghelyo misanag “labaw sa kahayag sa adlaw”³ sa dihang ang Dios nga Amahan ug ang Iyang Anak nga si Jesukristo, nagpakita sa batan-on nga si Joseph Smith sayo sa tingpamulak sa 1820 nianang balaang kakahoyan sa amihanang New York. Kana nga hitabo misugod sa modernong paghatag og pagpadayag gikan sa langit. Usa sa unang mga elemento sa orihinal nga Simbahan ni Kristo aron mapahiuli mao ang awtoridad sa pagkapari sa Dios. Samtang ang Pagpahiuli nagpadayon, ang mga lalaki ug mga babaye nakaamgo sa kaimportante ug potensyal sa pagtambayayong isip managkauban, Iyang gitugutan ug gigiyahan niining sagra-dong paghago.

Niadtong 1842, sa dihang ang mga babaye sa bag-ong Simbahan gustong magporma og opisyal nga grupo sa pagtabang sa buhat, si Presidente Joseph Smith mibati nga nadasig sa

pag-organisar kanila “ubos sa priesthood subay sa sumbanan sa priesthood.”⁴ Siya miingon, “Ako karon mohatag sa yawe nganha kaninyo sa ngalan sa Dios; . . .—kini mao ang sinugdanan sa maayong mga adlaw.”⁵ Ug tungod kay ang yawe gihatag, ang edukasyon, politikanhon, ug ekonomikanhong mga oportunidad alang sa mga babaye nagsugod sa paglapad sa tibukok kalibutan.⁶

Kining bag-ong organisasyon sa Simbahan alang sa mga babaye, nga ginganlan og Relief Society, dili pareha sa ubang mga kapunongan nianang panahona tungod kay kini giestablisar sa usa ka propeta kinsa naglihok uban ang awtoridad sa pagkapari sa paghatag sa mga babaye og awtoridad, sagrado nga mga responsibilidad, ug opisyal nga mga katungdanan diha sa estruktura sa Simbahan, dili lahi gikan niini.⁷

Gikan sa panahon ni Propeta Joseph Smith hangtud karon, ang nagpadayon nga pagpahiuli sa tanang mga butang nakahatag og kahayag sa panginahanglan sa awtoridad ug gahum sa pagkapari sa pagtabang sa mga lalaki ug mga babaye nga matuman ang ilang balaang mga responsibilidad. Karong bag-o kita gitudloan nga ang mga babaye nga gi-set apart ubos sa direksyon sa usa ka tawo nga naghupot sa mga yawe sa pagkapari

naglihok uban sa *awtoridad sa pagkapari* sa ilang mga calling.⁸

Niadtong Oktubre 2019, si Presidente Russell M. Nelson mitudlo nga ang mga babaye nga natugahan sa templo adunay *gahum sa pagkapari* sa ilang kinabuhi ug sa ilang mga panimalay samtang sila motuman niadtong sagrado nga mga pakigsaad nga ilang gihimo uban sa Dios.⁹ Siya mipasabut nga “ang kalangitan abli sa *mga babaye* kinsa natugahan sa gahum sa Dios nga gikan sa ilang mga pakigsaad sa pagkapari sama ngadto sa mga lalaki kinsa naghupot sa pagkapari.” Ug siya miawhag sa matag sister sa “paggamit kanunay sa gahum sa Manluluwas sa pagtabang sa inyong pamilya ug sa uban nga inyong gimahal.”¹⁰

Unsay gipasabut niana alang kaninyo ug kanako? Sa unsa nga paagi nga ang pagsabut sa awtoridad ug sa gahum sa pagkapari makapausab sa atong kinabuhi? Usa sa mga importante mao ang pagsabut nga kon ang mga babaye ug mga lalaki magtambayayong kita makahimo og dako kay sa magbinugtong.¹¹ Ang atong mga tahas gikinahanglan sa usag usa kay sa magkompetensyahay. Bisan og ang mga babaye wala ma-orden ngadto sa katungdanan sa pagkapari, sumala sa gihisgutan sa miagi, ang mga babaye napanalanginan og gahum sa pagkapari samtang sila motuman sa ilang



Syracuse, Utah, USA

mga pakigsad, ug sila naglihok uban sa awtoridad sa pagkapari sa dihang gi-set apart sa usa ka calling.

Sa usa ka matahum nga adlaw sa Agosto, ako dunay pribilehiyo nga molingkod uban ni Presidente Russell M. Nelson sa gitukod pag-usab nga panimalay nila ni Joseph ug Emma Smith sa Harmony, Pennsylvania, duol diin ang Aaronic nga Pagkapari gipahiuli niining ulahing mga adlaw. Sa among panag-istoriya, si Presidente Nelson naghisgot mahitungod sa importante nga tahas nga gidala sa mga babaye sa Pagpahiuli.

Presidente Nelson: “Usa sa labing importante nga mga aspeto nga akong nahinumduman bahin kon ako moanhi niining dapit sa pagpahiuli sa pagkapari mao ang importante nga tahas sa mga babaye diha sa Pagpahiuli.

“Sa dihang si Joseph unang nagsugod sa paghubad sa Basahon ni Mormon, kinsa ang nagsulat? Hinoon, gamay ra iyang nahimo, dili daghan. Si Emma miapil.

“Ug ako naghunahuna ni Joseph nga miadto sa kakahoyan aron magampo duol sa ilang panimalay sa Palmyra, New York. Diin siya miadto? Siya miadto sa Sagrado nga Kakahoyan. Nganong miadto siya didto? Tungod kay didto miadto si Mama kon siya gusto nga magampo.

“Mao kadto ang duha ka babaye kinsa adunay mga tahas sa pagpahiuli sa pagkapari ug sa Pagpahiuli sa Simbahan. Walay duha-duha, kita makaingon nga ang atong mga asawa sama ka importante karon sama kaniadto. Siyempre sila importante.”

Sama nila ni Emma ug Lucy ug Joseph, kita labing epektibo kon kita andam nga makat-on sa usag usa ug nagkahiusa sa atong tumong nga mahimong mga disipulo ni Jesukristo ug motabang sa uban subay niana nga dalan.

Kita gitudloan nga ang “pagkapari manalangin sa mga kinabuhi sa mga anak sa Dios sa daghang paagi. . . . Sa mga calling sa [Simbahan], mga ordinansa sa templo, mga relasyon sa pamilya, ug sa hilum, indibidwal nga pagpangalagad, ang Santos sa Ulahing

Adlaw nga mga babaye ug mga lalaki naglihok uban sa gahum ug awtoridad sa pagkapari. Ang pagsinaligay sa mga lalaki ug mga babaye sa pagtuman sa buhat sa Dios pinaagi sa Iyang gahum usa ka mahinungdanong bahin sa ebanghelyo ni Jesukristo nga gipahiuli pinaagi ni Propeta Joseph Smith.”¹²

Ang panaghiusa importante sa balaan nga buhat nga kita dunay pribilehiyo ug gitawag sa pagbuhat, apan dili lang kini mahitabo. Kini nagkinahanglan og paningkamot ug panahon nga magtinambagay—sa pagpaminaw sa usag usa, pagsabut sa panglantaw sa uban, ug mag-ambitay og mga kasinatian—apan ang proseso moresulta sa mas madasigong mga desisyon. Bisan sa mga responsibilidad sa panimalay o sa Simbahan, ang labing epektibong paagi sa pagtuman sa atong balaang potensyal mao ang pagtambayayong, napanalanginan sa gahum ug awtoridad sa Iyang pagkapari sa atong managlahi apan igasangkap nga mga tahas.

Unsa kaha nga matang ang panaguban sa mga kinabuhi sa mga babaye sa pakigsaad karon? Mopakigbahin ko og ehemplo.

Sila si Alison ug John adunay talagsaon nga panag-uban. Silang duha mosakay og biseklita sa mga lumba nga duol ug lagyo. Aron malampusong makig-indigay niana nga sakyanan, ang duha ka nanakay kinahanglan magkahiusa. Sila kinahanglang motakilid sa samang direksyon sa saktong panahon. Ang usa dili modominar sa

lain, apan sila kinahanglang magkasinabot ug ang matag usa mohimo sa iyang bahin. Ang kapitan, sa atubangan, maoy mokontrol kon kanus-a mohunog ug kanus-a mobarug. Ang nagsakay sa luyo, kinahanglang magbantay unsay nahitabo ug andam nga mohatag og dugang ayuda kon sila nabiyaan og gamay o mohinay kon sila duol ra kaayo sa ubang seklista. Sila kinahanglang mosuporta sa usag usa aron mouswag ug makab-ot ang ilang tumong.

Si Alison mipasabut: “Sa sinugdanan, ang tawo nga mao ang kapitan moingon ‘Barug’ kon kita kinahanglan nga mobarug ug ‘Hunong’ kon kita kinahanglan nga mohunong sa pagtindak. Pagkahuman, ang tawo nga anaa sa luyo magbantay kon ang kapitan hapit na mobarug o mohunong, ug dili na kinahanglan nga mosulti. Kami makahibalo kon ang usa namo naglisud ug [dayon] ang wa maglisud maoy maningkamot nga mopaspas mi og usab. Mahitungod gayud kini sa pagsalig ug pagtambayayong.”¹³

Sila si John ug Alison nagkahiusa dili lamang sa ilang pagsikad sa ilang biseklita, apan sila nagkahiusa sa ilang kaminyoon usab. Ang matag usa nagtinguha sa kalipay sa lain labaw sa iyang kaugalingon; ang matag usa mangita sa maayong gawi sa usag usa ug maningkamot sa pagbuntog sa dili kaayo maayong kaniya. Sila magpuli-puli sa pagpangulo ug magpuli-puli sa paghatag og dugang kon ang usa ka partner nagkalisud. Ang matag usa



Provo, Utah, USA



nga sila kinahanglang mobuhat niining tanan o maghulat nga sultihan unsay buhaton.¹⁸

Ang pagtan-aw sa mga babaye isip importante nga mga partisipante dili mahitungod sa “pagkasama” apan mahitungod sa pagsabot sa kamatuoran sa doktrina. Imbis mag-establisar og programa sa pagpahinabo niana, kita aktibong motrabaho sa paghatag bili sa mga babaye sama sa gibuhat sa Dios: isip importante

mohatag og bili sa mga kontribusyon sa lain ug nakakita og mas maayong mga tubag sa ilang mga hagit samtang sila mohiusa sa ilang mga talento ug mga kapanguhaan. Sila sa tinuod nagkahi-
usa pinaagi sa Kristohanong gugma.

Mahimong mas mahiusa sa balaang sundanan sa pagtambayayong sa panaghiusa importante niining panahon sa “akoy una” nga mga mensahe nga naglibut kanato. Ang mga babaye adunay lahi, balaang mga gasa¹⁴ ug gihatagan og talagsaong mga responsibilidad, apan kadto dili labaw—o ubos—kaimportante kay sa mga gasa ug mga responsibilidad sa mga lalaki. Ang *tanan* gidesinyo ug gikinahanglan sa pagpahinabo sa balaang plano sa Langitnong Amahan sa paghatag sa matag usa sa Iyang mga anak sa labing maayong oportunidad sa pagtuman sa iyang balaang potensyal.

Karon, “nagkinahanglan kita og mga babaye nga adunay kaisug ug panglantaw sa atong Inahan nga si Eva”¹⁵ sa paghiusa sa ilang kaigsoonan sa pagdala og mga kalag ngadto ni Kristo.¹⁶ Ang mga lalaki kinahanglang mahimong tinuod nga mga kauban kay sa magtuo nga sila mao lang ang responsable o paglihok ingon nga “nagpakaaron-ingnon” nga mga kauban samtang ang mga babaye maoy naghimo sa daghang trabaho. Ang mga babaye kinahanglan nga “moabante [ug] moangkon sa [ilang] tukma ug importanting dapit”¹⁷ isip mga kauban kay sa maghunahuna

nga mga kauban sa buhat sa kaluwasan ug kahimayaan.

Andam na ba kita? Kita ba maning-kamot sa pagbuntog sa dili patas tungod sa atong kultura ug mosagop sa balaan nga mga sundanan ug mga binuhatan basi sa pundasyon nga doktrina? Si Presidente Russell M. Nelson midapit kanato nga “magtinabangay kita niining sagradong buhat . . . [nga] motabang sa pag-andam sa kalibutan alang sa Ikaduhang Pag-anhi sa Ginoo.”¹⁹ Kon buhaton nato, kita makat-on sa paghatag og bili sa indibidwal nga mga kontribusyon sa usag usa ug dugangan ang kaepektibo diin kita makatuman sa atong balaan nga mga tahas. Kita mobati og mas dakong kalipay kay sa atong nasinati na.

Hinaut nga ang matag usa nato mopili nga magkahiusa diha sa dinasig nga paagi sa Ginoo sa pagtabang sa Iyang buhat nga magpadayon. Sa ngalan sa atong minahal nga Manluluwas, nga si Jesukristo, amen. ■

MUBO NGA MGA SULAT

1. Tan-awa sa Genesis 3:1–18; Moises 4:1–19.
2. Tan-awa sa Moises 5:1–12. Kini nga mga bersikulo nagtudlo bahin sa tinuod nga panag-uban ni Adan ug Eva: sila nakabaton og mga anak (bersikulo 2); nagtrabaho sila sa pagsangkap sa ilang kaugalingon ug sa ilang pamilya (bersikulo 1); nag-ampo sila (bersikulo 4); nagsunod sila sa mga sugo sa Dios ug naghatalad og mga sakripisyo (bersikulo 5); sila nagkat-on (mga bersikulo 4, 6–11) ug mitudlo sa ebanghelyo ni Jesukristo ngadto sa ilang mga anak (bersikulo 12).
3. Joseph Smith—Kasaysayan 1:16.

4. Joseph Smith, in Sarah M. Kimball, “Auto-Biography,” *Woman’s Exponent*, Sept. 1, 1883, 51; see also *Mga Pagtulun-an sa mga Presidente sa Simbahan: Joseph Smith* (2007), 451.
5. Joseph Smith, sa “Nauvoo Relief Society Minute Book,” 40, josephsmithpapers.org.
6. Tan-awa sa George Albert Smith, “Address to the Members of the Relief Society,” *Relief Society Magazine*, Dis. 1945, 717.
7. Tan-awa sa John Taylor, sa Nauvoo Relief Society Minutes, Mar. 17, 1842, makita sa churchhistorianspress.org. Sumala ni Eliza R. Snow, si Joseph Smith mitudlo usab nga ang mga babaye pormal nga naorganisar sa miaging mga dispensasyon (tan-awa sa Eliza R. Snow, “Female Relief Society,” *Deseret News*, Apr. 22, 1868, 81; *Anak nga mga Babaye sa Ginghamarian: Ang Kasaysayan ug Buhat sa Relief Society* [2011], 1–7).
8. Tan-awa sa Dallin H. Oaks, “Ang mga Yawe ug Awtoridad sa Pagkapari [Priesthood],” *Liahona*, Mayo 2014, 49–52.
9. Tan-awa sa Russell M. Nelson, “Espirituhanon nga mga Bahandi,” *Liahona*, Nob. 2019, 78, 79.
10. Russell M. Nelson, “Espirituhanon nga mga Bahandi,” 77.
11. “Apan ang gipahiuli nga ebanghelyo nagtudlo sa mahangturong ideya nga ang mga bana ug mga asawa *magsaligay* sa usag usa. Sila managsama. Sila Managkauban” (Bruce R. ug Marie K. Hafen, “Crossing Thresholds and Becoming Equal Partners,” *Liahona*, Ago. 2007, 28).
12. Gospel Topics, “Joseph Smith’s Teachings about Priesthood, Temple, and Women,” topics.ChurchofJesusChrist.org.
13. Personal nga pakigsinulatay.
14. Tan-awa sa Russell M. Nelson, “Usa ka Hangyo ngadto sa Akong mga Sister,” *Liahona*, Nob. 2015, 95–97.
15. Russell M. Nelson, “Usa ka Hangyo ngadto sa Akong mga Sister,” 97.
16. Tan-awa sa *General Handbook: Serving in The Church of Jesus Christ of Latter-day Saints*, 1.4, ChurchofJesusChrist.org.
17. Russell M. Nelson, “Usa ka Hangyo ngadto sa Akong mga Sister,” 97.
18. “Minahal kong mga sister, bisan unsay inyong calling, bisan unsay inyong kahintang, nagkinahanglan kami sa inyong hunahuna, panabut, ug sa inyong inspirasyon. Kami nagkinahanglan kaninyo nga motingog ug mamulong diha sa mga council sa ward ug sa stake. Nagkinahanglan kita sa matag minyo nga sister nga mamulong isip ‘usa ka *makatampo* ug *hingpit* nga kauban’ samtang kamo makighiusa sa inyong bana sa pagdumala sa inyong pamilya. Minyo o dili, kamong mga sister adunay talagsaong mga kapasidad ug espesyal nga panabut nga inyong nadawat isip gasa gikan sa Dios. Kaming mga lalaki dili makapareha sa inyong talagsaong impluwensya. . . .
“ . . . Nagkinahanglan kami sa inyong kalig-on!” (Russell M. Nelson, “Usa ka Hangyo ngadto sa Akong mga Sister,” 97).
19. Russell M. Nelson, “Usa ka Hangyo ngadto sa Akong mga Sister,” 97.

ANG UNANG KAPANGULOHAN



Dallin H. Oaks
Uhang Magtatambag



Russell M. Nelson
Presidente



Henry B. Eyring
Ikaduhang Magtatambag

ANG KORUM SA NAPULOG DUHA KA MGA APOSTOLES



M. Russell Ballard



Jeffrey R. Holland



Dieter F. Uchtdorf



David A. Bednar



Quentin L. Cook



D. Todd Christofferson



Neil L. Andersen



Ronald A. Rasband



Gary E. Stevenson



Dale G. Renlund



Gerrit W. Gong



Ulisses Soares

ANG KAPANGULOHAN SA SEVENTY



L. Whitney Clayton



Patrick Kearon



Carl B. Cook



Robert C. Gay



Terence M. Vinson




José A. Teixeira



Carlos A. Godoy

MGA GENERAL AUTHORITY SEVENTY

(sa alpabetikal nga pagkaham-ay)



Marcos A. Aldukaitis




Weatherford T. Clayton




Christofoel Golden



Hugo E. Martinez




Anthony D. Perkins



Moisés Villanueva



Rubén V. Alliaud



Valeri V. Corcón



Jose L. Alonso

Joe M. Alvarado

Jorge M. Alvarado

Steven R. Bangenter

Ian S. Ardern

LeGrand R. Curtis Jr.

Joaquin E. Costa

Massimo De Feo

Mathias Held

Peter F. Meurs

Michael T. Ringwood

Scott D. Whiting

Lynn G. Robbins

Chi Hong (Sam) Wong

Kazuhiko Yamashita

Gary B. Sabin

Gary B. Sabin

Thierry K. Mutombo

David P. Homer

William K. Jackson

Marcus B. Nash

K. Brett Nattress

Evan A. Schmutz

Joseph W. Sitati

Vern P. Stanfill

Benjamin M. Z. Tai

Brian K. Taylor

Michael John U. Teh

S. Mark Palmer

Adilson de Paula Parrella

Juan A. Uceda

Arnulfo Valenzuela

Kevin W. Pearson

Erik W. Kopschke

Joni L. Koch

Jörg Klebingat

Larry S. Kacher

Peter M. Johnson

Paul V. Johnson

Enrique R. Parabella

Randy D. Funk

Mark A. Braagg

L. Todd Budge

Matthew L. Carpenter

Yoon Hwan Choi

Craig C. Christensen

Ricardo P. Gimenez

Taylor G. Godoy

Edwared Gavaret

Dean M. Davies

W. Christopher Waddell

Gerald Causse

Michael W. Christensen

Bradley R. Wilcox

Steven J. Lund

Ahmad S. Corbett

Cristina B. Franco

Joy D. Jones

Lisa L. Hakness

Reyna J. Aburto

Jean B. Bingham

Sharon Eubanik

Jean B. Bingham

Becky Craven

Bonnie H. Gordon

Michelle Craig

Jan E. Newman

Mark L. Pace

Milton Camargo

Dean M. Davies

Taniela B. Wakolo

Takashi Wada

John C. Pngree Jr.

Richard J. Maynes

John A. McCune

Kevin S. Hamilton

Kyle S. McKay

James R. Rasband

Alan R. Walker

Michael T. Ringwood

Peter F. Meurs

Mathias Held

Massimo De Feo

ANG PRESIDING BISHOPRIC



Dean M. Davies
Unang Magratambag



Gerald Causse
Presiding Bishop
Magratambag



W. Christopher Waddell
Magratambag




Michael John U. Teh

KINATIBUK-ANG MGA OPISYALES


RELIEF SOCIETY




Sharon Eubanik
Unang Magratambag



Jean B. Bingham
Presidente




Becky Craven
Ikaduhang Magratambag




Bonnie H. Gordon
Presidente




Michelle Craig
Unang Magratambag




Lisa L. Hakness
Unang Magratambag



Joy D. Jones
Presidente




Cristina B. Franco
Ikaduhang Magratambag




Ahmad S. Corbett
Unang Magratambag

YOUNG MEN




Bradley R. Wilcox
Ikaduhang Magratambag




Steven J. Lund
Presidente

YOUNG WOMEN



Bonnie H. Gordon
Presidente




Michelle Craig
Unang Magratambag

SUNDAY SCHOOL



Mark L. Pace
Presidente



Milton Camargo
Unang Magratambag



Ni Presidente Henry B. Eyring
Ikaduhang Magtatambag sa Unang Kapangulohan

Siya Mag-una Kanato

Ang Ginoo naggiya sa Pagpahiuli sa Iyang ebanghelyo ug sa Iyang Simbahan. Siya hingpit nga nahibalo sa umaabut. Siya nagdapit ninyo ngadto sa buhat.

Minahal kong mga kaigsoonan, ako mapasalamaton nga makauban kamo niining kinatibuk-ang komperensya sa Ang Simbahan ni Jesukristo sa mga Santos sa Ulahing mga Adlaw. Sa iyang pagdapit sa pagpamalandong sa paagi nga ang Pagpahiuli sa Ginoo sa Iyang Simbahan niining katapusang dispensasyon mipanalangin nato ug sa atong mga minahal, si Presidente Russell M. Nelson misaad nga ang atong kasinatian dili lang halandumon apan dili makalimtan.

Ang akong kasinatian halandumon, sigurado ko ang inyoha mao usab. Kon kini dili ba makalimtan nagdepende sa matag usa kanato. Importante kana nako tungod kay ang kasinatian sa pag-andam alang niini nga komperensya nakausab nako sa paagi nga gusto nakong molungtad. Tuguti ko sa pagpasabut.

Ang akong pagpangandam midala nako sa pagbasa sa talaan sa usa ka panghitabo sa Pagpahiuli. Akong

nabasa kana nga panghitabo kadaghan, apan kini kanunay alang nako report sa usa ka importante nga miting nga naglambigit kang Joseph Smith, ang propeta sa Pagpahiuli. Apan karon akong nakita diha sa asoy sa unsang paagi ang Ginoo naggiya nato, Iyang mga disipulo, sa Iyang Simbahan. Akong nakita unsa kamahinungdanon alang nato nga mga mortal nga magiyahan sa Manluluwas sa kalibutan, ang Tiglalang—kinsa nasayud sa tanang mga butang, kaniadto, karon, ug sa umaabut. Siya nagtudlo nato sa anam-anam ug mogiya nato, dili gayud mamugos.

Ang miting nga akong gihulagway usa ka mahinungdanon nga higayon sa Pagpahiuli. Kini usa ka miting sa adlaw nga Igpapahulay nga gipahigayon niadtong Abril 3, 1836, sa Templo sa Kirtland sa Ohio, pito ka adlaw human kini gipahinungod. Si Joseph Smith mihulagway niining talagsaon nga higayon sa kasaysayan sa kalibutan sa yanong paagi. Kadaghanan sa iyang asoy girekord diha sa Doktrina ug mga Pakigsaad seksyon 110:

“Sa kahapunon, ako mitabang sa uban nga mga Presidente sa pag-apudapod sa Panihapon sa Ginoo ngadto sa Simbahan, nadawat kini gikan sa Napulog Duha, kansang kahigayunan mao ang pagpanalangin sa sakrament niining adlaw. Human mahimo kini nga pag-alagad ngadto sa akong mga kaigsoonan, ako mipaingon sa pulpito, ang mga tabil gipaubos, ug ako miluhod, uban ni Oliver Cowdery, sa maligdong ug mahilum nga pag-ampo. Human motindog gikan sa pag-ampo, ang mosunod nga panan-awon gipadayag ngari kanamong duha”.¹

“Ang tabil gikuha gikan sa among mga hunahuna, ug ang mga mata sa among panabut nabuksan.

“Kami nakakita sa Ginoo nga nagtindog diha sa barandilya sa pulpito, sa among atubangan; ug ubos sa iyang mga tiil mao ang usa ka hinlo nga buhat sa lunsay nga bulawan, diha sa bulok nga sama sa baga.

“Ang iyang mga mata ingon sa usa ka siga sa kalayo; ang buhok sa iyang ulo puti sama sa lunsay nga yelo; ang iyang panagway mihayag labaw sa kahayag



JESUS CHRIST APPEARS TO THE PROPHET JOSEPH SMITH AND OLIVER COWDERY | JESUKRISTO MAGPAKITA NGADTO NI PROPETA JOSEPH SMITH UG OLIVER COWDERY, NI WALTER RANE

sa adlaw; ug ang iyang tingog ingon sa dahunog sa dagko nga mga katubigan, gani ang tingog ni Jehova, nag-ingon:

“Ako mao ang sinugdanan ug ang katapusan; Ako mao siya kinsa nabuhi, Ako mao siya kinsa gipatay; Ako mao ang inyong manlalaban ngadto sa Amahan.

“Tan-awa, ang inyong mga sala gipasaylo diha kaninyo; kamo malimpyo sa akong atubangan; busa, ihangad ang inyong mga ulo ug pagmaya.

“Himoa ang mga kasingkasing sa inyong mga kaisogon nga magma-ya, ug himoa ang mga kasingkasing sa akong tanan nga mga katawhan nga magma-ya, kinsa, uban sa ilang kusog, nagtukod niini nga balay ngadto sa akong ngalan.

“Kay tan-awa, Ako midawat niini nga balay, ug ang akong ngalan maania dinhi; ug Ako magpakita sa akong kaugalingon ngadto sa akong mga katawhan diha sa kalooy dinhi niini nga balay.

“Oo, Ako mopakita ngadto sa akong mga sulugoon, ug mosulti ngadto kanila sa akong kaugalingon nga tingog, kon ang akong mga katawhan maghupot sa akong mga sugo, ug dili maghugaw-hugaw niining balaan nga balay.

“Oo ang mga kasingkasing sa mga kaliboan ug napulo ka mga kaliboan malipay sa hilabihan sa sangputanan sa mga panalangin nga ibu-bu, ug ang pagtuga diin ang akong mga sulugoon gitugahan dinhi niini nga balay.

“Ug ang pagkabantog niini nga balay mokaylap ngadto sa langyaw nga mga yuta; ug kini mao ang sinugdanan sa panalangin nga ibu-bu diha sa mga ulo sa akong mga katawhan. Bisan pa niana. Amen.

“Human matapos kini nga pananawon, ang mga kalangitan naabli pag-usab ngari kanamo; ug si Moises mipakita diha sa among atubangan, ug mitugyan ngari kanamo sa mga yawe sa pagpundok sa Israel gikan sa upat ka mga bahin sa yuta, ug sa pagdala sa napulo ka mga kaliwatan gikan sa yuta sa amihanan.

“Human niini, si Elias mipakita, ug mitugyan sa kapaigoan sa ebanghelyo

ni Abraham, miingon nga diha kanamo ug sa among binhi sa tanan nga mga kaliwatan nga mosunod kanamo pagapanalanginan.

“Human matapos kini nga pananawon, lain nga mahinungdanon ug mahimayaon nga pananawon miabut diha kanamo; kay si Elijah ang propeta, kinsa gidala ngadto sa langit nga wala makatilaw og kamatayon, nagbarug diha sa among atubangan, ug miingon:

“Tan-awa, ang panahon miabut na sa hingpit, nga gipamulong pinaagi sa ba-ba ni Malaquias—nga nagpamatuod nga siya [Elijah] kinahanglan nga ipadala, sa dili pa moabut ang mahinungdanon ug makalilisang nga adlaw sa Ginoo—

“Sa pagpabalik sa mga kasingkasing sa mga amahan ngadto sa mga anak, ug ang mga anak ngadto sa mga amahan, basin pa unya ang tibuok yuta pagahampakon uban sa usa ka tunglo—

“Busa, ang mga yawe niini nga kapaigoan gitugyan ngadto sa inyong mga kamot; ug pinaagi niini kamo masayud nga ang mahinungdanon ug makalilisang nga adlaw sa Ginoo duol na, gani diha sa mga pultahan.”²

Karon, ako nakabasa na kadaghan niana nga asoy. Ang Espiritu Santo mikumpirmar ngari nako nga ang asoy tinuod. Apan samtang ako nagtuon ug nangandam alang niini nga komperensya, akong mas klarong nasabtan ang gahum sa Ginoo sa paggiya sa detalye sa Iyang mga disipulo sa Iyang buhat.

Pito ka tuig sa wala pa gitugyan ni Moises kang Joseph ang mga yawe sa pagpundok sa Israel didto sa Templo sa Kirtland, “Si Joseph nakakat-on gikan sa ulohang pahina sa Basahon ni Mormon nga ang katuyoan niini mao ang ‘pagpakita ngadto sa salin sa balay ni Israel . . . nga sila unta mahibalo sa mga pakigsaad sa Ginoo, ug nga aron sila dili ipahimulag sa kahangturan.’ Niadtong 1831, ang Ginoo misulti kang Joseph nga ang pagpundok sa Israel magsugod sa Kirtland, ‘Ug

gikan dinhi [Kirtland], kinsa kadto nga Ako motugot nga moadto taliwala sa tanan nga mga nasud . . . kay ang Israel pagaluwason, ug Ako mogiya kanila.’”³

Bisan og ang misyonaryo nga buhat gikinahanglan sa pagpundok sa Israel, ang Ginoo midasig sa Iyang mga lider sa pagtudlo sa Napulog Duha, kinsa nahimong pipila sa atong unang mga misyonaryo, “Hinumdumi kamo dili moadto sa ubang nasud, hangtud nga inyong madawat ang inyong pagtuga.”⁴

Ingon og ang Templo sa Kirtland importante sa anam-anam nga plano sa Ginoo alang sa duha ka rason: Una, si Moises nagpaabut hangtud nahuman ang templo aron ipahiuli ang mga yawe sa pagpundok sa Israel. Ug ikaduha, si Presidente Joseph Fielding Smith mitudlo nga “ang Ginoo misugo sa mga Santos sa pagtukod og templo [ang Templo sa Kirtland] diin siya mopadayag sa mga yawe sa awtoridad ug diin ang mga apostoles matugahan ug maandam sa pagpul-ong sa iyang ubasan sa katapusang higayon.”⁵ Bisan og ang pagtuga sa templo nga atong nahibaloan karon wala gipahigayon sa Templo sa Kirtland, agig katumanan sa panagna, ang pagpangandam nga mga ordinansa sa templo nagsugod nga gipaila didto, uban sa pagbubu sa espiritwal nga mga pagpakita nga misangkap niadtong gitawag og mga misyon sa gisaad nga pagtuga sa “gahum gikan sa kahitas-an”⁶ nga misangput sa dakong pagpundok pinaagi sa misyonaryo nga pagserbisyo.

Human ang mga yawe sa pagpundok sa Israel gitugyan ngadto ni Joseph, ang Ginoo midasig sa Propeta sa pagpadala sa mga sakop



São Paulo, Brazil



sa Napulog Duha sa mga misyon. Samtang ako nagtuon, nahimong klaro nako nga ang Ginoo miandam sa detalye sa paagi alang sa Napulog Duha sa pag-adto sa mga misyon gawas sa nasud diin ang mga tawo giandam nga motuo ug mopaluyo kanila. Wala madugay, kaliboan ang, pinaagi nila, mahimong sakop sa gipahiuli nga Simbahan sa Ginoo.

Sumala sa atong mga talaan, gibanabana nga tali sa 7,500 ug 8,000 ang nabunyagan atol sa duha ka misyon sa Napulog Duha didto sa British Isles. Kini mipahimutang sa pundasyon sa misyonaryo nga buhat sa Europe. Sa katapusan sa ika-19 nga siglo mga 90,000 ang mipundok ngadto sa Amerika, diin ang kadaghanan gikan sa British Isles ug Scandinavia.⁷ Ang Ginoo midasig ni Joseph ug niadtong matinud-anong mga misyonaryo kinsa mitrabaho sa pagkabot og usa ka ani nga tingali, nianang panahona, ingon og lapas sa ilang abilidad. Apan ang Ginoo, uban sa Iyang hingpit nga panglantaw ug pagpangandam, mihimo niini nga posible.

Inyong mahinumduman ang tataw nga simple ug dul-an sa balaknon nga pinulongan gikan sa ika-110 nga seksyon sa Doktrina ug mga Pakigsaad:

“Tan-awa, ang panahon miabut na sa hingpit, nga gipamulong pinaagi sa ba-ba ni Malaquias—nga nagpamatuod nga siya [Elijah] kinahanglan nga ipadala, sa dili pa moabut ang mahinungdanon ug makalilisang nga adlaw sa Ginoo—

“Sa pagpabalik sa mga kasingkasing sa mga amahan ngadto sa mga anak, ug ang mga anak ngadto sa mga

amahan, basin pa unya ang tibuok yuta pagahampakon uban sa usa ka tunglo—

“Busa, ang mga yawe niini nga kapaigoan gitugyan ngadto sa inyong mga kamot; ug pinaagi niini kamo masayud nga ang mahinungdanon ug makalilisang nga adlaw sa Ginoo duol na, gani diha sa mga pultahan.”⁸

Ako magpamatuod nga ang Ginoo nakakita layo ngadto sa umaabut ug sa unsa nga paagi Siya moggiya nato sa pagtabang Niya sa pagtuman sa iyang mga katuyoan sa katapusang mga adlaw.

Samtang ako nagserbisyo sa Presiding Bishopric daghang katuigan ang milabay, ako gitahasan sa pagdumala sa tigdesinyo ug tig-ugmad nga grupo nga mihimo sa ginganlan nato og FamilySearch. Ako mabinantayon sa pagsulti nga ako “midumala” sa paghimo niini kay sa pagsulti nga ako “midirekta” niini. Daghang maalamong mga tawo mibiya sa mga panarbaho ug miabut aron sa paghimo unsay gusto sa Ginoo.

Ang Unang Kapangulohan mitakda og tumong sa pagpakunhod sa pagkadoble sa mga ordinansa. Ang ilang dakong kabalaka mao ang among dili pagkahibalo kon ang ordinansa sa usa ka tawo napahigayon na ba. Sulod sa mga tuig—o daw mga tuig—ang Unang Kapangulohan nangutana nako, “Kanus-a ninyo kini mabuhat?”

Uban sa pag-ampo, kakugi, ug personal nga sakripisyo sa katawhan nga may talagsaong abilidad, ang buluhaton natuman. Kini anam-anam nga natuman. Ang unang buluhaton mao

ang paghimo sa FamilySearch nga dali masabtan o daling gamiton alang niadtong dili komportable sa computer. Dugang nga mga kausaban miabut, ug ako nasayud nga kini magpadayon sa pag-abut, kay matag higayon nga kami mosulbad og dinasig nga problema, among giablihan ang pultahan alang sa dugang nga pagpadayag alang sa mga kauswagan nga sama ka importante apan wala pa makita. Bisan karon, ang FamilySearch nagpadayon nga nahimong unsay gikinahanglan sa Ginoo nga kabahin sa Iyang Pagpahiuli—ug dili lang sa paglikay sa pagkadoble sa mga ordinansa.

Ang Ginoo mitugot namo sa paghimo og mga kalamboan sa pagtabang sa mga tawo nga makaangkon og pamilyar nga mga pagbati ug gani gugma alang sa ilang katigulangan ug pagkompleto sa ilang mga ordinansa sa templo. Karon, ingon nga ang Ginoo nasayud gyud nga mahitabo, ang mga batan-on nahimong mga magtutudlo sa computer sa ilang mga ginikanan ug miyembro sa ward. Tanan nakakaplag og hingpit nga kalipay niini nga pagserbisyo.

Ang espiritu ni Elijah nag-usab sa kasingkasing sa mga batan-on ug tigulang, mga anak ug ginikanan, mga apo ug apohan. Ang mga templo sa dili madugay malipayong mag-iskedyul pag-usab og mga oportunidad sa pagbunyang ug ubang sagradong ordinansa. Ang tinguha sa pagserbisyo sa atong katigulangan ug ang kasuod sa mga ginikanan ug anak nagtubo.

Ang Ginoo nakakita nga kining tanan moabut. Iyang giplano kini, anam-anam, sama sa Iyang gibuhat sa ubang mga kausaban sa Iyang Simbahan. Siya mipasanay ug miandam og matinud-anon nga katawhan kinsa mopili sa pagbuhat sa maayong paagi sa lisud nga mga butang. Siya kanunay nga mapailubon sa mahigugmaong paagi sa pagtabang nato nga makat-on “pagtulun-an human sa usa ka pagtulun-an, lagda human sa usa ka lagda, diyutay dinhi ug diyutay didto.” Siya piho sa pagpili sa panahon ug pagkahan-ay sa Iyang mga intensyon, apan Siya mosiguro nga

ang sakripisyo kanunayng magdala og padayon nga mga panalangin nga dili nato makita daan.

Ako motapos pinaagi sa pagpahayag sa akong pasalamat sa Ginoo— Siya kinsa midasig ni Presidente Nelson sa pagdapit nako sa paghimo og sakripisyo sa pag-andam alang niining komperensya. Matag oras ug pag-ampo atol sa akong pagpangandam nagdala og panalangin.

Akong gidapit tanan nga makadungog niining mensahe o makabasa niining mga pulong nga magbaton og pagtuo nga ang Ginoo naggiya sa Pagpahiuli sa Iyang ebanghelyo ug Simbahan. Siya mag-una kanato. Siya hingpit nga nahibalo sa uma-abut. Siya nagdapit ninyo ngadto sa buhat. Siya makig-uban ninyo niini. Siya dunay plano alang sa inyong pagserbisyo. Ug gani samtang kamo magsakripisyo, kamo mobati og kalipay samtang kamo motabang sa uban nga molambo aron maandam sa Iyang pag-anhi.

Ako mopamatuod kaninyo nga and Dios nga Amahan buhi. Si Jesus mao ang Kristo. Kini Iyang Simbahan. Siya nakaila ug nahigugma kaninyo. Siya naggiya kaninyo. Siya miandam sa agianan alang kaninyo. Sa sagra-dong ngalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 110, ulohan sa seksyon; tan-awa usab sa Joseph Smith, “History, 1838–1856, volume B-1 [1 September 1834–2 November 1838],” Abr. 3, 1836, 727, josephsmithpapers.org.
2. Doktrina ug mga Pakigsaad 110:1–16.
3. Karl Ricks Anderson, *The Savior in Kirtland: Personal Accounts of Divine Manifestations* (2012), 276; Doktrina ug mga Pakigsaad 38:33.
4. Gihatag diha sa apostolikanhong tahas nga gipahigayon ni Oliver Cowdery, sa “Minute Book 1,” Feb. 21, 1835, 162, josephsmithpapers.org.
5. Joseph Fielding Smith, *Doctrines of Salvation*, comp. Bruce R. McConkie (1955), 2:234.
6. Doktrina ug mga Pakigsaad 38:32.
7. Tan-awa sa James B. Allen, Ronald K. Esplin, ug David J. Whittaker, *Men with a Mission: The Quorum of the Twelve Apostles in the British Isles, 1837–1841* (1992), 53, 302; Brandon S. Plewe, ed., *Mapping Mormonism: An Atlas of Latter-day Saint History* (2012), 104.
8. Doktrina ug mga Pakigsaad 110:14–16.
9. 2 Nephi 28:30.



Ni Presidente Dallin H. Oaks
Unang Magtatambag sa Unang Kapangulohan

Ang Melchizedek nga Pagkapari ug ang mga Yawe

Sa Simbahan ang awtoridad sa pagkapari gamiton ubos sa direksyon sa usa ka lider sa pagkapari kinsa naghupot sa mga yawe niana nga pagkapari.

Mipili ko nga dugang nga mamulong mahitungod sa pagkapari sa Dios, ang hilisgutan nga nahisgutan na sa tulo ka nag-unang mamumulong kinsa mitudlo kanato kon sa unsang paagi ang pagkapari mopanalangin sa mga kinabuhi sa mga babaye, batan-on nga mga babaye, ug batan-on nga mga lalaki.

Ang pagkapari mao ang balaanong gahum ug awtoridad nga temporaryong gitugyan nga gamiton diha sa buhat sa Dios alang sa kaayohan sa tanan Niyang mga anak. Ang *pagkapari* dili mao kadtong gi-orden ngadto sa usa ka katungdanan sa pagkapari o kadtong mogamit sa awtoridad niini. Ang mga lalaki kinsa naghupot sa pagkapari dili mao ang pagkapari. Samtang dili nato tawagon ang na-orden nga mga lalaki isip *ang pagkapari*, haum nga tawagon sila isip *naghupot* sa pagkapari.

Ang gahum sa pagkapari anaa diha sa Simbahan ug sa organisasyon sa pamilya. Apan ang gahum sa pagkapari ug awtoridad sa pagkapari lahi ang paglihok diha sa Simbahan kay sa pamilya. Kining tanan nagsubay sa mga

baruganan nga giestablisar sa Ginoo. Ang katuyoan sa plano sa Dios mao ang paggiya sa Iyang mga anak ngadto



Provo, Utah, USA

sa kinabuhing dayon. Ang mortal nga mga pamilya mahinungdanon niana nga plano. Ang Simbahan anaa aron sa paghatag og doktrina, sa awtoridad, ug sa mga ordinansa nga gikinahanglan aron sa pagpadayon sa mga relasyon sa pamilya ngadto sa kahangturang. Busa, ang organisasyon sa pamilya ug ang Simbahan ni Jesukristo nagsuporta sa usag usa. Ang mga panalangin sa priesthood—sama sa kahingpitan sa ebanghelyo ug mga ordinansa sama sa bunyag, kumpirmasyon ug pagdawat sa gasa sa Espiritu Santo, sa tuga sa templo, ug mahangturong kaminyoon—pareho nga anaa alang sa mga lalaki ug mga babaye.¹

Ang pagkapari nga atong gihisgutang dinhi mao ang Melchizedek nga Pagkapari, gipahiuli sa pagsugod sa Pagpahiuli sa ebanghelyo. Si Joseph Smith ug Oliver Cowdery gi-orden ni Pedro, Santiago, ug Juan, kinsa mideklarar sa ilang mga kaugalingon “nga naghupot sa mga yawe sa gingharian, ug sa kapaigoan sa kahingpitan sa panahon” (Doktrina ug mga Pakigsaad 128:20). Kining senyor nga mga Apostoles nakadawat niana nga awtoridad gikan sa Manluluwas Mismo. Ang tanan nga mga awtoridad o katungdanan diha sa pagkapari mga sumpay sa Melchizedek nga Pagkapari (tan-awa sa Doktrina ug mga Pakigsaad 107:5), kay kini “naghupot sa katungod sa kapangulohan, ug adunay gahum ug pagtugot ibabaw sa tanan nga mga buhatan diha sa simbahan sa tanan nga panahon sa kalibutan” (Doktrina ug mga Pakigsaad 107:8).

Sa Simbahan ang awtoridad sa labaw nga pagkapari, ang Melchizedek nga Pagkapari, ug ang ubos o Aaronic nga Pagkapari gamiton ubos sa direksyon sa usa ka lider sa pagkapari, sama sa bishop o presidente, kinsa naghupot sa mga yawe niana nga pagkapari. Aron makasabut sa paggamit sa awtoridad sa pagkapari diha sa Simbahan, kinahanglang makasabut kita sa baruganan sa mga yawe sa pagkapari.

Ang mga yawe sa Melchizedek nga Pagkapari sa gingharian gitugyan pinaagi ni Pedro, Santiago, ug Juan, apan

wala kana mokompleto sa pagpahiuli sa mga yawe sa pagkapari. Ang ubang mga yawe sa pagkapari ulahi nga miabut. Human sa pagpahinungod sa unang templo niini nga dispensasyon sa Kirtland, Ohio, tulo ka propeta—si Moises, Elias, ug Elijah—mipahiuli “sa mga yawe niini nga dispensasyon,” lakip sa mga yawe kalabut sa pagpundok sa Israel ug sa buhat sa mga templo sa Ginoo (tan-awa sa Doktrina ug mga Pakigsaad 110), sama sa bag-o lang gihulagway ni Presidente Eyring nga maagnihon kaayo.

Ang labing pamilyar nga ehemplo sa gamit sa mga yawe mao ang sa pagpahigayon sa mga ordinansa sa pagkapari. Ang usa ka ordinansa usa ka solemne nga buhat nga nagtimaan sa paghimo og mga pakigsaad ug sa pagsaad og mga panalangin. Sa Simbahan ang tanang ordinansa ipahigayon ubos sa pagtugot sa lider sa pagkapari kinsa naghupot sa mga yawe alang niana nga ordinansa.

Ang usa ka ordinansa kasagaran nga ipahigayon sa mga tawo kinsa na-orden ngadto sa usa ka katungdanan sa pagkapari nga naglihok ubos sa direksyon sa tawo kinsa naghupot sa mga yawe sa pagkapari. Sama pananglit, ang mga naghupot sa lainlaing katungdanan sa Aaronic nga Pagkapari mopahigayon sa ordinansa sa sakramento ubos sa mga yawe ug direksyon sa bishop, kinsa naghupot sa mga yawe sa Aaronic nga Pagkapari. Ang samang baruganan magamit ngadto sa mga ordinansa sa pagkapari diin ang mga babaye ang mopahigayon diha sa templo. Bisan kon ang mga babaye wala maghupot og katungdanan sa pagkapari, mopahigayon sila og sagrado nga mga ordinansa ubos sa pagtugot sa presidente sa templo, kinsa naghupot sa mga yawe alang sa mga ordinansa sa templo.

Ang laing ehemplo sa awtoridad sa pagkapari ubos sa direksyon sa tawo nga naghupot sa mga yawe mao ang mga pagtulun-an sa mga lalaki ug babaye nga gitawag sa pagtudlo sa ebanghelyo, sa mga klase man diha sa ilang mga home ward o sa natad

sa mission. Ang ubang mga ehemplo mao kadtong naghupot og mga posisyon sa pagpangulo diha sa ward ug migamit og awtoridad sa pagkapari sa ilang pagpangulo tungod sa ilang mga calling ug ubos sa pagset-apart ug direksyon sa lider sa pagkapari nga naghupot sa mga yawe diha sa ward o sa stake. Sa ingon niini nga paagi gigamit ug gipahimuslan ang awtoridad ug gahum sa pagkapari diha sa Ang Simbahan ni Jesukristo sa mga Santos sa Ulahing mga Adlaw.²

Ang awtoridad sa pagkapari gigamit usab ug ang mga panalangin niini nasinati diha sa mga pamilya sa mga Santos sa Ulahing mga Adlaw. Sa mga pamilya ang akong gipasabut mao ang lalaki nga naghupot sa pagkapari ug babaye kinsa naminyo ug ang ilang mga anak. Gilakip usab nako ang mga pagkalahi gikan sa gimithi nga mga relasyon sama sa resulta sa kamatayon o diborsyo.

Ang baruganan nga ang katungod sa pagkapari magamit lamang ubos sa direksyon sa tawo nga naghupot sa mga yawe alang niana nga buluhaton importante diha sa Simbahan, apan dili kini mahimo diha sa pamilya. Sama pananglit, ang usa ka amahan modumala ug mogamit sa pagkapari diha sa iyang pamilya pinaagi sa awtoridad sa pagkapari nga iyang gihuptan. Dili siya magkinahanglan sa direksyon o pagtugot sa tawo nga naghupot sa mga yawe sa pagkapari aron mopahigayon sa iyang lain-laing mga buluhaton sa pamilya. Naglakip kini sa pagtambag sa mga sakop sa iyang pamilya, pagpahigayon og mga miting sa pamilya, paghatag og mga panalangin sa pagkapari ngadto sa iyang asawa ug mga anak, o paghatag og panalangin sa pag-ayo ngadto sa mga sakop sa pamilya o sa uban.³ Ang mga awtoridad sa Simbahan motudlo sa mga sakop sa pamilya apan dili modumala sa paggamit sa awtoridad sa pagkapari diha sa pamilya.

Ang samang baruganan magamit kon wala ang amahan ug ang inahan mao ang lider sa pamilya. Siya ang mangulo diha sa iyang pamilya ug maoy himan nga madala ang gahum

ug mga panalangin sa pagkapari nganha sa iyang pamilya pinaagi sa iyang tuga ug pagsilyo diha sa templo. Samtang dili siya awtorisado nga mohatag og mga panalangin sa pagkapari nga mahatag lamang sa usa ka tawo nga naghupot og piho nga katungdanan diha sa pagkapari, makahimo siya sa pagbuhat sa ubang mga buluhaton sa pagpangulo sa pamilya. Sa paghimo niini, iyang gigamit ang gahum sa pagkapari alang sa kaayohan sa mga anak nga iyang gidumala diha sa iyang posisyon sa pagpangulo diha sa pamilya.⁴

Kon ang mga amahan hingpit nga mogamit sa ilang pagkapari diha sa ilang kaugalingong pamilya, maka-pauswag kini sa misyon sa Simbahan sama sa uban pa nilang mabuhat. Ang mga amahan nga naghupot sa Melchizedek nga Pagkapari kinahanglang mogamit sa ilang awtoridad “sa pagdani, sa pagkamaintuson, sa kalumo ug kaaghup, ug sa ti-unay nga paghigugma” (Doktrina ug mga Pakigsaad 121:41). Kanang taas nga sumbanan alang sa paggamit sa tanang awtoridad sa pagkapari maoy labing importante diha sa pamilya. Ang mga naghupot sa pagkapari kinahanglang motuman usab sa mga sugo aron makabaton sila sa gahum sa pagkapari sa paghatag og mga panalangin ngadto sa mga sakop sa ilang pamilya. Sila kinahanglang magugmad og mahigugmaong mga relasyon sa pamilya aron ang mga sakop sa pamilya madasig sa paghangyo kanila og mga panalangin. Ug ang mga ginikanan kinahanglang moawhag og dugang nga mga panalangin sa pagkapari diha sa pamilya.⁵

Niini nga mga miting sa kompetensiya, samtang magtinguha kita og mubong pahulay gikan sa atong mortal nga mga kabalaka tungod sa makalaglag nga pandemic, gitudloan kita og importanting mga baruganan sa kahangturan. Ako moawhag sa matag usa kanato nga ang atong mata “bug-os” nga modawat niini nga mga kamatuoran sa kahangturan aron ang atong mga lawas “mapuno sa kahayag” (3 Nephi 13:22).



Sa Iyang wali ngadto sa mga pundok sa katawhan nga narekord diha sa Biblia ug sa Basahon ni Mormon, ang Manluluwas mitudlo nga ang mortal nga mga lawas mamahimong puno sa kahayag o puno sa kangitngit. Kita, siyempre, gusto nga mapuno sa kahayag, ug ang atong Manluluwas mitudlo kanato kon unsaon nga mahitabo kini. Kita kinahanglang maminaw sa mga mensahe mahitungod sa mga kamatuoran sa kahangturan. Iyang gigamit ang ehemplo sa atong mata, nga pinaagi niini makapasulod kita og kahayag sa atong lawas. Kon ang atong “mata bug-os”—sa laing pagkasulti, kon nakatutok kita sa pagdawat og mahangturon nga kahayag ug pagsabut—Siya mipasabut, “ang tibuok ninyong lawas mapuno sa kahayag” (Mateo 6:22; 3 Nephi 13:22). Apan kon ang atong “mata dautan”—kana, kon mangita kita og dautan ug isulod kini sa atong lawas—Siya mipasidaan, ang “inyong tibuok lawas mapuno sa kangitngit” (bersikulo 23). Sa laing pagkasulti, ang kahayag o kangitngit diha sa atong mga lawas mag-agad kon sa unsang paagi nato gitan-aw—o gidawat—ang mahangturon nga mga kamatuoran nga gitudlo kanato.

Kinahanglang natong sundon ang pagdapit sa Manluluwas nga magtinguha ug mohangyo nga makasabut sa mga kamatuoran sa kahangturan. Siya misaad nga ang atong Amahan sa Langit andam nga motudlo sa tanan sa mga kamatuoran nga ilang gitinguha (tan-awa sa 3 Nephi 14:8). Kon

magtinguha kita niini ug himoon ang atong mata nga bug-os nga modawat niini, ang Manluluwas misaad nga ang mga kamatuoran sa kahangturan “pagaablihan” kanato (tan-awa sa 3 Nephi 14:7–8).

Agig pagtandi, si Satanas matinguhaon sa paglibog sa atong hunahuna o sa pagpahisalaag kanato sa importante nga mga butang sama sa mga paagi sa paglihok sa pagkapari sa Dios. Ang Manluluwas mipasidaan sa ingon nga “mini nga mga propeta, kinsa moduol kaninyo nga magsul-ob sa saput sa karnero, apan diay sa sulod nila sila mga lobo nga manunukob” (3 Nephi 14:15). Mihatag Siya kanato niini nga pagsulay aron sa pagtabang kanato nga mopili sa kamatuoran gikan sa lain-laing pagtulun-an nga tingali makalibog kanato: “Kamo makaila kanila pinaagi sa ilang mga bunga,” Siya mitudlo (3 Nephi 14:16). “Ang usa ka maayo nga kahoy dili mohatag og dautan nga bunga, ni ang usa ka dautan nga kahoy [maka]hatag og maayo nga bunga” (bersikulo 18). Busa, kinahanglang motan-aw kita sa mga resulta—“ang mga bunga”—sa mga baruganan nga gitudlo ug sa mga tawo nga nagtudlo niini. Mao kana ang labing maayong tubag sa daghan sa mga pagsupak nga atong nadunggan batok sa Simbahan ug sa doktrina ug mga polisiya ug pagpangulo niini. Sunda ang pagsulay nga gitudlo sa Manluluwas. Tan-aw sa mga bunga—sa mga resulta.

Kon maghunahuna kita sa mga bunga sa ebanghelyo ug sa gipahiuli nga Simbahan ni Jesukristo, maglipay kita kon sa unsang paagi ang Simbahan, panahon sa kinabuhi sa buhi nga mga miyembro niini, mikaylap gikan sa lokal nga mga kongregasyon sa Intermountain West ngadto sa kahimtang diin ang kadaghanan sa sobra 16 ka milyon nga mga miyembro niini nagpuyo sa mga nasud gawas sa Estados Unidos. Uban niana nga pagtubo, atong gibati ang nadugangan nga kapasidad sa Simbahan sa pagtabang sa mga miyembro niini. Motabang kita sa pagsunod sa mga sugo, sa pagtuman sa mga responsibilidad sa pagsangyaw sa gipahiuli nga ebanghelyo, sa pagpundok sa Israel, ug sa pagtukod og mga templo sa tibuok kalibutan.

Gigiyahan kita sa usa ka propeta, si Presidente Russell M. Nelson, kangsang pagpangulo gigamit sa Ginoo aron makab-ut ang pag-uswag nga atong nabati sulod sa sobra duha ka tuig sa iyang pagpangulo. Karon mapanalanginan kita nga maminaw ni Presidente Nelson, kinsa motudlo kanato kon unsaon nato nga madugangan ang atong pag-uswag niining gipahiuli nga Simbahan ni Jesukristo niining mahagiton nga panahon.

Mopamatuod ko sa kamatuoran niining mga butanga ug moapil kaninyo sa pag-ampo alang sa atong propeta, kinsa maoy sunod natong pamina-won, sa ngalan ni Jesukristo, amen. ■

MUBO NGA MGA SULAT

1. Tan-awa sa Dallin H. Oaks, “Katungod sa Priesthood diha sa Pamilya ug sa Simbahan,” *Liahona*, Nob. 2005, 24–27.
2. Tan-awa sa Russell M. Nelson, “Espirituhanon nga mga Bahandi,” *Liahona*, Nob. 2019, 76–79; Dallin H. Oaks, “Katungod sa Priesthood diha sa Pamilya ug sa Simbahan,” 24–27; Dallin H. Oaks, “Ang mga Yawe ug Awtoridad sa Priesthood,” *Liahona*, Mayo 2014, 49–52.
3. Tan-awa sa Dallin H. Oaks, “Ang mga Gahum sa Priesthood,” *Liahona*, Mayo 2018, 65–68.
4. Tan-awa sa Russell M. Nelson, “Espirituhanon nga mga Bahandi,” 76–79.
5. Tan-awa sa Russell M. Nelson, “Ang Pagpangalagad uban sa Gahum ug Katungod sa Dios,” *Liahona*, Mayo 2018, 68–75; Dallin H. Oaks, “Ang mga Gahum sa Priesthood,” 65–68.



Ni Presidente Russell M. Nelson
Presidente sa Ang Simbahan ni Jesukristo
sa mga Santos sa Ulahing mga Adlaw

Pag-abli sa Kalangitan alang sa Tabang

*Atong gamiton ang atong hugot nga pagtuo
diha ni Ginoong Jesukristo ngadto sa paglihok!*

Pagkatalagsaon ug pagkanindot niini nga sesyon! Salamat, minahal nga Laudy ug Enzo. Inyo gayung girepresentar pag-ayo ang halangdong mga kabatan-onan sa Simbahan.

Akong minahal nga kaigsoonan, daghan ang atong nadungog karon mahitunogod sa Pagpahiuli sa Simbahan—ang mismong Simbahan nga giestablisar sa atong Manluluwas, si Jesukristo, atol sa Iyang pagpangalagad dinhi sa yuta. Kana nga Pagpahiuli nagsugod 200 ka tuig na ang milabay karong tingpamulak sa dihang ang Dios nga Amahan ug ang Iyang Anak, si Jesukristo, mipakita ngadto sa batan-ong Joseph Smith.

Napulo ka tuig human niining talagsaong panan-awon, si Propeta Joseph Smith ug laing lima pa gitawag isip nag-unang mga miyembro sa gipahiuli nga Simbahan sa Ginoo.

Gikan nianang gamay nga grupo nga nagpundok niadtong Abril 6, 1830, nahimo nang tibuok kalibutan nga organisasyon sa sobra sa 16 ka milyon nga mga miyembro. Ang maayong nahimo niining Simbahan sa tibuok kalibutan sa paghupay sa pag-antus ug pagdasig sa katawhan nahibaloan na sa kadaghanan. Apan ang pinakaimportanting katuyoan niini mao ang pagtabang sa kalalakin-an, kababayen-an, ug kabataan nga

mosunod ni Ginoong Jesukristo, motuman sa Iyang mga sugo, ug mahimong sarang alang sa labing mahinungdanan sa tanang panalangin—kanang kinabuhing dayon uban sa Dios ug sa ilang mga minahal sa kinabuhi.¹

Sa atong paghandum sa panghitabo nga gipasiugdahan niadtong 1820, importante nga hinumduman nga samtang gitahud nato si Joseph Smith isip propeta sa Dios, dili kini simbahan ni Joseph Smith, ni kini simbahan ni Mormon. Kini mao ang Simbahan ni Jesukristo. Iyang gimando kon unsa gayud ang itawag sa Iyang Simbahan: “Kay sa ingon ang akong simbahan pagatawgon sa katapusan nga mga adlaw, gani Ang Simbahan ni Jesukristo sa mga Santos sa Ulahing mga Adlaw.”²

Ako namulong na sa miagi mahitunogod sa gikinahanglan nga pagkorihir sa paagi sa atong pagtawag sa ngalan sa Simbahan.³ Sukad nianang higayuna, daghan ang nabuhat aron mahimo kini nga pagkorihir. Mapasalamaton kaayo ko kang Presidente M. Russell Ballard ug sa tibuok Korum sa Napulog Duha ka mga Apostoles, kinsa daghan kaayo og nabuhat aron pangulohan kining mga paningkamot ingon man usab niadtong may kalabutan sa laing inisyatibo nga akong ipahibalo karong gabhiona.

Ang mga lider ug mga departamento sa Simbahan, may kalabutan nga mga organisasyon, ug minilyon nga mga miyembro—ug uban pa—naggamit na karon sa saktong ngalan sa Simbahan. Ang opisyal nga giya sa estilo sa Simbahan gi-adjust na. Ang nag-unang website sa Simbahan mao na karon ang ChurchofJesusChrist.org. Ang mga address alang sa email, mga ngalan sa website [domain], ug mga channel sa social media gi-update na. Ang atong minahal nga choir mao na karon ang The Tabernacle Choir at Temple Square.

Kita mihimo niining talagsaong mga paningkamot tungod kay kon atong tangtangan ang ngalan sa Ginoo gikan sa ngalan sa *Iyang* Simbahan, wala nato tuyoa nga tangtangan *Siya* isip ang sentro nga tutokan sa atong pagsimba ug sa atong kinabuhi. Sa dihang atong gidala ang ngalan sa Manluluwas ngari kanato atol sa bunyag, mipasalig kita nga mosaksi, pinaagi sa atong mga pulong, mga

hunahuna ug mga lihok, nga si Jesus mao ang Kristo.⁴

Sa miagi, misaad ko nga kon kita “mobuhat sa atong labing maayo sa pagpahiuli sa saktong ngalan sa Simbahan sa Ginoo,” Siya “mobu-bu sa Iyang gahum ug mga panalangin diha sa mga ulo sa mga Santos sa Ulahing mga Adlaw, sa mga paagi nga wala nato makita sukad.”⁵ Akong usbon kana nga saad karon.

Aron matabangan kita nga maka-hinumdom Kaniya ug mailhan Ang Simbahan ni Jesukristo sa mga Santos sa Ulahing mga Adlaw isip *Simbahan sa Ginoo* malipayon kaming mopaila sa usa ka simbolo nga mopakita sa mahinungdanong dapit ni Jesukristo diha sa Iyang Simbahan.

Kini nga simbolo naglakip sa ngalan sa Simbahan nga nasulod sa usa ka bato sa pamag-ang [cornerstone]. Si Jesukristo mao ang ulohang bato sa pamag-ang.⁶

Anaa sa sentro sa simbolo ang usa ka representasyon sa marmol nga estatuwa

nga hinimo ni Thorvaldsen nga mao ang *Christus*. Nagpakita kini sa nabanhaw, *buhi* nga Ginoo nga mituyhad sa Iyang mga bukton aron hangupon ang tanan nga moduol Kaniya.

Sa simbolikanhong paagi, si Jesukristo nagbarug ubos sa usa ka arko. Ang arko nagpahinumdom kanato bahin sa nabanhaw nga Manluluwas nga migawas gikan sa lubnganan sa ikatulong adlaw human sa Paglansang Kaniya sa Krus .

Kini nga simbolo mamahimong pamilyar sa kadaghanan, kay dugay na man natong giisip ang gipahiuli nga ebanghelyo nga adunay kalabutan sa *buhi*, nabanhaw nga Kristo.

Ang simbolo gamiton na karon isip usa ka tigpailang biswal alang sa opisyal nga literatura, mga balita, ug mga panghitabo sa Simbahan.⁷ Kini mopahinumdom sa tanan nga mao kini ang Simbahan sa Manluluwas ug nga ang tanan natong gibuhit isip mga miyembro sa Iyang Simbahan nakasentro kang Jesukristo ug sa Iyang ebanghelyo.

Karon, akong minahal nga kaigsoonan, ugma mao ang Domingo sa Lukay, sama sa maayo kaayong pagkatudlo ni Elder Gong. Dayon mosulod kita sa espesyal nga semana nga matapos sa Pasko sa Pagkabanhaw. Isip mga sumusunod ni Jesukristo, nga nagpuyo sa panahon nga ang COVID-19 nga pandemic mipagubot sa tibuok kalibutan, dili lamang kita maghisgot bahin ni Kristo o magsangyaw bahin ni Kristo o mogamit og simbolo nga nagrepresentar ni Kristo.

Atong gamiton ang atong hugot nga pagtuo diha ni Ginoong Jesukristo ngadto sa paglihok!

Sama sa inyo nang nahibaloan, ang mga miyembro sa Simbahan nagsunod sa balaod sa puasa kausa sa usa ka bulan.

Ang doktrina sa pagpuasa karaan na. Gihimo na kini sa biblikanhong mga bayani gikan sa nag-unang mga adlaw. Sila si Moises, David, Esdras, Nehemias, Ester, Isaias, Daniel, Joel, ug daghan pa nagpuasa ug nagsangyaw bahin sa pagpuasa.⁸ Pinaagi sa mga sinulat ni Isaias, ang Ginoo miingon:



“*Dili ba* mao kini ang pagpuasa nga akong napili? ang paghubad sa mga higit sa kadautan, pagtanggap sa mga bugkos sa yugo, ug ang pagpagawas sa mga dinaugdaug?”⁹

Si Apostol Pablo mitambag sa mga Santos sa Corinto nga “managsulod kamo diha sa kahigayunan sa pagpuasa ug pag-ampo.”¹⁰ Ang Manluluwas Mismo namahayag nga ang pihong mga butang “dili mahimo sa pagpagula *gawas* sa paagi sa pag-ampo ug pagpuasa.”¹¹

Ako miingon bag-o lang sa usa ka video sa social media nga “isip usa ka doktor ug tig-opera, ako adunay dako nga pagdayeg alang sa medikal nga mga propesyonal, mga scientist, ug sa uban kinsa nagtrabaho sa tanang oras aron masanta ang pagkatap sa COVID-19.”¹²

Karon, isip Presidente sa Ang Simbahan ni Jesukristo sa mga Santos sa Ulahing mga Adlaw ug usa ka Apostol ni Jesukristo, ako *nasayud* nga ang Dios “aduna sa tanan nga gahum, tanan nga kaalam, ug tanan nga salabutan; siya nakatugkad sa tanan nga mga butang, ug siya usa ka maloloy-on nga Binuhad, gani ngadto sa kaluwasan, ngadto kinsa mohinul-sol ug motuo diha sa iyang ngalan.”¹³

Busa, atol sa mga panahon sa hilabihan nga kalisud, kon ang sakit moabut na sa pandemic, ang labing natural nga butang nga atong buhaton mao ang pagtawag sa atong Langitnong Amahan ug sa Iyang Anak—ang Bantugang Tig-ayo—sa pagpakita sa Ilang talagsaong gahum



London, England



nga mopanalangin sa mga tawo dinhi sa yuta.

Sa akong mensahe sa video, akong gidapit ang tanan nga moapil sa pagpuasa sa Dominggo, Marso 29, 2020. Daghan kaninyo ang tingali nakakita sa video ug miapil sa pagpuasa. Ang uban siguro wala. Karon nagkinahanglan gihapon kita og tabang gikan sa langit.

Busa karong gabhiona, akong minahal nga kaigsoonan, sama sa gibuhad sa mga anak ni Mosiah, kinsa mihatag sa ilang kaugalingon ngadto sa tuman nga pagpuasa ug pag-ampo,¹⁴ ug isip kabahin sa atong Abril 2020 nga kinatibuk-ang komperensya, nanawagan ko og laing tibuok kalibutan nga pagpuasa. Alang sa tanan kansang panglawas makatugot, magpuasa kita, mag-ampo, ug mohiusa pag-usab sa atong pagtuo. Mainampuon kitang mangamuyo alang sa kahupayan gikan niining tibuok kalibutan nga pandemic.

Akong gidapit ang *tanan*, lakip na niadtong dili miyembro sa atong Simbahan, nga magpuasa ug mag-ampo sa Biyernes Santo, Abril 10, nga ang kasamtangang pandemic unta makontrolar, ang mga tig-atiman mapanalipdan, ang ekonomiya mapalig-on, ug ang kinabuhi mahimong normal.

Unsaon nato sa pagpuasa? Ang duha ka kan-anan o 24 oras maoy naandan. Apan kinahanglan kamong modesisyon kon unsay maglangkob og sakripisyo alang kaninyo, samtang maghinumdom kamo sa labing dako nga sakripisyo nga gihimo sa Manluluwas alang kaninyo. Maghiusa kita sa pagpangamuyo alang sa pagkaayo sa tibuok kalibutan.

Ang Biyernes Santo mamahimong mao *ang* perpektong adlaw nga ang

atong Langitnong Amahan ug ang Iyang Anak modungog *kanato!*

Minahal nga kaigsoonan, akong ipahayag ang akong dakong gugma alang kaninyo, uban sa akong pagpamatuod bahin sa kabalaan sa buhat diin kita nalambigit. Kini *mao* Ang Simbahan ni Jesukristo sa mga Santos sa Ulahing mga Adlaw. Siya nagbarug sa ulohan niini ug naggiya sa tanan natong gibuhad. Ako nasayud nga Siya motubag sa mga pangamuyo sa Iyang katawhan. Ako mopamatuod pinaagi sa sagradong ngalan ni Jesukristo, amen. ■

MUBO NGA MGA SULAT

1. Tan-awa sa Doktrina ug mga Pakigsaad 14:7.
2. Doktrina ug mga Pakigsaad 115:4.
3. Tan-awa sa Russell M. Nelson, “Ang Sakto nga Ngalan sa Simbahan,” *Liahona*, Nob. 2018, 87–89.
4. Tan-awa sa Russell M. Nelson, “Ang Sakto nga Ngalan sa Simbahan,” 88.
5. Russell M. Nelson, “Ang Sakto nga Ngalan sa Simbahan,” 89.
6. Tan-awa sa Mga Taga-Efeso 2:20.
7. Sa pagtahud sa sagradong kahimtang sa simbolo sa Simbahan ug pagpreserbar sa legal nga proteksyon, ang opisyal nga simbolo sa Simbahan gamiton lamang kon aprubahan sa Unang Kapangulohan ug sa Korum sa Napulog Duha ka mga Apostoles. Dugang nga impormasyon mahimong makuha pinaagi sa pagkontak sa Intellectual Property Office sa Simbahan sa cor-intellectualproperty@ChurchofJesusChrist.org.
8. Tan-awa sa Exodo 34:28; 2 Samuel 12:16; Ezra 10:6; Nehemias 1:4; Ester 4:16; Isaia 58:3; Daniel 9:3; Joel 2:12.
9. Isaia 58:6.
10. 1 Mga Taga-Corinto 7:5.
11. Mateo 17:21; emphasis gidugang.
12. Russell M. Nelson, sa “Prophet Invites All to Fast and Pray for Relief from COVID-19,” Mar. 26, 2020, newsroom. ChurchofJesusChrist.org.
13. Alma 26:35.
14. Tan-awa sa Alma 17:3.



Ni Elder Ronald A. Rasband
Sa Korum sa Napulog Duha ka mga Apostoles

Katumanan sa Panagna

Ang mga panagna nga natuman sa Pagpahiuli sa kahingpitan sa ebanghelyo ni Jesukristo daghan.

Akong minahal nga mga kaigsoonan, akong dungog nga makapamulong niining makasaysayanong kinatibuk-ang komperensya nga naghandum sa Unang Panan-awon ni Joseph Smith bahin sa Dios nga Amahan ug sa Iyang Anak, si Jesukristo, nga sa walay pagduha-duha, diha sa usa ka Sagradong Kakahoyan. Kana nga panan-awon usa ka talagsaong sinugdanan sa Pagpahiuli sa ebanghelyo ug sa tanang nahitabo, gikan sa Basahon ni Mormon hangtud sa pagbalik sa awtoridad ug mga yawe sa pagkapari, sa pag-organisar sa tinuod nga Simbahan sa Ginoo, sa mga templo sa Dios, ug sa mga propeta ug mga apostoles nga nangulo sa buhat niining ulahing mga adlaw.

Pinaagi sa balaanong plano, ang karaang mga propeta sa Dios, dihang giaghat sa Espiritu Santo, nanagna bahin sa Pagpahiuli ug sa unsay moabut sa atong panahon, ang katapusang dispensasyon ug ang kahingpitan sa panahon. Ang mismong buhat “nga midasig sa mga kalag” sa nag-unang mga manalagna.¹ Sulod sa mga henerasyon, sila nagtagna, nagdamgo, naglantaw, ug nanagna bahin sa umaabut nga gingharian sa Dios dinhi sa yuta, sa unsay gitawag ni Isaias nga “usa ka katingalahang buhat ug usa ka kahibulongan.”²

Ang mga panagna nga natuman sa Pagpahiuli sa kahingpitan sa ebanghelyo ni Jesukristo, lakip na Ang Simbahan ni Jesukristo sa mga Santos sa Ulahing

mga Adlaw, daghan. Karon, hinoon, akong hatagan og gibug-aton ang pipila lamang sa akong mga paborito. Gitudlo kini kanako sa akong minahal nga mga magtutudlo sa Primary ug sa tiilan sa boutan nako nga inahan.

Si Daniel, kinsa mipugong sa mga leon pinaagi sa iyang pagtuo ni Ginoong Jesukristo ug sa panginlabut sa tigpangalagad nga mga anghel sa Dios, nakakita sa atong panahon sa usa ka panan-awon. Nag-interpretar og damgo alang sa taga-Babelon nga si Haring Nabucodonosor, nanagna si Daniel sa Simbahan sa Ginoo nga motungha sa katapusang mga adlaw sama sa gamay nga bato nga “gipikas gikan sa bukid nga walay gigamit nga mga kamot.”³ Sa “walay gigamit nga mga kamot,” nagpasabut pinaagi sa balaanong panginlabut, ang Simbahan sa Ginoo modako hangtud nga

mopuno kini sa tibuok yuta, nga “dili gayud malumpag . . . [apan] molungtad sa walay katapusan.”⁴

Usa kini ka talagsaong saksi nga ang mga pulong ni Daniel nangatuman samtang ang mga miyembro sa Simbahan, gikan sa tibuok kalibutan, nagtan-aw ug naminaw sa komperensya karon.

Ang mapahinunguron nga si Apostol Pedro mihulagway sa “panahon sa pagtuman na sa tanan . . . sukad pa sa karaang kapanahonan.”⁵ Si Apostol Pablo misulat nga sa kahingpitan sa panahon, ang Dios “[mo]hiusa . . . diha kang Kristo sa tanang mga butang,”⁶ “si Jesukristo mao ang ulohang bato sa pamag-ang.”⁷ Ako mibati niadtong mga panagna sa hilabihan sa dihang miapil ko sa pagpahinungod sa Templo sa Rome Italy. Ang tanang propeta ug mga apostoles anaa didto nga nagpamatuod bahin ni Jesukristo, ang Manunubos sa kalibutan, sama kang Pedro ug Pablo. Ang Simbahan usa ka buhi nga ehemplo nianang restitusyon, mga kaigsoonan, ug ang atong mga miyembro mga saksi niadtong balaang mga panagna sa dugay nang panahon.

Si Jose sa Ehipto nanagna nga sa ulahing mga adlaw “usa ka manalagna ang pasanayon sa Ginoo nga akong Dios, kinsa mao ang usa ka pinili nga manalagna ngadto sa bunga sa akong mga kaliwat.”⁸ “Kay siya mobuhat sa buhat [sa Ginoo].”⁹ Si Joseph Smith, ang propeta sa Pagpahiuli, mao kana nga manalagna.

Si Juan ang Tigpadayag nanagna bahin sa usa ka anghel sa Labawng Makagagahum nga nagdala sa



North Salt Lake, Utah, USA



importanting mga elemento sa Pagpahiuli pinaagi niining mga pulong: “Ug nakita ko ang laing manulonda nga naglupad sa taliwala sa kalangitan, ug kini siya may gidalang walay katapusang maayong balita aron imantala ngadto sa mga nanagpuyo sa yuta, ug sa tanang kanasuran, ug kabanayan, ug pinulongan, ug katawhan.”¹⁰ Si Moroni mao kana nga anghel. Nakita niya ang atong panahon sigun sa narekord diha sa Basahon ni Mormon. Sa balik-balik nga pagpakita, iyang giandam si Joseph Smith alang sa iyang pangalagad, lakip na ang paghubad sa Basahon ni Mormon: Lain nga Tugon ni Jesukristo.

Ang ubang mga propeta nanagna sa atong panahon. Si Malaquias naghigot ni Elijah nga pabalikon “ang kasingkasing sa mga amahan ngadto sa mga bata, ug ang kasingkasing sa mga bata ngadto sa ilang mga amahan.”¹¹ Si Elijah miabut, ug isip resulta, karon kita adunay 168 ka templo nga makita sa tibuok yuta. Ang matag templo nagserbisyo sa takus nga mga miyembro nga naghimo og sagra-dong mga pakigsaad ug nagdawat og makapanalangin nga mga ordinansa alang sa ilang kaugalingon ug sa ilang namatay nga mga katigulangan. Kining sagrado nga buhat nga gihulagway ni Malaquias “mahinungdanon ngadto sa plano sa Tiglalang alang sa walay katapusan nga destinasyon sa Iyang mga anak.”¹²

Kita nagpuyo nianang gipanagna nga panahon; kita ang katawhan nga

gitahasan sa responsibilidad sa dili pa moabut ang Ikaduhang Pag-anhi ni Jesukristo; kita ang mopundok sa mga anak sa Dios, kadtong maminaw ug mohangup sa mga kamatuoran, mga pakigsaad, ug mga saad sa walay katapusang ebanghelyo. Si Presidente Nelson mitawag niini nga mao “*ang labing dakong* hagit, *ang labing dakong* kawsa, ug *ang labing dakong* buhat sa yuta karon.”¹³ Niana nga milagro ako mohatag sa akong pagsaksi.

Pinaagi sa pagsangun gikan ni Presidente Russell M. Nelson, pagka-Pebrero niining tuiga akong gipahinungod ang Templo sa Durban South Africa. Usa kadto ka adlaw nga akong mahinumduman sa tibuok nakong kinabuhi. Kauban nako ang mga miyembro nga mihangup sa ebanghelyo sama sa gipanagna ni Jeremias sa dugay nang panahon—“usa ka siyudad, ug duruha sa usa ka panimalay.”¹⁴ Ang doktrina ni Jesukristo naghiusa natong tanan—sa tibuok kalibutan—isip mga anak sa Dios, isip managsoon diha sa ebanghelyo. Bisan unsa pa ang atong panagway o sininaan, usa kita ka katawhan nga adunay Amahan sa Langit kansang plano gikan pa sa sinugdanan ug alang sa Iyang pamilya aron mahiusa pag-usab pinaagi sa paghimo ug pagtuman sa sagradong mga pakigsaad sa templo.

Ngadto sa gamay nga pundok sa mga naghupot sa pagkapari didto sa usa kaeskwelahan sa Kirtland, Ohio, niadtong 1834, si Propeta Joseph nanagna, “Gamay ra nga mga Priesthood ang inyong nakita karong

gabhiona, pero kini nga Simbahan molukop sa Amihanang ug Habagatang Amerika—molukop kini sa kalibutan.”¹⁵

Sa bag-ong katuigan nakabiyahe ko sa tibuok kalibutan aron mahimamat ang mga miyembro sa Simbahan. Ang akong mga Kaigsoonan sa Korum sa Napulog Duha adunay susama nga mga buluhaton. Sa gihapon, kinsa man ang makaapas sa iskedyl sa atong minahal nga propeta, si Presidente Nelson, kansang pagbiyahe sa iyang unang duha ka tuig isip Presidente sa Simbahan midala kaniya aron mahimamat ang mga Santos sa 32 ka nasud ug mga teritoryo sa U.S.¹⁶ aron mosaksi sa buhi nga Kristo.

Ako nahinumdom sa dihang nadawat nako ang akong mission call samtang batan-on pa. Gusto kong moserbisyo sa Germany, sama sa akong papa, igsoong lalaki, ug bayaw nga lalaki. Wala maghulat ni bisan kinsa nga makapauli, midali kog adto sa mailbox ug miabli sa call. Akong nabasa nga gitawag ko ngadto sa Eastern States Mission, nga ang ulohang buhatan anaa sa Siyudad sa New York. Nasagmuyo ko, busa misulod ko ug giabli ang akong mga kasulatan alang sa kahupayan. Nagsugod ko pagbasa sa Doktrina ug mga Pakigsaad: “Tanawa, ug sud-onga, Ako adunay daghan nga mga katawhan niini nga dapit, sa naglibut nga mga rehiyon; ug ang usa ka masangputon nga pultahan pagabuksan diha sa naglibut nga mga rehiyon niining silangan nga bahin sa yuta.”¹⁷ Kana nga panagna, nga gihatag ngadto ni Propeta Joseph Smith niadtong 1833, usa ka pagpadayag ngari nako. Nasayud ko nianang higayuna nga gitawag ko sa eksaktong misyon nga gusto sa Ginoo nga akong serbisuhan. Nagtudlo ko sa Pagpahiuli ug sa talagsaong sinugdanan niini sa dihang ang atong Amahan sa Langit namulong ngadto ni Joseph Smith ug miingon, “Kini mao ang Akong Hinigugmang Anak. Paminaw Kaniya!”¹⁸

Mahinungdanon alang sa tibuok Simbahan mao ang panagna ni Isaias, nga gihatag sobra na sa 700 ka tuig sa wala pa matawo si Jesukristo: “Ug mahinabo sa ulahing mga adlaw, ang bukid sa balay sa Ginoo pagatukuron sa ibabaw sa tumoy sa kabukiran, . . .

ug ang tanang mga nasud magagana-
yan ngadto kaniya.”¹⁹

Sa akong hunahuna karon, naghunahuna ko sa minilyon sa atong mga miyembro ug mga higala nga konektado niining mga kahimoan [proceedings] sa elektronik nga paagi pinaagi sa telebisyon, internet, o sa ubang pamaagi. Kita daw kaubang naglingkod “sa ibabaw sa tumoy sa kabukiran.”²⁰

Si Brigham Young kadtong namulong sa propetikanhong mga pulong nga “Kini ang tukma nga dapit.”²¹ Ang mga Santos, ang uban kanila kaugalingon nakong mga katigulangan nga pioneer, nagrabaho aron maestablisar ang Zion sa Rocky Mountains “pinaagi sa kabubut-on ug kahimuot Niya kinsa nagamando sa mga nasud sa yuta.”²²

Ako nagbarug karon sa sagradong luna nga nakadani og minilyon ka mga bisita. Niadtong 2002, ang Siyudad sa Salt Lake maoy mi-host sa Winter Olympic Games. Ang Tabernacle Choir nanganta sa pangbukas nga mga seremonya, ug ang Simbahan mitanyag og mga konsyerto ug mga programa alang sa mga bisita ug mga partisipante

gikan sa daghan kaayong mga nasud. Ako kanunay nga mahinumdom nga makita ang templo diha sa likod sa panggabii nga mga sibya sa mga balita sa tibuok kalibutan.

Sulod sa katuigan, ang mga presidente sa Estados Unidos, mga hari, mga huwes, mga prime minister, mga ambasadador, ug mga opisyaes gikan sa daghang dapit miabut sa Siyudad sa Salt Lake ug nahimamat ang atong mga lider. Si Presidente Nelson mi-host sa mga lider sa National Association for the Advancement of Colored People, usa ka organisasyon sa Estados Unidos nga mapasaligon sa parehas nga mga katungod nga walay diskriminasyon base sa kaliwat. Ako nahinumdom nga nagbarug tupad niining mga higala ug mga lider samtang si Presidente Nelson miapil kanila nga nanawagan alang sa mas dakong pagtahud ug panag-uyon sa mga kaliwatan dinhi sa kalibutan.²³

Daghan pa ang miabut sa Temple Square ug nakigtambag uban sa mga lider sa Simbahan. Pananglitan, sa miaging tuig, sa paghingalan lang og pipila, atong gi-welcome ang ika-68 nga Civil Society Conference sa United Nations, usa ka tibuok kalibutan nga panagtigum ug ang una nga nahitabo sa gawas sa Siyudad sa New York. Kita nakighimamat sa Committee for Religious Affairs sa Vietnam ug mga ambasadador gikan sa Cuba, sa Pilipinas, Argentina, Romania, Sudan, Qatar, ug Saudi Arabia. Kita mi-welcome usab sa secretary general sa Muslim World League.

Unsay akong gihulagway mao ang katumanan sa panagna ni Isaias nga sa katapusang mga adlaw, ang mga nasud moadto “sa bukid sa balay sa Ginoo.”²⁴ Ang nabantog nga Templo

sa Salt Lake nagbarug diha sa sentro nianang kahalangdon ug himaya.

Dili ang talan-awon ang nakadani sa mga tawo, bisan kon ang atong nahimutangan talagsaon; kini ang kahulugan sa putli nga relihiyon nga gipakita diha sa diwa, paglambo, kaayo, ug kamanggihatagon sa Ang Simbahan ni Jesukristo sa mga Santos sa Ulahing mga Adlaw ug sa katawhan niini; ang atong gugma sama sa paghigugma sa Dios; ang atong pasalig sa mas halangdon nga kawsa, nga gitawag ni Joseph Smith nga “[ang] kawsa ni Kristo.”²⁵

Kita wala masayud kon kanus-a mobalik ang Manluluwas, apan kita nasayud niini. Kita kinahanglang andam sa kasingkasing ug hunahuna, takus nga modawat Kaniya, ug dungganon nga mahimong kabahin sa tanang gipagnagna sa dugay na kaayong panahon.

Ako mopamatuod nga si Presidente Russell M. Nelson mao ang propeta sa Ginoo dinhi sa yuta, ug anaa sa iyang kiliran ang mga Apostoles nga gitwag sa Dios, gipaluyohan isip mga propeta, mga manalagna, ug mga tigpadayag. Ug, akong minahal nga kaigsoonan, ang Pagpahiuli nagpadayon.

Akong tapuson uban sa panagna ni Joseph Smith, mga pulong nga ako mopamatuod nga tinuod: “Walay dili balaan nga kamot ang makapugong sa buhat sa paglambo; mga pagpanggukod mahimong magkakusog, ang mga manggugubot mahimong maghiusa, mga kasundaluhan magpundok, mga pasangil mahimong modaot sa kadungganan, apan ang kamatuoran sa Dios magpadayon nga maisugon, halangdon ug gawasnon, hangtud nga kini makasulod sa matag yuta, makabisita sa matag dapit, molukop sa matag nasud, ug makasulti sa matag dunggan, hangtud ang mga katuyoan sa Dios matuman, ug ang Halangdong Jehova moingon nga ang buhat nahuman na.”²⁶ Ako mopamatuod nga kining mga panagna ni Joseph Smith nangatuman.

Ako mosaad nga sa inyong pagsunod sa dinasig nga tambag sa atong minahal nga propeta, si Presidente Russell M. Nelson, sa iyang mga magtatambag, sa mga Apostoles, ug sa ubang mga lider sa Simbahan, ug



Provo, Utah, USA

samtang mopatalinghug kamo sa karaang mga propeta nga nanagna sa atong panahon, kamo mapuno, sa kinauyukang bahin sa inyong kasingkasing ug kalag, sa diwa ug sa buhat sa Pagpahiuli. Ako mosaad kaninyo nga inyong makita ang kamot sa Dios diha sa inyong kinabuhi, makadungog sa Iyang mga pag-aghat, ug mobati sa Iyang gugma. Sa ngalan ni Jesukristo, uban sa pasalamat alang sa Pagpahiuli sa Iyang ebanghelyo ug sa Iyang Simbahan, agig ebidensya sa Iyang dili hitupngan nga gugma, amen. ■

MUBO NGA MGA SULAT

1. *Mga Pagtulun-an sa mga Presidente sa Simbahan: Joseph Smith* (2007), 623.
2. Isaias 29:14.
3. Daniel 2:45; tan-awa usab sa Doktrina ug mga Pakigsaad 65:2.
4. Daniel 2:44.
5. Mga Buhat 3:21.
6. Mga Taga-Efeso 1:10.
7. Mga Taga-Efeso 2:20.
8. 2 Nephi 3:6.
9. 2 Nephi 3:8.
10. Pinadayag 14:6.
11. Malaquias 4:6.
12. “Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145.
13. Russell M. Nelson, “Paglaum sa Israel” (tibuok kalibutan nga debosyonal sa kabatan-onan, Hunyo 3, 2018), HopeofIsrael.ChurchofJesusChrist.org.
14. Jeremias 3:14.
15. Joseph Smith, sa *Mga Pagtulun-an sa mga Presidente sa Simbahan: Wilford Woodruff* (2004), 27.
16. Tan-awa sa Valerie Johnson, “President Nelson Became the Prophet 2 Years Ago. What Has Happened Since Then?” *Church News*, Ene. 13, 2020, thechurchnews.com.
17. Doktrina ug mga Pakigsaad 100:3.
18. Joseph Smith—Kasaysayan 1:17.
19. Isaias 2:2; tan-awa usab sa Miqueas 4:1–2.
20. Isaias 2:2.
21. Ang hugpong sa mga pulong nga “Kini ang tukma nga dapit” ginaingon nga unang gigamit ni Brigham Young pinaagi ni Wilford Woodruff samtang namulong atol sa pagsaulog sa Adlaw sa mga Pioneer niadtong Hulyo 1880 (tan-awa sa “Pioneers’ Day,” *Deseret Evening News*, Hulyo 26, 1880, 2).
22. Brigham Young, Mar. 31, 1861, Historian’s Office reports of speeches, 1845–1885, Church History Library, Siyudad sa Salt Lake.
23. Tan-awa sa “First Presidency and NAACP Leaders Call for Greater Civility, Racial Harmony,” Mayo 17, 2018, newsroom.ChurchofJesusChrist.org.
24. Isaias 2:2; tan-awa usab sa Miqueas 4:1–2.
25. *Mga Pagtulun-an: Joseph Smith*, 426.
26. *Mga Pagtulun-an: Joseph Smith*, 167.



Ni Bonnie H. Cordon
Kinatibuk-ang Presidente sa Young Women

Aron Sila Makakita

Pangita ug pag-ampo alang sa mga oportunidad nga modan-ag ang inyong kahayag aron ang uban makakita sa dalan ngadto ni Jesukristo.

Mga kaigsoonan, ang atong mga kasingkasing napanalanginan ug nabag-o pinaagi sa Espiritu nga atong gibati niini nga komperensya.

Duha ka gatos ka tuig ang milabay, usa ka dako nga gilis sa kahayag mikunsad sa usa ka batan-ong lalaki sa kakahoyan. Niana nga kahayag, si Joseph Smith nakakita sa Dios nga Amahan ug sa Iyang Anak, si Jesukristo. Ang Ilang kahayag mitangtang sa espirituhanong kangitngit nga milukop sa yuta ug mipakita unsay buhaton ni Joseph Smith—ug kanta-tong tanan. Tungod sa kahayag nga gipadayag nianang adlaw, kita makadawat sa kahingpitan sa mga panalangin nga anaa pinaagi sa Pag-ula sa atong Manluluwas, si Jesukristo.

Pinaagi sa Pagpahiuli sa Iyang ebanghelyo, kita mobati sa kahayag sa atong Manluluwas. Apan, kana nga kahayag dili para kanimo ug kanako lamang. Si Jesukristo mitawag kanato “himoa nga ang inyong kahayag mohayag sa atubangan niini nga mga katawhan,

aron sila makakita sa inyong maayo nga mga buhat ug himayaon ang inyong Amahan kinsa anaa sa langit.”¹ Ganahan ko sa hugpong sa mga pulong nga “aron sila makakita.” Usa kini ka tinuoray kaayo nga imbitasyon gikan sa Ginoo nga mahimong mas matinguhaong motabang sa uban nga makakita sa dalan ug sa ingon niana moduol kang Kristo.

Dihang 10 anyos ko, ang among pamilya adunay oportunidad nga makaabi-abi ni Elder L. Tom Perry sa Korum sa Napulog Duha ka mga Apostoles sa among panimalay dihang siya na-assign sa among lungsod.

Hapit na ang gabii, ang among pamilya ug ang mga Perry milingkod sa sala aron mokaon sa lamian nga apple



Provo, Utah, USA

pie ni mama, samtang si Elder Perry nagsugilon bahin sa mga Santos sa tibook kalibutan. Ako nalingaw kaayo.

Gabii na dihang si mama mipaadto nako sa kusina ug nangutana og yano nga pangutana: “Bonnie, gipakaon na ba nimo ang mga manok?”

Ang akong kasingkasing nahugno; wala nako mapakaon ang mga manok. Di ko gustong mobiya sa atubangan sa usa ka Apostol sa Ginoo, misugyot ko nga ang mga manok pwede rang magpuasa hangtud sa buntag.

Ang akong inahan mitubag og dili malalis nga “dili.” Sa dihang, si Elder Perry misulod sa kusina ug sa iyang kusog, madasigong tingog nangutana, “Nakadungog ba ko nga dunay nagkinahanglan og tabang sa pagpakaon sa mga manok? Mahimo bang ako ug ang akong anak motabang nimo?”

Kadakong kalipay na karon ang pagpakaon sa mga manok! Ako midagan aron kuhaon ang among dako nga flashlight. Naghinam-hinam, naguna ko, naglukso-lukso sa agianan padulong sa tangkal sa manok. Samtang ang akong kamot nagwara-wara sa flashlight, mitabok mi sa kamaisan ug katrigohan.

Pag-abot sa gamayng irigasyon nga kanal nga nagtabok sa agianan, milayat dayon ko niini nga kasa-garan nakong buhaton sa miaging mga gabii. Wala ko makabantay sa mga paningkamot ni Elder Perry nga makaapas sa mangitngit, dili sinati nga agianan. Ang akong galabyog-labyog nga suga wala makatabang nga iyang makita ang kanal. Kay walay permanenting hayag nga makita, siya nadi-retso og katunob sa tubig ug kusog kaayo nga mi-agulo. Nakuyawan, milingi ko sa akong bag-ong higala nga mibira sa iyang basa nga tiil gikan sa kanal ug mitaktak sa tubig gikan sa iyang bug-at nga panit nga sapatos.

Sa nahumol ug puno pa sa tubig nga sapatos, si Elder Perry mitabang nako sa pagpakaon sa mga manok. Dihang human na mi, mapinangaon siyang mitudlo, “Bonnie nagkinahanglan ko nga makakita sa agianan. Ako nagkinahanglan sa suga nga modan-ag sa akong gilaktan.”

Akong gipadan-ag ang akong suga apan wala sa paagi nga makatabang ni Elder Perry. Karon, nasayud nga nagkinahanglan siya sa kahayag aron luwas nga makalakaw sa agianan, akong gipunting ang flashlight unahan sa iyang mga lakang ug masaligon kaming nakauli.

Minahal kong mga kaigsoonan, sulod sa daghang mga tuig ako namalandong sa baruganan nga akong nakat-unan gikan kang Elder Perry. Ang pagdapit sa Ginoo nga ang atong kahayag ipadan-ag dili lamang usa ka pinasulagma nga pagwara-wara sa kahayag ug mohimo sa kalibutan nga mas hayag. Kini mao ang pagpunting sa atong kahayag aron ang uban makakita sa dalan ngadto kang Kristo. Kini mao ang pagpundok sa Israel *niini nga habig sa tabil*—ang pagtabang sa uban nga makita ang sunod nga ang-ang padulong sa paghimo ug pagtuman sa mga pakigsaad uban sa Dios.²

Ang Manluluwas mipamatuod, “Tan-awa Ako mao ang kahayag; Ako nagpakita og usa ka panig-ingnan alang kaninyo.”³ Atong tan-awon ang usa sa Iyang mga ehemplo.

Ang babaye sa atabay usa ka Samaritanhon kinsa wala makaila ni Jesukristo ug giisip sa kadaghanan nga usa ka sinalikway sa iyang katilingban. Si Jesus nakigkita niya ug nakig-istorya. Siya misulti niya bahin sa tubig. Siya dayon migiya kaniya ngadto sa nagkadako nga kahayag samtang namahayag nga Siya Mismo ang “buhi nga tubig.”⁴

Si Kristo sa manggiloy-ong paagi nahibalo mahitungod kaniya ug sa iyang mga panginahanglan. Iyang nahimamat ang maong babaye ug misugod sa pag-istorya mahitungod sa usa ka butang nga pamilyar ug komon kaniya. Kon Siya mihunong sa diskusyon niana nga punto, tingali usa kaha unta kadto ka positibo nga paghimamat. Apan dili kadto more-sulta sa iyang pag-adto sa siyudad sa pagpahayag, “Umari kamo, tan-awa, . . . : mao ba kaha kini ang Cristo?”⁵ Sa hinay-hinay, pinaagi sa pag-istoryahanay, siya nakaila ni Jesukristo, ug bisan pa sa iyang kaagi,

siya nahimong usa ka instrumento sa kahayag, midan-ag sa dalan alang sa uban aron sila makakita.⁶

Karon atong tan-awon ang duha ka tawo nga misunod sa ehemplo sa Manluluwas sa pagdan-ag sa kahayag. Bag-uhay lang ang akong amigo nga si Kevin naglingkod tapad sa usa ka business executive atol sa usa ka panihapon. Siya nabalaka unsay i-istorya sulod sa duha ka oras. Misunod sa usa ka pag-aghat, si Kevin nangutana, “Sultihi ko bahin sa imong pamilya. Diin sila gikan?”

Ang lalaki gamay ra og nahibaloan bahin sa iyang kagikan, maong si Kevin mikuha sa iyang selfon, misulti, “Aduna koy app nga mosumpay sa mga tawo ngadto sa ilang mga pamilya. Atong tan-awon unsay atong makit-an.”

Human sa taas nga panaghisgut, ang bag-o nga amigo ni Kevin nangutana, “Nganong ang pamilya importante kaayo sa inyong simbahan?”

Si Kevin mitubag og yano, “Kami nagtuo nga kita magpadayon sa pagpakabuhi human kita mamatay. Kon atong mailhan ang atong mga katigulangan ug modala sa ilang mga ngalan ngadto sa sagradong lugar nga gitawag og templo, kita makahimo og mga ordinansa sa kaminyoon aron magkauban ang atong mga pamilya bisan human sa kamatayon.”⁷

Si Kevin nagsugod og usa ka butang nga siya ug ang iyang bag-ong higala anaay kapareha. Siya nakakita og paagi aron makapamatuod sa kahayag ug gugma sa Manluluwas.

Ang ikaduha nga istorya bahin ni Ella, usa ka magdudula sa basketball sa kolehiyo. Ang iyang ehemplo nagsugod dihang nadawat niya ang iyang mission call samtang layo sa eskwelahan. Siya mipili sa pag-abli sa iyang tawag [call] atubangan sa iyang team. Sila halos walay nahibaloan bahin sa Simbahan ni Jesukristo ug wala makasabot sa tinguha ni Ella nga moserbisyo. Siya mibalik-balik sa pag-ampo aron mahibalo unsaon sa pagpasabot sa iyang mission call sa paaging mabati sa iyang mga kauban ang Espiritu. Ang iyang tubag?

“Ako mihimo og PowerPoint,” si Ella miingon, “kay ako kalma lang gyud.”



Iya silang gisultihan bahin sa potensyal sa pagserbisyo sa usa sa sobra sa 400 ka mga mission ug posible nga magkat-on og usa ka linggwahe. Iyang gihisgutan ang liboan ka mga misyonaryo nga nagserbisyo. Si Ella mitapos sa pagpakita sa hulagway sa Manluluwas ug niining mubo nga pagpamatuod: “Ang basketball usa sa labing importanting mga butang sa akong kinabuhi. Ako mibiyahe sa tibuok nasud ug gibiyaan ang akong pamilya aron modula alang niini nga coach ug uban niini nga team. Ang duha lamang ka butang nga mas importante nako gawas sa bastkeball mao ang akong pagtuo ug akong pamilya.”⁸

Karon, pananglit kamo naghunahuna, “Kini mga talagsaong tag-1,000-watt nga mga ehemplo, apan ako usa ka 20-watt nga bombilya,” hinumdumi ang Manluluwas nagpamatuod, “Ako mao ang kahayag diin kamo mopakita.”⁹

Siya mipahinumdum nato nga Iyang ipakita ang kahayag kon kita motabang sa uban nga moduol Kaniya.

Kamo ug ako dunay igong kahayag nga ikapaambit *karon*. Kita makahayag sa sunod nga lakang aron makatabang sa usa ka tawo nga mapaduol kang Jesukristo, ug dayon sa sunod nga lakang, ug sa sunod.

Pangutan-a ang imong kaugalingon, “Kinsa ang nagkinahanglan sa imong kahayag aron makit-an ang agianan nga ilang gikinahanglan apan dili makakita?”

Minahal kong mga higala, nganong ang pagpadan-ag sa atong kahayag importante? Ang Ginoo misulti kanato nga “aduna pay daghan sa ibabaw sa yuta . . . kinsa natago gikan sa kamatuoran tungod kay sila wala masayud asa kini pangitaa.”¹⁰ Kita makatabang. Mahimo natong tuyoon ang pagdan-ag sa atong kahayag aron

ang uban makakita. Kita makadapit.¹¹ Kita mahimong molakaw sa panaw uban niadtong nagbuhat og lakang padulong sa Manluluwas, bisan pa og dili komportable. Kita makahimo nga atong pundukon ang Israel.

Ako mopamatuod ang Ginoo mopadako sa matag gagmay nga paningkamot. Ang Espiritu Santo moaghat nato sa pagkahibalo unsa ang atong isulti ug buhaton. Kana nga mga pagsulay mahimong magkinahanglan sa atong pagbuhat og mga butang nga dili komportable, apan kanunay kitang makasiguro nga ang Ginoo motabang sa atong kahayag nga modan-ag.

Mapasalamaton kaayo ko sa kahayag sa Manluluwas, nga nagpadayon sa pagpangulo niining Simbahan pinaagi sa pagpadayag.

Ako nagdapit natong tanan sa pagsunod sa ehemplo ni Jesukristo ug sa manggiloy-ong paagi magpakabana niadtong anaa sa atong palibot. Pangita ug pag-ampo alang sa mga oportunidad nga modan-ag ang inyong kahayag aron ang uban makakita sa dalan ngadto ni Jesukristo. Ang Iyang saad halangdon: “Siya nga magasunod kanako dili gayud magalakaw sa kangitngit, hinonoa magabaton siya sa kahayag nga magahatag og kinabuhi.”¹² Ako mopamatuod nga ang atong Manluluwas, si Jesukristo, mao ang dalan, kamatuoran, kinabuhi, kahayag, ug gugma sa kalibutan. Sa ngalan ni Jesukristo, amen. ■

MUBO NGA MGA SULAT

1. 3 Nephi 12:16.
2. Tan-awa sa Russell M. Nelson “Hope of Israel” (tibuok kalibutan nga debosyonal sa kabatan-onan, Hunyo 3, 2018), *HopeofIsrael.ChurchofJesusChrist.org*.
3. 3 Nephi 18:16.
4. Tan-awa sa Juan 4:9–30.
5. Juan 4:29.
6. Tan-awa sa Robert ug Marie Lund, “Ang Pagtahud sa Manluluwas para sa mga Babaye,” *Liahona*, Mar. 2015, 32–36.
7. Personal nga pakigsinulatay.
8. Personal nga pakigsinulatay.
9. 3 Nephi 18:24.
10. Doktrina ug mga Pakigsaad 123:12.
11. Tan-awa sa Dieter F. Uchtdorf, “Misionaryo nga Buhat: Pagpakigbahin sa Unsay Anaa sa Inyong Kasingkasing,” *Liahona*, Mayo 2019, 15–18.
12. Juan 8:12.



Ni Elder Jeffrey R. Holland
Sa Korum sa Napulog Duha ka mga Apostoles

Usa ka Hingpit nga Kahayag sa Paglaum

Tungod kay ang Pagpahiuli mipamatuod sa sukaranang kamatuoran nga ang Dios tinuod nga naglihok niini nga kalibutan, kita mahimong molaum, kita kinahanglang molaum, bisan kon nag-atubang sa labing malisud nga mga kalisdanan.

Sa miaging Oktubre, gidapit kita ni Presidente Russell M. Nelson sa *paglantaw* niining komperensya sa Abril 2020 pinaagi sa atong tagsa-tagsa nga paglingi sa *nangagi* aron makita ang gahum sa kamot sa Dios diha sa pagpahiuli sa ebanghelyo ni Jesukristo. Si Sister Holland ug ako seryusong midawat nianang propetikanhong pagdapat. Among gihanduraw nga nagpu-yo kami sa sayong bahin sa mga 1800, nagsusi sa relihiyusong mga tinuohan sa maong panahon. Nianang gihanduraw nga kahimtang, nangutana mi sa among kaugalingon, “Unsa may kulang dinhi? Unsay atong gipangandoy nga duna unta kita? Unsay atong *gilauman* nga ihatag sa Dios agig tubag sa atong espirituhanong pangaliya?”

Usa ka butang, nakaamgo mi nga duha ka siglo ang milabay maglaum gayud kaha unta kami sa pagpahiuli sa mas tinuod nga konsepto bahin sa Dios kay sa gituohan sa kadaghanan niadtong panahona, diin Siya daw gisalipdan sa gatusan ka tuig nga mga sayop ug walay pagsinabtanay.

Hulamon nako ang mga pulong ni William Ellery Channing, usa ka inilang relihiyusong tawo niadtong panahona, kita unta molantaw sa “maamumahon nga kinaiya sa Dios,” nga gikonsiderar ni Channing nga mao “ang unang mahinungdanong doktrina sa Kristiyanismo.”¹ Ang maong doktrina moila unta sa Dios nga usa ka mapinanggaong Amahan sa Langit, kay sa usa ka bangis nga maghuhusga nga mopaluwat og hingpit nga hustisya o usa ka agalon nga kaniadto aktibong miapil sa paggiya dinhi sa yuta apan karon nalinga na sa mga butang sa laing kalibutan.

Oo, ang among mga gilauman sa 1820 mao unta ang pagkaplag sa Dios nga nakigsulti ug naggiya pareho ka dayag karon sama sa Iyang gibuhad sa unang panahon, usa ka tinuod nga Amahan, sa labing mahigugmaong mithi niana nga pulong. Siya siguradong *dili* gayud ang walay pagbati nga tigmando kinsa mipili og pipila lang ka tawo nga luwason ug dayon ang nahabiling tawhanong pamilya itagana

alang sa kalaglagaan. Dili, Siya mao ang binuhad kansang matag lihok, pinaagi sa balaang pamahayag, gihimo “alang sa kaayohan sa kalibutan; kay siya naghigugma sa kalibutan”² ug sa tanan nga lumulupyo niini. Kana nga gugma mao ang Iyang pinakadakong rason nga gipadala si Jesukristo, ang Iyang Bugtong Anak, dinhi sa kalibutan.³

Kabahin ni Jesus, kon nagpuyo pa unta kami niadtong unang katuigan sa ika-19 nga siglo, nakaamgo unta kami uban sa dakong kahingawa nga ang mga pagduda sa pagkatinuod sa kinabuhi sa Manluluwas ug sa Pagkabanhaw nagsugod na sa paggamot panahon sa Kakristiyanohan. Busa, maglaum kaha unta kami nga adunay moabut nga ebidensya sa tibuok kalibutan nga mopamatuod sa biblikanhong pagsaksi nga si Jesus *mao* ang Kristo, ang Anak mismo sa Dios, Alpha ug Omega, ug ang bugtong Manunubos nga mailhan niining kalibutan. Apil unta sa among labing kinasingkasing nga mga gilauman nga moabut ang laing ebidensya base sa kasulatan, butang nga mahimong laing tugon ni Jesukristo, nga mopadako ug mopalapad sa among kahibalo sa Iyang milagroso nga pagkatawo, talagsaong pagpangalagad, maulaong sakripisyo, ug mahimayaong Pagkabanhaw. Sa tinuod ang maong dokumento mao ang “pagkamatarung . . . [nga gipakana-og] gikan sa langit; ug kamatuoran [nga gipadala] gikan sa yuta.”⁴

Sa pagpaniid sa Kristohanong kalibutan nianang panahona, maglaum kaha unta kami nga makakaplag og tawo nga tugotan sa Dios nga may tinuod nga katungod sa pagkapari nga mobunyag namo, mohatag sa gasa sa Espiritu Santo, ug mopahigayon sa tanang mga ordinansa sa ebanghelyo nga gikinahanglan alang sa kahimaya-an. Niadtong 1820, maglaum kaha unta kami nga makita ang katumanan sa makaagni nga mga saad ni Isaias, Miqueas, ug ubang karaang mga propeta kabahin sa pagbalik sa harianong balay sa Ginoo.⁵ Maghinamhinam kaha unta kami nga makakita sa himaya sa balaan nga mga templo nga matukod pag-usab, uban sa Espiritu,




mga ordinansa, gahum, ug katungod sa pagtudlo sa mahangturong mga kamatuoran, pag-ayo sa personal nga mga samad, ug pagbugkos sa mga pamilya sa kahangturan. Mangita kaha unta ako bisan asa og tawo nga adunay katungod sa pagsulti ngari kanako ug sa akong minahal nga Patricia nga ang among kaminyoon sa ingon niana nga kahimtang gibugkos alang sa karon ug sa kahangturan, nga dili na gayud makadungog o makadawat sa makahamok nga tunglo nga “hangtud ang kamatayon mobulag kaninyo.” Ako nasayud nga “sa balay sa [atong] Amahan anaay daghang puy-anan,”⁶ apan, para kanako, kon maswertehan man ako nga makapanunod sa usa niana, kana para kanako walay kalainan sa gubaon nga payag kon si Pat ug ang akong mga anak dili nako makauban aron mag-ambit nianang panulundon. Ug alang sa among mga katigulangan, ang uban nabuhi ug namatay sa karang panahon nga wala gani makadungog sa ngalan ni Jesukristo, maglaum

kaha unta kami nga mahiuli ang labing makiangayon ug maloloy-on nga biblikanhong konsepto—ang naandang buhat sa mga buhi sa paghalad og makaluwas nga mga ordinansa alang sa nangamatay na nila nga kaliwatan.⁷ Walay naandan nga buhat nga akong mahunahuna nga labawng makapakita sa kaanindot sa pagpakabana sa usa ka mahigugmaong Dios alang sa tanan Niyang mga anak sa kalibutan dili igspayan kon kanus-a man sila nabuhi ug bisan diin sila namatay.

Nan, ang among lista sa mga gilauman sa 1820 mahimong daghang pa, apan tingali ang pinakaimportante nga mensahe sa Pagpahiuli mao nga ang ingon nga mga gilauman *wala* unta makawang. Nagsugod didto sa Sagra-dong Kakahoyan ug

nagpadayon hangtud karon, kining mga pangandoy nagsugod sa pagkatumang ug nahimo, sama sa gitudlo ni Apostol Pablo ug sa uban, tinuod nga sinipit sa kalag, sigurado ug lig-on.⁸ Ang kanhi nga gilauman lang karon nahimo na nga kasaysayan.

Mao kana ang atong paglingi sa 200 ka tuig nga kaayo sa Dios ngadto sa kalibutan. Apan unsa man ang atong paglantaw sa unahan? Aduna pa kitay mga gilauman nga *wala* pa matuman. Gani samtang kami namulong, kita nakiggubat sa COVID-19 maong “tanang kinahanglang motabang,” usa ka ligdong nga pahinumdom nga ang usa ka bayrus⁹ nga liboan ang kagamay kay sa lugas sa balas¹⁰ makapaluhod sa tibuok nga mga populasyon ug tibuok kalibutang ekonomiya. Atong giampo kadtong nawad-an og mga minahal sa kinabuhi niining moderno nga hampak, ingon man niadtong kasamtangang natakbuyan o anaa sa peligro. Kita sa tinuod nag-ampo alang niadtong naghatag og talagsaon nga pag-atiman alang sa kahimsug. Kon ato na kining mabuntog—ug mahimo nato kini—hinaut nga parehas kitang mopsalig sa pagluwas sa kalibutan gikan sa bayrus sa kagutom, pagluwas sa mga kasilinganan ug kanasuran gikan sa bayrus sa kakabus. Hinaut nga kita maglaum og mga eskwelahan diin ang mga estudyante tudloan—dili mahadlok nga pusilon—ug alang sa gasa sa personal nga dignidad sa matag anak sa Dios, nga dili mahugawan sa *bisan unsa* nga matang sa paghusga sa kagikan, kaliwatan, o relihiyon. Luyo niining tanan mao ang atong walay hunong nga paglaum alang sa mas



Taboão de Serra, São Paulo, Brazil

dakong debosyon ngadto sa duha ka labing dagko sa tanang mga sugo: paghigugma sa Dios pinaagi sa pagtuman sa Iyang tambag ug paghigugma sa atong mga silingan pinaagi sa pagpakita og kaayo ug kalooy, pasensya ug pagpasaylo.¹⁰ Kining duha ka dagkong mando sa gihapon—ug sa kanunay—mao lang ang bugtong tinuod natong paglaum aron mahatagan ang atong mga anak og mas maanindot nga kalibutan kay sa ilang nailhan karon.¹¹

Dugang sa pagbaton niining tibuok kalibutan nga mga tinguha, daghan dinhi sa nanambong karon adunay lawom nga personal nga mga gilauman: paglaum nga molambo ang kaminyoon, o usahay paglaum nga maminyo lang; paglaum nga mabuntog ang pagkaadik; paglaum nga mobalik ang nahisalaag nga anak; paglaum nga mahunong ang hilabihan kadaghang emosyonal ug pisikal nga mga kasakit. Tungod kay ang Pagpahiuli mipamatuod sa sukaranang kamatuoran nga ang Dios tinuod nga naglihok niini nga kalibutan, kita *mahimong* molaum, kita *kinahanglang* molaum, bisan kon nag-atubang sa labing mali-sud nga mga kalisdanan. Mao kana ang gipasabot sa kasulatan dihang si Abraham milaum bisan sa diha nga dili na unta angayang molaum¹²—mao nga, siya mituo bisan sa tanang rason nga *dili* angayang motuo—nga siya ug si Sara makaanak bisan kon murag imposible kaayo kadto nga mahitabo. Busa, mangutana ko, “Kon daghan sa atong mga gilauman sa 1820 nag-anam og katuman uban sa usa ka bidlisiw sa langitnong kahayag ngadto sa usa ka yano nga batan-on nga nag-ampo sa kakahoyan sa amihanang bahin sa New York, nganong dili man kita molaum nga ang matarung nga mga tinguha ug Kristohanong mga pangan-doy mahimo gihapong matubag sa Dios sa tanang paglaum sa talagsaon, milagroso nga paagi?” Kitang tanan kinahanglan nga motuo nga kon unsa man ang atong gitinguha diha sa katarung sa umaabot, sa ubang paagi, maato ra gihapon.

Mga kaigsoonan, nasayud kita unsa ang pipila sa mga relihiyoso nga

kakulangan sa sayong bahin sa ika-19 nga siglo. Dugang pa, nahibalo kita bahin sa relihiyosong mga pagkulang karon hinungdan nga ang kagutom ug paglaum sa uban wala gihapon matubag. Kita nasayud nga daghan nianang kakulang sa katagbawan nagpahilayo sa uban gikan sa naandan nga ekliyasstikanhong mga institusyon. Kita usab nasayud, sama sa gisulat sa nasagmuyo nga manunulat, nga “daghang mga lider sa relihiyon [niadtong panahon] daw walay nahibaloan” sa pagtubag niining pagkunuhod, mihatag og “lasaw nga tambal sa espiritu, kaaktibo sa kawsa nga walay bili, pagsulti og dili maayo nga gilitok sa paagi nga morag maayo pamina-won, [o usahay kana lang] pagyawit og walay pulos nga butang”¹³—ug kanang tanan nahitabo sa panahon nga ang kalibutan nagkinahanglan og mas daghan pa, dihang ang bag-ong henerasyon angayang makadawat og mas daghan pa, ug dihang sa panahon ni Jesus Iyang gitanyag kay mas daghan pa. Isip mga disipulo ni Kristo, kita sa atong panahon mahimong molabaw pa sa karaang Israel kinsa mituaw “Ang among mga bukog nangauga, ug ang among paglaum nawagtang.”¹⁴ Sa tinuod, kon kita sa katapusan mawad-an og pagla-um, mawala ang atong katapusang makapalahutay nga bahandi. Didto sa ganghaan mismo sa impyerno nga gisulat ni Dante ang pasidaan sa tanang nagpanaw pinaagi sa iyang *Divina Commedia*: “Biyai ang tanang paglaum,” siya miingon, “kamo nga mosulod dinhi.”¹⁵ Tinuod nga kon mawala ang paglaum, ang mahabilin kanato mao lamang ang nagdilaab nga impyerno sa atong palibot.

Busa, kon ang atong buko-buko nasampig na sa paril ug, sama sa giingon sa himno, “kon napakyas ang uban pagtabang,”¹⁶ usa sa atong labing gikinahanglan nga hiyas mao kining bililhon nga gasa sa paglaum nga dili gayud mabulag sa atong pagtuo sa Dios ug sa atong gugma sa uban.

Niining duha ka siglo nga anibersaryo, kon kita molingi sa unsay tanang nadawat nato ug magmaya sa

pagkaamgo sa daghan nga gilauman nga natuman, akong ipalanog ang sentimento sa matahum nga batan-on nga sister missionary kinsa misulti kanamo didto sa Johannesburg pipila ka bulan ang milabay, “[Kita] wala moabut niining gilay-ona aron igo lang mohunong dinhi.”¹⁷

Gamit ang kaugalingong mga pulong sa usa sa labing makapadasig nga mga panamilit nga natala sukad sa kasulatan, ako mosulti duyog ni propeta Nephi ug nianang batan-on nga sister:

“Akong hinigugma nga mga kaigsoonan [ug mga sister], human kamo [makadawat niining unang mga bunga sa Pagpahiuli], ako mangutana kon ang tanan natuman ba? Tan-awa, ako moingon nganha kaninyo, Wala. . . .

. . . Kamo kinahanglan gayud mopadayon sa unahan uban ang pagkamakanunayon kang Kristo, *magbaton sa usa ka hingpit nga kahayag sa paglaum*, ug usa ka gugma sa Dios ug sa tanan nga mga tawo. . . . Kon kamo mopadayon[,] . . . miingon ang Amahan: Kamo makabaton og kinabuhi nga dayon.”¹⁸

Ako nagpasalamat, akong mga kaigsoonan ug mga sister, sa tanan nga gihatag kanato niining katapusan ug pinakamahinungdanon sa tanang dispensasyon, ang dispensasyon sa gipahiuli nga ebanghelyo ni Jesukristo. Ang mga gasa ug mga panalangin nga modagayday gikan niana nga ebanghelyo mahinungdanon kaayo para kanako—ang tanan—busa sa tinguha nga magpasalamat sa akong Langitnong Amahan alang niini, ako adunay “mga saad nga tumanon, ug mga milya nga pagalakton sa dili pa ako matulog, ug mga milya nga pagalakton sa dili pa ako matulog.”¹⁹ Hinaut nga kita mopadayon sa unahan nga adunay gugma sa atong mga kasingkasing, maglakaw diha sa “kahayag sa paglaum”²⁰ nga modan-ag sa dalan sa balaanon nato nga pagpaabot sulod sa 200 ka tuig na karon. Ako mopamatuod nga ang umaabot mahimong puno sa mga milagro ug buhong sa mga panalangin sama sa nangagi. Anaa kanato ang tanan nga

rason nga molaum sa mga panalangin gani mas dagko kay sa ato nang nadawat tungod kay kini mao ang buhat sa Labawng Makakagahum nga Dios, kini ang Simbahan nga adunay padayon nga pagpadayag, kini ang ebanghelyo sa walay kinutuban nga grasya ug kaayo ni Kristo. Ako mosaksi sa tanan niining mga kamatuoran ug sa mas daghan pa sa ngalan ni Jesukristo, amen. ■

MUBO NGA MGA SULAT

1. “The Essence of the Christian Religion,” sa *The Works of William E. Channing* (1888), 1004.
2. 2 Nephi 26:24.
3. Tan-awa sa Juan 3:16–17.
4. Moises 7:62.
5. Tan-awa sa Isaias 2:1–3; Ezequiel 37:26; Miqueas 4:1–3; Malaquias 3:1.
6. Juan 14:2.
7. Tan-awa sa 1 Mga Taga-Corinto 15:29; Doktrina ug mga Pakigsaad 128:15–17.
8. Tan-awa sa Mga Hebreohanon 6:19; Ether 12:4.
9. Tan-awa sa Na Zhu and others, “A Novel Coronavirus from Patients with Pneumonia in China, 2019,” *New England Journal of Medicine*, Feb. 20, 2020, 727–33.
10. Tan-awa sa “Examination and Description of Soil Profiles,” sa *Soil Survey Manual*, ed. C. Ditzler, K. Scheffe, ug H. C. Monger (2017), nrnc.usda.gov.
11. Tan-awa sa Mateo 22:36–40; Marcos 12:29–33; tan-awa usab sa Levitico 19:18; Deuteronomio 6:1–6.
12. Tan-awa sa Ether 12:4.
13. Tan-awa sa Mga Taga-Roma 4:18.
14. R. J. Snell, “Quiet Hope: A New Year’s Resolution,” *Public Discourse: The Journal of the Witherspoon Institute*, Dis. 31, 2019, thepublicdiscourse.com.
15. Ezequiel 37:11.
16. Kini mao ang hugpong sa mga pulong nga sa kasagaran gihubad. Hinoon, ang mas literal nga hubad mao ang “Tanang paglaum biyai, kamo kinsa mosulod dinhi” (Dante Alighieri, “The Vision of Hell,” sa *Divine Comedy*, gihubad ni Henry Francis Cary [1892], canto III, linya 9).
17. “Ubani Akol!” *Mga Himno*, nu. 97.
18. Judith Mahlangu (multistake nga komperensya duol sa Johannesburg, South Africa, Nob. 10, 2019), sa Sydney Walker, “Elder Holland Visits Southeast Africa during ‘Remarkable Time of Growth,’” *Church News*, Nob. 27, 2019, thechurchnews.com.
19. 2 Nephi 31:19–20; emphasis gidugang.
20. “Stopping by Woods on a Snowy Evening,” mga linya 14–16, sa *The Poetry of Robert Frost: The Collected Poems*, ed. Edward Connery Lathem (1969), 225.
21. 2 Nephi 31:20.



Ni Elder David A. Bednar
Sa Korum sa Napulog Duha ka mga Apostoles

“Himoa Kini nga Balay nga Matukod ngadto sa Akong Ngalan” (Doktrina ug mga Pakigsaad 124:40)

Ang mga pakigsaad nga nadawat ug ang mga ordinansa nga gipahigayon diha sa mga templo mahinungdanon sa pagbalaan sa atong mga kasingkasing ug alang sa kinatas-ang paghimaya sa mga anak sa Dios.

Sa Sagradong Kakahoyan 200 ka tuig na ang milabay, ang batan-ong si Joseph Smith nakakita ug nakig-istorya sa Dios, ang Amahan sa Kahangturan, ug sa Iyang Anak, si Jesukristo. Gikan Kanila, nakakat-on si Joseph sa tinuod nga kinaiya sa Dios nga Kapangulohan ug sa nagpadayong pagpadayag samtang kining balaanong panan-awon misugod sa “kapaigoan sa kahingpitan sa mga panahon” sa ulahing mga adlaw.¹

Paglabay sa mga tulo ka tuig, agig tubag sa matinud-anong pag-ampo niadtong gabii sa Septyembre 21, 1823, ang lawak ni Joseph nalukop sa kahayag hangtud nga kini “sama na sa udtong-tutok.”² Usa ka personahe ang mitungha sa kiliran sa iyang higdaanan, misangpit sa ngalan sa batan-ong lalaki, ug miingon nga “siya usa ka sinugo nga gipadala gikan sa

atubangan sa Dios . . . ug nga ang iyang ngalan mao si Moroni.”³ Siya mitudlo ni Joseph mahitungod sa pagtungha sa Basahon ni Mormon.

Ug dayon si Moroni mikutlo gikan sa basahon ni Malaquias sa Daang Tugon, nga may gamayng kausaban diha sa pinulongan nga gigamit sa Bersyon sa King James:

“Tan-awa, Ako mopadayag nganha kaninyo sa Pagkapari, pinaagi sa kamot ni Elijah ang propeta, sa dili pa moabut ang mahinungdanon ug makalilisang nga adlaw sa Ginoo. . . .

“Ug siya motanom sa mga kasingkasing sa mga anak sa mga saad nga gihimo ngadto sa mga amahan, ug ang mga kasingkasing sa mga anak mobati ngadto sa ilang mga amahan. Kon dili pa ingon niini, ang tibuok kalibutan pagalaglagon sa hingpit sa iyang pag-abut.”⁴

Sa importanting paagi, ang instruksyon ni Moroni ngadto ni Joseph Smith mahitungod sa misyon ni Elijah mipasiugda sa buhat sa templo ug family history sa ulahing mga adlaw ug usa ka importanting elemento sa pagpahiuli sa “tanang gisulti sa Dios pinaagi sa baba sa iyang mga balaang propeta sukad pa sa karaang kapanahonan.”⁵

Ako mag-ampo alang sa tabang sa Espiritu Santo samtang dungan kitang magkat-on mahitungod sa mga pakigsaad, mga ordinansa, ug mga panalangin nga maanaa kanato diha sa mga templo sa Ang Simbahan ni Jesukristo sa mga Santos sa Ulahing mga Adlaw.

Ang Pagbalik ni Elijah

Ako mosugod pinaagi sa usa ka sukaranang pangutana: nganong importante man ang pagbalik ni Elijah?

“Kita nakakat-on gikan sa pagpadayag sa ulahing mga adlaw nga si Elijah naghupot sa gahum sa pagbugkos sa Melchizedek nga Pagkapari”⁶ ug “mao ang katapusan nga propeta nga naghi-mo sa ingon sa wala pa ang panahon ni Jesukristo.”⁷

Si Propeta Joseph Smith mipasabut: “Ang espiritu, gahum, ug tawag ni Elijah mao, nga kamo adunay gahum sa paghupot sa yawe sa . . . *kahingpit-an sa Melchizedek nga Pagkapari* . . . ; ug sa . . . pagdawat . . . sa tanang mga ordinansa nga anaa sa gingharian sa Dios, gani ngadto sa pagbalik sa mga kasingkasing sa mga amahan ngadto sa mga anak, ug ang mga kasingkasing sa mga anak ngadto sa mga amahan, gani bisan kadtong didto sa langit.”⁸

Kining sagradong awtoridad sa pagsilyo gikinahanglan aron ang “bisan unsay imong pagabugkuson dinhi sa yuta, didto sa langit pagailhon kini nga binugkos; ug bisan unsay imong pagaluagan dinhi sa yuta, didto sa langit pagailhon kini nga linuagan.”⁹

Si Joseph dugang nga miklaro: “Sa unsang paagi nga ang Dios moabut aron pagtubos niini nga henerasyon? Siya mopadala ni Elijah ang propeta. . . . Si Elijah mopadayag gayud sa mga pakigsaad aron pagsilyo sa mga kasingkasing sa mga amahan ngadto



ELIJAH RESTORING THE KEYS OF THE SEALING POWER OF THE PRIESTHOOD TO ELIJAH AND OLIVER COWDERY IN THE TEMPLE, BY ROBERT T. BARRETT

sa mga anak, ug ang mga anak ngadto sa mga amahan.”¹⁰

Si Elijah mipakita uban ni Moises didto sa Bukid sa Transfigurasyon ug mitugyan niini nga awtoridad ngadto nila ni Pedro, Santiago, ug Juan.¹¹ Si Elijah mipakita usab uban ni Moises ug ni Elias niadtong Abril 3, 1836, didto sa Templo sa Kirtland ug mitugyan sa samang mga yawe sa pagkapari ngadto ni Joseph Smith ug Oliver Cowdery.¹²

Ang pagpahiuli sa awtoridad sa pagbugkos pinaagi ni Elijah niadtong 1836 mahinungdanon sa pag-andam sa kalibutan alang sa Ikaduhang Pag-anhi sa Manluluwas ug nagpasiugda og hilabihan nga nagkadaghan ug tibuok kalibutan nga kadasig sa pagsiksik sa family history.

Pag-usab, Pagpabaling, ug Pagputli og mga Kasingkasing

Ang pulong nga *kasingkasing* gigitmit og sobra 1,000 ka higayon diha sa sumbanan nga mga basahon. Kining

yano apan mahinungdanong pulong kasagarang nagpasabut sa mga pagbati sulod sa usa ka tawo. Ang atong kasingkasing—ang kombinasyon sa atong mga tinguha, mga pagbati, mga katuyoan, mga motibo, ug mga kinaiya—naghulagway kon kinsa kita ug motino kon unsa kita sa umaabut. Ug ang kinauyokan sa buhat sa Ginoo mao ang pag-usab, pagpabaling, ug pagputli sa mga kasingkasing pinaagi sa mga pakigsaad sa ebanghelyo ug mga ordinansa sa pagkapari.

Wala kita motukod o mosulod sa balaang mga templo aron lang maka-angkon og halandumong kasinatian sa indibidwal o pamilya. Hinoon, ang mga pakigsaad nga nadawat ug ang mga ordinansa nga gipahigayon diha sa mga templo mahinungdanon sa pagbalaan sa atong mga kasingkasing ug alang sa kinatas-ang paghimaya sa mga anak sa Dios.

Ang pagtanom diha sa mga kasingkasing sa mga anak sa mga saad nga



pagka-diosnon”¹⁹ pinaagi sa pagdawat sa mga ordinansa sa pagkapari ug sa paghimo ug pagtuman og sagradong mga pakigsaad, mapanalanginan kita og kusog nga lapas sa atong kaugalingon²⁰ aron sa pagbuntog sa mga tintasyon ug mga hagit sa mortalidad ug sa paghimo ug pagkahimong maayo.

Ang Pagkabantog Niini nga Balay Mokaylap

Ang unang templo niini nga dispensasyon gitukod sa Kirtland, Ohio ug gipahinungod niadtong Marso 27, 1836.

Sa usa ka pagpadayag ngadto ni Propeta Joseph Smith usa ka semana human sa pagpahinungod, ang Ginoo mideklarar:

“Himoa ang mga kasingkasing sa akong tanan nga mga katawhan nga magmaya, kinsa, uban sa ilang kusog, nagtukod niini nga balay ngadto sa akong ngalan. . . .

“Oo ang mga kasingkasing sa mga kaliboan ug napulo ka mga kaliboan malipay sa hilabihan sa sangputanan sa mga panalangin nga ibu-bu, ug ang pagtuga diin ang akong mga sulugon gitugahan dinhi niini nga balay.

“Ug ang pagkabantog niini nga balay mokaylap ngadto sa langyaw nga mga yuta; ug kini mao ang sinugdanan sa panalangin nga ibu-bu diha sa mga ulo sa akong mga katawhan.”²¹

Palihug timan-i ang mga hugpong sa mga pulong nga *ang mga kasingkasing sa mga kaliboan ug napulo ka mga kaliboan malipay sa hilabihan ug ang pagkabantog niini nga balay mokaylap ngadto sa langyaw nga mga yuta*. Kini makakurat nga mga deklarasyon niadtong Abril sa 1836, sa dihang ang Simbahan adunay diyutay lang nga mga miyembro ug usa ka templo.

Karon sa 2020, kita adunay 168 ka magamit nga mga templo. Kwarentay nuybe nga dugang templo ang gitukod pa o gipahibalo. Ang mga balay sa Ginoo gipangtukod diha sa “mga pulo sa dagat”²² ug sa mga nasud ug mga dapit nga kaniadto gikonsiderar sa daghang tawo nga malagmit dili makaangkon og templo.

Ang seremonya sa tuga gipresentar karon sa 88 ka pinulongan ug maanaa

gihimo ngadto sa mga amahan—gani si Abraham, Isaac, ug Jacob—pagpabalang sa mga kasingkasing sa mga anak ngadto sa kaugalingon nilang mga amahan, pagsiksik sa family history, ug pagpahigayon og puli nga mga ordinansa sa templo mao ang mga paghago nga mopanalangin sa mga indibidwal sa duha ka habig sa tabil. Samtang matinguhaon kitang moapil niining sagrado nga buhat, nagsunod kita sa mga sugo sa paghigugma ug pagserbisyo sa Dios ug sa atong mga silingan.¹³ Ug ang samang walay pagkahakug nga serbisyo tinud-anayng motabang kanato nga “[Ma]minaw Kaniya!”¹⁴ ug modangup ngadto sa Manluluwas.¹⁵

Ang labing sagrado nga mga pakigsaad ug mga ordinansa sa pagkapari madawat lamang diha sa templo—ang balay sa Ginoo. Ang tanang nakat-unan ug tanang gibuhad diha sa templo naghatag og gibug-aton sa kabalaan ni Jesukristo ug sa Iyang tahas diha sa mahinungdanong plano sa kalipay sa Langitnong Amahan.

Gikan sa Sulod Paingon sa Gawas

Si Presidente Ezra Taft Benson mihulagway og importante nga sundanan nga gigamit sa Manunubos sa “pagpahinabo sa pagka-imortal ug sa kinabuhi nga dayon sa tawo.”¹⁶ Siya miingon: “Ang Ginoo nag-usab sa mga tawo gikan sa sulod paingon sa gawas. Ang kalibutan nag-usab sa tawo gikan sa gawas paingon sa sulod.

Ang kalibutan mohaw-as sa mga tawo gikan sa nagdasok nga mga pinuyanan. Si Kristo nagkuha sa nagdasok nga ngil-ad nga mga pagbati sa mga tawo, ug unya sila mohaw-as sa ilang mga kaugalingon gikan niini nga pagdasok. Ang kalibutan moumol sa mga tawo pinaagi sa pag-usab sa ilang palibut. Si Kristo nag-usab sa mga tawo, kinsa dayon mousab sa ilang palibut. Ang kalibutan moumol sa tawhanong kinaiya, apan si Kristo makausab sa tawhanong kinaiyahan.”¹⁷

Ang mga pakigsaad ug mga ordinansa sa pagkapari mahinungdanon sa nagpadayong proseso sa espiritwal nga pagkatawo pag-usab ug transpormasyon; kini ang mga paagi nga ang Ginoo motrabaho sa matag usa kanato *gikan sa sulod paingon sa gawas*. Ang mga pakigsaad nga makanunayong gitahud, gihinumduman, ug gisulat “sa Espiritu sa Dios nga buhi . . . sa mga papan nga mga kasingkasing”¹⁸ naghatag og katuyoan ug kasiguroan sa mga panalangin sa mortalidad ug sa kahangturan. Ang mga ordinansa nga takus nga gidawat ug kanunay nga gihinumduman moabli sa langitnong mga agianan diin ang gahum sa pagkadiosnon modagayday sa atong kinabuhi.

Kita dili moadto sa templo aron motago o moeskapo sa mga kadautan sa kalibutan. Hinoon, moadto kita sa templo aron sa pagbuntog sa kalibutan sa dautan. Samtang atong dapiton sa atong kinabuhi ang “gahum sa

sa daghan pang dugang nga pinulongan samtang ang mga templo tukuron aron sa pagpanalangin og daghan pa sa mga anak sa Dios. Sa mosunod nga 15 ka tuig, ang gidaghanon sa mga pinulongan nga maanaa ang mga ordinansa sa templo malagmit nga madoble.

Karong tuiga atong sugdan ang pagtukod sa 18 ka templo. Sa pagtandi, milungtad og 150 ka tuig aron matukod ang unang 18 ka templo, gikan sa pag-organisar sa Simbahan niadtong 1830 hangtud sa pagpahinungod ni Presidente Spencer W. Kimball sa Tokyo Japan Temple niadtong 1980.

Ikonsiderar ang pagpadali sa buhat sa templo nga nahitabo sa panahon lang ni Presidente Russell M. Nelson. Sa dihang si Presidente Nelson natawo niadtong Septyembre 9, 1924, ang Simbahan adunay unom ka magamit nga mga templo.

Sa dihang gi-orden siya isip Apostol niadtong Abril 7, 1984, paglabay sa 60 ka tuig, 26 ka templo ang magamit, adunay dugang nga 20 ka templo sulod sa 60 ka tuig.

Sa dihang si Presidente Nelson gipaluyohan isip Presidente sa Simbahan, 159 ka templo ang magamit, adunay dugang nga 133 ka templo sulod sa 34 ka tuig diin miserbisyo siya isip sakop sa Korum sa Napulog Duha.

Sukad nahimong Presidente sa Simbahan niadtong Enero 14, 2018, si Presidente Nelson mipahibalo na og 35 ka bag-ong templo.

Nubentay sayis porsyento sa anaa na nga mga templo napahinungod panahon sa kinabuhi ni Presidente Nelson; 84 porsyento ang napahinungod sukad siya na-orden isip Apostol.

Kanunay nga Tutuki ang mga Butang nga Labing Importante

Isip mga miyembro sa gipahiuli nga Simbahan sa Ginoo, mahingangha kita sa padayong nagkakusog nga gipaspason sa Iyang buhat sa ulahing mga adlaw. Ug dugang pa nga mga templo ang moabut.

Si Brigham Young nanagna, “Sa pagtuman niini nga buhat dili lamang usa ka templo apan liboan niini, ug

liboan ug napulo ka mga libo sa mga lalaki ug mga babaye moadto ngadto sa mga templo ug mopahigayon alang sa mga tawo kinsa nabuhi kutob sa ipadayag sa Ginoo.”²³

Masabut lang, ang pahibalo sa matag bag-o nga templo usa ka tinubdan sa dakong kalipay ug usa ka rason nga magpasalamat sa Ginoo. Hinoon, ang atong nag-unang tutukan mao ang mga pakigsaad ug mga ordinansa nga makausab sa atong kasingkasing ug makapalawom sa atong debosyon sa Manluluwas ug dili lang sa dapit o kaanindot sa gambalay.

Ang sukaranang mga obligasyon nga aduna kita isip mga miyembro sa gipahiuli nga Simbahan sa Ginoo mao ang (1) “[Pag]paminaw Kaniya!”²⁴ ug pag-usab sa atong mga kasingkasing pinaagi sa mga pakigsaad ug mga ordinansa ug (2) malipayong pagtuman sa balaanong gitudlo nga responsibilidad nga motanyag sa mga panalangin sa templo ngadto sa tibuok tawhanong pamilya sa duha ka habig sa tabil. Uban sa direksyon ug tabang sa Ginoo, matuman gayud nato kining sagrado nga mga katungdanan.

Ang Pagtukod sa Zion

Si Propeta Joseph Smith namahayag: “Ang pagtukod sa Zion mao ang katuyoan nga nakapaikag sa katawhan sa Dios sa matag panahon; usa kini ka tema diin ang mga propeta, mga pari ug mga hari nagpakabuhi uban sa talagsaong kahimuot; ila kining gilauman uban sa malipayon nga pagpaabut sa adlaw diin kita magpuyo; ug gidasig uban sa langitnon ug mahimayaon nga mga pagpaabut nga ilang giawit ug gisulat ug gipanagna kining atong panahon; apan namatay sila nga wala makakita sa mga panghitabo sa atong kapanahunan; . . . anaa ra kanato ang pagtan-aw niini, pag-apil ug pagtabang sa pagpalambo sa Ulahing mga adlaw nga kahimayaan.”²⁵

“Ang langitnon nga Priesthood makighusa uban sa kalibutanon nga Priesthood, sa pagpahinabo niadtong mga dagko nga mga katuyoan; . . . usa ka buluhaton nga gihunahuna sa Dios ug sa mga anghel uban sa

kahimuot alang sa milabay nga mga henerasyon; nga midasig sa mga kalag niadtong karaan nga mga patriarch ug mga propeta; usa ka buluhaton nga gitagana aron mapahinabo ang kalaglagan sa mga gahum sa kangitngit, ang pagbag-o sa yuta, ang himaya sa Dios, ug ang kaluwasan sa tawhanon nga pamilya.”²⁶

Ako solemne nga mopamatuod nga ang Amahan ug ang Anak mipakita ngadto ni Joseph Smith, ug si Elijah mipahiuli sa awtoridad sa pagsilyo. Ang sagrado nga mga pakigsaad ug mga ordinansa sa templo makalig-on kanato ug makalunsay sa atong mga kasingkasing samtang kita “[Ma]minaw Kaniya!”²⁷ ug modawat sa gahum sa pagka-diosnon diha sa atong kinabuhi. Ug ako mosaksi nga kining buhat sa ulahing mga adlaw molaglag sa mga gahum sa kangitngit ug mopahinabo sa kaluwasan sa tawhanong pamilya. Niining mga kamatuoran malipayon akong mopamatuod sa sagradong ngalan ni Ginoong Jesukristo, amen. ■

MUBO NGA MGA SULAT

1. Mga Taga-Efeso 1:10.
2. Joseph Smith—Kasaysayan 1:30.
3. Joseph Smith—Kasaysayan 1:33.
4. Joseph Smith—Kasaysayan 1:38–39.
5. Mga Buhat 3:21.
6. Bible Dictionary sa LDS nga Iningles nga bersyon sa Biblia, “Elijah.”
7. Giya ngadto sa mga Kasulatan, “Elijah.”
8. *Mga Pagtulun-an sa mga Presidente sa Simbahan: Joseph Smith* (2007), 376.
9. Mateo 16:19; tan-awa usab sa Mateo 18:18; Helaman 10:7; Doktrina ug mga Pakigsaad 124:93; 132:46.
10. *Mga Pagtulun-an: Joseph Smith*, 378.
11. Tan-awa sa Mateo 17:3.
12. Tan-awa sa Doktrina ug mga Pakigsaad 110:13–16.
13. Tan-awa sa Mateo 22:34–40.
14. Joseph Smith—Kasaysayan 1:17.
15. Tan-awa sa Omni 1:26; Moroni 10:30, 32.
16. Moises 1:39.
17. Ezra Taft Benson, “Born of God,” *Ensign*, Nob. 1985, 6.
18. 2 Mga Taga-Corinto 3:3.
19. Tan-awa sa Doktrina ug mga Pakigsaad 84:20–21.
20. Tan-awa sa “Sundon Ko Ikaw Ginoo,” *Mga Himno*, nu. 133.
21. Doktrina ug mga Pakigsaad 110:6, 9–10.
22. 2 Nephi 29:7.
23. *Mga Pagtulun-an sa mga Presidente sa Simbahan: Brigham Young* (1997), 358.
24. Joseph Smith—Kasaysayan 1:17.
25. *Mga Pagtulun-an: Joseph Smith*, 221.
26. *Mga Pagtulun-an: Joseph Smith*, 623.
27. Joseph Smith—Kasaysayan 1:17.



Ni Presidente Russell M. Nelson
*Presidente sa Ang Simbahan ni Jesukristo
 sa mga Santos sa Ulahing mga Adlaw*

Paminaw Kaniya

*Ang atong Amahan nakahibalo nga kon kita gilibutan
 sa walay kasiguroan ug sa kahadlok, ang labing
 makatabang nato mao ang pagpaminaw sa Iyang Anak.*

Minahal kong kaigsoonan, mapasal-
 lamaton ko nga, pinaagi sa paggamit
 sa teknolohiya, kita nagkapundok
 aron sa pagsimba niining buntag sa
 Dominggo. Pagkabalahan nato nga
 nahibalo nga ang ebanghelyo ni
 Jesukristo gipahiuli sa yuta!

Sa milabayng mga semana, kadag-
 hanan nato nakasinati og pagkabalda
 sa atong personal nga kinabuhi. Mga
 linog, mga sunog, mga baha, mga
 sakit, ug ang mga resulta niini nakabal-
 da sa mga naandan, ug nakaingon sa
 kakulang sa mga pagkaon, nag-unang
 mga panginahanglan ug mga tinigum.

Taliwala niining tanan, kami
 nagdayeg ug nagpasalamat ninyo sa
 pagpili sa pagpaminaw sa pulong
 sa Ginoo niining panahon sa walay
 kasiguroan pinaagi sa pag-apil namo
 sa kinatibuk-ang komperensya. Ang
 nagkadugang nga kangitngit nga
 nag-uban sa kalisdanan nakapasanag
 sa kahayag ni Kristo. Hunahunaa lang
 ang kaayohan nga atong mahimo atol
 niining tibuok kalibutan nga kalis-
 danan. Ang inyong gugma ug hugot
 nga pagtuo sa Manluluwas mahimong
 hinungdan nga makadiskobre ang usa
 ka tawo sa Pagpahiuli sa kahingpitan
 sa ebanghelyo ni Jesukristo.

Sa miaging duha ka tuig, si Sis-
 ter Nelson ug ako nakahimamat sa
 liboan kaninyo sa tibuok kalibutan.

Kami nakigmiting ninyo sa mga arena
 ug mga ballroom sa hotel. Sa matag
 dapit, ako mibati nga ako anaa sa pre-
 sensya sa pinili sa Ginoo ug nga ako
 nakakita sa panagpundok sa Israel.

Kita nagpuyo sa adlaw nga
 “mahinamong gipaabut sa atong
 mga katigulangan.”¹ Kita *nakasaksi
 gayud* unsay nakita ni propeta Nephi
 sa *panan-awon lamang*, nga ang
 “gahum sa Kordero sa Dios” mokun-
 sad “diha sa mga katawhan sa pakig-
 saad sa Ginoo, kinsa nagkatibulaag sa
 ibabaw sa yuta; ug sila gisangkapan
 sa katarung ug uban sa gahum sa
 Dios sa dako nga himaya.”²

Kamo, akong kaigsoonan, apil
 niadtong mga lalaki, mga babaye, ug

mga bata nga nakita ni Nephi. Huna-
 hunaa kana!

Bisan asa pa kamo magpuyo o
 unsay inyong kahimtang, ang Ginoo
 nga si Jesukristo mao ang *inyong*
 Manluluwas, ug ang propeta sa Dios,
 si Joseph Smith, mao ang *inyong* pro-
 peta. Siya giorden nang daan sa wala
 pa ang pundasyon niini nga yuta nga
 mahimong propeta niining katapu-
 sang dispensasyon, diin “walay itago”³
 gikan sa mga Santos. Ang pagpadayag
 nagpadayon sa paggawas gikan sa
 Ginoo niining nagpadayon nga prose-
 so sa pagpahiuli.

Alang kaninyo unsay gipasabut nga
 ang ebanghelyo ni Jesukristo gipahiuli
 sa yuta?

Kini nagpasabut nga kamo ug ang
 inyong pamilya mabugkos sa kahang-
 turan! Kini nagpasabut nga tungod
 kay kamo nabunyagan pinaagi sa
 dunay awtoridad gikan ni Jesukristo
 ug nakumpirmahan nga miyembro sa
 Iyang Simbahan, kamo makatagam-
 tam sa kanunay nga pakig-uban sa
 Espiritu Santo. Siya mogiya ug mana-
 lipod kaninyo. Kini nagpasabut nga
 kamo dili biyaan nga wala mahupay
 o walay magamit nga gahum sa Dios
 sa pagtabang ninyo. Kini nagpasabut
 nga ang gahum sa pagkapari makapa-
 nalangin ninyo sa inyong pagdawat sa
 importanting mga ordinansa ug paghi-
 mog mga pakigsaad uban sa Dios ug
 pagtuman niini. Kini nga mga kamatu-
 oran nakahatag og kalig-on sa atong
 mga kalag, ilabi na niining panahon
 nga ang unos mapintas.



New York City, New York, USA

Ang Basahon ni Mormon miistorya sa pabangon ug pagkapukan sa duha ka dagkong mga sibilisasyon. Ang ilang kasaysayan nagpakita kon unsa ka sayon nga ang kadaghanan sa mga tawo makalimot sa Dios, pagsalikway sa mga pasidaan sa mga propeta sa Ginoo, ug pagtinguha og gahum, pagkabantugan, ug mga tawhanong kalipay.⁴ Mibalik-balik, ang mga propeta kaniadto mipahayag og “mahinungdanon ug kahibulongan nga mga buhat ngadto sa mga katawhan, diin sila wala motuo.”⁵

Dili kini lahi sa atong panahon. Sa milabayng katuigan, ang mahinungdanon ug kahibulongan nga mga butang nadungog gikan sa gihalad nga mga pulpito sa tibuok yuta. Apan kadaghanan sa mga tawo *wala* modawat niini nga mga kamatuoran—tingali kay sila wala makahibalo asa kini pangitaa⁶ o kay sila naminaw sa mga tawo nga wala sa tanang kamatuoran o kay sila misalikway sa kamatuoran tungod sa kalibutanong mga butang.

Ang kaaway abtik. Liboan na ka tuig nga siya mihimo sa maayo nga dautan ug sa dautan nga maayo.⁷ Ang iyang mga mensahe ingon og kusog, isug, ug mapagarbuhon.

Hinooon, ang mga mensahe gikan sa atong Langitnong Amahan makita nga lahi. Siya makigsulti sa yano, sa hilom, ug sa labihan kayano nga kita makasabut gayud Kaniya.⁸

Pananglitan, matag higayon nga Siya mopaila sa Iyang Bugtong Anak ngadto sa mga mortal sa yuta, Siya mihimo pinaagi sa pipila lamang ka pulong. Sa Bungtod sa Transfigurasyon ngadto ni Pedro, Santiago, ug Juan, ang Dios miingon, “Kini ang akong hinigugma nga Anak: paminaw kaniya.”⁹ Ang Iyang mga pulong ngadto sa mga Nephite sa karaang Bountiful mao “Tan-awa ang akong Hinigugmang Anak, kinsa Ako nahimuot kaayo, kang kinsa Ako mihimaya sa akong ngalan—paminaw kamo kaniya.”¹⁰ Ug ngadto ni Joseph Smith, nianang mahinungdanong pamahayag nga miabli niini nga dispensasyon, ang Dios yanong miingon, “*Kini ang Akong Hinigugma nga Anak. Paminaw Kaniya.*”¹¹



CHRIST APPEARING IN THE WESTERN HEMISPHERE ISI KRISTO NGA MIPAKITA SA KASADPANG BAHIN SA KALIBUTAN, NI ARNOLD FRIBERG

Karon, minahal kong kaigsoonan, hunahunaa ang kamatuoran niining tulo ka higayon nga gihisgutan, sa wala pa ipaila sa Amahan ang Anak, ang mga tawo nga nalakip anaa sa kahadlok ug, sa pila ka bahin nabalaka.

Ang mga Apostoles nahadlok sa dihang ilang nakita si Jesukristo nga gilibutan sa panganud sa Bungtod sa Transfigurasyon.

Ang mga Nephite nahadlok tungod kay sila nakasinati og kalaglagan ug kangitngit sulod sa pipila ka adlaw.

Si Joseph Smith gigunitan sa gahum sa kangitngit sa wala pa moabli ang kalangitan.

Ang atong Amahan nakahibalo nga kon kita gilibutan sa walay kasiguroan ug sa kahadlok, ang labing makatabang nato mao ang pagpaminaw sa Iyang Anak.

Tungod kay kon kita magtinguha nga maminaw—tinuod nga pagpaminaw—sa Iyang Anak, kita giyahan nga makahibalo unsay buhaton sa bisan unsa nga sirkumstansya.

Ang unang pulong sa Doktrina ug mga Pakigsaad mao ang *patalinghug*.¹² Kini nagpasabut “sa pagpaminaw uban

sa tumong sa pagsunod.”¹³ Sa pagpatalinghug nagpasabut sa “[Pag]paminaw Kaniya”—sa *pagpaminaw* unsay isulti sa Manluluwas ug dayon sa *pagpatalinghug* sa Iyang tambag. Niining duha ka pulong—“Paminaw Kaniya”—Ang Dios mihatag nato og sundanan alang sa kalampusan, ug hingpit nga kalipay niini nga kinabuhi. Kita kinahanglan nga *maminaw* sa mga pulong sa Ginoo, *mopatalinghug* niini, ug *mamati* unsay Iyang gisulti kanato!

Isip mga disipulo ni Jesukristo, ang atong mga paningkamot sa *pagpaminaw Kaniya* kinahanglan nga mas gitinguha nato. Kinahanglan og tininoud ug makanunayon nga paningkamot sa pagpuno sa atong inadlaw nga kinabuhi sa Iyang mga pulong, sa Iyang mga pagtulunan, sa Iyang mga kamatuoran.

Kita dili gyud makasalig sa importasyon nga atong makita sa social media. Sa binilyong mga pulong sa online ug sa usa ka kalibutan nga puno sa materyalismo nga pahinumdom nga kanunay apilan sa masaba, dautan nga mga paningkamot sa kaaway, asa *man* kita makapaminaw Kaniya?

Kita makaadto sa mga kasulatan. Kini nagtudlo nato bahin ni Jesukristo ug sa Iyang ebanghelyo, sa gidak-on sa Iyang Pag-ula, ug mahinungdanong plano sa Amahan sa kalipay ug katubsanan. Inadlaw nga pagbasa sa pulong sa Dios importante alang sa espirituhanong kaluwasan, ilabi na niining panahon sa nagkagrabe nga kaguliyang. Samtang kita magbusog sa mga pulong ni Kristo matag adlaw, ang mga pulong ni Kristo mosulti nato unsaon sa pagtubag sa mga kalisud nga wala nato mahunahunai nga atong atubangon.

Kita usab [maka] *paminaw Kaniya* diha sa templo. Ang balay sa Ginoo *mao* ang balay sa pagkat-on. Didto ang Ginoo nagtudlo sa Iyang kaugalingong paagi. Didto ang matag ordinansa nagtudlo bahin sa Manluluwas. Didto kita makat-on unsaon sa pag-abli sa tabil ug makigsulti sa langit sa mas klaro. Didto kita makat-on unsaon sa pagpapahawa sa kaaway ug paggamit sa gahum sa pagkapari sa Ginoo sa paglig-on nato ug niadtong atong gimahal. Kinahanglan ang matag usa nato magtinguha ug kadangpan didto.

Kon kining temporaryo nga mga restriksyon sa COVID-19 mahuman na, palihug pag-iskedyul og regular nga panahon sa pagsimba ug pagserbisyo sa templo. Ang matag minuto niana nga panahon mopanalangin kaninyo ug sa inyong pamilya sa mga paagi nga *walay lain* ang makahimo. Paggahin og panahon sa pagpamalandong unsay inyong nadungog ug nabati samtang didto kamo. Hangyog ang Ginoo sa pagtudlo ninyo unsaon sa pag-abli sa kalangitan aron mapanalangin ang inyong kinabuhi ug mga kinabuhi sa inyong gimahal ug giserbisyoan.

Samtang ang pagsimba sa templo dili posible karon, ako modapit ninyo nga dugangan ang inyong pag-apil sa family history, lakip ang family history research ug indexing. Ako mosaad nga kon inyong dugangan ang inyong panahon sa buhat sa templo ug sa family history mouswag ug molambo ang inyong abilidad sa pagpaminaw Kaniya.

Kita usab [maka] *paminaw Kaniya* nga mas klaro kon atong hashasan ang atong abilidad sa pag-ila sa mga hung-hong sa Espiritu Santo. Wala gayud sukad nga mas importante nga makahibalo unsaon sa pagpaminaw sa Espiritu nga mamulong kaninyo kay sa karon. Sa Dios nga Kapangulohan, ang Espiritu Santo mao ang mensahero. Siya modala sa mga hunahuna diha sa inyong alimpatakan nga gusto sa Amahan ug sa Anak nga inyong madawat. Siya mao ang Maghuhupay. Siya mohatag og pagbati sa kalinaw sa inyong kasingkasing. Siya mopamatuod sa kamatuoran ug mokumpirma unsa ang tinuod samtang kamo maminaw ug mobasa sa pulong sa Ginoo.

Ako mousab sa akong hangyo alang ninyo nga inyong buhaton *bisan unsa* ang makapadugang sa inyong espirituhanong kapasidad sa pagdawat og personal nga pagpadayag.

Ang pagbuhat sa ingon makatabang ninyo unsaon sa pagpadayon sa inyong kinabuhi, unsay buhaton sa panahon sa krisis, ug unsaon sa pag-ila ug paglikay sa mga tintasyon ug mga pagpanglimbong sa kaaway.

Ug, sa katapusan, kita [maka] *paminaw Kaniya* samtang kita mamati sa mga pulong sa mga propeta, mga manalagna, ug mga tigpadayag. Ang naordinahan nga mga Apostoles ni Jesukristo kanunay nga nagpamatuod Kaniya. Sila nagtudlo sa dalan samtang kita nagsubay sa malisud nga dalan sa atong mortal nga mga kasinatian.

Unsay mahitabo kon kamo maminaw pag-ayo, mopatalinghug, ug mamati unsay gisulti sa Manluluwas ug unsay Iyang gisulti pinaagi sa Iyang mga propeta? Ako mosaad nga kamo mapanalangin og dugang gahum sa pag-atubang sa tintasyon, mga pakigbisog, ug kahuyang. Ako mosaad og mga milagro sa inyong kaminyoon, mga relasyon sa pamilya, ug inadlaw nga trabaho. Ug ako mosaad nga ang inyong kapasidad sa pagbati og hingpit nga kalipay madugangan bisan kon ang unos magkadaghan sa inyong kinabuhi.

Kining Abril 2020 nga kinatibukang komperensya mao ang atong panahon sa paghandom sa panghitabo nga nakapusab sa kalibutan. Samtang kita nagpaabut niining ika-200 nga anibersaryo sa Unang Panan-awon ni Joseph Smith, ang Unang Kapangulohan ug Konseho sa Napulog Duha ka mga Apostoles namalandong unsay *among* mabuhat aron sa pagsaulog sa tukmang paagi niining importanting hitabo.

Kana nga pagpakita sa dios mipasiugda sa Pagpahiuli sa kahingpitan sa ebanghelyo ni Jesukristo ug mipahiluna sa dispensasyon sa kahingpitan sa panahon.

Kami naghunahuna kon angay ba nga mopabarug og monumento. Apan samtang among gikonsiderar ang talagsaon nga makasaysayon ug internasyonal nga epekto sa Unang Panan-awon, nadasig kami sa



paghimo og usa ka monumento dili sa granite o bato apan sa mga pulong—mga pulong sa ligdong ug sagrado nga mga pamahayag—gisulat, dili ikulit diha sa “papan nga bato” apan hinoon ikulit diha sa “papan” sa atong mga kasingkasing.¹⁴

Sukad nga na-organisar ang Simbahan, lima lamang ka pamahayag ang gipagawas, nga ang katapusan mao ang “Ang Pamilya: Usa ka Pamahayag ngadto sa Kalibutan,” nga gipresentar ni Presidente Gordon B. Hinckley niadtong 1995.

Karon samtang kita mamalandong niining importanting panahon sa kasaysayan sa kalibutan ug sa mando sa Ginoo sa pagpundok sa nagkatibulaag nga Israel agig pagpangandam alang sa Ikaduhang Pag-anhi ni Jesukristo, kami, ang Unang Kapangulohan ug Konseho sa Napulog Duha ka mga Apostoles, mopagawas sa mosunod nga pamahayag. Ang ulohan niini mao ang “Ang Pagpahiuli sa Kahingpitan sa Ebanghelyo ni Jesukristo: Usa ka Pamahayag ngadto sa Kalibutan sa Ikaduhang Siglo nga Kasaulogan.” Ang tagsulat niini mao ang Unang Kapangulohan ug ang Konseho sa Napulog Duha ka mga Apostoles sa Ang Simbahan ni Jesukristo sa mga Santos sa Ulahing mga Adlaw. Gipetsahan kini og Abril 2020. Aron maandam alang karong adlaw, ako na kining girekord daan nga pamahayag diha sa Sagradong Kakahoyan, diin unang nakita ni Joseph Smith ang Amahan ug ang Anak.

“Kami ligdong nga mamahayag nga ang Dios nagmahal sa Iyang mga anak sa matag nasud sa kalibutan. Ang Dios nga Amahan mihatag kanato sa balaanong pagkatawo, walay sama nga kinabuhi, ug walay kinutuban nga maulaong sakripisyo sa Iyang Pinalanggang Anak, si Jesukristo. Pinaagi sa gahum sa Amahan, si Jesus mibangon pag-usab ug nakaangkon og kadaugan batok sa kamatayon. Siya ang atong Manluluwas, atong Ehempro, ug atong Manunubos.

“Duha ka gatus ka tuig na ang milabay, sa usa ka matahan nga buntag sa tingpamulak niadtong 1820, ang

batan-ong si Joseph Smith, nagtinguha nga masayud kon hain nga simbahan ang apilan, miadto sa kakahoyan aron mag-ampo duol sa iyang panimalay sa amihanang bahin sa New York, USA. Aduna siyay mga pangutana kalabut sa kaluwasan sa iyang kalag ug misalig nga ang Dios mogiya kaniya.

“Uban sa kamapainubsanon, kami modeklarar nga agig tubag sa iyang pag-ampo, ang Dios nga Amahan ug ang Iyang Anak, si Jesukristo, mipakita kang Joseph ug mipasiugda sa pagpabalik sa tanang butang (Mga Buhat 3:21) sama sa gipanagna diha sa Biblia. Dinhi niini nga panan-awon, iyang nakat-unan nga human mamatay ang orihinal nga mga Apostoles, ang Simbahan ni Kristo sa Bag-ong Tugon nawala sa kalibutan. Si Joseph ang mahimong himan sa pagbalik niini.

“Kami momatuod nga ubos sa direksyon sa Amahan ug sa Anak, ang langitnon nga mga mensahero mianhi aron sa pagtudlo kang Joseph ug sa pag-establisar og usab sa Simbahan ni Jesukristo. Ang nabanhaw nga si Juan Bautista mipahiuli sa awtoridad sa pagbunyang pinaagi sa pagpaunlod alang sa kapasayloan sa mga sala. Tulo sa orihinal nga napulog duha ka mga Apostoles—si Pedro, Santiago, ug Juan—mipahiuli sa pagka-apostol ug sa mga yawe sa awtoridad sa pagkapari. Ang uban mianhi usab, lakip ni Elijah, kinsa mipahiuli sa awtoridad sa paghiusa sa mga pamilya hangtud sa kahangturan diha sa mahangturon nga mga pakigrelasyon nga molungtad lapas sa kamatayon.

“Dugang kaming mosaksi nga si Joseph Smith gihatagan sa gasa ug gahum sa Dios sa paghubad sa usa ka karaan nga rekord: ang Basahon ni Mormon—Lain nga Tugon ni Jesukristo. Ang mga pahina niining sagrado nga teksto naglakip og usa ka asoy sa personal nga pagpangalagad ni Jesukristo taliwala sa katawhan sa Kasadpang Bahin sa Kalibutan human sa Iyang Pagkabanhaw. Nagtudlo kini sa katuyoan sa kinabuhi ug nagpasabut sa doktrina ni Kristo, nga mahinungdanon alang niana nga katuyoan. Isip kauban nga kasulatan sa Biblia,

ang Basahon ni Mormon nagpamatuod nga ang tanang tawhanong nilalang mga anak nga lalaki ug mga anak nga babaye sa usa ka mahigugmaong Amahan sa Langit, nga Siya adunay balaan nga plano alang sa atong kinabuhi, ug nga ang Iyang Anak, si Jesukristo, namulong karon sa samang paagi sa karaang panahon.

“Kami modeklarar nga Ang Simbahan ni Jesukristo sa mga Santos sa Ulahing mga Adlaw, nga giorganisar niadtong Abril 6, 1830, mao ang Simbahan ni Kristo sa Bag-ong Tugon nga gipahiuli. Kini nga Simbahan nakaangkla sa hingpit nga kinabuhi sa ulohang bato sa pamag-ang niini, si Jesukristo, ug diha sa Iyang walay kinutuban nga Pag-ula ug literal nga Pagkabanhaw. Si Jesukristo mitawag na usab og mga Apostoles ug mihatag kanila og awtoridad sa pagkapari. Midapit Siya kanatong tanan sa pagduol ngadto Kaniya ug sa Iyang Simbahan, sa pagdawat sa Espiritu Santo, sa mga ordinansa sa kaluwasan, ug sa pag-angkon og malungtarong kalipay.

“Duha ka gatus ka tuig na ang milabay sukad nga gipasiugdahan sa Dios nga Amahan ug sa Iyang Pinalanggang Anak, si Jesukristo kini nga Pagpahiuli. Minilyon sa tibuok kalibutan ang mihangop sa kahibalo mahitungod niining gipanagna nga mga panghitabo.

“Malipayon kaming modeklarar nga ang gisaad nga Pagpahiuli padayon nga mahitabo pinaagi sa nagpadayon nga pagpadayag. Ang kalibutan dili na gayud mahimong sama kaniadto, tungod kay ang Dios ‘[mol]hiusa diha kang Kristo sa tanang mga butang’ (Mga Taga-Efeso 1:10).

“Uban sa balaang pagtahud ug pagpasalamat, kami isip Iyang mga Apostoles modapit sa tanan nga masayud—sama kanamo—nga ang kalangitan bukas. Kami momatuod nga ang Dios mipahibalo sa Iyang kabubut-on alang sa Iyang pinalanggang mga anak nga lalaki ug mga anak nga babaye. Kami mopamatuod nga kadtong mainampuong magtuon sa mensahe sa Pagpahiuli ug molihok uban sa pagtuo mapanalanginan nga makaangkon og ilang kaugalingong pagsaksi sa

kabalaan niini ug sa katuyoan niini sa pag-andam sa kalibutan alang sa gisaad nga Ikaduhang Pag-anhi sa atong Ginoo ug Manluluwas, si Jesukristo.”

Hinigugmang mga kaigsoonan, mao kana ang among pamahayag sa ikaduhang siglo nga kasaulogan ngadto sa kalibutan kabahin sa Pagpahiuli sa ebanghelyo ni Jesukristo diha sa kahingpitan niini. Nahubad kini sa 12 ka mga pinulongan. Ang ubang mga pinulongan mosunod sa dili madugay. Kini mahimong anaa dayon sa website sa Simbahan, diin kamo makaangkon og kopya. Tun-i kini sa pribado nga paagi ug uban sa sakop sa inyong pamilya ug mga higala. Pamalandungi ang mga kamatuoran ug paghunahuna sa epekto niadtong mga kamatuoran sa inyong kinabuhi kon kamo maminaw niini, mopatalinghug niini, ug motuman sa mga sugo ug mga pakigsaad nga nag-uban niini.

Ako nasayud nga si Joseph Smith giorden nang daan nga propeta nga gipili sa Ginoo sa pag-abli niining katapusang dispensasyon. Pinaagi kaniya ang Simbahan sa Ginoo gipahiuli nganhi sa yuta. Si Joseph misilyo sa iyang pagpamatuod uban sa iyang dugo. Gihigugma ug gitahud ko siya!

Ang Dios buhi! Si Jesus mao ang Kristo! Ang Iyang Simbahan gipahiuli! Siya ug ang Iyang Amahan, ang atong Langitnong Amahan, nagbantay kana to. Sa ingon ako mopamatuod pinaagi sa sagradong ngalan ni Jesukristo, amen. ■

MUBO NGA MGA SULAT

1. Doktrina ug mga Pakigsaad 121:27.
2. 1 Nephi 14:14.
3. Doktrina ug mga Pakigsaad 121:28.
4. Tan-awa sa 1 Nephi 22:23.
5. Ether 12:5.
6. Tan-awa sa Doktrina ug mga Pakigsaad 123:12.
7. Tan-awa sa Isaias 5:20; 2 Nephi 15:20.
8. Tan-awa sa 2 Nephi 25:4; Alma 5:43.
9. Marcos 9:7; Lucas 9:35.
10. 3 Nephi 11:7.
11. Joseph Smith—Kasaysayan 1:17.
12. Tan-awa sa Doktrina ug mga Pakigsaad 1:1.
13. Sa Daang Tugon, ang pulong *patalinghug* gihubad gikan sa Hebreohanon nga *shama*, nga usa ka berbo nga nagpasabut sa “pagpaminaw uban ang tumong sa pagsunod.” *Patalinghug* usa ka pulong sa kasulatan nga makita sa 40 ka seksyon sa Doktrina ug mga Pakigsaad.
14. Tan-awa sa 2 Mga Taga-Corinto 3:3.

Singgit nga Hosanna

Ni Presidente Russell M. Nelson

Presidente sa Ang Simbahan ni Jesukristo sa mga Santos sa Ulahing mga Adlaw

Karon, akong kaigsoonan, sa atong pagsaulog sa Unang Panan-awon ni Joseph Smith sa Amahan ug Anak kami mibati nga angay nga magma-ya kitang tanan pinaagi sa pag-apil sa Singgit nga Hosanna.

Kining sagradong pagsinggit unang gihatag niini nga dispensasyon sa pagpahunod sa Templo sa Kirtland niadtong Marso 27, 1836. Kini karon ihatag sa pagpahinungod sa matag templo. Kini usa ka sagrado nga halad ngadto sa Amahan ug sa Anak, nagsimbolo sa reaksyon sa katawhan sa dihang ang Manluluwas mihimo sa Iyang madaugong pagsulod ngadto sa Jerusalem. Kini usab nagmatuod pag-usab unsay nasinati sa batan-ong Joseph nianang adlaw sa Sagrado nga Kakahoyan—sa ato pa, nga ang Amahan ug ang Anak duha ka nahimaya nga mga Binuhat nga atong gisimba ug gidayeg.

Ako karon mopakita unsaon ang Singgit nga Hosana. Samtang akong buhaton, ako modapit sa atong mga kauban sa media sa paghimo niini nga sagrado uban ang kaligdong ug pagtahud.

Ang matag usa nga moapil mokuha og limpyo nga puting panyo, maggunit niini sa usa ka tumoy, ug iwara-wara kini samtang magdunungan sa pagsulti, “Hosanna, Hosanna, Hosanna ngadto sa Dios ug sa Kordero,” balikon sa makatulo ka higayon, sundan sa “Amen, Amen, ug Amen.” Apan kon kamo walay puti nga panyo, iwara-wara lang ang inyong kamot.

Mga kaigsoonan, ako karon modapit kaninyo sa pagbarug ug pag-apil sa Singgit nga Hosana, pagkahuman ang “Kanta sa Hosana” ug “Ang Espiritu sa Dios”¹ kantahon.

Sa sinyas sa conductor, palihug apil sa pagkanta sa “Ang Espiritu sa Dios.”

Hosanna! sa Dios ug Kordero.


Hosanna! sa Dios ug Kordero.

Hosanna! sa Dios ug Kordero.


Amen, Amen, ug Amen. ■

MUBO NGA SULAT

1. *Mga Himno*, nu. 2.



Bountiful, Utah, USA



Ni Presidente Dallin H. Oaks
Unang Magtatambag sa Unang Kapangulohan

Ang Dako nga Laraw

Kita kinsa nahibalo sa plano sa Dios ug kinsa nakigsaad nga moapil adunay tataw nga responsibilidad sa pagtudlo niini nga mga kamatuoran.

Bisan taliwala sa talagsaong mga pagsulay ug mga hagit, kita gayud napanalanginan! Kining kinatibuk-ang komperensya naghatag kanato og daghan gayud nga bililhong mga kamatuoran ug kalipay sa Pagpahiuli sa ebanghelyo ni Jesukristo. Kita nagmaya sa panan-awon sa Amahan ug sa Anak nga nagsugod sa Pagpahiuli. Kita gipahinumduman sa milagrusong pagtungha sa Basahon ni Mormon, kansang sentrong katuyoan mao ang pagpamatuod ni Jesukristo ug sa Iyang doktrina. Kita nabag-o sa mali-payong reyalidad sa pagpadayag—ngadto sa mga propeta ug ngari nato sa personal nga paagi. Kita nakadungog og bililhong mga pagpamatuod sa walay kinutuban nga Pag-ula

ni Jesukristo ug sa Iyang literal nga Pagkabanhaw. Ug kita natudloan sa ubang kamatuoran sa kahingpitan sa Iyang ebanghelyo nga gipadayag ngadto kang Joseph Smith human ang Dios nga Amahan mipahayag nianang bag-ong gitawag nga propeta: “Kini mao ang Akong Hinigugmang Anak. Paminaw Kaniya!” (Joseph Smith—Kasaysayan 1:17).

Kita napalig-on sa atong kahi-balo sa pagpahiuli sa pagkapari ug sa mga yawe niini. Kita nabag-o sa atong determinasyon nga ipahibalo ang tukma nga ngalan sa gipahiuli nga Simbahan sa Ginoo, Ang Simbahan ni Jesukristo sa mga Santos sa Ulahing mga Adlaw. Ug kita gidapit nga moapil sa pagpuasa ug pag-

ampo aron maminusan ang kasamtangan ug umaabut nga mga epekto sa usa ka makaguba nga tibuok kalibutan nga pandemic. Karong buntaga kita nadasig sa buhi nga propeta sa Ginoo nga nagpresentar

og makasaysayanong pamahayag sa Pagpahiuli. Kami momatuod sa pamahayag niini nga “kadtong manampuong magtuon sa mensahe sa Pagpahiuli ug molihok uban sa pagtuo mapanalanginan nga makaangkong og ilang kaugalingong pagsaksi sa kabalaan niini ug sa katuyoan niini sa pag-andam sa kalibutan alang sa gisaad nga Ikaduhang Paganhi sa atong Ginoo ug Manluluwas, si Jesukristo.”¹

Ang Laraw

Kining tanan kabahin sa balaang laraw kansang katuyoan mao ang paghatag og katakos sa mga anak sa Dios nga mahimaya ug mahimong sama Niya. Gitawag diha sa kasulatan isip ang “mahinungdanon nga laraw sa kalipay,” “laraw sa katubsanan,” ug “ang . . . laraw sa kaluwasan” (Alma 42:8, 11, 5), kana nga laraw—nga gipadayag sa Pagpahiuli—nagsugod sa usa ka Konseho sa Langit. Isip mga espiritu, kita nagtinguha nga makakab-ot sa kinabuhing dayon nga gitagamtam sa atong langitnong mga ginikanan. Niana nga higayon, kita miuswag kutob sa atong mahimo nga wala ang mortal nga kasinatian sa pisikal nga lawas. Aron mahatag kana nga kasinatian, ang Dios nga Amahan nagplano sa paglalang niini nga yuta. Sa giplano nga mortal nga kinabuhi, kita makasala samtang kita makasinati sa oposisyon nga gikinahanglan alang sa atong espiritwal nga paglambo. Kita usab makasinati sa pisikal nga kamatayon. Sa pagluwas nato gikan sa kamatayon ug sala, ang atong Langitnong Amahan mohatag og usa ka Manluluwas. Ang Iyang Pagkabanhaw motubos sa tanan gikan sa kamatayon, ug ang Iyang maulaong sakripisyo mobayad sa kantidad nga gikinahanglan alang sa tanan aron malimpyohan gikan sa sala sa mga kondisyon nga gitakda sa pagdasig sa atong paglambo. Kining Pag-ula ni Jesukristo mao ang sentro sa plano sa Amahan.

Sa Konseho sa Langit, tanang espiritu nga mga anak sa Dios gipaila sa plano sa Amahan, lakip na sa mortal nga mga sangputanan ug pagsulay,



Provo, Utah, USA



langitnong tabang, ug sa mahimaya-ong padulngan niini. Kita nakakita sa katapusan gikan sa sinugdanan. Ang dili maihap nga mga tawo kinsa natawo dinhi sa yuta mipili sa plano sa Amahan ug nakig-away alang niini sa langitnong sangka nga misunod. Daghan usab ang mihimo og mga pakigsaad sa Amahan kalabut sa unsay ilang buhaton sa mortalidad. Sa mga paagi nga wala pa mapadayag, ang atong mga lihoc didto sa kalibutan sa espiritu nag-impluwensya sa atong kahimtang dinhi sa mortalidad.

Ang Mortalidad ug Kalibutan sa Espiritu

Ako karon mo-summarize sa pipila sa nag-unang mga elemento sa plano sa Amahan, kay kini makaapekto nato atol sa atong mortal nga mga panaw ug didto sa kalibutan sa espiritu nga mosunod.

Ang katuyoan sa mortal nga kinabuhi ug sa postmortal nga paglambo nga mahimong mosunod niini mao ang alang sa anak sa Dios nga mahimong sama Niya. Kini mao ang tinguha sa Langitnong Amahan alang sa tanan Niyang mga anak. Aron makab-ut kining malipayong padulngan, ang mahangturong mga balaod nagkinahanglan nga kita mahimong nahinlo nga mga binuhat pinaagi sa Pag-ula

ni Jesukristo aron kita makapuyo sa presensya sa Amahan ug sa Anak ug makatagamtam sa mga panalangin sa kahimayaan. Sama sa gitudlo sa Basahon ni Mormon, Siya nagdapit sa “tanang sa pagduol ngadto kaniya, ug sa pag-ambit sa iyang kaayo; ug siya wala maglimud kang bisan kinsa nga moduol ngadto kaniya, itum ug puti, ulipon ug gawasnon, lalaki ug babaye; ug siya naghinumdom sa mga luog; ug ang tanan managsama ngadto sa Dios” (2 Nephi 26:33; tanawa usab sa Alma 5:49).

Ang balaang plano aron kita makakab-ot sa unsay gitakda nga atong maabot nagkinahanglan nato sa pagpili sa pagsalikway sa dautan nga oposisyon nga nagtintal sa mga mortal sa pagsupak sa mga sugo sa Dios ug sa Iyang plano. Kini usab nagkinahanglan nga kita maapektuhan sa ubang mortal nga oposisyon, sama sa sala sa uban o pisikal nga mga depekto sa pagkatawo. Usahay ang atong gikinahanglan nga paglambo mas maayong makab-ot pinaagi sa pag-antus ug kalisud kay sa kaharuhay ug kalinaw. Ug walay usa niining mortal nga oposisyon ang makatuman sa katuyoan niini kon ang langitnong pagtabang mohupay kanato gikan sa tanang makadaut nga mga sangputanan sa mortalidad.

Ang plano mopadayag sa atong padulngan sa kahangturan, sa katuyoan ug mga kondisyon sa atong panaw sa mortalidad, ug sa langitnong mga tabang nga madawat nato. Ang mga sugo sa Dios nagpasidaan nato batok sa pagkahisalaag ngadto sa makyaw nga mga kahimtang. Ang mga pagtulun-an sa dinasig nga mga lider mogiya sa atong dalan ug mohatag og kasiguroan nga nagdasig sa atong mahangturong panaw.

Ang plano sa Dios naghatag kanato og upat ka dagko nga mga kasiguroan nga motabang sa atong panaw sa mortalidad. Ang tanan gihatag nganhi kanato pinaagi sa Pag-ula ni Jesukristo, ang sentro sa plano. Ang *una* nag-siguro kanato nga pinaagi sa Iyang pag-antus alang sa mga sala nga atong hinulsulan, kita malimpyuhan niadto nga mga sala. Dayon ang maloloyon nga katapusang tighukom “dili na mahinumdom kanila” (Doctrine and Covenants 58:42).

Ikaduha, isip kabahin sa Pag-ula sa atong Manluluwas, Siya midala diha Kaniya sa tanang ubang mortal nga kahuyang. Kini nagtugot nato sa pagdawat og balaang tabang og kusog sa pagpas-an sa dili kalikayan nga palas-anon sa mortalidad, sa personal ug sa kinatibuk-an, sama sa gubat ug sakit. Ang Basahon ni Mormon naghatag sa atong labing klaro nga paghulagway sa kasulatan niining gikinahanglan nga gahum sa Pag-ula. Ang Manluluwas midala diha Kaniya “sa mga kasakit ug mga balatian [ug mga kahuyang] sa iyang mga katawhan. . . . Siya modala diha kaniya sa ilang mga kahuyang, nga ang iyang kasingkasing mahimo nga mapuno uban sa kalooy, sumala sa unod, nga siya mahimo nga masayud sumala sa unod unsaon pagtabang ang iyang mga katawhan sumala sa ilang mga kahuyang” (Alma 7:11–12).

Ikatulo, ang Manluluwas, pinaagi sa Iyang walay kinutubang Pag-ula, motangtang sa kondisyon nga ang kamatayon maoy katapusan ug maghatag nato sa malipayong kasiguroan nga kitang tanan mabanhaw. Ang Basahon ni Mormon nagtudlo,

“Karon, kini nga pahiuili modangat sa tanan, tigulang ug batan-on, ulipon ug gawasnon, lalaki ug babaye, dautan ug matarung; ug gani walay buhok sa ilang mga ulo nga mawala; apan ang matag butang ipahiuli ngadto sa iyang hingpit nga bayanan” (Alma 11:44).

Atong gisaulog ang ka tinuod sa Pagkabanhaw niining panahon sa Pasko sa Pagkabanhaw. Kini naghatag nato sa panglantaw ug kalig-on sa paglahutay sa mortal nga mga hagit nga giatubang sa matag usa kanato ug niadtong atong gihigugma, mga butang sama sa pisikal, mental, o emosyonal nga kakulangan nga atong makuha gikan sa pagkatawo o masinati atol sa atong mortal nga kinabuhi. Tungod sa Pagkabanhaw, kita nasayud nga kining mortal nga mga kakulangan temporaryo lang!

Ang gipahiuli nga ebanghelyo nagsiguro nato nga ang Pagkabanhaw mahimong maglakip sa oportunidad nga makauban ang atong mga sakop sa pamilya—bana, asawa, mga anak, ug ginikanan. Kini usa ka gamhanan nga pagdasig alang kanato sa pagtuman sa atong responsibilidad sa pamilya sa mortalidad. Kini makatabang kanato nga magpuyo sa gugma niini nga kinabuhi sa pagpaabut sa malipayong panaghiusa ug pakiguban sa sunod.

Ikaupat ug katapusan, ang bag-ong pagpadayag nagtudlo nato nga ang atong paglambo dili kinahanglang mahuman dungan sa pagkatapos sa mortalidad. Gamay ra ang gipadayag bahin niining importanting kasiguroan. Kita giingnan nga kini nga kinabuhi mao ang panahon sa pagpangandam sa pagsugat sa Dios ug nga kita kinahanglang dili maglangay sa atong paghinulsol (tan-awa sa Alma 34:32–33). Gihapon, kita gitudloan nga sa kalibutan sa espiritu ang ebanghelyo gisangyaw bisan gani ngadto sa “mga dautan ug mga masinupakon kinsa misalikway sa kamatuoran” (Doktrina ug mga Pakigsaad 138:29) ug nga kadtong gitudloan didto makahimo sa paghinulsol sa dili pa ang Katapusang Paghukom (tan-awa sa mga bersikulo 31–34, 57–59).

Aniay pipila sa ubang mga sukaranan sa laraw sa atong Langitnong Amahan:

Ang gipahiuli nga ebanghelyo ni Jesukristo naghatag nato og talagsaong panglantaw sa mga hilisgutan

sa kaputli, kaminyoon, ug pagpanganak. Kini nagtudlo nga ang kaminyoon sumala sa plano sa Dios gikinahanglang aron matuman ang katuyoan sa laraw sa Dios, sa paghatag sa balaanong gitakda nga kahimantang alang sa mortal nga pagkatawo, ug sa pag-andam sa mga sakop sa pamilya alang sa kinabuhing dayon. “Ang kaminyoon gi-orden sa Dios ngadto sa tawo,” ang Ginoo miingon, “. . . nga ang yuta makatuman sa katuyoan sa iyang pagkalalang” (Doktrina ug mga Pakigsaad 49:15–16). Niini, Iyang plano, syempre, nagsukwahi sa pipila ka lig-on nga kalibutanong mga pwersa sa balaod ug kustombre.

Ang gahum sa paglalang og mortal nga kinabuhi maoy labing mahimayaong gahum nga gihatag sa Dios ngadto sa Iyang mga anak. Ang paggamit niini gipatuman diha sa unang sugo ngadto kang Adan ug Eva, apan ang laing importante nga sugo gihatag aron sa pagpugong sa sayop nga paggamit niini. Gawas sa mga bugkos sa kaminyoon, ang tanang paggamit sa gahum sa paglalang dako man o gamay usa ka makasasala nga paghugaw ug pagtuis sa labing balaang kinaiya sa tawo. Ang gibug-aton nga gibutang sa gipahiuli nga ebanghelyo niining balaod sa kaputli kay tungod sa katuyoan sa gahum sa paglalang diha sa pagtuman sa plano sa Dios.

Unsay Sunod?

Atol niining ika-200 nga anibersaryo sa Unang Panan-awon, nga mipasugda sa Pagpahiuli, kita nasayud



Olmué, Marga Marga, Chile

sa plano sa Ginoo ug kita gidasig sa duha ka siglo sa mga panalangin niini pinaagi sa Iyang gipahiuli nga Simbahan. Niining tuig 2020, kita adunay unsay inilang gitawag nga 20/20 nga panan-awon alang sa mga panghitabo sa nangagi.

Samtang kita molantaw sa umaabot, hinoon, ang atong panan-aw dili kaayo klaro. Kita nasayud nga duha ka siglo human sa Pagpahiuli, ang kalibutan sa espiritu karon naglakip na sa daghang sinati sa mortalidad nga mga trabahador sa pagtuman sa pagsangyaw nga nahitabo didto. Kita usab nasayud nga kita karon adunay mas daghan nga templo sa pagpahigayon sa mga ordinansa sa kahangturan alang niadtong maghinulsol ug modawat sa ebanghelyo sa Ginoo sa isig ka kilid sa tabil sa kamatayon. Kining tanan mopauswag sa plano sa atong Langitnong Amahan. Ang gugma sa Dios malukpanon kaayo nga, gawas lang sa pipila kinsa tuyo gayud nga nagpakahimong mga anak sa kapildihan, Siya nag-andam og padulngan sa himaya alang sa Iyang tanang anak.(tan-awa sa Doktrina ug mga Pakigsaad 76:43).

Kita nasayud nga ang Manluluwas mobalik ug nga adunay usa ka milenyum sa malinawong paghari sa pagtapos sa mortal nga bahin sa plano sa Dios. Kita usab nasayud nga adunay lainlaing pagkabanhaw sa mga matarung ug dili matarung, uban sa katapusang paghukom sa matag tawo nga kanunay magsunod sa iyang pagkabanhaw.

Kita pagahukman sumala sa atong mga aksyon, sa tinguha sa atong kasingkasing, ug sa matang sa pagkatawo nga atong nakabot. Kini nga paghukom mohimo sa tanang mga anak sa Dios nga makapadayon ngadto sa usa ka gingharian sa himaya diin ang ilang pagkamasulundon mihimong angayan nila ug diin sila mahimong komportable. Ang maghuhukom niining tanan mao ang atong Manluluwas, si Jesukristo (tan-awa sa Juan 5:22; 2 Nephi 9:41). Ang Iyang pagkasayud sa tanan naghatag Niya og hingpit nga kahibalo sa tanan natong mga buhat ug mga tinguha, kadtong mga wala pa mahinulsuli o wala pa mausab ug kadtong nahinulsolan na o matarung. Busa, human sa Iyang paghukom kitang tanan mokumpisal “nga ang iyang mga paghukom mga makiangayon” (Mosiah 16:1).

Sa pagtapos, ako mopaambit sa kombiksyon nga miabut kanako gikan sa daghang mga sulat ug sa pagribyu sa daghang mga hangyo nga mobalik sa Simbahan human sa pagtangtang sa ngalan o apostasiya. Daghan sa atong mga miyembro wala hingpit nga nakasabut niining plano sa kaluwasan, nga nagtubag sa kadaghanang pangutana bahin sa doktrina ug dinasig nga mga polisiya sa gipahiuli nga Simbahan. Kita kinsa nasayud sa plano sa Dios ug kinsa nakigsaad nga moapil adunay klaro nga responsibilidad sa pagtudlo niining mga kamatuoran ug sa pagbuhat sa atong tanang mahimo aron mas masabtan kini sa uban ug diha sa atong kaugalingong mga kahimtang sa mortalidad. Ako mopamatuod ni Jesukristo, atong Manluluwas ug Manunubos, kinsa mihimo niining tanan nga posible, sa ngalan ni Jesukristo, amen. ■

MUBO NGA SULAT

1. “Ang Pagpahiuli sa Kahingpitan sa Ebanghelyo ni Jesukristo: Usa ka Pamahayag ngadto sa Kalibutan sa Ikaduhang Siglo nga Kasaulogan,” sa Russell M. Nelson, “Paminaw Kaniya,” *Liahona*, Mayo 2020, 91.



Ni Elder Quentin L. Cook
Sa Korum sa Napulog Duha ka mga Apostoles

Ang Panalangin sa Nagpadayon nga Pagpadayag ngadto sa mga Propeta ug sa Personal nga Pagpadayag aron sa Paggiya sa Atong Kinabuhi

Ang nagpadayon nga pagpadayag nadawat ug gidawat pa pinaagi sa mga pamaagi nga giestablisar sa Ginoo.

Karon mamulong ako kalabut sa nagpadayon nga pagpadayag ngadto sa mga propeta ug sa nagpadayon nga personal nga pagpadayag aron sa paggiya sa atong kinabuhi.

Usahay makadawat kita og pagpadayag bisan kon wala kita masayud sa mga katuyoan sa Ginoo. Sa wala pa matawag si Elder Jeffrey R. Holland nga mahimong Apostol



San Bernardo, Santiago, Chile

niadtong Hunyo 1994, duna akoy nindot nga kasinatian sa pagpadayag nga siya pagatawag. Usa ako ka regional representative kaniadto ug walay nakitang rason nga hatagan ako niana nga kahibalo. Apan nagkauban kami isip batan-ong mga misyonaryo sa England sa sayong bahin sa 1960, ug dako ang akong gugma alang kaniya. Akong gikonsiderar ang kasinatian nga malumo nga kalooy alang kanako. Sa bag-o lang nga katuigan, naghunahuna ko kon giandam ba ko sa Ginoo nga mahimong junior diha sa Napulog Duha ngadto sa talagsaong misyonaryo nga kauban kinsa akong junior companion sa dihang batan-on pa kami nga mga misyonaryo.¹ Akong pasidan-an usahay ang batan-ong mga misyonaryo nga magmabination ngadto sa ilang mga junior companion tungod kay wala gayud sila mahibalo basin mahimo unya kini nilang senior companion.

Ako adunay lig-ong pagpamatuod nga kining gipahiuli nga Simbahan gigiyahan sa atong Manluluwas, si Jesukristo. Nasayud Siya kinsa ang tawagon isip Iyang mga Apostoles ug sa unsang han-ay sila pagatawag. Nasayud usab Siya unsaon sa pagandam sa Iyang senior nga Apostol nga mahimong propeta ug Presidente sa Simbahan.

Napanalanginan kita karong buntaga nga makadungog sa atong pinalanggang propeta, si Presidente Russell M. Nelson, nga mihatag og seryusong pamahayag ngadto sa kalibutan sa ikaduhang siglo nga kasaulogan kalabut sa Pagpahiuli sa kahingpitan sa ebanghelyo ni Jesukristo.² Kining importanting deklarasyon ni Presidente Nelson nagklaro nga ang kagikan, pagkaanaa, ug direksyon alang sa umaabut sa Simbahan ni Jesukristo anaa tungod sa baruganan sa nagpadayon nga pagpadayag. Kining bag-ong pamahayag nagrepresentar sa komunikasyon sa usa ka mahigugmaong Amahan ngadto sa Iyang mga anak.

Sa milabay nga panahon, si Presidente Spencer W. Kimball mipahayag

sa mga pagbati nga aduna ako karon. Miingon siya: “Sa tanang mga butang, nga kita kinahanglan nga labing mapasalamaton . . . mao nga ang mga langit sa tinuoray naabli na gayud ug nga ang gipahiuli nga simbahan ni Jesukristo natukod diha sa bato sa pagpadayag. Ang nagpadayon nga pagpadayag sa pagkatinuod mao ang mismong dugo sa kinabuhi sa ebanghelyo sa buhing Ginoo ug Manluluwas, nga si Jesukristo.”³

Si propeta Enoch nakakita nang daan sa panahon diin kita nagpuyo. Ang Ginoo miangkon ngadto kang Enoch sa hilabihang kaudatan nga mokuyanap ug nanagna sa “dako nga mga katalagman” nga mahitabo. Bisan pa, ang Ginoo misaad, “Apan ang akong mga katawhan Ako mopatunhay.”⁴ “Ug pagkamatarung Ako mopakanaog gikan sa langit, ug kamatuoran Ako mopadala gikan sa yuta, aron sa pagpamatuod sa akong Bugtong Anak.”⁵

Si Presidente Ezra Taft Benson mitudlo uban sa dakong gahum nga ang Basahon ni Mormon, ang sukaranan sa atong tinuohan, mitungaha gikan sa yuta agig pagtuman sa gipamulong sa Ginoo ngadto ni Enoch. Ang Amahan ug ang Anak ug mga anghel ug mga propeta nga mipakita ngadto ni Propeta Joseph Smith “gigiyahan sa langit sa pagpahiuli sa gikinahanglan nga mga gahum ngadto sa gingharian.”⁶

Si Propeta Joseph Smith nakadawat og daghang nagsunod nga mga pagpadayag. Ang uban gihisgutan dinhi niini nga komperensya. Daghang mga pagpadayag nga nadawat ni Propeta Joseph gipreserbar alang kanato diha sa Doktrina ug mga Pakigsaad. Ang tanang sumbanan nga mga basahon



sa Simbahan naglangkob sa hunahuna ug kabubut-on sa Ginoo alang kanato niining katapusang dispensasyon.⁷

Agig dugang niining talagsaong sukaranan nga mga kasulatan, napanalanginan kita sa nagpadayon nga pagpadayag ngadto sa buhi nga mga propeta. Ang mga propeta “sinugo nga mga tinugyanan sa Ginoo, gitugutan nga mamulong alang Kaniya.”⁸

Ang ubang mga pagpadayag hilabihan ka importante, ug ang uban nakadugang sa atong pagsabut sa mahinungdanon nga balaanong mga kamatuoran ug naghatag og giya sa atong panahon.⁹

Mapasalamaton kaayo kita sa pagpadayag ngadto ni Presidente Spencer W. Kimball nga naghatag sa mga panalangin sa pagkapari ug templo ngadto sa tanang takus nga lalaki nga mga miyembro sa Simbahan niadtong Hunyo 1978.¹⁰

Nakaserbisyo ko uban sa daghan sa Napulog Duha kinsa anaa kaniadto ug miapil sa dihang nadawat kana nga bililhong pagpadayag. Ang matag usa kanila, sa personal nga mga pakig-istorya, mikumpirma sa gamhanan ug makahiusa nga espirituhanong giya nga nasinati nila ug ni Presidente Kimball. Daghan ang miingon nga kadto ang labing gamhanang pagpadayag nga ilang nadawat sa wala pa o human niana nga panahon.¹¹

Kami nga nagserbisyo karon sa Korum sa Napulog Duha ka mga Apostoles napanalanginan sa among panahon samtang ang mahinungdanong mga pagpadayag miabut pinaagi sa bag-ohay nga mga propeta.¹² Si Presidente Russell M. Nelson usa ka sinugo nga tinugyanan sa Ginoo *ilabi na* kon kalabut sa mga pagpadayag sa pagtabang sa mga pamilya sa pagtukod og mga santuwaryo sa pagtuo diha sa ilang mga panimalay, pagpundok sa nagkatibulaag nga Israel sa duha ka habig sa tabil, ug pagpanalangin sa natugahan nga mga miyembro diha sa sagrado nga mga ordinansa sa templo.

Sa dihang ang importanting mga kausaban sa pagpanalangin sa atong mga panimalay gipahibalo niadtong Oktubre 2018 nga kinatibuk-ang komperensya, nagpamatuod ko “nga sa mga deliberasyon sa Konseho sa Unang Kapangulohan ug Korum sa Napulog Duha ka mga Apostoles didto sa templo, . . . human nangamuyo sa Ginoo ang atong minahal nga propeta alang sa pagpadayag . . . , usa ka gamhanang kumpirmasyon ang nadawat sa tanan.”¹³

Niana nga panahon, ang ubang pagpadayag kalabut sa sagrado nga mga ordinansa sa templo nadawat apan wala ipahibalo o i-implementar.¹⁴ Kini nga giya nagsugod sa indibidwal nga mapanagnaong pagpadayag ngadto ni Presidente Russell M. Nelson ug sa malumo ug kusganong kumpirmasyon ngadto niadtong miapil sa proseso. Si Presidente Nelson pihong milakip sa mga sister nga nangulo sa mga organisasyon sa Relief Society, Young Women, ug Primary. Ang katapusang giya, diha sa templo, ngadto sa Unang Kapangulohan ug sa Korum sa Napulog Duha ka mga Apostoles hilabihan ka espirituhanon ug kusganon. Matag usa kanamo nasayud nga among nadawat ang hunahuna, kabubut-on, ug tingog sa Ginoo.¹⁵

Ako modeklarar sa tumang kaligdong nga ang nagpadayon nga pagpadayag nadawat ug gidawat pa pinaagi sa mga pamaagi nga giestablisar sa Ginoo. Ako mopamatuod nga

ang bag-ong pamahayag nga gihatag ni Presidente Nelson karong buntaga usa ka pagpadayag nga mopanalangin sa tanang tawo.

Among Dapiton ang Tanan sa Pagbusog diha sa Lamesa sa Ginoo

Kami usab mopahayag sa among kinasingkasing nga tinguha nga mahiusa pag-usab niadtong nanglimbasug sa ilang mga pagpamatuod, dili na kaayo aktibo, o gipatangtang ang ilang mga ngalan sa mga rekord sa Simbahan. Kami nagtinguha nga magpakabusog uban ninyo “sa mga pulong ni Kristo” diha sa lamesa sa Ginoo, aron makat-on sa mga butang nga kinahanglang buhaton natong tanan.¹⁶ Nagkinahanglan kami kaninyo! Ang Simbahan nagkinahanglan kaninyo! Ang Ginoo nagkinahanglan kaninyo! Among kinasingkasing nga pag-ampo nga moapil kamo kanamo sa pagsimba sa Manluluwas sa kalibutan. Kami nasayud nga ang pipila kaninyo tingali nakasinati og pagkasilo, pagpanglupig, o ubang binuhatan nga dili Kristohanon. Kami usab nasayud nga ang pipila adunay mga hagit sa ilang pagtuo nga tingali wala sa hingpit mamatnguni, masabti, o maresolbar.

Ang pipila sa atong labing lig-on ug matinud-anon nga mga miyembro nag-antus og hagit sa ilang pagtuo sulod sa usa ka panahon. Ganahan ko sa tinuod nga istorya ni W. W. Phelps, kinsa misalikway sa Simbahan ug mipamatuod batok ni Propeta Joseph Smith sa usa ka korte sa Missouri. Human maghinulsol, misulat siya ngadto ni Joseph, “Nasayud ako sa akong sitwasyon, nasayud kamo niini, ug ang Dios nasayud niini, ug gusto ko nga maluwas kon ang akong mga higala motabang kanako.”¹⁷ Si Joseph mipasaylo kaniya, mipatrabaho kaniya og balik, ug mapinanggaong misulat, “Managhigala sa sinugdanan mga higala pag-usab sa katapusan.”¹⁸

Mga kaigsoonan, bisan unsa pa ang inyong sitwasyon, palihug hibalo ni nga ang Simbahan ug mga miyembro niini mohangup kaninyo og balik!

Personal nga Pagpadayag nga Mogiya sa Atong Kinabuhi

Ang personal nga pagpadayag maanaa sa tanan kinsa mapaubsanong magtinguha og giya gikan sa Ginoo. Kini sama kaimportante sa pagpadayag nga nadawat pinaagi sa propeta. Ang personal, espirituhanong pagpadayag gikan sa Espiritu Santo mire-sulta sa minilyon nga nakadawat og pagpamatuod nga gikinahanglan aron mabunyagan ug makumpirmahan nga mga miyembro sa Ang Simbahan ni Jesukristo sa mga Santos sa Ulahing mga Adlaw.

Ang personal nga pagpadayag mao ang dakong panalangin nga mada-wat human sa bunyag sa dihang kita “pagasantoson pinaagi sa pagdawat sa Espiritu Santo.”¹⁹ Akong mahinumduman ang usa ka espesyal nga espirituhanong pagpadayag sa dihang 15 anyos pa ako. Ang akong minahal nga igsoong lalaki nagtinguha og giya gikan sa Ginoo kon unsaon sa pagtubag ang among pinanggag amahan, kinsa dili gusto nga magmision ang akong igsoon. Ako usab nag-ampo sa kinasingkasing ug nakadawat og personal nga pagpadayag sa kamatuoran sa ebanghelyo.

Ang Tahas sa Espiritu Santo

Ang personal nga pagpadayag nakabase sa espirituhanon nga mga kamatuoran nga nadawat gikan sa Espiritu Santo.²⁰ Ang Espiritu Santo mao ang tigpadayag ug tigpamatuod sa tanang kamatuoran, ilabi na sa Manluluwas. Kon wala ang Espiritu Santo, kita dili gayud masayud nga si Jesus mao ang Kristo. Ang Iyang importanting tahas mao ang pagsaksi mahitungod sa Amahan ug sa Anak ug sa Ilang mga titulo ug sa Ilang himaya.

Ang Espiritu Santo makaimpluwensya sa tanan sa gamhanang paagi.²¹ Kini nga impluwensya dili magpadayon gawas kon ang tawo mabunyagan ug makadawat sa gasa sa Espiritu Santo. Ang Espiritu Santo nagsilbi usab nga makalimpyong gahum sa proseso sa paghinulsol ug kapasayloan.

Ang Espiritu mopahayag sa talagsaon nga mga paagi. Ang Ginoo

migamit niining maanindot nga paghulagway:

“Ako mosulti kanimo diha sa imong hunahuna ug sa imong kasing-kasing, pinaagi sa Espiritu Santo, nga moabut diha kanimo ug nga mopuyo diha sa imong kasingkasing.

“Karon, tan-awa, kini mao ang espiritu sa pagpadayag.”²²

Bisan kon ang impluwensya niini hilabihan ka gamhanan, kasagaran nga moabut kini sa ligdong, hina-gawhaw nga tingog.²³ Ang mga kasulatan naglakip og daghang ehemplo kon sa unsang paagi ang Espiritu mo-impluwensya sa atong hunahuna, lakip ang pagpamulong og kalinaw sa atong hunahuna,²⁴ pag-okupar sa atong hunahuna,²⁵ paglamdag sa atong hunahuna,²⁶ ug gani pagpadala og tingog sa atong hunahuna.²⁷

Ang pipila ka baruganan nga nag-andam kanato sa pagdawat og pagpadayag naglakip sa:

- Pag-ampo alang sa espirituhanong giya. Sa matinahuron ug mapaub-sanong paagi kita kinahanglang magtinguha ug mangayo²⁸ ug mag-mapailubon ug manunuton.²⁹
- Pagpangandam alang sa inspirasyon. Kini nagkinahanglan nga nahiuyon kita sa mga pagtulun-an sa Ginoo ug nagsunod sa Iyang mga sugo.
- Takus nga pag-ambit sa sakramento. Kon ato kining buhaton, kita mosaksi ug mopakigsaad sa Dios

nga kita modala diha sa atong kaugalingon sa ngalan sa Iyang balaang Anak ug nga kita mohinumdom Kaniya ug mosunod sa Iyang mga sugo.

Kini nga mga baruganan nag-andam kanato sa pagdawat, pag-ila, ug pagsunod sa aghat ug giya sa Espiritu Santo. Kini naglakip sa “malinawon nga mga butang . . . nga nag-dala og hingpit nga kalipay [ug] . . . kinabuhi nga dayon.”³⁰

Ang atong espirituhanong pagpangandam mapalambo pag-ayo kon kanunay kitang magtuon sa mga kasulatan ug mga kamatuoran sa ebanghelyo ug mamalandong diha sa atong hunahuna sa giya nga atong gitinguha. Apan hinumdumi nga mag-mapailubon ug mosalig sa panahon sa Ginoo. Ang giya ihatag sa Ginoo nga nahibalo sa tanan kon Siya “tuyo nga motudlo kanato.”³¹

Pagpadayag diha sa Atong mga Calling ug mga Buluhaton

Ang Espiritu Santo mohatag usab og pagpadayag diha sa atong mga calling ug mga buluhaton. Sa akong kasinatian, ang mahinungdanong espirituhanong giya kasagarang moabut kon maningkamot kita sa pagpanalangin sa uban diha sa pagtuman sa atong mga responsibilidad.

Makahinumdom ko isip batanong bishop nga nakadawat og desperadong tawag gikan sa usa ka

magtiayon sa hapit na ko mosakay og eroplano alang sa usa ka sabut sa negosyo. Nangamuyo ko sa Ginoo sa wala pa sila moabut aron masayud unsaon nako sa pagpanalangin kani-la. Gipadayag ngari nako ang matang sa problema ug ang tubag nga angay nakong ihatag. Kanang mapadayagong giya nagtugot kanako sa pagtuman sa sagradong mga responsibilidad sa akong calling isip bishop bisan pa sa kalimitado sa panahon. Ang mga bishop sa tibuok kalibutan adunay susama kanako nga mga matang sa mga kasinatian. Isip stake president, wala lamang ako makadawat og importanting pagpadayag apan nakadawat usab og personal nga *pagkorihir* nga gikinahanglan aron matuman ang mga katuyoan sa Ginoo.

Akong isiguro kaninyo nga ang mapadayagong giya mahimong madawat sa matag usa kanato samtang mapaubsaon kitang maghago diha sa ubasan sa Ginoo. Kadaghanan sa atong giya magagikan sa Espiritu Santo. Usahay ug alang sa pipila ka mga katuyoan, direkta kining magagikan sa Ginoo. Personal akong mopamatuod nga tinuod kana. Ang giya alang sa Simbahan, sa kinatibukan, moabut diha sa Presidente ug propeta sa Simbahan.

Kami, isip moderno nga mga Apostoles, adunay pribilehiyo nga makatrabaho ug makauban sa pagbiyahe ang atong propeta karon, si Presidente Nelson. Akong lahion pagsulti ang giingon ni Wilford Woodruff mahitun-god ni Propeta Joseph Smith; masulti usab kini ngadto ni Presidente Nelson. Akong nakita ang “mga gibuhad sa Espiritu sa Dios uban kaniya, ug sa mga pagpadayag ni Jesukristo ngadto kaniya ug ang katumanan niadto nga mga pagpadayag.”³²

Ang akong mapaubsanong pangamuyo karon mao nga ang matag usa kanato magtinguha sa nagpadayong pagpadayag nga mogiya sa atong kinabuhi ug mosunod sa Espiritu samtang mosimba kita sa Dios nga Amahan sa ngalan sa atong Manluluwas, si Jesukristo, kang kinsa



Rexburg, Idaho, USA



ako mosaksi sa ngalan ni Jesukristo, amen. ■

MUBO NGA MGA SULAT


1. Niadtong 1960 sa dihang ang edad alang sa misyonaryo nga pagserbisyo alang sa batan-ong mga lalaki gipaubsan gikan sa 20 ngadto sa 19 anyos ang panuigon, usa ako sa katapusang mga 20 anyos; si Elder Jeffrey R. Holland maoy usa sa nag-una nga mga 19 anyos.
2. Tan-awa sa “Ang Pagpahiuli sa Kahingpitan sa Ebanghelyo ni Jesukristo: Usa ka Pamahayag ngadto sa Kalibutan sa Ikkaduhang Siglo nga Kasaulogan,” sa Russell M. Nelson, “Paminaw Kaniya,” *Liahona*, Mayo 2020, 91. Kini nga pamahayag miapil sa lima pa nga gihatag niini nga dispensasyon pinaagi sa Unang Kapangulohan ug sa Korum sa Napulog Duha ka mga Apostoles.
3. *Mga Pagtulun-an sa mga Presidente sa Simbahan: Spencer W. Kimball* (2006), 303; tan-awa usab sa Mateo 16:13–19.
4. Moises 7:61.
5. Moises 7:62. Ang Ginoo mipadayon, “Ug pagkamatarung ug kamatuoran Ako mosugo nga mosilhi sa yuta ingon sa usa ka lunop, aron pagpundok sa akong pinili gikan sa upat ka mga suok sa yuta” (Moises 7:62; tan-awa usab sa Salmo 85:11).
6. Ezra Taft Benson, “The Gift of Modern Revelation,” *Ensign*, Nob. 1986, 80.
7. Tan-awa sa Ezra Taft Benson, “The Gift of Modern Revelation,” 80.
8. Hugh B. Brown, “Joseph Smith among the Prophets” (Sixteenth Annual Joseph

Smith Memorial Sermon, Logan Institute of Religion, Dis. 7, 1958), 7.

9. Tan-awa sa Hugh B. Brown, “Joseph Smith among the Prophets,” 7. Sa tanang sitwasyon, ang mga pagpadayag nahuyon sa pulong sa Dios nga gihatag sa mga propeta kaniadto.
10. Tan-awa sa Opisyal nga Pahayag 2; tan-awa usab sa 2 Nephi 26:33. Ang pagpadayag miimplementar sa doktrina nga naestablisar diha sa Basahon ni Mormon nga “ang tanan managsama ngadto sa Dios,” lakip ang “itum ug puti, ulipon ug gawasnon, lalaki ug babaye” (2 Nephi 26:33). Kining talagsaong pagpadayag nadawat ug nakumpirma diha sa sagrado nga ibabaw nga lawak sa Templo sa Salt Lake sa Konseho sa Unang Kapangulohan ug Korum sa Napulog Duha ka mga Apostoles.
11. Daghan sa mga Apostoles mipahayag nga ang pagpadayag hilabihan ka gamhanan ug sagrado nga ang bisan unsang pulong nga gamiton sa paghulagway niini dili igo ug, sa ubang paagi, makapaminos sa halawom ug gamhanan matang sa pagpadayag.
12. Tan-awa sa “Ang Pamilya: Usa ka Pamahayag ngadto sa Kalibutan,” *Liahona*, Mayo 2017, 145. Kini nga pamahayag gipahibalo ni Presidente Gordon B. Hinckley diha sa kinatibuk-ang miting sa Relief Society nga gipahigayon niadtong Septyembre 23, 1995, sa Siyudad sa Salt Lake, Utah. Tan-awa usab sa Thomas S. Monson, “Welcome sa Komperensya,” *Liahona*, Nob. 2012, 4–5. Si Presidente Monson mipahibalo sa mas

ubos nga edad nga gikinahanglan alang sa misyonaryo nga pagserbisyo.

13. Quentin L. Cook, “Lig-on ug Malungtarong Pagkakabig ngadto sa Langitnong Amahan ug kang Ginoong Jesukristo,” *Liahona*, Nob. 2018, 11.
14. Ang mga pinadayag kalabut sa sagradong mga ordinansa sa templo giimplementar sa tanang templo sugod niadtong Enero 1, 2019. Importante nga masabtan nga ang piho nga mga detalye mahitungod sa mga ordinansa sa templo hisgutan lamang diha sa templo. Hinoon, ang mga baruganan itudlo. Si Elder David A. Bednar nindot nga mitudlo sa kamahinungdanon sa mga pakigsaad ug mga ordinansa sa templo ug sa unsang paagi nga pinaagi niini “ang gahum sa pagkadiosnon modagayday sa atong kinabuhi” (“Himoa Kini nga Balay nga Matukod ngadto sa Akong Ngalan,” *Liahona*, Mayo 2020, 86).
15. Kini nga proseso ug ang mga miting nga gipahigayon nahitabo diha sa Templo sa Salt Lake niadtong Enero, Pebrero, Marso, ug Abril 2018. Ang katapusang pagpadayag ngadto sa Unang Kapangulohan ug sa Korum sa Napulog Duha ka mga Apostoles nahitabo niadtong Abril 26, 2018.
16. Tan-awa sa 2 Nephi 32:3.
17. *Mga Santos: Ang Istorya sa Simbahan ni Jesukristo sa Ulahing mga Adlaw*, vol. 1, *Ang Sumbanan sa Kamatuoran, 1815–1846* (2018), 476.
18. *Mga Santos*, 1:476.
19. 3 Nephi 27:20.
20. Ang Espiritu Santo usa ka sakop sa Dios nga Kapangulohan (tan-awa sa 1 Juan 5:7; Doktrina ug mga Pakigsaad 20:28). Siya adunay lawas nga espiritu sa porma ug pagkasusama sa tawo (tan-awa sa Doktrina ug mga Pakigsaad 130:22). Ang Iyang impluwensya maanaa bisan asa. Siya mahiusa diha sa katuyoan sa atong Langitnong Amahan ug ni Jesukristo, atong Manluluwas.
21. Alang sa komprehensibo nga pagsabut mahitungod sa Kahayag ni Kristo ug ang kalainan tali sa Kahayag ni Kristo ug sa Espiritu Santo, tan-awa sa 2 Nephi 32; Doktrina ug mga Pakigsaad 88:7, 11–13; “Kahayag ni Kristo,” Giya ngadto sa mga Kasulatan. Tan-awa usab sa, Boyd K. Packer, “Ang Kahayag ni Kristo,” *Liahona*, Abr 2005, 8–14.
22. Doktrina ug mga Pakigsaad 8:2–3.
23. Tan-awa sa Helaman 5:30; Doktrina ug mga Pakigsaad 85:6.
24. Tan-awa sa Doktrina ug mga Pakigsaad 6:23.
25. Tan-awa sa Doktrina ug mga Pakigsaad 128:1.
26. Tan-awa sa Doktrina ug mga Pakigsaad 11:13.
27. Tan-awa sa Enos 1:10.
28. Tan-awa sa Mateo 7:7–8.
29. Tan-awa sa Mosiah 3:19.
30. Doktrina ug mga Pakigsaad 42:61.
31. Neal A. Maxwell, *All Things Shall Give Thee Experience* (2007), 31.
32. Wilford Woodruff, sa *Mga Pagtulun-an sa mga Presidente sa Simbahan: Joseph Smith* (2007), 342.



By Elder Ricardo P. Giménez
Sa Seventy

Pagpangita og Kadangpan gikan sa mga Kalisud sa Kinabuhi

Si Jesukristo ug ang Iyang Pag-ula mao ang dangpanan nga gikinahanglan natong tanan, bisan pa sa mga kalisud nga miabut sa atong kinabuhi.

Niadtong tunga-tunga sa mga 1990, atol sa akong pag-eskwela sa kolehiyo, kabahin ako sa Fourth Company sa Departamento sa Bombero sa Santiago sa Chile. Samtang nagserbisyo didto, ako nagpuyo sa estasyon sa bombero isip kabahin sa bantay sa gabii. Sa hinapos sa tuig, ako gisultihan nga kinahanglan nga ako naa sa estasyon sa bombero sa Bisperas sa Bag-ong Tuig tungod kay nianang adlaw adunay gayuy mga emerhensya. Nasurprisa, ako mitubag, “Mao ba?”

Hinoon, ako nahinumdom nga naghulat uban sa akong kauban sa dihang, pagkatungang gabii, nagsugod na sa pagbuto-buto sa siyudad sa Santiago. Kami nagginaksanay nga nanghinaut og kaayuhan alang sa bag-ong tuig. Sa kalit ang mga kampana sa estasyon sa bombero nagsugod sa pagtingog, timailhan nga dunay emerhensya. Kami mikuha sa among ekipog ug misakay sa trak. Sa among pagpadulong sa emerhensya, sa among paglabay sa pundok sa mga tawo nga nagsaulog sa bag-ong tuig, ako

nakamatikod nga sila walay pagpakabana ug walay pagtagad. Sila relaks ra ug nalingaw sa mainit nga kagabhion sa ting-init. Apan sa duol, ang mga tawo nga gidali namo sa pagtabang anaa sa seryoso nga problema.

Kini nga kasinatian nakatabang nako nga makaamgo nga bisan ang atong kinabuhi usahay nindot ra, ang panahon moabut sa matag usa nato nga kita mag-atubang sa wala paabuta nga mga hagit ug mga kalisud nga mosangko na sa atong abilidad sa paglahutay. Pisikal, mental, pamilya, ug panarbaho nga mga hagit; natural nga mga katalagman; ug ubang mga butang sa kinabuhi o kamatayon mao ang pipila ka mga ehemplo sa mga kalisud nga atong atubangon niini nga kinabuhi.

Kon nag-atubang niini nga mga kalisud, kita sa kasagaran makasinati og mga pagbati nga walay paglaum o kahadlok. Si Presidente Russell M. Nelson miingon, “Tungod kay ang hugot nga pagtuo mao man ang tambal sa kahadlok”—*pagtuo diha sa atong Ginoong Jesukristo* (“Ipakita ang Inyong Pagtuo,” *Liahona*, May 2014, 29). Sa akong pagkakita sa mga kalisud nga nakaapekto sa mga kinabuhi sa mga tawo, ako nakaingon nga bisan unsa pay matang sa kalisud ang moigo kanato—bisan adunay kasulbaran niini o katapusan—adunay usa lamang ka kadangpan, ug kini mao ra alang sa tanang matang sa mga kalisud. Kining bugtong dangpanan nga gihatag sa atong Langitnong Amahan mao ang atong Ginoo nga si Jesukristo ug ang Iyang Pag-ula.

Walay usa kanato nga makalikay sa pag-atubang niini nga mga kalisud. Si Helaman, usa ka propeta sa Basahon ni Mormon, mitudlo kanato sa mosunod: “Hinumdumi, hinumdumi nga kini diha sa lig-on nga sukaranan sa atong Manunubos kinsa mao si Kristo, ang Anak sa Dios, nga kamo kinahanglan gayud nga motukod sa inyong tukuranan; nga sa panahon nga ang yawa mopadala sa iyang mapintas nga mga hangin, oo, sa iyang mga pana diha sa alimpulos, oo, sa diha nga ang tanan niya nga ulan nga yelo ug ang iyang mapintas nga unos, mohampak diha kaninyo, kini walay gahum ibabaw kaninyo sa pagbitad kaninyo ngadto sa bungaw sa pagkauyamot ug walay katapusan nga pagkaalaot, tungod sa lig-on nga



Oslo, Norway

sukaranan diin kamo natukod nga mao ang tinuod nga tukuranan, usa ka tukuranan diin kon ang mga tawo magtukod dili sila mapukan” (Helaman 5:12).

Si Elder Robert D. Hales, kinsa adunay iyang kaugalingong kasinatian sa mga kalisud, miingon, “Ang pag-antus anaa sa tanan; sa unsa nga paagi kita molihok niini iya sa indibidwal. Ang pag-antus makahatag kanato og usa sa duha ka mga paagi. Kini mahimong usa ka makapalig-on ug makapaputli nga kasinatian inubanan sa hugot nga pagtuo, o kini makaguba nga pwera sa atong mga kinabuhi kon kita walay hugot nga pagtuo diha sa maulaong sakripisyo sa Ginoo” (“Your Sorrow Shall Be Turned to Joy,” *Ensign*, Nob. 1983, 66).

Aron makatagamtam sa dangpanan nga gitanyag ni Jesukristo ug sa Iyang Pag-ula, kinahanglan kitang magbaton og hugot nga pagtuo diha Kaniya—ang usa ka hugot nga pagtuo makahatag nato og abilidad sa pagbuntog sa tanang mga kasakit sa limitado, yutanong panglantaw. Siya misaad nato nga Siya mopagaan sa atong luwan kon kita moduol ngadto Kaniya sa atong tanang nga buhaton.

“Umari kanako”, Siya miingon, “kamong tanan nga nabudlay ug nabug-atan, ug papahulayon ko kamo.

“Isangon ninyo ang akong yugo diha kaninyo, ug pagtuon kamo gikan kanako; kay ako maaghup ug mapaubsanon sa kasingkasing; ug makakaplag kamog pahulay alang sa inyong mga kalag.

“Kay masayon ang akong yugo, ug magaan ang akong luwan” (Mateo 11:28–30; tan-awa usab sa Mosiah 24:14–15).

Ginaingon nga “sa usa ka tawo nga adunay hugot nga pagtuo, wala kinahanglana ang pagpasabut. Sa usa ka tawo nga walay hugot nga pagtuo, walay pagpasabut ang posible.” (This statement has been attributed to Thomas Aquinas but is most likely a loose paraphrase of things he taught.) Hinoon, kita dunay limitado nga pagsabut sa mga butang nga nahitabo dinhi sa yuta, ug sa kasagaran kita walay mga tubag sa pangutana nga *ngano*. Nganong nahitabo man kini? Nganong nahitabo man kini *kanako*? Unsay angay nakong makat-unan? Kon dili kita makakita sa mga tubag, mao nga ang mga pulong nga gipadayag sa atong Manluluwas ngadto ni Propeta Joseph Smith didto sa Bilangoan sa Liberty hingpit nga magamit:

“Akong anak, kalinaw nganha sa imong kalag; ug ang imong kalisdanan ug ang imong mga kasakitan sulod lamang sa mubo nga higayon;

“Ug unya, kon ikaw molahutay pag-ayo, ang Dios mobayaw kanimo

sa kahitas-an” (Doktrina ug mga Pakigsaad 121:7–8).

Bisan daghang mga tawo ang nagtuo *ni* Jesukristo, ang importante nga pangutana mao kon kita ba *nagtuo* Kaniya ug kon kita ba *nagtuo* sa mga butang nga Iyang gitudlo nato ug gisugo nga atong buhaton. Tingali dunay maghunahuna, “Unsay nahibaloan ni Jesukristo unsay nahitabo kanako? Giunsa Niya pagkahibalo unsay akong gikinahanglan aron magmalipayon?” Sa tinuod, ang atong Manunubos ug Tigpataliwala ang gipasabut ni propeta Isaias sa dihang siya miingon:

“Gitamay siya ug gisalikway sa mga tawo; usa ka tawo sa mga kasub-anan, ug nakasinati sa pag-antus. . . .

“Sa pagkamatuod gipas-an niya ang atong kasakitan, ug gipas-an niya ang atong mga kasub-anan. . . .

“Apan siya gisamaran alang sa atong mga kalapasan, siya diha sa napangos tungod sa atong mga kasal-anan, ang silot sa atong pakigdait diha sa ibabaw niya; ug tungod sa iyang mga labod kita nangaayo” (Isaias 53:3–5).

Si Apostol Pedro mitudlo usab nato mahitungod sa Manluluwas, nag-ingon, “Siya gayud mao ang midala sa atong mga sala diha sa iyang lawas ngadto sa kahoy, aron kita mamatay, ngadto sa sala ug mabuhi ngadto sa pagkamarung. Pinaagi sa Iyang mga samad kamo nangaayo” (1 Pedro 2:24).

Bisan og nagsingabut ang panahon sa kaugalingong pagkamartir ni Pedro, ang iyang mga pulong walay kahadlok o pagduha-duha; hinoon, siya mitudlo sa mga Santos sa “paglipay,” bisan og sila anaa “sa kabug-at tungod sa daghang mga tintasyon.” Si Pedro mitambag kanato sa paghinumdom nga “ang pagkatinuod sa [atong] pagtuo, . . . nga ginasulayan pinaagig kalayo” mosangpot ngadto “sa pagdalayeg ug paghimaya ug pagpasidungog kaninyo inigpadayag na unya kang Jesukristo” ug sa “kaluwasan sa [atong] mga kalag” (1 Pedro 1:6–7, 9).

Si Pedro mipadayon:

“Mga hinigugma, ayaw kamo paghikurat sa magasilaob nga kalisdanan nga magaabut sa pagsulay kaninyo, nga kaha pagaingnon ninyo nga usa



ka talagsaong butang ang nahitabo kaninyo:

“Magalipay hinoon kamo sumala sa pagpakaambit sa mga kasakit ni Kristo, aron kamo magakalipay usab ug magasadyaon inigpadayag na unya sa iyang himaya” (1 Pedro 4:12–13).

Si Presidente Russell M. Nelson mitudlo nga ang “mga Santos mahimong magmalipayon sa bisan unsang kahimtang. . . . Kon ang sentro sa atong kinabuhi anaa sa plano sa Dios sa kaluwasan . . . ug ni Jesukristo ug sa Iyang ebanghelyo, mobati kita og kamaya bisan unsa pay mahitabo—o wala manghitabo—sa atong kinabuhi. Ang kalipay moabut gikan ug tungod Kaniya. Siya ang tinubdan sa tanang kalipay” (“Hingpit nga Kalipay ug Espirituhanon nga Pagsugakod,” *Liahona*, Nob. 2016, 82).

Dayag lang, mas sayon ang pagsulti niining mga butanga kon kita wala sa taliwala sa kalisud kay sa pagpuyo ug paggamit niini panahon sa kalisud. Apan isip inyong igsoon, ako manghinaut nga kamo mobati nga ako sinsero nga mopaambit uban ninyo kon unsa ka bililhon ang pagkahibalo nga si Jesukristo ug ang Iyang Pag-ula mao ang dangpanan nga gikinahanglan natong tanan, bisan pa sa mga kalisud nga miabut sa atong kinabuhi.

Ako nasayud nga kitang tanan mga anak sa Dios, nga Siya nahigugma kanato, ug nga kita wala maginusara. Ako modapit kaninyo dali ug tan-awa Siya mopagaan sa inyong mga luwan ug mahimong dangpanan nga inyong gipangita. Dali ug tabang sa uban nga makakaplag og dangpanan nga ilang gitinguha pag-ayo. Dali ug pabilin uban namo niini nga dangpanan, nga motabang ninyo sa pagpakigbatok sa mga kalisud sa kinabuhi. Walay pagduha-duha sa akong kasingkasing nga kon kamo moduol, kamo makakita, kamo makatabang, ug kamo magpabilin.

Si propeta Alma mipamatuod sa mosunod ngadto sa iyang anak nga si Helaman: “Ako nasayud nga kinsa ang mobutang sa ilang pagsalig diha sa Dios pagabuligan sa ilang mga pag-sulay ug sa ilang mga kasamok, ug sa



ilang mga kasakit, ug pagabayawon sa katapusan nga adlaw” (Alma 36:3).

Ang Manluluwas Mismo miingon:

“Busa, himoa nga ang inyong mga kasingkasing mahupay . . . z; kay ang tanan nga mga tawo ania sa akong mga kamot; pagmalinawon ug hibalo nga Ako mao ang Dios. . . .

“Busa, ayaw kahadlok bisan ngadto sa kamatayon; kay dinhi niini nga kalibutan ang imong kalipay dili hingpit, apan kanako hingpit ang imong kalipay.” (Doktrina ug mga Pakigsaad 101:16, 36).

Ang himno nga “Akong Kalag, Magmalinawon,” nga nakapatandog sa akong kasingkasing sa daghang okasyon, adunay mensahe sa kahupayan alang sa atong kalag. Ang mga pulong mabasa sama sa mosunod:

*Akong kalag magmalinawon ka
Sa kahangturan Dios kauban ta,*

*Kasubo ug kahadlok wala na,
Mobalik na ang putli nga gugma.
Akong kalag: magmalinawon ka,
Imong higala kay lipayon ka.
(Mga Himno, nu. 70)*

Sa atong pag-atubang sa mga kalisud sa kinabuhi, ako nasayud nga kon kita mohimo sa atong labing maayong paningkamot ug mosalig kang Jesukristo ug sa Iyang Pag-ula isip atong dangpanan, kita mapanalaninan og kahupayan, kalig-on, kontrol, ug kalinaw nga atong gitinguha, uban ang kasiguroan sa atong mga kasingkasing nga sa katapusan sa atong panahon dinhi sa yuta, maka-dungog kita sa mga pulong sa atong Magtutudlo: “Maayong pagkabuhat, maayo ug kasaligan nga ulipon: . . . dumuyog ka sa kalipay sa imong agalon” (Mateo 25:21). Sa ngalan ni Jesukristo, amen. ■



Olmué, Marga Marga, Chile



Ni Elder Dieter F. Uchtdorf
Sa Korum sa Napulog Duha ka mga Apostoles

Dali ug Pasakop

Kami modapit sa tanang mga anak sa Dios sa tibuok kalibutan sa pagpakig-uban namo niining dakong buluhaton.

Minahal kong kaissoonan, minahal kong mga higala, matag semana, ang mga miyembro sa Ang Simbahan ni Jesukristo sa mga Santos sa Ulahing mga Adlaw sa tibuok kalibutan mosimba sa atong minahal nga Langitnong Amahan, ang Dios ug Hari sa uniberso, ug sa Iyang Pinalanggang Anak, si Jesukristo. Kita mamalandong sa kinabuhi ug mga pagtulun-an ni Jesukristo—ang bugtong walay sala nga sukad nabuhi, ang walay lama nga Kordero sa Dios. Kutob sa atong mahimo, kita moambit sa sakramento agig paghinumdom sa Iyang sakripisyo ug makaila nga Siya ang sentro sa atong kinabuhi.

Kita nahigugma Kaniya ug kita nagtahud Kaniya. Tungod sa Iyang dako ug mahangturong gugma, si Jesukristo nag-antus ug namatay alang kaninyo ug kanako. Siya miabli sa mga ganghaan sa kamatayon, migu-ba sa nag-ulang mga bong-bong nga mibulag sa mga higala ug mga minahal,¹ ug midala og paglaum sa walay paglaum, miayo sa masakiton, ug kagawasan sa binilanggo.²

Ngadto Kaniya kita mohalad sa atong kasingkasing, sa atong kinabuhi, ug sa atong inadlaw nga debosyon. Tungod niini nga rason “[kita] naghisgot mahitungod kang Kristo, [kita]

nalipay diha kang Kristo, [kita] nagsangyaw mahitungod kang Kristo . . . nga ang [atong] mga anak mahimo nga masayud sa unsa nga tinubdan sila mahimo nga mangita alang sa kapasayloan sa ilang mga sala.”³

Pagbansay sa Pagkadisipulo

Hinoon, ang pagkadisipulo ngadto ni Jesukristo labaw pa sa pagsulti ug pagsangyaw ni Kristo. Ang Manluluwas Mismo mipahiuli sa Iyang Simbahan aron sa pagtabang nato diha sa dalan nga mahimong mas sama Kaniya. Ang Simbahni ni Jesukristo sa mga Santos sa Ulahing mga Adlaw gitukod aron

sa paghatag og mga oportunidad sa pagbansay sa sukaranan sa pagkadisipulo. Pinaagi sa atong pag-apil diha sa Simbahan, kita makat-on sa pag-ila ug pagsunod sa mga aghat sa Balaan nga Espiritu. Kita nagpalambo sa kinaiya sa pagtabang pinaagi sa kalooy ug pagkamabination ngadto sa uban.

Kini mao ang usa ka paningkamot sa tibuok kinabuhi, ug kini nagkinahanglan og pagbansay.

Ang malampusong mga atleta nagpahin og daghang mga oras sa pagbansay sa mga sukaranan sa ilang sport. Ang mga nurse, mga networker, mga enhinyero sa nuclear, ug gani ako isip tigluto sa kusina ni Harriet makamao ug mahanas lamang kon kita magkugi sa pagbansay sa atong trabaho.

Isip usa ka kapitan sa eroplano, ako sa kasagaran mobansay og mga piloto gamit ang flight simulator—usa ka makuti nga makina nga nagkopya sa kasinatian sa paglupad. Ang simulator dili lamang makatabang sa mga piloto nga makat-on sa mga sukaranan sa pagpalupad; kini usab makahatag nila og kasinatian ug sa pagtubag sa wala paabuta nga mga panghitabo nga ilang masugatan kon sila na ang magdumala sa tinuod nga eroplano.

Mao usab ang samang baruganan alang sa mga disipulo ni Jesukristo.

Aktibong pag-apil sa Simbahan ni Jesukristo ug sa daghang nagkalainlain nga oportunidad niini makatabang nato nga mas makaandam alang sa nagkausab nga mga sirkumstansya



Millcreek, Utah, USA

sa kinabuhi, bisan unsa man kini. Isip mga miyembro sa Simbahan, kita giawhag sa pagsubsob sa atong kaugalingon diha sa mga pulong sa Dios pinaagi sa Iyang mga propeta, karaan ug moderno. Pinaagi sa sinsero ug mapainubsanong pag-ampo ngadto sa atong Langitnong Amahan, kita makat-on sa pag-ila sa tingog sa Balaang Espiritu. Kita modawat og mga tawag sa pagserbisyo, pagtudlo, pagplano, ug pagpangalagad. Kini nga mga oportunidad nagtugot nato nga motubo diha sa espiritu, hunahuna, ug kinaiya.

Kini makatabang nato sa pag-andam sa paghimo ug pagtuman sa sagrado nga mga pakigsaad nga mopanalangin nato niini nga kinabuhi ug sa kinabuhi nga moabut.

Dali, Pakig-uban Kanamo!

Kami modapit sa tanang mga anak sa Dios sa tibuok kalibutan sa pagpakig-uban namo niining dakong buluhaton. Dali ug tan-awa! Bisan atol niining mahagiton nga panahon sa COVID-19, pakigkita namo sa online. Pakigkita sa among mga misyonaryo sa online. Susiha sa inyong kaugalingon unsa kini nga Simbahan! Kon kining malisud nga panahon mola-bay, pakigkita namo sa among mga panimalay ug sa among mga dapit sa pagsimba!

Kami modapit kaninyo sa pagduol ug pagtabang! Dali ug serbisyo uban namo, mangalagad sa mga anak sa Dios, magsunod sa mga tunob sa Manluluwas, ug sa paghimo niini nga kalibutan nga mas maayo nga dapit.

Dali ug pasakop! Kamo makahimo namo nga mas lig-on. Ug kamo mahimong mas maayo, mas mabination, ug mas malipayon usab. Ang inyong hugot nga pagtuo molawom ug motubo nga mas malig-on—mas makahimo sa pagbatok sa kagubot ug sa wala damha nga mga pagsulay sa kinabuhi.

Ug unsaon nato sa pagsugod? Adunay daghang posible nga mga paagi.

Kami modapit kaninyo sa pagbasa sa Basahon ni Mormon. Kon kamo walay kopya, kamo makabasa niini sa ChurchofJesusChrist.org⁴ o i-download

ang Book of Mormon app. Ang Basahon ni Mormon mao ang laing tugon ni Jesukristo ug usa ka kompanyon sa Daan ug Bag-ong Tugon. Kami nagmahal niining balaan nga mga kasulatan ug magkat-on gikan niini.

Kami modapit kaninyo sa paggahin og panahon sa ComeuntoChrist.org sa pagsusi unsay gitudlo ug gituohan sa mga miyembro sa Simbahan.

Dapita ang mga misyonaryo sa pagbisita ninyo sa online o sa pribado diha sa inyong panimalay kon kini posible—sila adunay mensahe sa paglaum ug pagkaayo. Kini nga mga misyonaryo mao ang among bililhong mga anak nga lalaki ug babaye kinsa nagserbisyo sa daghang mga dapit sa tibuok kalibutan sa ilang kaugalingong panahon ug kwarta.

Sa Simbahan ni Jesukristo, kamo makakita og pamilya sa mga tawo nga dili kaayo lahi gikan ninyo. Kamo makakita og mga tawo nga kinahanglan sa inyong tabang ug gustong motabang ninyo samtang kamo maningkamot nga mahimong labing maayong bersyon sa inyong kaugalingon—ang tawo nga gilalang sa Dios aron mahimo.

Ang Pagdawat sa Manluluwas Gipadangat Kanatong Tanan

Kamo tingali maghunahuna, “Ako nakahimo og mga sayop sa akong kinabuhi. Ako dili makasiguro kon ako mobati ba nga nahisakop sa Simbahan ni Jesukristo. Ang Dios dili interesado sa tawo nga sama nako.”

Si Jesukristo, bisan Siya mao ang “Hari sa mga hari,”⁵ ang Mesiyas, ang Anak sa buhing Dios,⁶ nagpakabana pag-ayo sa matag usa nga mga anak sa Dios. Siya nagpakabana bisan pa sa posisyon sa tawo—unsa ka kabus o ka datu, unsa ka dili hingpit o namatud-an nga ang usa ka tawo dili hingpit. Atol sa iyang mortal nga kinabuhi, ang Manluluwas nangalagad sa tanan: ngadto sa malipayon ug malampuson, ngadto sa masulub-on ug nahisalaag, ug ngadto sa nawad-an og paglaum. Sa kasagaran, ang mga tawo nga Iyang gipangalaganan dili mga indibidwal nga inila, matahum,

o adunahan. Sa kasagaran, ang mga tawo nga Iyang gibayaw walay ikasikli kon dili ang pagpasalamat lamang, mapainubsanong kasingkasing, ug tinguha sa hugot nga pagtuo.

Kon si Jesus migahin sa Iyang mortal nga kinabuhi sa pagpangalagad ngadto “sa labing gagmay niini,”⁷ dili ba Siya mohigugma nila karon? Wala bay luna sa Iyang Simbahan alang sa tanang mga anak sa Dios? Bisan kad-tong mibati nga dili takus, gikalimtan, o nag-inusara?

Walay piho nga ang-ang sa pagkahingpit nga inyong kab-uton aron angayan sa grasya sa Dios. Ang inyong mga pag-ampo dili kinahanglan nga kusog o larino o saktong grammar aron moabut sa langit.

Sa tinuod, ang Dios walay pinalabi⁸—ang mga butang nga dunay bili sa kalibutan walay bili ngadto Kaniya. Siya nasayud sa inyong kasingkasing, ug Siya nahigugma kaninyo bisan pa sa inyong titulo, sa gidaghanon sa kwarta, o sa mga sumusunod sa Instagram.

Sa atong pagpatumong sa atong mga kasingkasing ngadto sa atong Langitnong Amahan ug magpaduol Kaniya, kita mobati Kaniya nga nagpaduol ngari kanato.⁹

Kitang tanan Iyang hinigugma nga mga anak.

Bisan kad-tong misalikway Kaniya.

Bisan kad-tong, gahig ulo, lisud kontrolahon nga anak, nasuko sa Dios ug sa Iyang Simbahan, ingnon ta nga miputos sa ilang mga bag, ug daling mipalayo namahayag nga sila mopahilayo ug dili na mobalik.

Kon ang usa ka anak mopahilayo sa panimalay, siya tingali dili makamatikod sa nabalaka nga mga ginikanan nga nagtan-aw sa may bintana. Uban sa malumong mga kasingkasing, sila nagtan-aw sa ilang anak nga mola-kaw—naglaum nga ang ilang anak makakat-on gikan niining makapasakit nga kasinatian ug makakita sa kinabuhi sa bag-ong panglantaw—ug sa katapusan mopauli.

Mao usab kini sa atong mahigugmaong Langitnong Amahan. Siya naghulat sa atong pagbalik.

Ang inyong Manluluwas, ang mga luha sa gugma ug kalooy sa Iyang mga mata, naghulat sa inyong pagbali. Bisan kon kamo mobati nga layo gikan sa Dios, Siya makakita kaninyo, Siya adunay kalooy kaninyo ug modagan aron sa paggakus kaninyo.¹⁰

Dali ug pasakop.

Ang Dios Motugot Nato nga Makat-on gikan sa Atong mga Sayop

Kita mga pilgrim [nagbiyahi padulong sa balaang dapit] nga naglakaw sa dalan sa pagkamortal sa pagpangita sa kahulugan ug sa kamatuoran. Sa kasagaran, ang tanan natong makita mao ang dalan sa unahan—kita dili makakita asa padulong ang likoanan. Ang atong mahigugmaong Langitnong Amahan wala mohatag nato sa tanang tubag. Siya misalig nga masulbad nato ang mga hagit pinaagi sa atong paningkamot. Siya nagpaabut nato nga motuo—bisan lisud ang pagbuhat sa ingon.

Siya nagpaabut nato sa paglihok uban ang pagsalig ug pagpalambo og kadasig—ug kalig-on—nga mopadayon pag usab.

Mao kana ang paagi nga kita makat-on ug motubo.

Sa tinuod gusto ba kamo nga ang tanan ipasabut sa matag detalye? Sa tinuod gusto ba kamo nga ang matag pangutana natubag? Ang matag destinasyon giplano?

Ako nagtuo nga kadaghanan nato dali kaayo nga kapuyon niini nga matang sa langitnong pagdumala. Kita makat-on sa importante nga mga leksyon sa kinabuhi pinaagi sa kasi-natian. Pinaagi sa pagkat-on gikan sa atong mga sayop. Pinaagi sa paghinulsol ug pagkaamgo alang sa atong kaugalingon nga ang “pagkadautan dili mahitabo nga kalipay.”¹¹

Si Jesukristo, ang Anak sa Dios, namatay aron nga ang atong mga sayop dili mokondenar nato ug sa kahangturan mahunong ang atong kauswagan. Tungod Kaniya, kita makahinulsol, ug ang atong mga sayop mahimong makatabang ngadto sa mas dakong kalipay.

Kamo dili kinahanglan nga maglakaw niini nga dalan nga mag-inusara.

Ang atong Langitnong Amahan wala mobiya nato aron maglatagaw sa langitngit.

Mao nga, sa tingpamulak niadtong 1820, Siya nagpakita uban sa Iyang Anak, nga si Jesukristo, ngadto sa batan-on, nga si Joseph Smith.

Hunahunaa kana sa makadiyot! Ang Dios sa uniberso nagpakita ngadto sa tawo!

Kini mao ang una sa daghang panagtagbo ni Joseph uban sa Dios ug sa ubang langitnong mga binuhat. Daghan sa mga pulong niining balaan nga mga binuhat nga gipamulong ngadto kaniya narekord diha sa mga kasulatan sa Ang Simbahan ni Jesukristo sa mga Santos sa Ulahing mga Adlaw. Kini sayon ra nga makuha. Si bisan kinsa ang makabasa niini ug makat-on alang sa ilang kaugalingon sa mensahe sa Dios alang kanato sa atong panahon.

Kami nagdapit kaninyo sa pagtuon niini alang sa inyong kaugalingon.

Si Joseph Smith batan-on pa sa dihang siya nakadawat niini nga mga pagpadayag. Kadaghanan kanila miabut sa wala siya mag 30 anyos.¹² Siya kulang sa kaalam, ug sa pipila ka tawo, siya tingali ingon og dili kwalipikado nga mahimong propeta sa Ginoo.

Ug sa gihapon ang Ginoo mitawag kaniya—nagsunod sa usa ka sumbanan nga atong makita sa tibuok balaan nga mga kasulatan.

Ang Dios wala maghulat nga mangita og hingpit nga tawo aron ipahiuli ang Iyang ebanghelyo.

Kon naghulat pa Siya, Siya naghulat pa gihapon.

Si Joseph sama kaayo kaninyo ug kanako. Bisan og si Joseph nakahimo og mga sayop, ang Dios migamit kaniya sa pagtuman sa Iyang importante nga mga katuyoan.

Si Presidente Thomas S. Monson sa kasagaran mobalik-balik niini nga mga pulong sa tambag: “Kinsa ang tawagon sa Ginoo, ang Ginoo mopasarang.”¹³

Si Apostol Pablo mirason uban sa mga Santos sa Corinto: “Kay palandunga ra ang pagtawag kaninyo,

mga igsoon: dili daghan kaninyo ang manggialamon sumala sa sukdanan nga kinalibutanon, dili daghan ang makagagahum; dili daghan ang mga hamili sa pagkatawo.”¹⁴

Ang Dios migamit sa huyang ug sa yano sa pagpahinabo sa Iyang mga katuyoan. Kini nga kamatuoran nagbarug isip pagpamatuod nga kini ang gahum sa Dios, dili sa tawo, nga nakahimo sa Iyang buhat sa yuta.¹⁵

Paminaw Kaniya, Sunod Kaniya

Sa dihang ang Dios nagpakita ngadto ni Joseph Smith, Siya mipaila sa Iyang Anak, si Jesukristo, ug mi-ingon, “Paminaw Kaniya.”¹⁶

Si Joseph migahin sa nahibilin sa iyang kinabuhi nga nagpaminaw Kaniya ug nagsunod Kaniya.

Sama sa nahitabo ni Joseph, ang atong pagkadisipulo nagsugod sa desisyon sa pagpaminaw sa Manluluwas nga si Jesukristo.

Kon kamo nagtinguha sa pagsunod Kaniya, lig-una ang inyong pagtuo ug pas-ana ang Iyang krus.

Kamo makahibalo nga kamo *gayud* nahisakop sa Iyang Simbahan—usa ka dapit sa mainit ug maabi-abihon diin kamo makaapil sa talagsaong pagtinguha sa pagkadisipulo ug kalipay.

Akong panghinaut nga, niining ikaduha ka gatus ka tuig nga kasa- ulogan sa Unang Panan-awon, sa atong pagpamalandong ug pagkat-on sa Pagpahiuli sa Simbahan ni Jesukristo, kita makaamgo nga dili lang kini usa ka makasaysayanong hitabo.



Oslo, Norway

Ikaw ug ako adunay importante nga bahin niining, talagsaon, nagpada-yon nga istorya.

Unsay bahin ninyo ug nako?

Mao ang pagkat-on bahin ni Jesukristo. Sa pagtuon sa Iyang mga pulong. Sa pagsunod Kaniya pinaagi sa aktibong pag-apil niining talag-saong buhat. Ako modapit kaninyo nga dali ug pasakop!

Kamo dili kinahanglan nga hing-pit. Kamo kinahanglan lamang nga adunay tinguha sa pagpalambo sa inyong pagtuo ug magpaduol ngad-to Kaniya matag adlaw.

Ang atong bahin mao ang paghi-gugma ug pagserbisyo sa Dios ug sa paghigugma ug pagserbisyo sa mga anak sa Dios.

Kon buhaton ninyo, ang Dios molibut kaninyo sa Iyang gugma, kalipay, ug piho nga giya pinaagi niini nga kinabuhi, bisan ubos sa labing seryoso nga mga sirkumstan-sya, ug lapas pa.

Niini ako mopamatuod, ug mobi-lin sa akong panalangin ug dakong pasalamat ug gugma alang sa matag usa kaninyo, sa sagradong ngalan sa atong Manluluwas, sa atong Agalon—pinaagi sa ngalan ni Jesu-kristo, amen. ■

MUBO NGA MGA SULAT

1. Tan-awa sa Mga Taga-Efeso 2:13–14.
2. Tan-awa sa Lucas 4:18.
3. 2 Nephi 25:26.
4. Tan-awa sa Basahon ni Mormon sa ChurchofJesusChrist.org/study/scriptures/bofm.
5. 1 Timoteo 6:15.
6. Tan-awa sa Mateo 16:15–17.
7. Mateo 25:40.
8. Tan-awa sa Mga Buhat 10:34.
9. Tan-awa sa Doktrina ug mga Pakigsaad 88:63.
10. Tan-awa ang reaksyon sa amahan kinsa nakakita sa pagbalik sa iyang nawala nga anak sa Lucas 15:20.
11. Alma 41:10.
12. Pananglitan, sa 138 ka seksyon sa Doktrina ug mga Pakigsaad, labaw sa 100 ka mga pagpadayag ang nadawat ni Joseph Smith sa wala pa ang iyang ika-30 nga adlaw nga natawhan, niadtong Disyembre 23, 1835.
13. Thomas S. Monson, “Duty Calls,” *Ensign*, Mayo 1996, 44.
14. 1 Mga Taga-Corinto 1:26.
15. Tan-awa sa 1 Mga Taga-Corinto 1:28–29; 2 Mga Taga-Corinto 4:7.
16. Joseph Smith—Kasaysayan 1:17.



Ni Elder L. Whitney Clayton
Sa Kapanguloan sa Seventy

Ang Labing Nindot nga mga Panimalay

Ang Manluluwas mao ang hingpit nga inhenyero, tigtukod, ug ang pangsulod nga tigdisenyo. Ang Iyang proyekto mao ang pagkahingpit ug ang mahangturong kalipay sa atong mga kalag.

Bag-uhay lang dunay billboard diha sa Siyudad sa Salt Lake nga nakadani sa akong panan-aw. Pahinumdom kini sa usa ka kasangkapan sa panimalay ug kompanya sa pangsulod nga disenyo. Yano kining pagkasulti, “Nag-alagad sa Labing Nindot nga mga Panimalay sa Siyudad sa Salt Lake.”

Ang mensahe tulukibon—unsa ang “labing nindot nga panimalay”? Ako naghunahuna niana nga pangutana, ilabi na kalabut sa mga anak nga ang akong asawa, si Kathy, ug Ako mipadako ug sa mga anak nga ilang gipadako karon. Sama sa mga ginika-nan bisan asa, kami nabalaka ug nag-ampo para sa among pamilya. Kami nabalaka gihapon. Kami matinguhaon kaayo sa labing maayo alang kanila. Sa unsang paagi nga sila ug ang ilang mga anak makapuyo sa labing nindot nga mga panimalay? Ako namalan-dong bahin sa mga panimalay sa mga miyembro sa Simbahan nga si Kathy ug ako nakahigayon sa pagbisita. Kami nadapit ngadto sa mga pani-malay didto sa Korea ug Kenya, sa Pilipinas ug Peru, sa Laos ug Latvia.

Tuguti ko nga mopaambit og upat ka obserbasyon mahitungod sa kinanin-dotang mga panimalay.

Una, gikan sa panglantaw sa Ginoo, ang pag-establisar sa labing nindot nga mga panimalay dunay kalabutan sa personal nga mga kali-dad sa mga tawo nga nagpuyo diha. Kining mga panimalay wala napa-nindot sa bisan unsang importante o molungtad nga paagi tungod sa ilang mga kasangkapan sa panimalay o pinaagi sa net worth o sosyal nga kahimtang sa mga tawo nga nanag-iya niini. Ang labing nindot nga matang sa bisan unsang panimalay mao ang imahe ni Kristo nga makita sa mga nagpuyo. Unsay importante mao ang pangsulod nga kinaiya sa mga kalag sa nagpuyo, dili ang estruktura mismo.

Ang mga hiyas ni Kristo maangkon diha sa “proseso sa panahon”¹ pinaagi sa tinuyo nga pag-uswag subay sa dalan sa pakigsaad. Ang Kristohanon nga hiyas modayan-dayan sa mga kinabuhi niadtong kinsa naningkamot sa pagpakabuhi uban sa kamaayo. Kini mopuno sa mga panimalay sa

kahayag sa ebanghelyo, bisan pa ang salog gama sa lapok o marmol. Bisan kon ikaw lang ang tawo sa inyong panimalay nga nagsunod sa pahimangno sa “pagpangita niini nga mga butang,”² ikaw nakatampo sa espirituhanong mga kagamitan sa inyong pamilya nga panimalay.

Kita nagsunod sa tambag sa Ginoo nga “[ihan-ay] ang [atong mga kaugalingon]; [andamon] ang matag butang nga kinahanglanon; ug [magtukod] ug usa ka balay,” pinaagi sa paghan-ay, pagpangandam, ug pag-establisar sa atong espiritual nga kinabuhi, dili ang atong kabtangan. Kon mapailubon kita nga magsubay sa dalan sa pakigsaad sa Manluluwas, ang atong mga panimalay mahimong “usa ka balay sa himaya, usa ka balay sa kahusay, [ug] usa ka balay sa Dios.”³

Ikaduha, ang mga residente sa labing nindot nga mga panimalay mogahin og panahon sa pagtuon sa kasulatan ug sa mga pulong sa buhing mga propeta sa matag adlaw. Si Presidente Russell M. Nelson midapit kanato sa “pag-usab” ug “pagbag-o” sa atong mga panimalay pinaagi sa pagtuon sa ebanghelyo.⁴ Ang Iyang pagdapat moila nianang kinanindotang mga panimalay nga pinuy-anan sa malumo, buhat nga mahinungdanon sa personal nga paglambo ug moayo sa atong mga kahuyang. Ang inadlaw nga paghinulsol mao ang himan sa transpormasyon nga makapahimo kanato sa paglambo og diyutay nga kamabination, mas mahigugmaon, ug mas masinabtanon. Ang pagtuon sa mga kasulatan makapaduol kanato ngadto sa Manluluwas, kansang manggihatagon nga gugma ug grasya makatabang kanato sa atong pagtubo.

Ang Biblia ug ang Basahon ni Mormon ug Ang Perlas nga Labing Bililhon nagsugilon kabahin sa pamilya, mao nga dili ikahibulong nga kadtong balaanon nga kadaghanon dili ikatandi sa mga tamdanan nga basahon para sa pagtukod og labing nindot nga mga panimalay. Kini nagtala sa kabalaka sa mga ginikanan, sa mga kakuyaw sa tintasyon, ang kalampusan sa pagkamatarung, sa

mga pagsulay sa kagutom ug kaabunda, ug sa kabangis sa gubat ug mga ganti sa kalinaw. Gibalik-balik sa mga kasulatan sa pagpakita nato kon giunsa sa mga pamilya nga milampos pinaagi sa matarung nga pagpakabuhi ug sa unsang paagi nga sila napukan tungod sa pagsubay sa laing dalan.

Ikatulo, ang nindot nga panimalay mosunod sa plano nga gimugna sa Ginoo alang sa Iyang labing nindot nga panimalay, ang templo. Ang pagtukod og usa ka templo magsugod sa nag-unang mga lakang—paghawan sa mga sagbot ug pagpatag sa yuta. Kadtong pasiunang mga paningkamot sa pag-andam sa luna tingali ikatandi sa paghupot sa sukaranang mga kasugoan. Ang mga kasugoan mao ang pundasyon diin ang pagkadisipulo matukod. Ang makanunayon nga pagkadisipulo modala kanato sa pagkahimong ligdong, makanunayon, ug dili matarug,⁵ sama sa puthaw nga bayanan alang sa templo. Kining lig-on nga bayanan nakapahimo sa Ginoo sa pagpadala sa Iyang Espiritu aron sa pag-usab sa atong mga kasingkasing.⁶ Ang pagsinati og dakong kausaban sa kasingkasing sama sa pagdugang og matahum nga hiyas(disenyo) sa sulod sa usa ka templo.

Kon kita mopadayon diha sa hugot nga pagtuo, ang Ginoo sa hinay-hinay nga mousab kanato. Atong madawat ang Iyang imahe sa atong mga panagway ug mosugod sa pagpamalandong sa gugma ug katahum sa Iyang kinaiya.⁷ Samtang kita mamahimong sama Kaniya, mobati kita og kahupay diha sa Iyang panimalay, ug Siya mobati og kahupay sa atong kaugalingon.

Kita makapabilin sa atong suod nga koneksyon sa panimalay ngadto sa Iyang panimalay pinaagi sa pagpasarang ug sa kanunayng paggamit og usa ka rekomend sa templo kutob sa itugot sa kahigayunan. Sa atong pagbuhay sa ingon, ang kabalaan sa balay sa Ginoo mopuyo usab diha sa atong balay.

Ang maanindot kaayo nga Salt Lake Temple nagbarug sa duol. Natukod pinaagi sa mga pioneer gamit ang mantiner nga mga kahimanan,

lokal nga mga materyales, ug walay katapusang grabing pagtrabaho, ang templo gitukod gikan niadtong 1853 hangtud 1893. Ang labing maayo nga gikadalit sa mga miyembro sa Simbahan sa pagka-inhenyero, arkitektura, ug sa pangsulod nga disenyo nakapahimo sa usa ka obra maestra nga giila sa minilyon.

Dul-an sa 130 ka tuig na ang milabay sukad ang templo napahinungod. Sama sa nahisgutan ni Elder Gary E. Stevenson gahapon, ang mga baruganan sa pagka-inhenyero nga gigamit sa pagdisenyo sa templo napulihan sa mas bag-o, mas luwas nga mga sumbanan. Ang kapakyas sa pagpalambo sa pag-inhenyero sa templo ug sa pag-ayo sa mga huyang nga estruktura magsilbing pagluib sa pagsalig sa mga pioneer, kinsa mihimo sa tanan ug dayon mitugyan sa pag-atiman sa templo ngadto sa misunod nga mga henerasyon.

Ang Simbahan mipadayon sa proyekto nga upat ka tuig nga pagpahuli aron sa pagpalambo sa estruktura sa templo ug sa kalig-on batok sa paglihok sa yuta (seismic).⁸ Ang pundasyon, mga salog, ug mga bungbong gipalig-on. Ang labing maayo nga kahibalo sa pagka-inhenyero nga anaa karon makasarang sa templo ngadto sa moderno nga mga sumbanan. Kita dili makahimo sa pagtanaw sa mga kausaban sa estruktura, apan ang mga epekto niini mahimong tinuod ug importante. Sa tanan niining buhat, ang matahum nga disenyo sa pangsulod nga bahin sa templo gitagana.

Kita kinahanglan mosunod sa ehemplo nga nahatag ngari kanato pinaagi sa pagpabag-o sa Salt Lake Temple ug mogahin og panahon sa pagtimbang-timbang sa atong kaugalingong espirituhanong pang-inhenyero nga kalig-on aron sa pagsiguro nga kini kanunayng bag-o. Ang matag karon ug unya nga pagsusi sa kaugalingon, inubanan sa pagpangutana sa Ginoo, “Unsa pay akong kulang?”⁹ makatabang sa matag-usa nato nga makatampo sa pagtukod sa kinanindotang panimalay.

Ikaupat, ang labing nindot nga mga panimalay mao ang mga dangpanan gikan sa mga unos sa kinabuhi. Ang Ginoo misaad nga kadtong kinsa maghupot sa mga sugo sa Dios “mouswag diha sa yuta.”¹⁰ Ang kauswagan sa Dios mao ang gahum sa pagpadayon bisan sa mga problema sa kinabuhi.

Niadntong 2002 nakat-on ko og usa ka importante nga leksyon mahitungod sa mga problema. Samtang didto sa Asunción, Paraguay, nakighimamat ko sa mga presidente sa stake sa siyudad. Nianang panahona, ang Paraguay nagsagubang og grabing krisis nga pinansyal, ug daghang mga miyembro sa Simbahan ang nag-antus ug dili na makapalit sa panginahanglan. Wala pa ko nakaadto sa South America sukad sa akong misyon ug wala pa gayud nakaadto sa Paraguay. Nakaserbisyo ko diha sa Kapangulohan sa Area sulod pa lang sa pipila ka semana. Maduha-duhaon mahitungod sa akong kawalay abilidad sa paggiya niadtong mga presidente sa stake, mihangyo ko nila sa pagsulti kanako kon unsay maayong nahitabo sa ilang mga stake. Ang unang presidente sa stake misulti nako mahitungod sa mga butang nga maayong nahitabo. Ang sunod naghisgot sa mga butang nga maayong nahitabo ug pipila ka mga problema. Sa higayon nga naabut na kami sa katapusang presidente sa stake, siya naghisgut lang og mga serye sa makapungot nga mga hagit. Samtang nagpasabut ang mga presidente sa stake sa kagrabe sa sitwasyon, naganam ko og kabalaka, hapit nadesperado, kabahin sa unsa ang isulti.

Sa dihang ang katapusang presidente sa stake mahuman na sa iyang mga komento, adunay misantop sa akong hunahuna: “Elder Clayton, pangutan-a sila: ‘Mga presidente, sa mga miyembro sa inyong stake nga nagbayad og hingpit nga ikapulo, nagbayad og madagayaong halad sa puasa, nagbuhat sa ilang mga calling sa Simbahan, naghimo gayud sa ilang pagbisita sa mga pamilya isip mga home teacher o mga visiting teacher¹¹

matag bulan, nagpahigayon og home evening, nagtuon sa mga kasulatan, ug nag-ampo isip pamilya sa matag adlaw, pila man nila ang dunay problema nga dili sila makasulbad sa ilang kaugalingon nga dili kinahanglan moapil ang Simbahan ug mosulbad sa ilang mga problema alang kanila?”

Misunod sa impresyon nga akong nadawat, akong gipangutana ang mga presidente sa stake niana nga pangutana.

Mitan-aw sila nako sa nasurprisa nga kahilum ug dayon miingon, “Pues, *ninguno*,” pasabut nga, “Kuan, wala.” Dayon misulti sila nako nga wala sa mga miyembro nga nagbuhat sa tanan niadtong butang nga adunay mga problema nga dili sila makahimo pagsulbad sa ilang kaugalingon. Ngano? Tungod kay sila nagpuyo sa labing nindot nga mga panimalay. Ang ilang matinud-anon nga pamuyo nakahatag kanila og kusog, pananawon, ug langitnong tabang nga ilang gikinahanglan sa paglahutay sa ekonomikanhong kalisdanan nga nagpalibut kanila.

Kini wala nagpasabut nga ang matarung dili na masakit, mag-antus og aksidente, magsagubang og pagkaparot sa negosyo, o magsagubang og daghan pang kalisdanan sa kinabuhi. Ang mortalidad kanunayng dunay mga hagit, apan sa matag karon ug unya ako nakakita nga kadtong naningkamot sa pagtuman sa mga sugo mao ang mabulahan sa ilang pagpadayon inubanan sa kalinaw ug paglaum. Kadto nga mga panalangin, maanaa alang sa tanan.¹²

Si David namahayag, “Gawas nga ang Ginoo magatukod sa balay, kawang lamang ang kahago niadtong mga nagtukod niini”¹³ Bisana man mo nagpuyo, bisan unsa man ang hitsura sa inyong balay, ug bisan unsa man ang komposisyon sa inyong pamilya, kamo makatabang sa pagtukod sa kinanindotan nga panimalay alang sa inyong pamilya. Ang gipahiuli nga ebanghelyo ni Jesukristo naghatag sa mga plano alang niana nga panimalay. Ang Manluluwas mao ang hingpit nga

inhenyero, tigtukod, ug ang pangsulod nga tigdisenyo. Ang Iyang proyekto mao ang pagkahingpit ug ang mahangturong kalipay sa atong mga kalag. Uban sa Iyang mahigugmaong tabang, ang inyong mga kalag mahimong mao lang ang Iyang gusto nga mamahimo ug kamo mahimong ang labing maayong bersyon sa inyong kaugalingon, andam sa pagtukod ug pagpuyo sa usa ka labing nindot nga panimalay.

Ako mapasalamaton nga mopamatuod nga ang Dios ug Amahan natong tanan buhi. Ang Iyang Anak, ang Ginoong Jesukristo, mao ang Manluluwas ug Manunubos sa tanang katawhan. Sila nahigugma kanato sa hingpit. Ang Simbahan ni Jesukristo sa mga Santos sa Ulahing mga Adlaw mao ang gingharian sa Ginoo dinhi sa yuta. Ang mga buhing propeta ug mga apostoles naggiya niini karon. Ang Basahon ni Mormon tinuod. Ang gipahiuli nga ebanghelyo ni Jesukristo mao ang hingpit nga blueprint sa pagtukod og labing nindot nga panimalay. Sa ngalan ni Jesukristo, amen. ■

MUBO NGA MGA SULAT

1. Moises 7:21.
2. Mga Artikulo sa Hugot nga Pagtuo 1:13.
3. Doktrina ug mga Pakigsaad 88:119.
4. Tan-awa sa Russell M. Nelson, “Ang Mahimong Labing Dalaygon nga mga Santos sa Ulahing mga Adlaw,” *Liahona*, Nob. 2018, 113.
5. Tan-awa sa 1 Nephi 2:10; Mosiah 5:15; 3 Nephi 6:14.
6. Tan-awa sa Mosiah 5:2; Alma 5:7.
7. Tan-awa sa Alma 5:14, 19.
8. Usa ka linog niadtong Marso 18, 2020, dayag nga mipakita sa panginahanglan nga himoon ang proyekto.
9. Mateo 19:20.
10. Mosiah 2:22.
11. Ang home teaching ug visiting teaching gihunong ug ang pagpangalagad napatuman niadtong 2018 (tan-awa sa Russell M. Nelson, “Pagpangalagad,” *Liahona*, Mayo 2018, 100).
12. Kon kita mopili nga magpakabuhi sumala sa mga sugo, nan ang mga panalangin sa Ginoo makuha sa igong gidaghanon. Kining nagbalik-balik nga sumbanan makita sa Basahon ni Mormon nga usahay gipasabut nga ang pagtuyok sa pagkamatarung ug pagkadautan (tan-awa sa *Book of Mormon Student Manual* [Church Educational System manual, 2009], 414, ChurchofJesusChrist.org).
13. Salmo 127:1.



Ni Elder D. Todd Christofferson
Sa Korum sa Napulog Duha ka mga Apostoles

Pagpaambit sa Mensahe sa Pagpahiuli ug sa Pagkabanhaw

Ang Pagpahiuli iya sa kalibutan, ug ang mensahe niini labihan ka dinalian karon.

Sa tibuok niining kinatibuk-ang komperensya naghigut kita ug nanganta uban sa hingpit nga kalipay mahitungod sa katumanan sa dugay na nga gipanagna nga “pagtuman na sa tanan,”¹ mahitungod sa pagpahinabo sa “laraw sa paghiusa diha kang Kristo sa tanang mga butang,”² mahitungod sa pagbalik sa kahingpitan sa ebanghelyo, pagkapari, ug sa Simbahan ni Jesukristo dinhi sa yuta, tanan niini atong gisulod sa ulohan nga “ang Pagpahiuli.”

Apan ang Pagpahiuli dili lamang alang kanato kinsa nagmaya karon. Ang mga pagpadayag bahin sa Unang Panan-awon dili lamang alang kang Joseph Smith apan gitanyag isip kahayag ug kamatuoran alang ni bisan kinsa nga “nakulangan og kaalam.”³ Ang Basahon ni Mormon iya sa katawhan. Ang mga ordinansa sa pagkapari alang sa kaluwasan ug kahimayaan giandam alang sa matag indibidwal, lakip na niadtong wala na magpuyo sa mortalidad. Ang Simbahan ni Jesukristo sa mga Santos sa Ulahing mga Adlaw ug ang mga panalangin niini gitumong alang sa tanang

gusto niini. Ang gasa sa Espiritu Santo gituyo alang sa tanan. Ang Pagpahiuli iya sa kalibutan, ug ang mensahe niini labihan ka dinalian karon.

“Busa, unsa ka dako ang pagkama-hinungdanon sa paghimo niini nga mga butang nga masayran ngadto sa mga lumulupyo sa yuta, aron sila masayud nga walay tawo nga makapuyo nga buhi atubangan sa Dios, gawas pinaagi sa mga maayo nga

buhat, kalooy, ug grasya sa Balaang Mesiyas, kinsa mitugyan sa iyang kinabuhi sumala sa unod, ug gikuha pag-usab pinaagi sa gahum sa Espiritu, nga siya unta makapahinabo sa pagkabanhaw sa mga patay.”⁴

Gikan sa adlaw nga ang igsoon sa Propeta nga si Samuel Smith, mipuno sa iyang kartera [satchel] sa bag-o pa lang naimprinta nga mga kopya sa Basahon ni Mormon ug nagsugod sa paglakaw aron mopaambit sa bag-ong kasulatan, ang mga Santos nagtrabaho nga walay paghunong “sa paghimo niini nga mga butang nga masayran ngadto sa mga lumulupyo sa yuta.”

Niadtong 1920, si Elder David O. McKay nianang higayuna sa Korum sa Napulog Duha ka mga Apostoles nagsugod og usa ka tuig nga paglibut sa mga misyon sa Simbahan. Pagka-Mayo 1921, nagbarug siya sa usa ka gamay nga sementeryo didto sa Fagali’i, Samoa, atubangan sa maayo pagkaatiman nga mga lubnganan sa tulo ka gagmayng mga bata, ang anak nga babaye ug duha ka anak nga lalaki nila ni Thomas ug Sarah Hilton. Kining gagmayng mga bata—ang kinamagulangan dos anyos—namatay atol sa panahon nga sila si Thomas ug Sarah nagserbisyo isip batan-ong magtiayon nga misyonaryo sa ulahing bahin sa mga 1800.

Sa wala pa siya mobiya sa Utah, si Elder McKay misaad kang Sarah, nga karon usa na ka biyuda, nga iyang



Bluffdale, Utah, USA

bisitahan ang mga lubnganan sa iyang mga anak didto sa Samoa kay wala pa gayud siya makabalik didto. Si Elder McKay misulat ngadto kaniya, “Ang imong gagmay nga mga anak, Sister Hilton, bisan sa kamingaw nakaimpluwensya sa uban . . . mipadayon sa inyong halangdong misyonaryo nga buhat nga gisugdan dul-an sa traynta ka tuig na ang milabay.” Dayon midugang siya og usa ka bersikulo nga iyang hinimo:

*Pinaagi sa mahigugmaong mga kamot gipiyung ang ilang mga mata,
Pinaagi sa mahigugmaong mga kamot gipahimutang ang ilang mga bukton ug tiil nga gagmay pa,
Pinaagi sa langyaw nga mga kamot nga sa ilang mga lubnganan miadorno,
Pinaagi sa mga estranghero nga mipasidungog ug mipahisubo.⁵*

Kini nga istorya usa lamang sa liboan, gatusan ka liboan, nga naghisgot bahin sa panahon, bahandi, ug mga kinabuhi nga gisakripisyo sobra sa miaging 200 ka tuig sa pagpaambit sa mensahe sa Pagpahiuli. Ang atong pangandoy nga maabut ang matag nasud, kaliwat, pinulongan, ug katawhan wala makuhai karon, sigun sa gisaksihan sa sobra sa liboan ka batan-ong mga lalaki, mga babaye, ug mga managtiayon nga kasamtangang nagserbisyo ubos sa full-time nga mga tawag sa misyon; sa kinatibuk-an pinaagi sa mga miyembro sa Simbahan, nga mipalanog sa pagdapit ni Felipe nga moduol ug motan-aw;⁶ ug pinaagi sa minilyon ka dolyar nga gigasto kada tuig aron mapadayon kini nga paningkamot sa tibuok kalibutan.

Samtang ang atong mga pagdapit dili pinugsanay, nanghinaut kita nga ang mga tawo makakita niini nga madanihon. Aron mahitabo kana, nagtuo ko nga dili mominus sa tulo ka butang ang gikinahanglan: una, ang inyong gugma; ikaduha, ang inyong ehemplo; ug ikatulo, ang inyong paggamit sa Basahon ni Mormon.



THE VOICE OF PETER, JAMES AND JOHN (ANG TINGOG NI LA NI PEDRO, SAMTAGO, UG JUANI); NILINDA CURLEY CHRISTENSEN UG MICHAEL T. MAJAN

Ang atong mga pagdapit dili butang alang sa kaugalingong interes; kondili, kinahanglan gayud kini nga usa ka pagpahayag sa dili hinakog nga gugma.⁷ Kini nga gugma, nga nailhan isip gugmang putli, ang tiunay nga gugma ni Kristo, ato lang kining pangayuon aron maangkon kini. Kita gidapit, gani gimanduan, sa “pag-ampo ngadto sa Amahan uban sa tibuok kusog sa kasingkasing, nga [kita] unta mapuno niini nga gugma.”⁸

Isip ehemplo, akong ipaambit ang kasinatian nga gisaysay ni Sister Lanett Ho Ching, kasamtangang nagserbisyo uban sa iyang bana, si Presidente Francis Ho Ching, kinsa nagdumala sa Samoa Apia Mission. Si Sister Ho Ching misaysay:

“Mga katuigan ang milabay, ang among bag-ong pamilya mibalhin sa usa ka gamay nga balay didto sa Laie, Hawaii. Ang grahian sa among balay gihimo nga usa ka studio apartment, diin nagpuyo ang usa ka lalaki nga ginganlan og Jonathan. Si Jonathan usa namo ka silingan sa laing dapit. Mibati nga morag dili kadto sulagma

nga gipundok kami sa Ginoo, nakahukom kami nga mas mahimong dayag sa among mga kalihokan ug pagkamiyembro sa Simbahan. Si Jonathan nalingaw sa among panaghigalaay ug ganahan nga mogahin og panahon sa among pamilya. Siya ganahan nga makakat-on mahitungod sa ebanghelyo, apan dili siya interesado nga mopasalig ngadto sa Simbahan.

“Paglabay sa panahon, nahimo nang angga ni Jonathan ang ‘Tiyo Jonathan’ ngadto sa among mga anak. Samtang padayong nagkadako ang among pamilya, mao usab ang interes ni Jonathan sa mga panghitabo sa among kinabuhi. Ang among mga imbitasyon sa mga party sa holiday, mga birthday, mga kalihokan sa eskwelahan, ug mga kalihokan sa Simbahan milakip hangtud sa mga family home evening ug mga bunyag sa mga bata.

“Usa ka adlaw nakadawat ko og tawag sa telepono gikan ni Jonathan. Siya nagkinahanglan og tabang. Siya nag-antus og diabetes ug dunay grabe nga impeksyon sa tiil nga kinahanglang putlon. Ang among pamilya ug

kasilinganang mga miyembro sa ward mitabang niya nianang panahon sa pagsulay. Kami nagpuli-puli sa ospital, ug mga panalangin sa pagkapari gitanyag. Samtang nagpaalim pa si Jonathan, uban sa tabang sa mga sister sa Relief Society, among gilimpyuhan ang iyang apartment. Ang mga kalalakin-an sa pagkapari mihimo og kanaugan sa iyang pwertahan ug kabatanan diha sa kasilyas. Sa dihang mipauli na si Jonathan sa balay, napuno siya sa emosyon.

“Si Jonathan nagsugod pag-usab sa mga leksyon sa misyonaryo. Sa semana sa wala pa ang Bag-ong Tuig, mitawag siya nako ug nangutana, ‘Unsay inyong buhaton sa Bisperas sa Bag-ong Tuig?’ Gipahinumduman nako siya sa among tinuig nga party. Apan hinoon, mitubag siya, ‘Gusto ko nga moanhi mo sa akong bunyag! Gusto nakong sugdan kining bag-ong tuig og sakto.’ Human sa 20 ka tuig nga ‘dali ug tan-awa ninyo,’ ‘dali ug tabang kamo,’ ug ‘dali ug pagpabilin,’ kining bililhong kalag andam na nga mabunyagan.

“Niadtong 2018, sa dihang gitawag kami nga mahimong presidente sa misyon ug kompanyon, nagkaluya na ang panglawas ni Jonathan. Gihangyo namo siya nga magpabiling lig-on nga maghulat sa among pagbalik. Nakalahutay siya sulod sa hapit usa ka tuig, apan giandam siya sa Ginoo nga mopauli na. Namatay siya nga malina-won niadtong Abril 2019. Ang akong mga anak nga babaye mitambong sa lubong sa ilang ‘Tiyo Jonathan’ ug mikanta sa sama nga awit nga among gikanta atol sa iyang bunyag.”

Ako mopaila og ikaduhang gikinahanglan alang sa malampusong pagpaambit sa mensahe sa Pagpahiuli pinaagi niining pangutana: unsay makapahimo sa inyong pagdapit nga madanohon sa usa ka tawo? Dili ba kamo man, ang ehemplo sa inyong kinabuhi? Daghan sa nakadungog ug nakadawat sa mensahe sa Pagpahiuli nagsugod sa pagkadani sa unsay ilang nakita diha sa usa ka miyembro o mga miyembro sa Simbahan ni Jesukristo. Kini tingali mao ang paagi

sa ilang pagtratar sa uban, ang mga butang nga ilang gisulti o wala gisulti, ang pagkamakanunayon nga ilang gipakita sa lisud nga mga sitwasyon, o sa ilang panagway lang.⁹

Bisan unsa pa man kini, dili kita makaeskapo sa kamatuoran nga kinahanglan natong masabtan ug mosunod sa mga baruganan sa gipahiuli nga ebanghelyo kutob sa atong mahimo aron mahimong madanohon ang atong mga pagdapit. Kini ang butang nga gipasabut karon isip pagkatinuod [authenticity]. Kon ang gugma ni Kristo anaa kanato, ang uban masayud nga ang atong gugma alang kanila tinuod. Kon ang kahayag sa Espiritu Santo nagdilaab sa sulod kanato, modagkut kini sa Kahayag ni Kristo diha kanila.¹⁰ Kon unsa kamo mopakita sa pagkatinuod sa inyong pagdapit nga moduol aron makasinati sa hingpit nga kalipay sa kahingpitan sa ebanghelyo ni Jesukristo.

Ang ikatulong gikinahanglan mao ang kanunay nga paggamit sa instrumento sa pagkabig nga gitakda sa Ginoo alang niining katapusang dispensasyon sa ebanghelyo, ang Basahon ni Mormon. Kini ang makita nga ebidensya sa propetikanhong tawag ni Joseph Smith ug ang makapakumbinsar nga ebidensya sa pagkabalaan ug Pagkabanhaw ni Jesukristo. Ang eksposisyon niini sa plano sa atong Langitnong Amahan bahin sa katubsan dili hitupngan. Kon mopaambit kamo sa Basahon ni Mormon, mopaambit kamo sa Pagpahiuli.

Sa dihang tin-edyer pa si Jason Olsen, balik-balik siyang gipasidan-an sa mga sakop sa pamilya ug sa uban batok sa pagkahimong usa ka Kristiyano. Siya adunay duha ka butang mga higala, hinoon, kinsa mga miyembro sa Ang Simbahan ni Jesukristo sa mga Santos sa Ulahing mga Adlaw, ug kanunay silang maghisgot bahin sa relihiyon. Ang iyang mga higala, sila si Shea ug Dave, matinahurong mitubag sa mga argumento nga gihatag sa uban ngadto ni Jason batok sa hugot nga pagtuo diha ni Jesukristo. Sa katapusan, gihatagan nila siya og kopya sa Basahon ni Mormon, nga

nag-ingon, “Kini nga libro motubag sa imong mga pangutana. Palihug basaha kini.” Siya nagpanagana nga midawat sa libro ug gibutang kini sa iyang backpack, diin nagpabilin kini sulod sa pipila ka bulan. Siya dili gustong mobilin niini sa balay basin makit-an kini sa iyang pamilya, ug dili siya gustong masagmuyo silang Shea ug Dave pinaagi sa pag-uli niini. Sa katapusan, nakahukom siya sa solusyon nga sunugon ang libro.

Usa ka gabii, dala ang lighter sa usa ka kamot ug ang Basahon ni Mormon sa pikas, hapit na niya sunuga ang libro sa dihang nakadungog siya og tingog diha sa iyang hunahuna nga nag-ingon, “Ayaw sunuga ang akong libro.” Nahibulong, mihunong siya kadali. Dayon, naghunahuna nga iya ra tong gihunahuna ang tingog, gisulayan na usab niya pagpasiga ang lighter. Usab, ang tingog misantup sa iyang hunahuna: “Adto sa imong kwarto ug basaha ang akong libro.” Gipadaplin ni Jason ang lighter, mibalik sa iyang kwarto, miabli sa Basahon ni Mormon, ug nagsugod sa pagbasa. Nagpadayon siya kada adlaw, kasagaran hangtud sa sayong mga oras sa buntag. Sa pag-abut ni Jason sa katapusan ug nag-ampo, siya mirekord, “Napuno ko sa Espiritu gikan sa akong alimpulo hangtud sa mga tikod sa akong mga tiil. . . . Mibati ko nga napuno sa kahayag. . . . Kadto ang labing malipayon nga kasinatian sukad sa akong kinabuhi.” Siya nagtinguha nga mabunyagan ug sa wala madugay nahimo mismong usa ka misyonaryo.

Tingali dili na angayang isulti nga bisan pa man sa tinuod nga gugma ug sinseridad, daghan, kon dili man kasagaran, sa atong mga pagdapit nga mopaambit sa mensahe sa Pagpahiuli balibaran. Apan hinumdumi kini: ang tanan angayan sa maong pagdapit—“ang tanan managsama ngadto sa Dios”;¹¹ ang Ginoo nahimuot sa matag paningkamot nga atong gibuhay, bisan unsa pa man ang resulta; ang usa ka gibalibaran nga pagdapit dili rason aron matapos ang atong panag-uban; ug ang kakulang sa interes karon



mahimong usa ka interes ugma. Bisan unsa pa man, ang atong gugma magpabilin sa kanunay.

Dili gayud nato kalimtan nga ang Pagpahiuli miresulta sa hilabihan nga kalisud ug sakripisyo. Usa kana ka hilisgutan alang sa laing adlaw. Karon nagmaya kita sa mga bunga sa Pagpahiuli, usa sa labing molabaw nga butang mao ang gahum na usab sa pagbugkos dinhi sa yuta ug didto sa langit.¹² Sigun sa gipahayag ni Presidente Gordon B. Hinckley, “Kon wala nay lain pang moresulta gikan sa tanang kaguol ug pagbudlay ug kasakit sa pagpahiuli kay sa gahum sa pagsilyo sa balaang pagkapari sa pagbugkos sa mga pamilya sa kahangturan, angay lamang kini sa tanang bugti niini.”¹³

Ang kinatas-ang saad sa Pagpahiuli mao ang katubsanan pinaagi ni Jesukristo. Ang Pagkabanhaw ni Jesukristo mao ang pamatuod nga Siya, sa pagkatinuod, adunay gahum nga motubos sa tanan nga moduol Kaniya—motubos kanila gikan sa kasub-anan, kawalay kaangayan, pagmahay, sala, ug bisan sa kamatayon. Karon Dominggo sa Lukay; usa ka semana gikan karon mao ang Pasko sa Pagkabanhaw. Atong

hinumduman, ato kanunayng hinumduman, ang pag-antus ug kamatayon ni Kristo aron moula alang sa atong mga sala, ug atong saulugon kanang labing talagsaon sa mga Dominggo, ang adlaw sa Ginoo, diin mibangon Siya gikan sa pagkamatay. Tungod sa Pagkabanhaw ni Jesukristo, ang Pagpahiuli adunay kahulugan, ang atong mortal nga kinabuhi adunay kahulugan, ug sa katapusan ang ato mismong pagpakabuhi adunay kahulugan.

Si Joseph Smith, ang halangdong propeta sa Pagpahiuli, nagtanyag sa nag-unang pagpamatuod alang sa atong panahon bahin sa nabanhaw nga Kristo: “Nga siya buhi! Kay kami nakakita kaniya, gani diha sa tuo nga kilid sa Dios.”¹⁴ Mapainubsanon kong modugang sa akong pagsaksi ngadto sa pagsaksi ni Joseph ug sa tanang apostoles ug mga propeta nga nag-una kaniya ug sa tanang apostoles ug mga propeta nga misunod kaniya, nga si Jesus sa Nazaret mao ang gisaad nga Mesiyas, ang Bugtong Anak sa Dios, ug ang nabanhaw nga Manunubos sa tanang katawhan.

“Kami mopamatuod nga kad-tong mainampuong magtuon sa

mensahe sa Pagpahiuli ug molihok uban sa pagtuo mapanalanginan nga makaangkon og ilang kaugalingong pagsaksi sa kabalaan niini ug sa katuyoan niini sa pag-andam sa kalibutan alang sa gisaad nga Ikaduhang Pag-anhi sa atong Ginoo ug Manluluwas, si Jesukristo.”¹⁵ Ang Pagkabanhaw ni Kristo nakapasiguro sa Iyang mga saad. Sa ngalan ni Jesukristo, amen. ■

MUBO NGA MGA SULAT

1. Mga Buhat 3:21.
2. Mga Taga-Efeso 1:10.
3. Santiago 1:5.
4. 2 Nephi 2:8.
5. David O. McKay, sulat ngadto ni Sarah M. Hilton, Hunyo 3, 1921, Church History Library, Siyudad sa Salt Lake.
6. Juan 1:46.
7. Tan-awa sa 1 Juan 4:18.
8. Moroni 7:48.
9. Si Presidente David O. McKay nakaobserbar: “Ang matag tawo nga nagpuyo niini nga kalibutan nakahatag og impluwensya, alang sa maayo o alang sa dautan. Dili lang kon unsay iyang gisulti, dili lang kon unsay iyang gibuhat. Kon dili kon unsa siya. Ang matag tawo, mosanag kon unsa siya” (*Mga Pagtulun-an sa mga Presidente sa Simbahan: David O. McKay* [2003], 274).
10. Tan-awa sa Juan 1:9; Doktrina ug mga Pakigsaad 88:6–13; 93:2.
11. 2 Nephi 26:33.
12. Tan-awa sa Mateo 16:19; 18:18; Doktrina ug mga Pakigsaad 110:14–16; 132:19, 46.
13. Gordon B. Hinckley, “As One Who Loves the Prophet,” sa Susan Easton Black ug Charles D. Tate, Jr., eds., *Joseph Smith: The Prophet, the Man* (1993), 6.
14. Tan-awa sa Doktrina ug mga Pakigsaad 76:22–24.
15. “Ang Pagpahiuli sa Kahingpitan sa Ebanghelyo ni Jesukristo: Usa ka Pamahayag ngadto sa Kalibutan sa Ikaduhang Siglo nga Kasaulogan,” Abr. 5, 2020, sa Russell M. Nelson, “Paminaw Kaniya,” *Liahona*, Mayo 2020, 91.



Sandy, Utah, USA



Ni Presidente Russell M. Nelson
*Presidente sa Ang Simbahan ni Jesukristo sa mga Santos sa
 Ulahing mga Adlaw*

Padayon uban sa Hugot nga Pagtuo

*Ako mopanalangin kaninyo og kalinaw ug
 nagkadako nga pagtuo diha sa Ginoo.*

Akong minahal nga kaigsoonan, sa atong pagtapos niining makasaysayanong komperensya, magpasalamat kita sa Ginoo. Ang musika maanindot ug ang mga mensahe makapadasig.

Atol niining komperensya, nakasinati kita og daghang importante nga mga gutlo. Niining ikaduhang siglo [bicentennial] nga anibersaryo, mipaila kami og usa ka pamahayag ngadto sa kalibutan nga nagpahayag sa katinuod sa Pagpahiuli sa ebanghelyo ni Jesukristo sa kahingpitan niini.

Atong gihandum ang Pagpahiuli uban sa Singgit nga Hosanna.

Atong gipahibalo ang usa ka simbolo nga nagpakita sa atong hugot nga pagtuo kang Ginoong Jesukristo ug alang sa biswal nga pag-ila sa opisyal nga impormasyon ug mga materyal sa Simbahan.

Kami nanawagan alang sa global nga adlaw sa pagpuasa ug pag-ampo, nga ang kasamtangang pandemic unta makontrolar, ang mga tig-atiman mapanalipdan, ang ekonomiya mapalig-on, ug ang kinabuhi mahimong normal. Kini nga puasa ipahigayon sa Biyernes Santo, Abril 10. Unsa ka talagsaong Biyernes kana!

Sunod Dominggo mao ang Dominggo sa Pasko sa Pagkabanhaw,

nga ato na usab nga handumon ang Pag-ula ug Pagkabanhaw sa atong Ginoong Jesukristo. Tungod sa Iyang Pag-ula, ang Iyang gasa sa pagkabanhaw moabut sa tanan nga nabuhing sukad. Ug ang Iyang gasa sa kinabuhing dayon moabut sa tanang angayan tungod sa pagkamatinud-anon sa mga ordinansa ug mga pakigsaad nga gihi-mo diha sa Iyang balaang mga templo.

Ang daghang makapadasig nga mga butang niining Abril 2020 nga kinatibuk-ang komperensya—ug ang sagradong semana nga ato karong gisugdan—ma-summarize sa duha ka balaanong gilitok nga mga pulong: “Paminaw Kaniya.”¹ Kami nag-ampo



nga ang inyong pagpokus sa Langitnong Amahan, kinsa militok niadtong mga pulong, ug sa Iyang Hinigugmang Anak, si Jesukristo, mao ang labing importante sa tanang nahitabo. Kami nag-ampo nga sugdan na usab ninyo ang *tinud-anay* nga maminaw, mamati, ug mopatalinghug sa mga pulong sa Manluluwas.² Ako mosaad nga ang nagkaminos nga kahadlok ug nagkadako nga pagtuo mosunod.

Salamat sa inyong tinguha nga himoon ang inyong mga panimalay nga tinuod nga dangpanan sa hugot nga pagtuo, diin ang Espiritu sa Ginoo mahimong mopuyo. Ang atong kurikulum sa pagtuon sa ebanghelyo, *Dali, Sunod Kanako*, magpadayon nga mopanalangin sa inyong kinabuhi. Ang inyong makanunayong mga paningkamot niini nga tinguha—bisan sa mga gutlo nga tingali mibati kamo nga dili kaayo kamo malampuson—mousab sa inyong kinabuhi, sa inyong pamilya, ug sa kalibutan. Kita mapalig-on samtang mahimo kitang mas maisugong mga disipulo sa Ginoo, mobarug ug mamulong alang Kaniya, bisan asa kita.

Karon, maghisgot kita bahin sa mga templo. Kita adunay 168 ka gipahinungod nga mga templo sa tibuok kalibutan. Ang uban anaa sa nagkalain-laing mga hugna sa pagplano ug pagtukod. Kon ipahibalo na ang mga plano sa pagtukod og bagong templo, mahimo kining kabahin sa atong sagrado nga kasaysayan.

Morag lain paminawon nga mopahibalo og bagong mga templo nga ang tanan natong mga templo sirado sa makadiyot.

Sobra sa usa ka siglo ang milabay, si Presidente Wilford Woodruff nakakita og mga kahimtang sama sa ato karon, sigun sa narekord diha sa iyang pag-ampo sa pagpahinungod sa Templo sa Salt Lake, nga gihtag niadtong 1893. Ang uban ninyo tingali bag-ohay lang nakakita sa mga kinutlo gikan niining talagsaon nga pag-ampo diha sa social media.

Paminawa kining mga pangamuyo gikan sa usa ka bantugang propeta sa Dios: “Kon ang Imong katawhan

walay kahigayunan sa pagsulod niining balaang balay . . . ug sila gidaug-daog ug nagkalisud, gilibutan sa kalisdanan . . . ug motan-aw niining Imong balaang balay ug mohangyo Kanimo alang sa kalingkawasan, alang sa tabang, aron mapadangat ang Imong gahum alang kanila, kami mohangyo Kanimo, nga molantaw gikan sa Imong balaang pinuy-anan diha sa kalooy . . . ug maminaw sa ilang mga pag-ampo. O kon ang mga anak sa Imong katawhan, sa katugan nga mobaut, mapalayo, pinaagi sa bisan unsang hinungdan, gikan niining dapita, . . . ug sila mag-ampo diha Kanimo gikan sa kinahiladman sa ilang mga kasakit ug kasubo nga ipadangat ang kahupayan ug kalingkawasan ngadto kanila, mapaubsanon kaming mangamuyo Kanimo . . . paminawa ang ilang mga pag-ampo, ug hatagi sila sa mga panalangin nga ilang gipangayo.”³

Mga kaigsoonan, atol niining panahon sa *atong* kalisdanan nga ang *mga* templo sirado, makagamit gihapon kamo sa gahum sa inyong mga pakigsaad ug pagtuga sa templo samtang inyong gitahud ang inyong mga pakigsaad. Palihug gamita kining panahona nga ang mga templo sirado sa pagpadayon nga magpuyo og kinabuhi nga takus sa templo o mahimong takus sa templo.

Paghisgot bahin sa templo uban sa inyong pamilya ug mga higala. Tungod kay si Jesukristo anaa sa sentro sa tanan natong gibuhay sa templo, samtang mas maghunahuna kamo sa templo mas maghunahuna kamo Kaniya. Pagtuon ug pag-ampo nga makakat-on pa og dugang mahitungod sa gahum ug kahibalo nga gituga kaninyo—o sa unsa pay ituga kaninyo.

Karon malipayon kaming mopahibalo sa mga plano sa pagtukod og walo ka bag-ong mga templo sa mosunod nga mga dapit: Bahía Blanca, Argentina; Tallahassee, Florida; Lubumbashi, Democratic Republic of the Congo; Pittsburgh, Pennsylvania; Siyudad sa Benin, Nigeria; Syracuse, Utah; Dubai, United Arab Emirates; ug Shanghai, People’s Republic of China.

Sa walo ka dapit, ang mga arkitekto sa Simbahan makigtambayayong sa lokal nga mga opisyal aron ang templo mahiangay ug makadugang sa kaanindot sa matag komunidad.

Ang plano alang sa usa ka templo sa Dubai miabut agig tubag sa ilang maanindot nga pagdapit, nga mapasalanton natong giila.

Ang konteksto sa plano alang sa Shanghai importante kaayo. Sobra na sa duha ka dekada, ang takus sa templo nga mga miyembro sa People’s Republic of China mitambong sa Templo sa Hong Kong China. Apan pagka-Hulyo 2019, kana nga templo gisirad-an alang sa dugay na nga giplano ug gikinahanglan kaayo nga pagbag-o.

Sa Shanghai, usa ka kasarangan nga dapit nga katiguman nga magamit sa daghang katuyoan maghatag og paagi sa mga miyembro nga Chinese nga magpadayon sa pag-apil sa mga ordinansa sa templo—sa People’s Republic of China—alang kanila ug sa ilang mga katigulangan.⁴

Sa matag nasud, kini nga Simbahan nagtudlo sa mga miyembro niini sa pagtahud, pagtuman, ug pagsunod sa balaod.⁵ Atong gitudlo ang kaimportante sa pamilya, sa pagkahimong maayo nga mga ginikanan ug sulundon nga mga lumulupy. Tungod kay atong gitahud ang mga balaod ug mga regulasyon sa People’s Republic of China, ang Simbahan *wala* magpadala og tig-proselyte nga mga misyonaryo didto; ni kita mobuhay niini karon.

Ang mga dili taga-China ug ang Chinese nga mga kongregasyon magpadayon nga magtigum nga managlahi. Ang legal nga estado sa Simbahan didto nagpabilin nga *walay kausaban*. Sa sugod nga hugna sa paggamit sa pasilidad, ang pagsulod pinaagi sa appointment lamang. Ang balay sa Ginoo sa Shanghai *dili* usa ka lugar nga destinasyon



THE FORCES OF LIGHT AND DARK (ANG MGA PWEBSA SA KAHAYAG OG KANGITNGIT), NI WARREN LUCH, SA MAAYONG KABUT-ON SA CHURCH HISTORY MUSEUM

para sa mga torista nga gikan sa ubang mga nasud.

Kining walo ka bag-ong mga templo mopanalangin sa kinabuhi sa daghang tawo sa duha ka habig sa tabil sa kamatayon. Ang mga templo mao ang kinatas-ang bahin sa Pagpahiuli sa kahingpitan sa ebanghelyo ni Jesukristo. Sa kaayo ug kamanggihatagon sa Dios, mas gipaduol Niya ang mga panalangin sa templo ngadto sa Iyang mga anak *bisan asa*.

Samtang nagpadayon ang Pagpahiuli, ako nasayud nga ang Dios



New Taipei City, Taiwan

magpadayon sa pagpadayag og daghang dagko ug mahinungdanong mga butang kalabut sa Iyang gingharian dinhi sa yuta.⁶ Kana nga gingharian *mao* Ang Simbahan ni Jesukristo sa mga Santos sa Ulahing mga Adlaw.

Minahal nga kaisoonan, akong ipahayag ang akong gugma alang kaninyo. Atol niining panahon sa kagubot ug kawalay kasiguroan, ug naggamit sa awtoridad nga gihtag kanako, gusto kong motugyan diha kaninyo og apostolikanhong panalangin.

Ako mopanalangin kaninyo og kalinaw ug nagkadako nga pagtuo diha sa Ginoo.⁷

Ako mopanalangin kaninyo og tinguha nga maghinulsol ug mas mahisama Kaniya kada adlaw.⁸

Ako mopanalangin kaninyo nga masayud nga si Propeta Joseph Smith mao ang propeta sa Pagpa-hiuli sa ebanghelyo ni Jesukristo sa kahingpitan niini.

Kon aduna may sakit diha kaninyo o sa inyong mga minahal sa kinabuhi, mobilin ko kaninyo og panalangin sa pagkaayo, pinasubay sa kabubut-on sa Ginoo.

Ako mopanalangin kaninyo, magdugang pag-usab sa akong pagpahayag sa gugma alang sa matag usa kaninyo, sa sagradong ngalan ni Jesukristo, amen. ■

MUBO NGA MGA SULAT

1. Joseph Smith—Kasaysayan 1:17; tan-awa usab sa Lucas 9:35.
2. Tan-awa sa Juan 10:27; Pinadayag 3:20; Mosiah 26:21, 28; Doktrina ug mga Pakigsaad 29:7.
3. Wilford Woodruff, pag-ampo sa pagpahinungod sa Templo sa Salt Lake, Abr. 6, 1893, ChurchofJesusChrist.org; emphasis gidugang.
4. Sulod sa liboan ka tuig, ang Chinese nga katawhan nagtipig og mga kasaysayan ug mga genealogy sa kabanay. Ang tradisyunal nga Chinese nga mga seremonya nagpakita og pagtahud alang sa ilang mga katigulangan, sama sa Qingming Festival (清明节). Ang Qingming Festival (清明节) karong tuiga giiskedyul alang sa Abril 4–5.
5. Tan-awa sa Mga Artikulo sa Hugot nga Pagtuo 1:12.
6. Tan-awa sa Mga Artikulo sa Hugot nga Pagtuo 1:9.
7. Tan-awa sa Juan 14:27.
8. Tan-awa sa 3 Nephi 27:27.

Estatistikal nga Report, 2019

Alang sa kasayuran sa mga miyembro sa Simbahan, ang Unang Kapangu-lohan miisyu sa mosunod nga estatistikal nga report kabahin sa kalamboan ug kahimtang sa Simbahan kutob sa Disyembre 31, 2019.

MGA UNIT SA SIMBAHAN

Mga Stake	3,437
Mga Mission	399
Mga District	542
Mga Ward ug Branch	30,940

MGA MIYEMBRO SA SIMBAHAN

Total nga mga miyembro	16,565,036
Bag-ong mga bata nga anaa sa rekord	94,266
Mga kinabig nga nabunyagan	248,835

MGA MISIONARYO

Full-time nga mga Misionaryo	67,021
Mga Church-Service Missionary	31,333

MGA TEMPLO

Mga Templo nga Gipahinungod sa 2019 (Rome Italy, Kinshasa Democratic Republic of the Congo, Fortaleza Brazil, Port-au-Prince Haiti, Lisbon Portugal, ug Arequipa Peru)	6
Mga Templo nga Gipahinungod Pag-usab sa 2019 (Memphis Tennessee, Oklahoma City Oklahoma, Oakland California, Raleigh North Carolina, Frankfurt Germany, Asunción Paraguay, ug Baton Rouge Louisiana)	7
Mga Templo nga Gigamit hangtud sa Katapusan sa Tuig	167



Elder Jorge T. Becerra

General Authority Seventy

Si Elder Jorge T. Becerra maulawon ug hilumon samtang nagdako, apan ang iyang mission president mihatag kaniya og mga oportunidad sa pagpangulo. Si Jorge miuli gikan sa California Arcadia Mission uban sa tinguha nga moapil sa buhat sa Ginoo sa tibuok niyang kinabuhi.

Sa edad nga 27, gitawag siya ngadto sa bishopric. Sa edad nga 32, gitawag siya isip bishop. Sa sinugdanan mibati siya nga dili angayan samtang ang mga tawo miduol kaniya uban sa ilang mga hagit.

“Wala koy ideya unsay akong gibuhay,” misulti siya sa iyang amahan.

Ang tubag sa iyang amahan mitudlo kaniya og usa ka gamhanang leksyon, mipahinumdom kaniya sa pagsalig sa iyang mission president kaniya, ug mitabang kaniya sa pagpangandam alang sa umaabut nga mga calling sa pagpangulo, lakip na ang iyang calling isip presidente sa stake sa edad nga 37.

“Ang akong amahan miingon, ‘Anak, pilay edad sa Espiritu Santo?’” Mihinumdom si Elder Becerra. “Usa kadto ka talagsaong higayon sa pagtulun-an alang kanako tungod kay nasayud ko nga makahimo ko sa bisan unsa nga isugo sa Ginoo kanako.”

Kana nga leksyon nagpabilin kang Elder Becerra sulod sa daghang katuigan sa kinasingsing nga pagserbisyo diha sa Ang Simbahan ni Jesukristo sa mga Santos sa Ulahing mga Adlaw.

Si Jorge Eduardo Torres Becerra natawo niadtong Disyembre 18, 1962, ngadto kang Juan C. Becerra ug Celia T. Becerra sa Siyudad sa Salt Lake, Utah, USA, diin siya nagdako.

Human makaserbisyo og full-time nga misyon, si Elder Becerra naminyo kang Debbie Ilene Schneberger diha sa Salt Lake Temple niadtong Agosto 10, 1984. Mga ginikanan sila sa lima ka anak.

Si Elder Becerra nakadawat og degree sa general studies gikan sa University of Utah ug usa ka associate of arts degree sa accounting gikan sa Salt Lake Community College. Nakatuon usab siya og negosyo sa University of Phoenix. Niadtong 1998 nahimo siya nga usa ka partner sa Allegis Advisor Group, usa ka kompaniya nga tigtagbag kalabut sa pinansyal. Sa panahon sa iyang pagkatawag isip General Authority Seventy, nagtrabaho siya isip investment adviser alang sa Intermountain Financial Partners.

Si Elder Becerra nakaserbisyo isip presidente sa Young Men sa ward, magtatambag sa kapangulohan sa misyon, magtatambag sa kapangulohan sa branch, magtutudlo sa seminary, magtatambag sa bishopric, bishop, presidente sa stake, ug presidente sa California Arcadia Mission. Sa panahon sa iyang pagkatawag, nagserbisyo siya isip Area Seventy. ■



Elder Matthew S. Holland

General Authority Seventy

Si Elder Matthew S. Holland dili na bag-o ngadto sa mga General Authority o sa mga kinatibuk-ang komperensya.

Daghang mga Santos sa Ulahing mga Adlaw nakaila kaniya isip anak nga lalaki ni Elder Jeffrey R. Holland sa Korum sa Napulog Duha ka mga Apostoles. Tingali ang uban makahinumdom kaniya isip ang 17 anyos nga namulong atol sa sesyon sa pagkapari sa Abril 1983 nga kinatibuk-ang komperensya.

“Usa ka talagsaon nga panalangin, sa tibuok nakong kinabuhi, nga magtan-aw kon sa unsang paagi ang akong mama ug papa nagpuyo, sa unsa sila mapasaligon, ug unsay gipabuhay kanila,” miingon si Elder Holland, kinsa nagdumala karon sa North Carolina Raleigh Mission.

“Apan, tungod niining personal nga mga obserbasyon, sobra ra ang among nasayran mahitungod niini nga calling aron maghunahuna nga igo kaming nasangkapan alang niini,” midugang siya. “Maayo gani, nakat-unan usab namo nga ang Ginoo mopasarang niadtong Iyang gitawag, ug nakakuha kami og dakong pagtuo ug kahupayan gikan niana.”

Si Elder Holland mihinumdom nga ang pagpamulong diha sa kinatibuk-ang komperensya makahadlok. Ang pagandam og mensahe nga sa katapusan miabut “pagtulun-an human sa usa ka pagtulun-an, lagda human sa usa ka lagda” (2 Nephi 28:30) nahimong “sayo, makahupay nga panalangin nga masayud nga kon modawat ka og mga buluhaton gikan sa Ginoo, motabang Siya nimo ug mohatag nimo og mga hunahuna ug mga impresyon sa mga butang nga kinahanglang ipaambit.”

Si Mateo Scott Holland natawo niadtong Hunyo 7, 1966, sa Provo, Utah, USA, ang anak ni Jeffrey R. ug Patricia Holland. Giminyoan niya si Paige Bateman niadtong Mayo 20, 1996, sa St. George Utah Temple. Mga ginikanan sila sa upat ka anak.

Ang mga nakab-ot ni Elder Holland sa edukasyon naglakip sa tulo ka degree sa political science—usa ka bachelor of arts gikan sa Brigham Young University niadtong 1991 ug master of arts ug doctor of philosophy, parehong gikan sa Duke University, niadtong 1997 ug 2001.

Samtang nagtrabaho isip usa ka associate professor sa political science sa BYU (2001–2009), gitudlo siya isip presidente sa Utah Valley University niadtong 2009, miserbisyo hangtud sa iyang 2018 nga tawag isip presidente sa misyon.

Nakaserbisyo siya isip bishop, high councilor, magtatambag sa bishopric, adviser sa Young Men sa ward, ward mission leader, magtutudlo sa Sunday School, ug full-time nga misyonaryo sa Scotland Edinburgh Mission. ■



Elder William K. Jackson

General Authority Seventy

Human sa 23 ka tuig isip usa ka regional medical officer sa U. S. Foreign Service, si William K. Jackson gihangyo nga mopaambit sa 20 ka labing nindot nga kasinatian niya samtang nagpuyo ug nagtrabaho sa labing hilit nga mga rehiyon sa kalibutan.

Samtang naghunahuna siya niana nga hangyo sa wala pa ang seremonya sa iyang pagretiro, nakaamgo siya nga “ang tanang 20 sa akong labing nindot nga 20 adunay kalabutan sa Simbahan o sa pamilya,” miingon siya.

Si William King Jackson natawo niadtong Marso 29, 1956, sa Washington, D.C., USA, ngadto kang E. William ug Lois Andrey Jackson. Nagdako siya sa Ojai, California, USA, apan tungod sa boluntaryo nga trabaho sa iyang mga ginikanan, nakaeskwela usab siya sa Honduras, Algeria, ug Afghanistan.

Human makaserbisyo og misyon sa Bolivia La Paz mission, nahimamat ni Elder Jackson si Ann Kesler niadtong ting-init sa 1977.

“Kadto gugma sa unang pagkakita alang kanako,” miingon siya. “Akong gigahin ang nahabilin niana nga ting-init sa pagpaningkamot nga makombinser siya nga ako ang lalaki para niya.”

Nagminyo sila niadtong Disyembre 29, 1977, sa Los Angeles California Temple. Sila ang mga ginikanan sa walo ka bata, diin ang tulo sinagop—gikan sa India, Nepal, ug Cambodia.

Si Elder Jackson mieskwela sa Brigham Young University, nakaangkon og bachelor of science degree gikan sa University of California, Berkeley, ug nakadawat og doctor of medicine degree gikan sa University of California, San Francisco, niadtong 1983.

Human sa iyang medical residency, mitrabaho sila sa gawas sa nasud sulod sa 26 ka tuig. Mitrabaho siya sa labing ulahi isip medical director sa Valley Family Health Care, nga adunay mga lokasyon sa Idaho ug Oregon, USA.

Sa dihang nagpuyo sila sa gawas sa Estados Unidos, siya ug si Sister Jackson migahin sa kadaghanan sa ilang panahon taliwala sa unang henerasyon nga mga miyembro sa Simbahan.

“Usa sa labing dako nga mga bahin sa akong pagpamatuod sa ebanghelyo mao ang pagtan-aw sa mabuhay sa ebanghelyo ngadto niini nga mga tawo nga among gimahal,” miingon siya. “Nakausab kini kanila.”

Si Elder Jackson nakaserbisyo isip Area Seventy, presidente sa India New Delhi Mission, presidente sa Young Men sa branch, magtutudlo sa institute, ug magtutudlo sa Doktrina sa Ebanghelyo. Sa panahon sa iyang pagkatawag aron mahimong General Authority Seventy, nagserbisyo siya isip bishop. ■



Elder Jeremy R. Jaggi

General Authority Seventy

Sa dihang si Elder Jeremy R. Jaggi tin-edyer pa, ang iyang siyete anyos nga igsoong babaye, si Kristen, natakbuyan og kagaw nga miataki sa iyang utok. Ang mga doktor miingon nga dili na siya maluwas.

Ang batan-ong si Jeremy miluhod tupad sa iyang higdanan diha sa panimalay sa pamilya sa Siyudad sa Salt Lake, Utah, USA, ug nangamuyo sa Ginoo aron masayud nganong kinahanglang mamatay ang iyang igsoon nga bata pa kaayo. Hinoon, ang iyang igsoong babaye nakadawat og panalangingin sa pagkapari ug nabuhi.

Nakaaghat kini sa 17 anyos nga si Jeremy nga “tarungan ang iyang kaugalingon ngadto sa Dios,” nga miduso kaniya sa seryusong pagbasa sa Basahon ni Mormon sa unang higayon. Sa wala madugay miserbisyo siya isip full-time nga misyonaryo sa Ohio Cleveland Mission.

Si Jeremy mobalik sa pagluhod diha sa kinasingkasing nga pag-ampo paglabay sa mga katuigan samtang ang iyang asawa, si Amy, nagbati sa ilang ikatulong anak nga kulang sa bulan. “Nianang higayona, mibati ko og hilabihang kalinaw—kalinaw nga mahulagway lamang isip ang mahigugmaong mga bukton sa Langitnong Amahan nga milyok kanako uban sa kainit sa Espiritu Santo,” miingon siya.

Kana nga kalinaw nakatabang kaniya tadlas sa mubong panahon nga nabuhi ang bata ug sa mga bulan sa kasubo nga misunod sa laing pagkakuha sa bata [miscarriage]. “Kitang tanan sulayan sa atong kaugalingong paagi,” miingon siya, “apan kami sa gihapon [miisip] nga maoy tumang kalipay’ [Santiago 1:2] nga ang Manluluwas mihatag og paagi alang kanamo nga makabaton og kalinaw ug kalipay.”

Si Jeremy Robert Jaggi natawo sa Siyudad sa Salt Lake, Utah, USA, niadtong Marso 23, 1973, ngadto kang Robert Stanley Jaggi ug Judy Anne Roos. Giminyoan niya si Amy Anne Stewart didto sa Salt Lake Temple niadtong Hunyo 12, 1995. Mga ginikanan sila sa lima ka anak.

Si Elder Jaggi nakadawat og bachelor of science degree sa behavioral science and health gikan sa University of Utah ug executive master of business administration degree gikan sa Pepperdine University. Siya ang nangulo sa regional sales alang sa Alkermes ug nagdumala sa komersyal nga real estate sa HCA Investments sa panahon sa iyang pagkatawag.

Si Elder Jaggi nakaserbisyo isip Area Seventy, presidente sa Utah Ogden Mission, assistant executive secretary sa stake, bishop, presidente sa elders quorum, magtutudlo sa seminary, magtatambag sa kapangulohan sa Young Men sa ward, magtutudlo sa pagpangandam sa misyonaryo sa stake, ug ward mission leader. ■



Elder Kelly R. Johnson

General Authority Seventy

Si Elder Kelly R. Johnson makahinumdom pag-ayo sa adlaw nga gitawag siya isip bishop sa edad nga 31. Nianang sama nga adlaw nahiling siya nga adunay Bell's palsy—usa ka kahimtang diin ang kaunuran sa pikas bahin sa nawong naparalisar o nahuyang.

Lisud kadto nga panahon, dili lamang tungod sa kaku-lian ug kaulaw nga resulta sa kondisyon apan tungod usab sa iyang daghang bag-o nga mga responsibilidad. Apan kanang lisud nga panahon nahimong usa ka panalangin.

“Wala masayud kon unsa ang sitwasyon sa kadugayan, nakapalambo ko og kalooy sa mga tawo nga nagpabilin kanako sa tibuok nakong kinabuhi,” miingon siya. “Nakakat-on gyud ko nga ang mga tawo makasinati og lisud ug subo nga mga butang nga dili nila makontrolar nga makaapekto sa ilang mga abilidad, mga pagbati, ug pagsalig.”

Usahay, dili sayon ang pagserbisyo diha sa Simbahan sa Ginoo. Apan sama nga ang mga disipulo sa Manluluwas “diha-diha gibiyaaan nila ang ilang mga laya” (Mateo 4:20) sa pagsunod kaniya, “bisan unsa nga ipabuhat kanamo, kami andam sa pagbuhat niini,” miingon si Elder Johnson.

Bisan asa siya o ang iyang pamilya tawagon sa Ginoo, moadto sila uban sa andam nga kasingkasing ug hunahuna, magtinguha nga makakaplag sa maayo bisan unsa pa ang ilang kahimtang.

Si Kelly Ray Johnson natawo sa Pleasant View, Utah, niadtong Enero 16, 1963, ngadto kang Harold Raymond Johnson Jr. ug Helen Craggaun Johnson. Nagdako siya sa Ogden, Utah, ug naminyo kang Teressa Lynn Bartrum sa Salt Lake Temple niadtong Marso 27, 1986. Sila adunay lima ka mga anak.

Si Elder Johnson migradwar gikan sa Weber State University niadtong 1987 sa bachelor of science degree sa accounting ug nakadawat sa iyang master of business administration degree gikan sa Brigham Young University niadtong 1989. Nakatrabaho siya isip usa ka forensic accountant alang sa KPMG International Cooperative ug sa labing ulahi nagtrabaho isip forensic accountant ug partner sa Norman, Townsend, and Johnson.

Si Elder Johnson, kinsa nagserbisyo isip Area Seventy sa panahon sa iyang pagkatawag, nakaserbisyo isip presidente sa misyon sa Thailand Bangkok Mission, diin didto siya miserbisyo sa iyang full-time nga misyon, ug isip presidente sa stake, magtatambag sa kapangulohan sa stake, high councilor, bishop, presidente sa elders quorum, ward mission leader, ug magtutudlo sa pagpangandam sa misyonaryo sa stake. ■



Elder Thierry K. Mutombo

General Authority Seventy

Si Elder Thierry K. Mutombo adunay lig-ong pagpamatuod sa ebanghelyo sa dihang nadawat niya ang iyang mission call sa batan-on pa. Nabunyagan uban sa iyang pamilya sa dihang 10 anyos siya, iyang nasaksihan ang gamhanang paagi nga ang ebanghelyo miusab sa iyang pamilya.

Apan bisan sa iyang pagpangandam sa pagserbisyo og misyon sa Côte d'Ivoire Abidjan Mission, siya walay lig-on nga pagpamatuod sa Basahon ni Mormon. Wala pa gayud siya makabasa niini sukad.

Ang dinasig nga bishop ni Thierry mihagit kaniya sa pagbasa sa Basahon ni Mormon matag adlaw sa dili pa mobiya sa iyang misyon. Gihatagan pa gani niya si Thierry og yawe ngadto sa lokal nga meetinghouse sa simbahan aron makatuon siya nga malinawon.

Si Thierry mibasa matag adlaw sulod sa tulo ka bulan. Sa dihang misulod na siya sa natad sa misyon, wala lamang siya makaangkon og lig-ong pagpamatuod sa Basahon ni Mormon, apan siya usab nakapalambo og mga gawi sa pagtuon nga nakatabang kaniya isip misyonaryo.

“Ang labing mahinungdanong himan nga anaa kita sa pagdala sa katawhan ngadto sa kahayag sa ebanghelyo ug pagpundok sa nagkatibulaag nga Israel mao ang Basahon ni Mormon,” miingon siya.

Si Thierry Kasuangi Mutombo natawo sa Kinshasa, Democratic Republic of Congo, niadtong Enero 31, 1976, ngadto kang Antoine Kasuangi Mutombo ug Marie Therese Matsanga Mutombo. Giminyoan niya si Tshayi Nathalie Sinda sa sibil nga seremonya niadtong Nobyembre 29, 2002. Wala madugay nasilyo sila sa Johannesburg South Africa Temple niadtong Nobyembre 19, 2004. Sila adunay unom ka anak.

Si Elder Mutombo migradwar niadtong 2010 gikan sa University of Cepromad nga adunay degree sa business management ug niadtong 2012 nga adunay bachelor's degree sa human resources management. Mitrabaho siya alang sa Simbahan didto sa Democratic Republic of Congo isip manager sa Family History ug Human Resources Department ug isip supervisor sa Materials Management Department.

Sa panahon sa iyang pagkatawag isip General Authority Seventy, si Elder Mutombo nagserbisyo isip presidente sa Maryland Baltimore Mission. Kaniadto nagserbisyo siya isip presidente sa stake, magtatambag sa kapangulohan sa stake, ward mission leader, magtutudlo sa Sunday School, ug executive stake secretary. ■



Elder Adeyinka A. Ojediran

General Authority Seventy

Ang Abril 2020 nga kinatibuk-ang komperensya maoy “usa ka dili makalimtan nga hinapos sa semana” alang ni Elder Adeyinka A. Ojediran.

Ang kinabig sa Simbahan gipaluyohan isip General Authority Seventy—pinakauna alang sa usa ka Nigerian ug West African nga Santos sa Ulahing mga Adlaw. Ang iyang naghi-ngapin nga pasalamat ug kalipay nadugangan pa sa dihang si Presidente Russell M. Nelson mipahibalo nga ang ikatulo nga templo sa Nigeria pagatukuron diha sa Benin City.

“Wala ko magdahum niana,” miingon si Elder Ojediran, nga mipahiyum pag-ayo. “Ang pagkadungog sa atong propeta nga misulti nga laing templo ang pagatukuron diha sa Nigeria nindot gayud kaayo. Alang kanako, kumpirmasyon kini nga ang buhat sa Ginoo paspas nga naglihok. Kitang tanan adunay daghang buhaton aron maandam ang mga anak sa Dios alang sa Ikaduhang Pag-anhi sa Iyang Anak.”

Natawo sa Ibadan, Nigeria, niadtong Abril 5, 1967, ngadto kang Amos Adeniyi ug Caroline Anike Ojediran, si Adeyinka Ayodeji Ojediran nakadawat og bachelor’s degree sa botany sa University of Ilorin niadtong 1991 diin pagkahuman nakaangkon og master’s of business administration degree gikan sa Ladoko Akintola University of Technology. Misugod siya og panarbaho sa finance ug business administration isip propesyonal nga chartered accountant. Nagtrabaho siya isip business finance manager sa Shell Nigeria sa wala pa ang iyang tawag isip General Authority.

Tulo ka tuig human sa iyang bunyag, iyang nahimamat si Olufunmilayo Omolola Akinbebije sa usa ka sosyal nga kalihokan. Ang duha sa wala madugay misugod sa pagpakig-date, apan ang pagpanarbaho sa lain-laing mga siyudad nagpasabut nga “magka-istorya lang kami pinaagi sa telepono.”

Ang magtiayon sa katapusan naminyo sa Nigeria niadtong 1998 ug nasilyo sa Johannesburg South Africa Temple niadtong Nobyembre 14, 2002. Ang mga Ojediran adunay usa ka anak nga babaye.

Si Elder Ojediran mapasalamaton kaayo sa matag calling sa Simbahan nga iyang nadawat sukad nga mipasakop sa Simbahan niadtong 1990 sa dihang 23 anyos pa siya. Ang matag eklesyastikanhong buluhaton nakatabang kaniya sa pag-uswag ug nakahatag kaniya og sagrado nga mga oportunidad sa pagtabang sa uban nga molambo diha sa ilang tagsa-tagsa ka mga calling ug mga katungdanan.

Si Elder Ojediran, nagserbisyo isip Area Seventy sa panahon sa iyang pagkatawag, nakaserbisyo usab isip magtatambag sa kapangulohan sa misyon, presidente sa stake, magtatambag sa kapangulohan sa stake, bishop, magtatambag sa bishopric, ug presidente sa branch. ■



Elder Ciro Schmeil

General Authority Seventy

Si Elder Ciro Schmeil kanunay nga naningkamot nga magmasulundon sa Ginoo, bisan kon wala siya makasabut sa rason luyo sa usa ka piho nga sugo. “Kon magmasulundon kita, kon mosunod kita sa mga sugo,” iyang nakat-unan, “ang Ginoo kanunay nga mopanalangin kanato.”

Sa pagtuman sa iyang mga calling, iyang nakita ang mga panalangin nga moabut gumikan sa pagkamasulundon. Samtang nagserbisyo isip bishop ug presidente sa stake, aduna siyay daghang bililhon nga mga oportunidad nga “makakita sa mga tawo nga nag-usab sa ilang kinabuhi tungod sa ilang pagpamatuod sa Manluluwas ug sa Basahon ni Mormon.”

Si Elder Schmeil natawo niadtong Abril 16, 1971, sa Ponta Grossa, Paraná, Brazil, ngadto kang Bruno ug Erica Schmeil, pareho nga mga kinabig sa Simbahan. Nagdako siya sa Curitiba, Brazil, ug dungan-dungan sa panahon nga ang iyang mga ginikanan gitawag nga mangulo sa Brazil Campinas Mission, mibiya siya aron moserbisyo sa Utah Ogden mission.

Samtang nag-eskwela sa University of Utah, nahimamat ni Elder Schmeil si Alessandra Machado Louza, usa ka estudyante sa Brigham Young University, sa usa ka debosyonal. “Sa pagkita namo sa unang higayon diha sa debosyonal, hingpit niya akong gibaliwala,” miingon siya. Apan alang kaniya, gugma kini sa unang pagkakita.

Naminyo sila sa São Paulo Brazil Temple niadtong Hulyo 1994 ug mihuman sa ilang pag-eskwela sa Estados Unidos. Mibalik sila ngadto sa Brazil sulod sa 20 ka tuig sa wala pa mobalhin ngadto sa Colorado, USA, ug dayon ngadto sa Florida, USA. Si Elder ug Sister Schmeil mga ginikanan sa duha ka anak.

Si Elder Schmeil nakaangkon og bachelor of arts degree in architectural studies gikan sa University of Utah niadtong 1995 ug executive master of business administration degree gikan sa Ohio University niadtong 2010. Nakatrabaho siya sa Walmart Brasil isip vice president ug director sa real estate development, isip chief operating officer sa Scopel, isip general manager sa Cia City, ug sa labing ulahi isip pangulo sa real estate alang sa JBS S.A.

Si Elder Schmeil nakaserbisyo isip Area Seventy, presidente sa stake, magtatambag sa kapangulohan sa stake, bishop, presidente sa elders quorum, ug presidente sa branch. ■



Elder Moisés Villanueva

General Authority Seventy

Siya 10 anyos pa lang niadtong panahona, apan si Elder Moisés Villanueva wala gayud makalimot sa iyang gibati sa dihang ang mga misyonaryo mitudlo kaniya ug sa iyang pamilya sa ebanghelyo didto sa Oaxaca, Mexico.

“Nakahinumdong ko sa Espiritu nga ilang gibilin, ang kalinau nga akong gibati sa akong kasingkasing,” miingon siya.

Sa dihang si Moisés gibunyagan uban sa upat sa iyang mga igsoon, ang iyang inahan—usa ka single parent nga nagpadako ni Moisés ug sa iyang pito ka igsoon sa lisud nga mga kahintang—mibalik sa pagkaaktibo sa Simbahan.

Wala madugay, samtang ang 18 anyos nga si Moisés nangandam alang sa iyang misyon, ang iyang pamilya mipadayon sa pag-atubang og temporal nga mga hagit. Nagduha-duha siya sa iyang desisyon nga mobiya ug iyang gisultihan ang iyang mama nga gusto niyang magpabilin sa balay aron motabang kaniya.

“Kon gusto gayud nimo nga motabang kanako,” miingon siya, “lakaw ug pagserbisyo sa Ginoo.”

Nagluhod tapad sa iyang higdaanan sa pagtapos sa iyang unang adlaw sa Mexico Hermosillo mission, gibati ni Moisés nga ang Ginoo nahimuot sa iyang desisyon. Iyang gipahinungod sa iyang misyon ang paglambo sa iyang pagpamatuod sa gipahiuli nga ebanghelyo.

“Kini nga Simbahan gipangulohan sa atong Manluluwas nga si Jesukristo,” miingon si Elder Villanueva. “Nakaila Siya sa ngalan sa matag usa kanato. Nasayud Siya sa atong mga panginahanglan, atong mga hagit, ug atong mga kabalaka. Nasayud usab Siya sa atong mga kalig-on ug bisan sa mga tinguha sa atong kasingkasing.”

Si Moisés Villanueva López natawo niadtong Disyembre 13, 1966, sa Oaxaca, Oaxaca, Mexico, ngadto kang Rubén Villanueva Platas ug Delfina López Domínguez. Giminyoan niya si Leticia Ávalos Lozano sa Mexico City Mexico Temple niadtong Hunyo 30, 1995. Sila adunay tulo ka anak.

Si Elder Villanueva nakaangkon og bachelor’s degree in business administration gikan sa Southeast Regional University niadtong 1997 ug master’s degree in innovation for business improvement gikan sa Tecnológico de Monterrey niadtong 2011. Sa labing ulahi nagtrabaho siya isip chief executive officer sa Sertexa, usa ka kompaniya sa transportasyon.

Sa panahon sa iyang pagkatawag, si Elder Villanueva nagserbisyo isip Area Seventy sa Mexico. Nakaserbisyo usab siya isip presidente sa California Arcadia Mission ug isip high councilor, magtatambag sa kapangulohan sa stake, bishop, ug direktor sa public affairs. ■



Steven J. Lund

Kinatibuk-ang Presidente sa Young Men

Isip bag-ong Kinatibuk-ang Presidente sa Young Men, si Steven J. Lund midawat og sagrado nga responsibilidad nga motabang sa paggiya sa gatusan ka libo nga batan-ong mga lalaki nga anaa sa edad sa Aaronic nga Pagkapari sa pangti- buok kalibutan nga Simbahan.

Kon mahimo pa nga personal nga makighimamat sa matag usa kanila, nasayud gayud siya kon unsa ang iyang isulti: “Ang pagkahimong malampuson nga miyembro sa gingharian sa Dios dili komplikado. Ang Langitnong Amahan nahigugma kanimo. Kinahanglan lang nimo nga mobalos sa paghigugma kaniya. Ug kon ato kanang buhaton, kita mahimong luwas ug malipayon. . . . Ang atong mga kinabuhi adunay kahulugan.”

Ang pagseryuso sa Simbahan dili lamang mahitabo sa Dominggo. Usa kini ka oportunidad sa matag adlaw, sumala sa abogado nga nahimong business executive.

“Ang pagbasa sa mga kasulatan, pagsimba, paghinulsol dayon kon matipas kita, pag-abli sa atong mga baba, ug pagkahimong usa ka ehemplo sa ebanghelyo—mao kana ang plano sa atong Langitnong Amahan,” miingon siya.

Si Brother Lund natawo niadtong Oktubre 30, 1953, ngadto kang Jay ug Toy Ellen Lund ug nagdako sa Amihanang California (Santa Rosa) ug sa Habagatang California (Long Beach), USA. Ang iyang pagserbisyo diha sa U.S. Army midala kaniya balik sa Uropa, usa ka kontinente nga nakat-unan niyang higugmaon atol sa iyang pagserbisyo sa Netherlands Amsterdam Mission.

Human sa iyang serbisyo militar, mi-enrol siya sa Brigham Young University, diin nahimamat niya pag-usab si Kalleen Kirk, usa ka batan-ong babaye nga iyang nakaila samtang nadestino sa Germany. Si Steven ug Kalleen sa katapusan nagminyos sa Salt Lake Temple niadtong Agosto 8, 1980. Mga ginikanan sila sa upat ka anak.

Human makaangkon og law degree sa BYU, si Brother Lund mitrabaho isip abogado hangtud nga nahimong presidente ug CEO sa Nu Skin Enterprises. Siya karon ang executive chairman sa board of directors sa kompaniya. Siya usab ang regent sa Utah System of Higher Education.

Si Brother Lund nakaserbisyo isip presidente sa Georgia Atlanta Mission ug isip coordinator sa Provo City Center Temple Dedication Committee. Siya usab nakaserbisyo isip sakop sa general board sa Young Men ug isip Area Seventy. ■



Ahmad S. Corbitt

Unang Magtatambag sa Kinatibuk-ang Kapangulohan sa Young Men

Si Ahmad S. Corbitt, 57, natawo niadtong Agosto 1962 ngadto kang James Earl Corbitt ug Amelia Corbitt. Ang pamilya kabus ug nagpuyo sa mga housing project sa Philadelphia, Pennsylvania, USA, nga gilibutan sa mga krimen ug kagubot sa mga gang. Dili luwas ang pagbiyahe gikan sa kasilinganan ngadto sa laing kasilinganan.

Apan ang espirituhanong mga impresyon sa iyang inahan migiya sa 10 ka anak niini ug mipabilin kanila nga luwas. Nahibalo siya kon kanus-a angay nga magdula ang iyang mga anak sa gawas ug kanus-a sila angay nga magpabilin sa sulod.

Kana nga espirituhanong kasensitibo ang migiya kaniya sa wala madugay sa pagdapit sa mga misyonaryo gikan sa Ang Simbahan ni Jesukristo sa mga Santos sa Ulahing mga Adlaw ngadto sa iyang panimalay. Sa hapit tibuk niyang pagkabata ug pagkabatan-on, si Ahmad ug ang iyang pamilya misimba uban sa Nation of Islam [Nasud sa Islam], ug sa kadugayan nabunyagan siya isip Protestante. Apan karon gibati niya nga gimahal sa lokal nga kongregasyon sa mga Santos sa Ulahing mga Adlaw.

Ang iyang inahan ug pipila ka igsoon nabunyagan pagkasunod bulan. Niadtong Agosto 16, 1980, sa iyang ika-18 nga adlawng natawhan, si Ahmad usab nagpabunyang. Ang iyang ama-ama, si Henry Brandford Campbell, mipasakop sa Simbahan pagkasunod tuig.

“Dili gayud kadto mahitungod kanamo,” miingon siya. “Mahitungod kadto sa Dios ug sa unsay gusto Niya nga among buhaton. Andam kami nga magmapausanon ug bukas. Gigiyahan Niya kami.”

Human mitambong sa Ricks College ug miserbisyo sa Puerto Rico San Juan Mission gikan sa 1982 hangtud 1984, nahimamat niya si Jayne Joslin atol sa usa ka temple trip sa mga young single adult. Ang magtiayon naminyo niadtong Agosto 24, 1985, sa Washington D.C. Temple ug karon ginikanan sa unom ka mga anak.

Sa misunod nga siyam ka tuig, mitrabaho siya sa adlaw ug mieskwela sa gabii, nakaangkon og mga degree gikan sa The Richard Stockton College sa New Jersey ug Rutgers University Law School.

Nakaserbisyo siya isip magtatambag sa kapangulohan sa stake, presidente sa stake, high counselor, ug presidente sa Dominican Republic Santo Domingo East Mission.

Si Brother Corbitt nakatrabaho isip trial lawyer, sa public relations ug isip direktor sa New York Office of Public and International Affairs sa Simbahan. Kasamtangan siya karong nagtrabaho sa Missionary Department sa Simbahan. ■



Bradley R. Wilcox

Ikaduhang Magtatambag sa Kinatibuk-ang Kapangulohan sa Young Men

Samtang miapil sa usa ka komperensya sa kabatan-onan sa California, si Bradley (Brad) R. Wilcox nakahimamat og batan-ong lalaki kinsa dili gusto nga maanaa didto. Gikuyogan niya ang tin-edyer ubos sa malandong nga kahoy, ug sa wala madugay naghigot na sila sa paboritong hilisgutan sa batan-on—skateboarding.

Si Brother Wilcox mihangyo sa batan-on sa pagpakita kaniya og pipila ka lihoc sa skateboarding. Nakadayeg, gidapit niya ang batan-on nga mohimo og demonstrasyon sa skateboarding sa Especially for Youth niana nga ting-init. Ang batan-ong lalaki mibalibad apan sa katapusan miuyon. Sa EFY, nakaangkon siya og kasinatian nga nakapausab sa kinabuhi ug nakaplagan ang iyang pagpamatuod sa ebanghelyo.

“Miadto siya sa EFY tungod sa skateboard, apan mibiya siya isip usa ka misyonaryo,” miingon si Brother Wilcox.

“Akong gigahin ang akong kinabuhi uban sa kabataan ug mga tin-edyer,” miingon si Brother Wilcox, “ug gimahal nako ang kabatan-onan.”

Si Bradley Ray Wilcox natawo sa Provo, Utah, USA, niadtong Disyembre 25, 1959, ngadto kang Ray T. Wilcox ug Val C. Wilcox. Nagdako siya sa Provo gawas sa iyang paggahin og pipila ka tuig sa pagkabata didto sa Ethiopia.

Human miserbisyo og full-time nga misyon sa Chile Viña del Mar Mission, si Brother Wilcox naminyo kang Deborah Gunnell sa Provo Utah Temple niadtong Oktubre 7, 1982. Mga ginikanan sila sa upat ka anak.

Si Brother Wilcox nakadawat sa iyang bachelor’s ug master’s degree gikan sa Brigham Young University ug sa iyang doctorate sa edukasyon gikan sa University of Wyoming. Si Brother Wilcox napasidunggan og pipila ka ganti tungod sa iyang buhat sa edukasyon, migahin og sobra sa 30 ka tuig sa Especially for Youth nga programa sa BYU, ug ganahan nga mahimong usa ka instruktur sa Campus Education Week.

Si Brother Wilcox ug ang iyang pamilya nakapuyo sa New Zealand ug Spain samtang midumala siya og mga study abroad program alang sa BYU. Nakasulat siya og pipila ka mga libro ug karon usa ka propesor sa Department of Ancient Scripture sa BYU.

Si Brother Wilcox nakaserbisyo isip presidente sa Chile Santiago East Mission ug isip usa ka sakop sa general board sa Sunday School, magtatambag sa kapangulohan sa stake, ug bishop sa usa ka ward sa mga young single adult. Sa panahon sa iyang pagkatawag, nagserbisyo siya isip high counselor ug isip presidente sa Young Men sa stake. ■



Halandumon nga mga Higayon sa Komperensya

Sama sa gisaad ni Presidente Russell M. Nelson, kini nga kinatibukang komperensya dili gayud makalimtan sa daghang paagi.¹ Ania ang pipila ka halandumon nga mga higayon sa komperensya.

Bag-o nga Simbolo

Si Presidente Nelson mipahibalo sa usa ka bag-ong simbolo alang sa Simbahan (tan-awa sa pahina 73). Ang simbolo naglakip sa ngalan sa Simbahan nga nasulod sa usa ka rektangulo, nga nagrepresentar sa usa ka bato sa pamag-ang. Ibabaw niana nagbarug ang Christus nga estatuwa ilawom sa usa ka arko, nga nagpahinundom kanato sa Manluluwas ug sa Iyang walay sulod nga lubnganan.

Pamahayag sa Ikaduhang Siglo nga Kasaulogan

Si Presidente Nelson mibasa sa “Ang Pagpahiuli sa Kahingpitan sa Ebanghelyo ni Jesukristo: Usa ka Pamahayag ngadto sa Kalibutan sa Ikaduhang Siglo nga Kasaulogan,” nga nagdapit sa mga tawo bisan asa nga magkat-on nga ang ebanghelyo ni Jesukristo nga gihisgutan diha sa Bag-ong Tugon anaa na usab sa yuta karon. Ang opisyal nga hubad makita

sa sulod sa atubangang hapin niini nga isyu sa 12 ka pinulongan. Ang mga miyembro nga naghulat pa og opisyal nga paghubad makakita og pasiuna nga mga hubad sa pamahayag diha sa pakigpulong ni Presidente Nelson (tan-awa sa pahina 91).

Maligdong nga Katiguman

Usa ka “maligdong nga katiguman” gipahigayon sa Dominggo sa buntag isip kabahin sa ikaduhang siglo nga kasaulogan sa Simbahan sa Unang Panan-awon. Atol niining sagrado nga miting, si Presidente Nelson nangulo sa mga Santos sa Singgit sa Hosanna, usa ka hiniusa nga pagpahayag og pagdayeg nga gigamit sa espesyal nga mga kalihokan sama sa mga pagpahinungod og templo (tan-awa sa pahina 92).

Ikaduha nga Tibuok Kalibutan nga Puasa

Alang sa ikaduhang higayon sulod sa siyam ka adlaw, si Presidente Nelson midapit sa kalibutan sa pagpuasa ug pag-ampo “nga ang kasamtangang pandemic unta makontrolar, ang mga tig-atiman mapanalipdan, ang ekonomiya mapalig-on, ug ang kinabuhi mahimong normal” (pahina 74). Kining ikaduha nga tibuok

kalibutan nga puasa nahitabo niadtong Biyernes Santo, Abril 10, 2020.

Bag-o nga mga Templo

Si Presidente Nelson mipahibalo sa mga plano sa pagtukod og walo ka bag-ong templo sa tibuok kalibutan (tan-awa sa pahina 115). Adunay 168 ka napahinungod na nga templo sa tibuok kalibutan, og 7 niana ang ubos sa pagpabag-o.

Mga Mamumulong gikan sa Kabatan-onan

Ang Sabado sa gabii nga sesyon nagpakita og mga pakigpulong gikan sa duha ka tin-edyer, si Laudy Ruth Kaouk ug Enzo Serge Petelo, kinsa namulong mahitungod sa paagi nga ang pagkapari nagpanalangin sa kabatan-onan (tan-awa sa mga pahina 56 ug 58). Sobra na sa 20 ka tuig sukad ang mga mamumulong gikan sa kabatan-onan gilakip sa kinatibukang komperensya.

Gamhanan nga Musika

Ang mga musika alang sa komperensya girekord nang daan. Ang mga Santos sa tibuok kalibutan mitapos sa komperensya pinaagi sa pagkanta sa “Salamat, O Dios, sa Propeta” uban sa mga choir sa Ghana, New Zealand, Mexico, South Korea, Germany, ug Brazil (tan-awa sa pahina 2). ■

MUBO NGA SULAT

1. Tan-awa sa Russell M. Nelson, “Panapos nga Pakigpulong,” *Liahona*, Nob. 2019, 122.

COVID-19: Mga Mensahe sa Paggiya, Pag-ayo, ug Paglaum

Ang mga miyembro mipamatuod nga nakakita sa impluwensya sa Ginoo bisan niining panahon sa kausaban, kabalaka, ug kadaut.

Mubong sulat sa Editor: Samtang gisugdan ang kinatibuk-ang komperensya niadtong Abril 4, ang mga imahe sa hilum nga Conference Center maoy mga pahinumdom sa pandemic sa atong palibut, apan ang mga mensahe gikan sa atong mga lider nakatutok sa pagkamasaligon ug paglaum. Sa bag-ohay lang nga mga semana, nakadawat kami og susama nga mga istorya sa pagtuo gikan sa mga miyembro sa Simbahan sa tibuok kalibutan. Ang mosunod nga mga pahina naglangkob og mga kinutlo gikan sa pipila sa inyong mga istorya, ingon man usab sa impormasyon mahitungod sa dugang nga mga artikulo diha sa internet. Uban sa Kristohanong kalooy, makapadayon kita sa pagtabang sa usag usa nga maayo gikan sa mga epekto niini nga pandemic.

Uban Siya Kanako Kaniadto; Uban Siya Kanako Karon

Samtang naglingkod ko sa balay nga naningkamot sa pagpakalma sa akong kabalaka sa unsay nahitabo sa kalibutan, pinasulagma nakong giablihan ang akong journal ug nakita ang mosunod: “Adunay daghan kaayong kahadlok nga kauban sa pagbangon matag adlaw niining kalibutan, apan uban sa pagtuo diha sa mga pagtulunan sa ebanghelyo, makauswag kita sa hinay-hinay. . . . Ang pagtuo kanunay nga makabuntog sa kahadlok.”

Nasayud ko nga nakadawat ako niana og gamhanang personal nga pagpadayag ug nga ang Langitnong Amahan mihatag niini kanako pinaagi sa akong kaugalingong mga sinulat sa journal nga nasulat pipila ka tuig na ang milabay. Napanalanginan ko og panahon sa kalinaw ug sa kahibalo nga ang Langitnong Amahan nag-uban kanako kaniadto, ug uban Siya kanako dinhi karon.

Danette Gray, Utah, USA

Ang Espiritu Santo Mahimong Molihok pinaagi sa Internet

Nadasig ko nga magsugod sa paghimo og mga klase sa seminary pinaagi sa mga group video chat. Duha ka adlaw sa wala pa ipaubos sa quarantine ang among siyudad, ang among klase mihimo sa unang leksyon niini pinaagi sa internet.

Pipila sa mga ginikanan miapil usab sa among klase, lakip niadtong dili mga miyembro. Akong gipugngan ang akong mga luha samtang dungan namong gitun-an ang Mosiah kapitulo 2. Kaming tanan mibati sa Espiritu samtang among nakat-unan nga ang pagserbisyo sa uban pagserbisyo usab sa Dios. Daghan ko og nakat-unan mahitungod sa pagdawat ug pag-ila og personal nga pagpadayag. Ang Espiritu Santo mopakita sa kamatuoran sa ebanghelyo sa daghang pamaagi. Bisan pa sa mga panghitabo sa kalibutan, walay makapugong sa buhat sa Langitnong Amahan alang sa kaluwasan sa Iyang mga anak sa pag-uswag.

Marites Pineda, Mindanao, Philippines

Wala Kami Makapalta bisan usa ka Adlaw sa Seminary

Bisan pa sa tanang nahitabo tungod sa coronavirus, malipayon ko nga mosulti nga wala kami makapalta bisan usa ka adlaw sa seminary! Ang pagtudlo sa akong mga klase pinaagi sa video chat mipresentar og pipila ka hagit, apan ganahan ko nga motan-aw sa mga ginikanan ug mga manghud nga maminaw sa among pag-istoryahanay. Ganahan ko nga nakahatag kini og pagbati sa pagkamakanunayon ug buluhaton sa among mga pamilya, ug ilabi na akong ganahan nga makapadayon kami sa pagsaksi ngadto sa usag usa mahitungod ni Jesukristo ug sa Iyang gugma alang kanato.

Mandi Crandell, Yigo, Guam

Pagserbisyo Niadtong anaa sa Duha ka Habig sa Tabil

Nagserbisyo ko isip senior nga sister nga misyonaryo sa Missouri Independence Mission sa dihang gikanselar ang mga miting sa Simbahan ug misugod kami sa paghiklin sa among kaugalingon diha sa among apartment. Gigitmit namo ang among mga telepono ug computer aron makontak ang mga miyembro ug makig-istorya niadtong among gitabangan, kinsa dili kanunay motambong sa simbahan.

Aron dunay mabuhat, nakahukom ko nga motrabaho og family history, bisan og taud-taod na nga naglisud ko sa pagpangita og bag-o nga mga ngalan. Sa akong pag-log in sa FamilySearch, akong nakita ang usa ka pahibalo sa usa ka rekord nga naghulat nga i-attach. Kana nga rekord migiya kanako nga nakakita og mga 70 ka tawo diha sa akong linya. Human sa lima ka adlaw, nahunong ang pagkaplag og bag-ong mga ngalan. Wala madugay nianang adlaw, among nasayran nga i-release kaming tanan aron makapauli. Naguol ko nga mobiya, apan mibati usab ko nga napanalanginan nga nakahimo ko sa pagserbisyo sa pamilya sa pikas



habig sa tabil atol niining malisud nga panahon.

Kim Nielson, Oregon, USA

Paghimo sa Among Bahin aron Mapadayon ang Pag-uswag sa Buhat sa Ginoo

Samtang ang mga misyonaryo sa among dapit gitambagan nga magpabilin sa ilang mga apartment, naningkamot kami sa pagbuhat sa among bahin, midapit og usa ka higala nga magkat-on mahitungod sa Simbahan. Ang mga misyonaryo mipaambit sa ilang mga leksyon pinaagi sa telepono ngadto sa among higala. Among gibati ang kalig-on sa Espiritu sa among panimalay tungod sa teknolohiya nga anaa kanato karon. Nindot kaayo nga makita ang buhat sa Ginoo nga nagpadayon gihapon bisan pa sa tanang mga hagit sa kalibutan.

Elaina Reich, Washington, USA

Ang Manluluwas Nakadungog sa Among Pagkanta

Nagserbisyo ko isip usa ka Church-service missionary sa PathwayConnect nga programa sa Kyiv Ukraine stake. Ang mga lider sa programa nakahukom sa pagbansay kanamong tanan kinsa mangulo sa mga panagpundok sa mga tawo aron makapahigayon kami niini pinaagi sa internet. Pagkasunod gayud nga adlaw, ang gobyerno mipahibalo og pang-quarantine nga mga lagda diha sa Kyiv.

Ganahan ko sa oportunidad nga magkapundok alang sa PathwayConnect. Ug ganahan ko sa oportunidad nga magkapundok aron dungan nga mosimba ug manganta diha sa panimalay ma-Dominggo. Mapasalamaton ko sa kasiguroan nga kon ang duha o tulo magpundok diha sa Iyang ngalan, anaa Siya. Walay usa nga nasayud kon unsa ka dugay kami nga ma-quarantine sa Kyiv, apan nasayud kami nga ang Manluluwas makadungog sa among pagpanganta.

Kateryna Serdyuk, Kyiv, Ukraine

"Panahon na nga Kuhaon og Balik ang Imong Pamilya"

Sa dihang ang balita naghigot mahitungod sa COVID-19, akong



gibati nga nasobrahan ra kini og paulyab. Dayon paglabay sa mga adlaw, misugod ko sa pagbati og kabalaka ug gani nataranta mahitungod sa umaabut sa atong kalibutan.

Usa ka buntag dili ko makabalik sa pagkatulog ug milingkod nga namalandong kon alang sa unsa kining tanan. Dayon miabut ang kalinaw. Ang Espiritu mitudlo kanako nga ang Ginoo mihatag kanako og usa ka gasa. "Panahon na nga kuhaon og balik ang imong pamilya," miingon Siya.

Ang kinabuhi mahimong okupado kaayo. Kini nga pandemic mihatag sa among pamilya sa oportunidad nga matutukan ang unsay importante: ang ebanghelyo ni Jesukristo. Makahimo ako sa pagtabon sa pipila niadtong makadaut nga mga impluwensya sa kalibutan ug tutokan ang pagtudlo sa akong mga anak sa pagtan-aw ngadto kang Kristo. Ang atong Amahan sa

Langit kanunay nga naghunahuna kanato. Labaw ko kana nga gibati karon kay sa kaniadto.

Mary Ostler, Nebraska, USA

Ang Ginoo Miandam Kanato alang Niini

Sa dihang una ko nga gisultihan nga ang mga panagtigum sa Simbahan temporaryong gihunong, medyo naguol ko. Apan karon akong nakita kon sa unsang paagi ang Ginoo miandam kanato alang niini pinaagi sa Iyang mga propeta. Ang pagtuon sa ebanghelyo nga nakasentro sa panimalay makatabang kanato sa malisud nga mga panahon. Mapasalamaton ko nga makaambit gihapon ko sa sakramento ma-Dominggo ug maka-access sa mga pulong sa mga propeta. Makahupay ang masayud nga hangtud makahimo na usab kita sa pagpundok, atong mabati ang sama nga Espiritu.

Emma van As, Gauteng, South Africa

Gitudloan na Kita Unsaon sa Pagsimba

Samtang ang akong bana ug ako miapil sa ordinansa sa sakramento sa among panimalay sa unang higayon, kusganon nakong nabati ang Espiritu nga naglisud ko sa pagkanta sa himno nga among gipili. Sa akong sobra 70 ka tuig nga pagtambong sa atong mga tulumanon sa pagsimba, wala ko kahinumdom nga nagmapasalamaton pag-ayo sa mga panalangin nga among nadawat pinaagi sa among pagka-miyembro ug pag-apil sa Ang Simbahan ni Jesukristo sa mga Santos sa Ulahing mga Adlaw.

Gitudloan na kita unsaon sa pagsimba ug kinsa ang atong simbahon. Oo, mingawon kita nga makig-uban sa atong isig ka mga Santos ug malipay nga mobalik sa "normal" sa labing sayo nga mahimo, apan mapasalamaton ko sa mga leksyon nga kasamtangan natong nakat-unan samtang mosunod kita sa tambag sa propeta diha sa atong "nakasentro sa panimalay, gisuportahan sa Simbahan" nga pagsimba.

Susan Preator, Montana, USA

Pagkaplag og Kalinaw ug Paghiusa

Ang pagpahigayon og home evening maoy usa ka butang nga

gikahinaman nako ug sa akong anak nga lalaki matag semana. Naanad na kami nga adunay mga miyembro, mga higala, ug mga misyonaryo nga mobisita sa among balay kanunay. Dayon grabe nga nausab ang mga butang tungod sa pandemic. Karon mopahigayon na kami og home evening uban sa among mga higala pinaagi sa telepono. Pinaagi niini nga panahon nga magkauban nakahimo kami og daghang butang nga mas nakapasuod kanamo.

Mapasalamaton kaayo ko alang sa atong minahal nga propeta, kinsa midapit kanatong tanan sa pagpuasa. Daghan kanato ang mibati sa gahum sa panaghiusa ug kalinaw pinaagi niana nga kasinatian. Sa mga panahon nga sama niini, ang kalinaw nga atong gikinahanglan moabut gikan sa Manluluwas nga si Jesukristo.

Roshene McKenzie, Kingston, Jamaica

Ang Dios Maoy Nagkontrolar

Nagsugod ko sa akong misyon duha ug tunga ka bulan lang ang milabay. Gi-assign ko nga moserbisyo sa Hermosillo, Mexico. Matag adlaw aduna koy oportunidad nga makahimamat og talagsaong mga tawo kinsa andam nga modawat sa gipahiuli nga ebanghelyo. Gibati nako nga nagsugod pa lang ko sa pagtuman sa akong katuyoan sa dihang ang COVID-19 mibalda sa akong misyon.

Sakit nga biyaan kadtong mga tawo nga gipangga nako pag-ayo, apan mibati usab ako og dakong kalinaw ug kasiguroan tungod kay ako nasayud nga ang Dios nagpabilin nga maoy nagkontrolar. Mapasalamaton ko nga kita adunay propeta ug mga Apostoles nga mogiya kanato niini nga panahon. Sama sa daghang mga misyonaryo sa kalibutan, masaligon ako nga dili kini ang katapusan sa akong misyon. Sa dili madugay makatabang na usab ako sa pagpadayon sa buhat sa Ginoo ug magpadayon sa pagkahimong himan diha sa Iyang mga kamot sa pagdala og daghang mga kalag ngadto sa paghinulsol. ■

Carolina Roman, Puerto Rico

Magpadayon sa Pagsusi diha sa Internet

Pagbasa og dugang nga mga istorya kon sa unsang paagi ang mga miyembro miresponde sa mga epekto sa pandemic diha sa ilang kinabuhi uban sa pagtuo ug paglaum.

Nagkinahanglan og paglaum?

- Pagkat-on kon sa unsang paagi ang mga miyembro sa tibuok kalibutan nakakaplag og paglaum nga ang Dios nagbantay kanato.
- Pagbasa kon sa unsang paagi ang mga miyembro mipadayon sa ubang panahon sa kasaysayan sa Simbahan sa dihang gikanselar ang mga miting sa sakramento.

Nagkinahanglan og tabang?

- Pagkat-on unsaon sa pag-ila sa kaguol diha sa imong kaugalingon ug unsaon sa pagbangutan uban niadtong nagbangutan.
- Pagsusi kon giunsa sa uban sa pagpahaum ang pagsimba diha sa panimalay.

Nagkinahanglan og mga ideya?

- Pagkuha og mga ideya kon sa unsang paagi nga makapadayon ka sa pagpangalagad niining talagsaon nga mga kahimtang.
- Pagkat-on kon sa unsang paagi ang ubang full-time nga mga misyonaryo mipahiangay sa mga kausaban sa ilang mga buluhaton.

Aron sa pagbasa niini nga mga istorya ug dugang pa, bisitaha ang espesyal nga seksyon sa *Liahona*, "COVID-19: Mga Mensahe sa Pagtuo." Pangitaa ang seksyon pinaagi sa pagbisita sa mga magasin diha sa Gospel Library nga app o sa internet diha sa ChurchofJesusChrist.org.

Dugang nga Makatabang nga mga Kapanguhaan alang sa mga Ginikanan

- Ang Mayo nga isyu sa *Higala* naglakip og mga istorya sa mga bata nga nagkat-on ug nagserbisyo.
- Ablihi ang Gospel Living nga app ug ang bag-ong mga isyu sa *New Era* aron makita ang mga istorya mahitungod sa kabatan-onan nga mipadayon uban sa pagtuo ug nakakaplag og talagsaong mga paagi sa pagserbisyo.
- Ang matanggong diha sa mas pig-ot nga puy-anan mahimong lisud. Alang sa mga ideya mahitungod sa pag-ugmad og lig-on nga relasyon sa imong kapikas ug pamilya, susiha kini nga mga artikulo:
 - "Falling Out of Love . . . And Climbing Back In," *Liahona*, Ene. 2005.
 - "Nurturing a Love That Lasts," *Liahona*, Mayo 2000.
 - "Alang sa Kalinaw sa Panimalay," *Liahona*, Mayo 2013.
 - "Labaw nga Makugihon ug Mabuhaton diha sa Panimalay," *Liahona*, Nob. 2009.
 - Subo lang, ang uban tingali moresponde niining makaluya nga panahon pinaagi sa pag-abuso sa uban. Kon ikaw napasakitan, palihug suhira ang mga kapanguhaan diha sa abuse.ChurchofJesusChrist.org ug pangayo og tabang. Kamo adunay katungod nga mahimong luwas ug tahuron.

Pagdiskobre pa og Dugang

- Alang sa labing bag-o nga mga update sa Simbahan mahitungod sa mga epekto sa COVID-19, adto sa ChurchofJesusChrist.org.



Mga Ideya para sa Kalihokan

Adunay daghang mga paagi sa pagtabang sa mga miyembro nga makat-on gikan sa mga mensahe sa kinatibuk-ang komperensya. Aniyap pipila ka mga ehemplo; mahimong aduna kay ubang mga ideya nga mas mohaum sa inyong korum o Relief Society.



- ***Panaghisgot diha sa mga grupo.***

Bahina ang mga miyembro ngadto sa gagmayng mga grupo, ug sanguni ang matag grupo og lain nga seksyon sa mensahe sa komperensya aron basahon ug hisgutan. Dayon hangyoo ang matag grupo sa pagpaambit og kamatuoran nga ilang nakat-unan. O mahimo kang magporma og mga grupo sa mga tawo nga nagtuon og laing mga seksyon ug tuguti sila sa pagpaambit sa usag usa kon unsay ilang nakat-unan.

- ***Tubaga ang mga pangutana.***

Dapita ang mga miyembro sa pagtubag og mga pangutana sama sa mosunod kabahin sa mensahe sa komperensya: Unsa nga mga kamatuoran sa ebanghelyo ang atong makit-an niini nga mensahe? Unsaon nato paggamit niini nga mga kamatuoran? Unsa nga mga pagdapit ug gisaad nga mga panalangin ang gihatag? Unsa ang gitudlo kanato niini nga mensahe mahitungod sa buhat nga gusto sa Dios nga atong buhaton?

- ***Pagpaambit og mga kinutlo.***

Dapita ang mga miyembro sa pagpakigbahin og mga kinutlo gikan sa mensahe sa komperensya nga nakadasig kanila sa pagtuman sa ilang mga responsibilidad sa buhat sa kaluwasan. Awhaga sila sa pagkonsiderar kon unsaon nila sa pagpakigbahin niini nga mga kinutlo aron sa pagpanalangin sa usa ka tawo, lakip na sa mga hinigugma ug sa mga tawo nga ilang gialagaran.

- ***Ipaambit ang usa ka leksyon gamit ang usa ka butang [object lesson].***

Pagdapit daan og pipila ka mga miyembro sa pagdala og mga butang gikan sa balay nga ilang magamit sa pagtudlo bahin sa mensahe sa komperensya. Atol sa miting, pangutan-a ang mga miyembro sa pagpasabut kon unsay kalabutan niadto nga mga butang sa mensahe.

- ***Pag-andam og leksyon nga itudlo sa panimalay.***

Hangyoo ang mga miyembro sa pagtrabaho nga magpares aron magplano og leksyon sa home evening base sa mensahe sa komperensya. Unsaon nato paghimo sa mensahe nga angay para sa atong mga pamilya? Unsaon kaha nato pagpaambit niini nga mensahe ngadto sa mga tawo nga atong gialagaran?

- ***Pagpaambit og mga kasinatian.***

Dungan nga magbasa sa pipila ka mga pamahayag gikan sa mensahe sa komperensya. Hangyoo ang mga miyembro sa pagpakigbahin og mga ehemplo gikan sa mga kasulatan ug gikan sa ilang kaugalingong kinabuhi nga naghulagway o naglig-on sa doktrina nga gitudlo niini nga mga pamahayag.

- ***Magkat-on kabahin og usa ka kasulatan.***

Dapita ang mga miyembro sa pagbasa og kasulatan nga gigamit sa mensahe sa komperensya. Hangyoo sila sa paghisgut kon sa unsang paagi nga ang mga pagtulun-an diha sa mensahe nakatabang kanila nga masabtan ang kasulatan.

- ***Pangita og tubag.***

Sayo pa lang, paghimo og pipila ka mga pangutana nga matubag gamit ang mensahe sa komperensya. Pagtutok sa mga pangutana nga makapahunahuna og maayo o makag-amit sa mga baruganan sa ebanghelyo (tan-awa sa *Pagtudlo Sumala sa Pamaagi sa Manluluwas*, 31–32). Dayon tugoti ang mga miyembro sa pagpili og pangutana ug mangita og mga tubag diha sa mensahe. Dapita sila sa paghisgut sa ilang mga tubag sa gagmay nga mga grupo.

- ***Pangita og hugpong sa mga pulong.***

Dapita ang mga miyembro sa pagpangita sa mensahe sa komperensya, nga mangita sa mga hugpong sa mga pulong nga makahuluganon kanila. Hangyoo sila sa pagpaambit sa mga hugpong sa mga pulong ug unsa ang ilang nakat-unan gikan niini. Sa unsang paagi kini nga mga pagtulun-an makatabang kanato sa paghimo sa buhat sa Ginoo?

- ***Paghimo og usa ka butang.***

Dapita ang mga miyembro sa paghimo og poster o bookmark nga maglakip og mubo nga makapadasig nga pamahayag gikan sa mensahe sa komperensya. Hatagi sila og kahigayunan nga makapakigbahin kon unsa ang ilang gibuhat. ■



Ang Mahinungdanong Luna sa Manluluwas

Si Presidente Russell M. Nelson mipahibalo og bag-ong simbolo aron sa pag-ila sa Ang Simbahan ni Jesukristo sa mga Santos sa Ulahing mga Adlaw (tan-awa sa pahina 73). Ang ilhanan naghatag og gibug-aton sa ngalan ni Jesukristo ug sa Iyang mahinungdanong tahas diha sa tanan nga gibuhat sa Simbahan. Ang ngalan sa Simbahan anaa sa sulod sa usa ka rektanggulo nga porma nga nagrepresentar og usa ka bato sa pamag-ang—nga si Jesukristo mao ang ulohang bato sa pamag-ang diin pagatukuron ang Simbahan (tan-awa sa Mga Taga-Efeso 2:19–21). Diha sa sentro sa simbolo mao ang usa ka representasyon sa marmol nga estatuwa nga hinimo ni Thorvaldsen, nga mao ang Christus. Ang imahe nagpakita sa nabanhaw, buhi nga Ginoo nga nagbarug ubos sa usa ka arko isip pahinumdom sa Iyang pagtungha gikan sa lubnganan tulo ka adlaw human sa Iyang kamatayon.

Sa pagtahud sa sagradong kahimtang sa simbolo sa Simbahan ug pagpreserbar sa legal nga proteksyon, ang opisyal nga simbolo sa Simbahan gamiton lamang kon aprubahan sa Unang Kapangulohan ug sa Korum sa Napulog Duha ka mga Apostoles.



“Alang kaninyo unsay gipasabut nga ang ebanghelyo ni Jesukristo napahiuli sa yuta?” Si Presidente Russell M. Nelson nangutana atol sa ika-190 nga Tinuig nga Kinatibuk-ang Komperensya sa Simbahan.

“Kini nagpasabut nga kamo ug ang inyong pamilya masilyo sa kahangturan! Kini nagpasabut nga tungod kay kamo nabunyagan pinaagi sa tawo nga dunay awtoridad gikan ni Jesukristo ug nakumpirmahan nga miyembro sa Iyang Simbahan, kamo makatagamtam sa kanunay nga pakig-uban sa Espiritu Santo. . . . Kini nagpasabut nga kamo dili biyaan nga wala mahupay o walay magamit nga gahum sa Dios sa pagtabang kaninyo. Kini nagpasabut nga ang gahum sa pagkapari makapanalangin kaninyo sa inyong pagdawat sa importanting mga ordinansa ug paghimo og mga pakigsaad uban sa Dios ug pagtuman niini. Kini nga mga kamatuoran nakahatag og kalig-on sa atong mga kalag, ilabi na niining panahon nga ang unos mapintas.”

